

O LE EKALESIA A IESU KERISO O LE AU PAIA O ASO E GATA AI • ME 2017

OLE Liahona



Saunoaga o le Konafesi Aoao

Ua Fofogaina Mai ia
Malumalu Fou e Lima
Ua Valaaauina Fitugaafulu
Fou e Toaono ma
le Au Peresitene Aoao
o le Aualofa

O LE KERISO SOIFUA

O LE MOLIMAU A LE AU APOSETOLO

O LE EKALESIA A IESU KERISO O LE AU PAIA O ASO E GATA AI

Ao tatou faamanatuina le soifua mai o Iesu Keriso i le lua afe tausaga talu ai, matou te tuuina atu la matou molimau i le moni o Lona soifua lē mafaatusalia ma le aoga e lē gata mai o Lana taulaga togiola sili. E leai lava se isi ua i ai se aafiaiga matua loloto na'uā o i latou uma na soifua ma o le a soifua ai i luga o le fogaeleele.

O Ia o le Ieova Silisili o le Feagaiga Tuai, o le Mesia o le Feagaiga Fou. O Ia o lē na foafoaina le lalolagi, i lalo o le taitaiga a Lona Tama. "Na ia faia mea uma lava; e leai foi se mea e tasi na faia e le i faia e ia" (Ioane 1:3). E ui ina leai se agasala, ae na papatisoina o Ia ina ia faataunu ai le amiotonu uma. Sa "femaliuai o ia ma agalelei" (Galuega 10:38), ae na lē amanaiaina o ia. O Lana talalelei o se savali o le filemu ma le agalelei. Na ia augani mai i tagata uma ina ia mulimuli atu i Lana faataitaiga. Na ia femaliuai i auala o Palesitina, e faamalolo i e mama'i, faapupula i e tauaso, ma faatutu mai e na oti. Na ia aoao atu upumoni o le faavavau, o le tulaga moni sa tatou i ai i le muai olaga, o le faamoemoega o lo tatou ola ai i le fogaeleele, ma le tulaga e mafai ona ausia e atalii ma afafine o le Atua i le olaga a sau.

Na Ia faatuina le faamanatuga e avea ma faamanatu o Lana taulaga togiola sili. Na pue faapagotaina o Ia ma faasalaina i ni tuua'iga sese, na ta'usalaina ina ia faamalie ai le motu o tagata, ma faasalaina i le oti i luga o le satauro i Kalevario. Na Ia tuuina atu Lona soifua e togiola ai agasala a tagata uma. O Lana [taulaga] o se meaalofa sili foaifua mo i latou uma e soifua mai i luga o le fogaeleele.

Matou te ta'utino atu i upu ma le faamaoni a'ia'i, o Lona soifua, lea e totongalemu i le talafaaasolipo o tagata uma, e le'i amataina mai i Peteleema pe faaiuina foi i luga o Kalevario. O Ia o le Ulumatua a le Tama, o le Alo Pele e Toatas i la le tino, o le Faaola ia o le lalolagi.

Na toe tu mai o Ia mai le tuugamau e "avea ma faapolopo o e ua momoe" (1 Korinito 15:20). I Lona tulaga o se Alii Toetu, na Ia asiisi atu ai ia i latou na alofagia e ia i le olaga nei. Na ia asiisi atu foi i isi o Ana "mamoe" (Ioane 10:16) i Amerika anamua. I le lalolagi i nei ona po, na faaali atu ai o Ia

ma Lona Tama i le taulealea o Iosefa Samita, i le amataga o le oo mai o le "sauniga i le faaatoaga o tausaga" (Efeso 1:10).

Na tusia e le Perofeta o Iosefa e faatatau i le Keriso Soifua, "O ona fofoga e pei o le afi mumu; o lauao o lona ao e sinasina e pei o le kiona mama; a e sili le pupula o ona fofoga i lo le pupula o le la; ma o lona siufogaga e pei o le taalili o vai tetele, o le siufogaga lava o Ieova, ua faapea mai:

"O a'u lē muamua ma lē mulimuli; o a'u o lē o loo ola, o a'u o lē na fasiotia; o a'u o lo outou fautua i le Tama. MFF 110:3-4."

Na folafola mai foi e le Perofeta e uiga ia te Ia: "O lenei, ina ua uma ona faia molimau e tele e uiga ia te ia, o le molimau tupito mulimuli lenei i mau uma lava, mā te faia ia te ia: O loo soifua o ia!"

"Aua na mā vaaia o ia, i le itu taumatau lava o le Atua; na mā faalogoina foi le siufogaga o molimau mai o ia lava lea o lē Toatas i na Fanaua e le Tama.


"E mai ia te ia, ma ui mai ia te ia, ma o ia, na foafoaina ai lalolagi uma, o ē nonofo ai foi o atalii ma afafine na fanaua e le Atua." (MFF 76:22-24).

Matou te folafola atu i upu ma le faamaoni a'ia'i, ua toefuatiaina mai i le fogaeleele Lana perisitua ma Lana Ekalesia—"ua atina'e i luga o le faavae o le au apostolo, atoa ma le au perofeta, o le maa tulimanu o Iesu Keriso lava lea" (Efeso 2:20).

Matou te ta'utino atu o le a i ai se aso e toe afio mai ai o Ia i le lalolagi. "Ona faaalia mai ai lea o le pupula o Ieova, e vaaia lava e tagata uma faatasi" (Isaia 40:5). O le a pule o Ia o le Tupu o Tupu ma nofotupu foi o le Alii o Alii, ma o le a tootutuli tulivae uma ma tapua'i laulaufaiva uma ia te Ia. O le a tatou tutu atu taitoatas i ina ia faamasinoina e Ia e tusa ma a tatou galuega ma manaoga o o tatou loto.


Matou te molimau atu, i le avea ai ma Ana Apostolo ua faauuina i le ala e tatau ai—o Iesu o le Keriso Soifua, o le Alo tino ola pea o le Atua. O Ia o le Tupu silisili o Emanuel, o loo afio i le taimi nei i le itu taumatau o Lona Tama. O Ia o le malamala, o le ola, ma le faamoemoega o le lalolagi. Ia faafetai le Atua mo le meaalofa lē mafaatusalia o Lona Alo paia lea.


O LE AU PERESITENE SILI



1 Januari, 2000

O LE KORAMA A LE TOASEFULULUA





Anotusi Me 2017

Voluma 41 • Numera 5

Sauniga Aoao a Tamaitai

- 6 **la Faatuatua i le Alii a e Aua le Faalagolago**
Bonnie H. Cordon
- 9 **O Le Malumalu e Matagofie**
Carol F. McConkie
- 12 **O Fafine Mausali**
Linda K. Burton
- 15 "Ou Te Tuuina Atu la Te Outou Le Manuia"
Peresitene Henry B. Eyring

Sauniga i le Taeao o le Aso Toonai

- 19 **Faapotopotoina o le Aiga o le Atua**
Peresitene Henry B. Eyring
- 23 **O Lona Aao Taiala i Aso Uma**
M. Joseph Brough
- 26 **O Le Fuafuaga Mamalu a lo Tatou Tama**
Elder Weatherford T. Clayton
- 29 **O Lo Tatou Leoleo Mamoe Lelei**
Elder Dale G. Renlund
- 33 **Ta'u Atu i le Atua ma le Le Masalosalo**
Elder Ulisses Soares
- 36 **Tupu Susulu Pea Lava Pea seia oo i le Aso e Atoatoa Ai**
Elder Mark A. Bragg
- 39 **Mauaina o le Mana o lesu Keriso i o Tatou Olaga**
Peresitene Russell M. Nelson

Sauniga i le Afiafi o le Aso Toonai

- 43 **O Le Lagolagoina o Taitai o le Ekalesia**
Peresitene Dieter F. Uchtdorf
- 45 **Lipoti a le Matagaluega Suetusi a le Ekalesia, 2016**
Kevin R. Jergensen
- 45 **Lipoti Faafuainumera, 2016**
Brook P. Hales
- 46 **Avea o se Soo o lo Tatou Alii o lesu Keriso**
Elder Robert D. Hales
- 49 **O Pese e Usuina ma Lē Usuina**
Elder Jeffrey R. Holland
- 52 **Tutu i Luga i Totonu ma Tuuto Atoa Atu**
Elder Gary B. Sabin
- 55 **O Le Gagana o le Talalelei**
Elder Valeri V. Cordón
- 58 **Manumalo i le Lalolagi**
Elder Neil L. Andersen
- 62 **Toefoi Atu ma Mauaina**
Elder M. Russell Ballard

Sauniga Aoao a le Au Perisitua

- 66 **Agalelei, Alofa Mama, ma le Alofa Peresitene Thomas S. Monson**
- 67 **Valaauina i le Galuega**
Elder David A. Bednar
- 75 **Saunia le Ala**
Epikopo Gérald Caussé
- 78 **O Lē Sili ia te Outou**
Peresitene Dieter F. Uchtdorf
- 82 "Savali Faatasi ma A'u"
Peresitene Henry B. Eyring

Sauniga i le Taeao o le Aso Sa

- 86 **O Le Mana o le Tusi a Mamona**
Peresitene Thomas S. Monson
- 87 **O Se Tupulaga e mafai ona Tetee Atu i le Agasala**
Joy D. Jones
- 90 **Aua le Vaavaai Solo, Vaai i Luga!**
Elder Yoon Hwan Choi
- 93 **Tuu Atu i le Agaga Paia e Taitai**
Elder Ronald A. Rasband
- 97 **Soo Se Mea Lava E Fai Mai Ai O la la Te Outou, la Outou Faia**
Elder L. Whitney Clayton
- 100 **O Le Aiga Atua ma le Ata o le Faaolataga**
Elder Dallin H. Oaks
- 104 **O Le Alofa Atoatoa e Faateaeseina ai le Fefe**
Peresitene Dieter F. Uchtdorf

Sauniga i le Afiafi o le Aso Sa

- 108 **O Le Leo o le Lapataiga**
Elder D. Todd Christofferson
- 112 **I Uo ma Tagata Sailili i le Ekalesia**
Elder Joaquin E. Costa
- 114 **Ua Silasila Atu lesu ia te la, ua Alofa Atu ia te la**
Elder S. Mark Palmer
- 117 **E Faapefea ona Fesoasoani le Agaga Paia ia te Oe?**
Elder Gary E. Stevenson
- 121 **O Le Ola e Faavavau Foi Lenei**
Elder C. Scott Grow
- 124 **Ina ia Avea Lo Tatou Malamalamama ma Tagavai mo Atunu**
Elder Benjamín De Hoyos
- 127 **O Faavae o le Faatuatua**
Elder Quentin L. Cook
- 72 **O Au Pulega Aoao ma Taitai Aoao o Le Ekalesia a lesu Keriso o le Au Paia o Aso e Gata Ai**
- 132 **Sa Latou Saunoa Mai ia i Tatou: O Le Avea o le Konafesi ma Vaega o o Tatou Olaga**
- 134 **Faasino Upu o Tala o le Konafesi**
- 135 **Tala Fou o le Ekalesia**



Konafesi Aoao Faaleausaga Lona 187

Afiafi o le Aso Toonai, 25 Mati, 2017, Sauniga Aoao a Tamaitai

Taitai: Bonnie L. Oscarson.

Tatalo amata: Robin Bonham.

Tatalo faaiu: Elizabeth Rose.

Musika na saunia e se aufaipese tuufaatasi a le Aualofa mai le Iunivesite o Polika Iaga; Jean Applonie, faatonu; Linda Margetts, ta okeni: "Le Tupu o Tupu, Afio Mai," *Viiga*, nu. 25, arr. Zabriskie, lolomi. e Holy Sheet Music; "I Feel My Savior's Love," *Children's Songbook*, 74–75, tuuf. Murphy; "Ieova e, ia Tautai Pea i Matou," *Viiga*, nu. 47; "E Alofa Lou Tama Faalelagi ia te Au," *Tusipese a Tamaiti*, 16–17, tuuf. Staheli.

Taeao o le Aso Toonai, 1 Aperila, 2017, Sauniga Aoao

Taitai: Peresitene Dieter F. Uchtdorf.

Tatalo Amata: Elder Kim B. Clark.

Tatalo Faaiu: Elder Jorge F. Zeballos.

Musika na saunia e le Aufaipese a le Tapeneko; Mack Wilberg ma Ryan Murphy, o faatonu; Clay Christiansen ma Richard Elliott, ta okeni: "Ua Tafa Ata," *Viiga*, nu. 1; "Let Zion in Her Beauty Rise," *Hymns*, no. 41, tuuf. Kasen, lolomi. e Jackman; "Fai Mea Tonu," *Viiga*, nu. 148; "Mamalu i le Atua," *Viiga*, nu. 40; "Aoao Mai ia Ou Ui i le Malamalama," *Viiga*, 187, tuuf. Wilberg; "Fiafia, o le Alii o le Tupu!" *Viiga* nu. 38, tuuf. Murphy.

Afiafi o le Aso Toonai, 1 Aperila, 2017, Sauniga Aoao

Taitai: Peresitene Henry B. Eyring.

Tatalo Amata: Elder Von G. Keetch.

Tatalo Faaiu: Elder Hugo Montoya.

Musika na saunia e se aufaipese a se aiga mai siteki i Tremonton, Garland, ma Fielding, Iuta; Jessica Lee Gilbert, faatonu; Bonnie Goodliffe, ta okeni: "Home Can Be a Heaven on Earth," *Hymns*, no. 298, arr. Bastian; pese Suifefilo: "O Le Atua Lo'u Tama," *Viiga*, nu. 184, ma le "How Will They Know?" *Children's Songbook*, 182 – 85, tuuf. Mohlman; ma Gilbert "Tala'i Atu o Iesu," *Viiga*, 168; "A Child's Prayer," *Children's Songbook*, 12–13, tuuf. Perry, lolomi. saunia e Jackman.

Afiafi o le Aso Toonai, 1 Aperila,

2017, Sauniga a le Au Perisitua

Taitai: Peresitene Dieter F. Uchtdorf.

Tatalo Amata: Elder Vern P. Stanfill.

Tatalo Faaiu: Elder Carlos A. Godoy.

Musika na saunia e se aufaipese a talavou nofofua matutua mai siteki i Holladay, ma Murray, Iuta; Brett Taylor, faatonu; Andrew Unsworth, ta okeni: "Rise Up, o Men a le Atua" (Alii), *Hymns*, no. 324, arr. Staheli, lolomi. e Jackman; "Sa Fanau Mauvalalo Iesu," *Viiga*, nu. 110, tuuf. Ripplinger, lolomi. e Jackman; "Faaola o Israaelu," *Viiga*, nu. 5; "Faamoemoe o Israaelu," *Viiga*, no. 161, tuuf. Kasen, lolomi. e Jackman.

Taeao o le Aso Sa, 2 Aperila, 2017, Sauniga Aoao

Taitai: Peresitene Henry B. Eyring.

Tatalo Amata: Neill F. Marriott.

Tatalo Faaiu: Elder Richard J. Maynes.

Musika na saunia e le Aufaipese a le Tapeneko; Mack Wilberg, faatonu; Richard Elliott ma Andrew Unsworth, ta okeni: "Le Au Paia Uunai i Luma," *Viiga*, nu. 44; "Ia Fiafia Tatou," *Viiga*, nu. 3, tuuf. Wilberg; "Love Is Spoken Here," *Children's Songbook*, 190–91, arr. Cardon; "O Mai Fanau a le Alii," *Viiga*, nu. 24; "Fanau ua Leoleo mai le Atua," *Viiga*, nu. 180, tuuf. Wilberg; "I Luga o Mauga," *Viiga*, nu. 4.

Afiafi o le Aso Sa, 2 Aperila, 2017, Sauniga Aoao

Taitai: Peresitene Dieter F. Uchtdorf.

Tatalo Amata: Elder Eduardo Gavarret.

Tatalo Faaiu: Elder Marcos A. Aidukaitis.

Musika na saunia e le Aufaipese a le Tapeneko; Mack Wilberg ma Ryan Murphy, o faatonu; Linda Margetts ma Bonnie Goodliffe, ta okeni: "Come, Rejoice," *Hymns*, no. 9, tuuf. Murphy; "Faapaia Mai Au," *Viiga*, nu. 70, tuuf. Staheli, lolomi. e Jackman; "The Iron Rod," *Hymns*, no. 274; "Tausi Poloaiga," *Viiga*, nu. 186; "Le Faavae Malosi," *Viiga*, nu. 45, tuuf. Wilberg.

E Maua Saunoaga o le Konafesi

Ina ia maua saunoaga o konafesi aoao i luga o le Initoneti i le tele o gagana, asiasi i le conference.lds.org ma filifili se gagana. O loo maua foi lauga i luga o le polokalama feaveai o le Gospel Library. E masani lava ona maua lipine faalogologo ma vitio i le gagana Pertenia i faletusi autu, i totonus o le ono vaiaso e sosoo ma le konafesi. O loo maua faamatalaga e uiga i le konafesi aoao i mamanu e mafai ona faaaogaina e tagata o le ekalesia e i ai manaoga faapitoa i le disability.lds.org.

Savali a Faiaoga o Aiga ma Faiaoga Asiasi

Mo savali a faiaoga o aiga ma faiaoga asiasi, faamolemole ia filifili se lauga e aupito sili ona fetau lelei ma tulaga o loo manaomia e i latou tou te asia

I Le Faavaa

Luma: Ata na pueina e Mason Coberly.

Tua: Ata na pueina e Christina Smith.

Ata Pue o le Konafesi

Ata Pue o le Konafesi i le Aai o Sate Leki sa pueina e Cody Bell, Janae Bingham, Mason Coberly, Randy Collier, Weston Colton, Ashlee Larsen, Leslie Nilsson, ma Christina Smith.



ME 2017 VOL. 41 NU. 5
O LE LIAHONA 14445 890

O Le Lomiga Faamaonia Faa-Samoa a le Ekalesia
 a Iesu Keriso o le Au Paia o Aso e Gata Ai

Susuga a le Au Peresitene Sili: Thomas S. Monson,
 Henry B. Eyring, Dieter F. Uchtdorf

O Le Koroma a Apostolo e Toasefululu:

Russell M. Nelson, Dallin H. Oaks, M. Russell Ballard,
 Robert D. Hales, Jeffrey R. Holland, David A. Bednar,
 Quentin L. Cook, D. Todd Christofferson, Neil L. Andersen,
 Ronald A. Rasband, Gary E. Stevenson, Dale G. Renlund

Faatonu: Joseph W. Sitati

Assistant Editors: Randall K. Bennett, Carol F. McConkie

Fautua: Brian K. Ashton, Jean B. Bingham, LeGrand R.
 Curtis Jr., Christoffel Golden, Douglas D. Holmes, Erich W.
 Kopischke, Larry R. Lawrence, Carole M. Stephens

Pule Faatonusili: Richard I. Heaton

Faatonusili o Mekasini a le Ekalesia: Allan R. Loyborg

Pule o Mea Tau Pisinisi: Garff Cannon

Pule Faatonutonu: Adam C. Olson

Pule Faatonutonu Lagolago: Ryan Carr

Lagolago o Lomiga: Cremilda Amaral

Au Tuisutu ma Faatonutonu: Maryssy Dennis, David
 Dickson, David A. Edwards, Matthew D. Flitton, Lori Fuller,
 Garrett H. Garff, LaRene Porter Gaunt, Jon Ryan Jensen,
 Charlotte Larcabal, Michael R. Morris, Eric B. Murdock,
 Sally Johnson Odekirk, Joshua J. Perkey, Jan Pinborough,
 Richard M. Romney, Mindy Anne Selu, Marissa Widdison

Pule Faatonusili o Faatufugaga: J. Scott Knudsen

Faatonusili Tuisiata: Tadd R. Peterson

Au Mamunu: Jeanette Andrews, Fay P. Andrus, C. Kimball
 Bott, Thomas Child, David Green, Colleen Hinckley, Eric P.
 Johnsen, Susan Lofgren, Scott M. Mooy, Mark W. Robison,
 Rachel Smith, Brad Teare, K. Nicole Walkenhorst

Faatonu o le Puletaofia ma Fatufatuga:

Collette Nebeker Aune

Pule i le Gaosiga: Jane Ann Peters

Au Gaosi: Glen Adair, Connie Bowthorpe Bridge, Julie
 Burdett, Thomas G. Cronin, Bryan W. Gygi, Ginny J. Nilson,
 Derek Richardson

Tailolomi: Joshua Dennis, Ammon Harris

Faatonusili Lolomiga: Steven T. Lewis

Faatonusili o le Tuafatufaga: Troy K. Vellinga

Mo le okaina o mekasini, alu i le store.lds.org po o le
 Faletusi Tutotonu i Pesega. Telefoni 64127. Totogi o le
 Mekasini: \$0.55 (Samoa) ī le kopī. Totogi mo le Tausaga
 Atoa \$6.60 (Samoa).

**Auina atu tusitisiga ma faafesili i luga o le
 initoneti** i le Liahona.lids.org: pe meli mai i le Liahona,
 Rm. 2420, 50 E. North Temple, Salt Lake City, UT 84150-
 0024, USA; po o le i-melli: liahona@ldschurch.org.

O Le Liahona (o lona uiiga i le Tusi a Mamona o le "tapasa"
 po o se "faatonutonu") e lomia i le faa-Alepania, Aminia
 (Sasae), Pisilama, Palekeria, Kemputopia, Sepuanu, Saina,
 Kalaoia, Siekiolovakia, Tenimaka, Take, Igilisi, Esitonia,
 Fiti, Finelani, Farani, Siamani, Eleni, Hanikeri, Initu, Iselani,
 Iritonesia, Italia, Japani, Kiripati, Korea, Latvia, Litunia,
 Malakasa, Masela, Monokolia, Nouei, Polani, Potukale,
 Romania, Rusia, Samoa, Saina (ua faafaofoieina), Silovenia,
 Sipanioli, Suetenia, Swahili, Tagaloa, Tahiti, Tai, Toga,
 Iukureini, Urutu, ma Viatename. (E eseese lava gagana.)

© 2017 Puletaofia and the Intellectual Reserve, Inc. Ua taofia
 aia tatau uma. Lomia i le lunaite Setete o Amerika.

Faamatala o le Puletaofia: Vagana ua faailoa atu, e
 mafai e tagata taitoatas i ona kopina anomea mai le Liahona
 mo lo latou faaaogaina patino, ma le salii tipe (e aofia ai
 mo valaauga o le Ekalesia). O lenei aia tatau e mafai ona
 faaleaoagaina i suo se taimi. O anomea o mea fatino e le
 mafai ona kopina pe afai o o loo faailoa mai se faasa i le
 laina o loo i ai ma le faatufugaga. O fesili mo le Puletaofia
 e tatau ona faatusati mai i le Intellectual Property Office,
 50 E., North Temple St., FL 13, Salt Lake City, UT 84150,
 USA; email: cor-intellectualproperty@ldschurch.org.

For Readers in the United States and Canada:

May 2017 Vol. 41 No. 5. O LE LIAHONA (USPS 311)
 Samoan (ISSN 1045-0947) is published monthly by The
 Church of Jesus Christ of Latter-day Saints, 50 East North
 Temple, Salt Lake City, UT 84150 USA subscription price
 is \$10.00 per year; Canada, \$12.00 plus applicable taxes.
 Periodicals Postage Paid at Salt Lake City, Utah. Sixty days'
 notice required for change of address. Include address label
 from a recent issue; old and new address *must* be included.
 Send USA and Canadian subscriptions to Salt Lake
 Distribution Center at address below. Subscription help
 line: 1-800-537-5971. Credit card orders (Visa, MasterCard,
 American Express) may be taken by phone. (Canada Post
 Information: Publication Agreement #40017431)

POSTMASTER: Send all UAA to CFS (see DMM 507.1.5.2).

NONPOSTAL AND MILITARY FACILITIES: Send address
 changes to Distribution Services, Church Magazines,
 P.O. Box 26368, Salt Lake City, UT 84126-0368, USA.



Failauga i le Faasologa

Faaalafapeta

Andersen, Neil L., 58
 Ballard, M. Russell, 62
 Bednar, David A., 67
 Bragg, Mark A., 36
 Brough, M. Joseph, 23
 Burton, Linda K., 12
 Caussé, Gérald, 75
 Choi, Yoon Hwan, 90
 Christofferson, D. Todd, 108
 Clayton, L. Whitney, 97
 Clayton, Weatherford T., 26
 Cook, Quentin L., 115
 Cordon, Bonnie H., 6
 Cordón, Valeri V., 55
 Costa, Joaquin E., 112
 De Hoyos, Benjamín, 124
 Eyring, Henry B., 15, 19, 82
 Grow, C. Scott, 121
 Hales, Brook P., 45
 Hales, Robert D., 46
 Holland, Jeffrey R., 49
 Jergensen, Kevin R., 45
 Jones, Joy D., 87
 McConkie, Carol F., 9
 Monson, Thomas S., 66, 86
 Nelson, Russell M., 39
 Oaks, Dallin H., 100
 Palmer, S. Mark, 114
 Rasband, Ronald A., 93
 Renlund, Dale G., 29
 Sabin, Gary B., 52
 Soares, Ulisses, 33
 Stevenson, Gary E., 117
 Uchtdorf, Dieter F., 43, 78, 104

Faasino Autu

Agaalofa, 29
 Agaga Paia, 9, 15, 19, 36, 39,
 87, 93, 100, 117, 115
 Agalelei, 29, 66
 Agavaa, 67, 93, 117, 121
 Aiga, 19, 36, 55, 62, 87
 Aiga Atua, 93, 100, 117
 Alofa, 29, 36, 46, 49, 66,
 104, 108, 114
 Alofa Mama, 15, 46, 66
 Aoao atu, 87, 124
 Auauna atu, 6, 15, 75, 78, 82
 Autalavou, 19, 23, 75
 Avea ma Soo, 12, 39, 46, 49,
 52, 58, 78, 87
 Faalealolagi, 58
 Faamagaloga, 29
 Faamalologa, 29
 Faamanatuga, 9, 15, 75, 124
 Faamoemoe, 104
 Faataitaiga, 55, 121
 Faatoagaina Mai, 15
 Faatuatua, 33, 39, 46, 49, 90,
 97, 115
 Faatuatuaina, 6, 33, 97
 Faigata, 29, 33, 39, 46, 49,
 52, 90, 97, 104, 115
 Faitalia, 26
 Feagaiga, 9, 12, 39, 52, 58,
 62, 87
 Fefe, 104
 Filemu, 58
 Foaooga, 26, 100
 Fuafuaga o le faaolataga, 19,
 26, 52, 62, 100, 104
 Galuega faafafeatalai, 67,
 90, 114
 Galuega faaemalumalu, 19,
 36, 90, 124
 Gaoioiga o le Ekalesia, 36
 Iesu Keriso, 6, 9, 12, 19, 23,
 26, 29, 33, 36, 39, 46, 49,
 58, 62, 66, 82, 90, 93, 97,
 100, 104, 108, 114, 121,
 124, 115



Mea na Faamamafa mai mai le Konafesi Aoao Faaletausaga Lona 187

le tai ono masina tatou te faapotopoto ai e faalogo i le afioga a le Atua e ala mai i perofeta soifua ma taitai musuia o le Ekalesia. E faiatau miliona i le lalolagi atoa e faapotopoto faatasi mai i aiga po o i totonus o falesa, i taimi eseese o itulagi ma gagana, e faaaogaina ia televisione e eseese le tetelē [e maimoa ai].

Ae o le konafesi aoao e sili atu nai lo se mea na tupu. O se aafiaga e mafai ona tumau mo se taimi umi tatou te mananaao ai. O le konafesi o se mea tatou te suesue, aoao mai, ma ola ai.

Ina ia fesoasoani ia te oe i ou aafiaga o le konafesi, matou te taumafai e pueina le agaga o le konafesi i lenei lomiga i le tai ono masina. Pe e te manao e suesue i le konafesi i le lolomiina, i le Initoneti, po o i luga o telefoni feaveai, matou te faamoemoe o se vaieli o le a e toe foi soo i ai.

la Viia Oe, Le Atua

Itulau 86: Ina ia faamalolosia a tatou molimau i le Faaola ma Lana talalelei, sa aioi mai Peresitene Thomas S. Monson ia i tatou “ia suesue ma mafaufau loloto i le Tusi a Mamona i aso taitasi.”

Itulau 66: Sa ia valaau atu foi i alii ina ia iloilo o latou olaga ma “mulimuli i le faataitaiga a le Faaola e ala i le agalelei, alofa, ma agaalofa.”

Malumalu Fou ua Fofogaina Mai

Itulau 86: Na fofogaina mai e Peresitene Monson ni malumalu fou se lima ina ia fauina i eria o Brasilia, Pasila; Manila lautele, Filipaina; Nairobi, Kenya; Pocatello, Idaho, ISA; ma Saratoga Springs, Iuta, ISA. (Tagai i le itulau e 141 mo nisi faamatalaga.)

Lagolagoina o Taitai Fou

Itulau 43: I le Aso Toonai, 1 o Aperila, sa fofogaina mai ai e le Au Peresitene Sili le faamaloloina o le Au Peresitene Aoao o le Aualofa: Linda K. Burton, Carole M. Stephens, ma Linda S. Reeves.

Itulau 135: Aoao atili e uiga i le valaauna o taitai aoao fou e 10 o le Ekalesia, e aofia ai le Au Peresitene o le Aualofa.

Folafolaga na Toe Taua

I totonus o le faavaa: Sa toe faasino nisi o failauga i le “O Le Keriso Soifua” ma le “O Le Aiga: O Se Folafolaga i le Lalolagi” (tagai i itulau 26, 36, 39, 62 ma le 100). E mafai ona e mauaina nei pepa taua i totonus o faavaa o lenei lomiga. ■





Sister Bonnie H. Cordon

Fesoasoani Lua i le Au Peresitene Aoao o le Peraimeri

Ia Faatuatua i le Alii a e Aua le Faalagolago

E mafai ona taulai atu o tatou olaga i le Faaola e ala i le iloaina o la, ma o le a la taitaia o tatou ala.

Ao o'u malaga atu i Asia, sa agai mai ia te a'u se uso pele. Sa opoina a'u i ona lima ma fesili mai, "E te talitonu moni lava o le talalelei moni lenei?" Uso pele, ou te iloa e moni. Ou te faatuatua i le Alii.

I le Faataoto 3:5–6, tatou te faitau ai i lenei fautuaga:

"Ia e faatuatua ia Ieova ma lou loto atoa; a e aua le faalagolago i lou lava atamai."

"Ia e manatua o ia i ou ala uma, ona faatonuina ai lea e ia lava ou ala."

O lenei mau e sau ma ni apoapoaiga se lua, se lapataiga, ma se folafolaga matagofie. O apoapoaiga e lua: "Ia e faatuatua ia Ieova ma lou loto atoa" ma "ia e manatua o ia i ou ala uma." O le lapataiga: "A e aua le faalagolago i lou lava atamai." Ma le folafolaga matagofie: "Ona faatonuina ai lea e ia lava ou ala."

Tatou talanoa muamua i le lapataiga. Ua tuuina mai e le ata vaia le tele o mea e mafaufau loloto i ai. O le lapataiga e sau i le faaupuga "aua le faalagolago"—"aua le faalagolago i lou lava atamai." I le faaPeretania o le upu *faalagolago* e i ai se uiga o le lilifa atu faaletino po o le masii i se isi itu. A tatou faalagolago *faaletino* i se

tasi itu po o se isi, tatou te o ese mai le ogatotonu, ua tatou le paleni, ma tatou pauuese. A tatou faalagolago *faale-agaga* i lo tatou lava atamai, ua tatou le faalagolago atu i lo tatou Faaola. A tatou faalagolago atu, ua tatou le i ai i le totonugalemu; ua tatou le paleni; ua tatou le taulai atu ia Keriso.

Uso e, manatua, i lo tatou muai olaga, sa tatou tutu faatasi ma le Faaola.

Sa tatou faatuatua ia te Ia. Sa faaleoina atu lo tatou lagolago, naunautaiga, ma le olioli mo le fuafuaga o le fafia na tuuina mai e lo tatou Tama Faalelagi. Tatou te lei faalagolago ese atu. Sa tatou tau ma a tatou molimau ma "tatou tutu faatasi ma 'au a le Atua, ona manumalo ai lea."¹ O lenei taua i le va o le lelei ma le leaga ua oo mai i le lalolagi. Ua tatou toe maua foi le tiutetauave paia e tutu atu ai o se molimau ma tuu atu lo tatou faalagolago i le Alii.

E tatau ona tatou fesili ifo taitoatasii: E faapefea ona ou tumau i le ogatotonu ma *aua le faalagolago* i lo'u lava atamai? E faapefea ona ou iloa ma mulimuli i le siufogoa o le Faaola pe afai ua matua malolosi lava leo o le lalolagi? E faapefea ona ou atinaeina le faalagolago i le Faaola?

Sei ou fautuaina atu ni auala se tolu e faateleina ai lo tatou malamalama i le [faalagolago] ma faalagolago ai i le Faaola. O le a e iloaina e le fou nei mataupu faavae, ae e mausali. O loo usuina i soo se Peraimeri, ta'uia i lesona a Tamaitai Talavou, ma o ni tali i fesili a le toatele o le Aualofa. O ni mataupu faavae tutotonu—ae le o faalagolago [i nisi meal].

Muamua, e mafai ona tatou iloa le Alii ma faalagolago ia te Ia pe a tatou "taumamafa fafia i afioga a Keriso; aua faauta, o afioga a Keriso o le a tau mai ai ia te outou mea uma e tatau ona outou faia."²





I nai masina ua tea sa faia la matou suesuega o tusitusiga paia faaleaiga. Sa nofo le atalii a la'u tama tama i luga o o'u vae a o matou faitau. Sa ou fiafia i le avea ai ma se tina matua, ma matua fiafia i le asiiasi mai o le aiga o si a'u tama.

I le mavae ai o la matou suesuega o tusitusiga paia, sa tapuni la'u tusi. Sa iloa e le atalii a la'u tama o le a vave ae oo mai le taimi e moe ai. Sa ia tilotilo mai i luga ma mata naunautai lanumouana ma fai mai se upumoni e faavavau: "Su'e nisi mau, Nana."

Na lapatai a'u e la'u tama, o se mātua lelei ma faomoemoeina, "Tinā aua e te vaivai ai. O loo ia taumafai e aloese mai le alu e moe."

Peitai ina ua talosaga mai le atalii o la'u tama mo nisi mau, sa matou toe faitauina nisi mau! O le tele o mau e faamalamalamaina ai o tatou mafaufau, fafaga o tatou agaga, tali a tatou fesili, faateleina lo tatou faalagolago i le Alii, ma fesoasoani e faataulai o tatou olaga ia te Ia. "Manatua ia suesue i ai ma le filiga, ina ia mafai ona outou manuia ai."³

Lua, e mafai ona tatou iloaina le Alii ma faalagolago ia te Ia e ala i le tatalo.

O se faamanuiaga le mafai ona tatalo i lo tatou Atua! "Tatalo atu i le Tama ma le malosi atoa o le loto."⁴

E i ai so'u manatuaga matagofie e uiga i se tatalo e pele ia te a'u. Mo se tasi o a'u malologa o le taumafanafana mai le kolisi, sa ou talia ai se galuega i Texas. E tatau ona ou tietie atu i le fia selau maila mai Idaho i Texas i la'u taavale tuai, o se taavale na ou faaigoaina ma le alofa ia Vern. Na tumu saisai Vern e oo i le taualuga, ma ua ou sauni mo se faigamalaga fou.

I lo'u agai atu i fafo mai le faitotoa, sa ou opoina si o'u tina pele ma sa ia fai mai, "Sei fai se ta tatalo ae e te lei alu."

Sa ma tootutuli ma amata ona tatalo lo'u tina. Sa ia aioi atu i le Tama Faalelagi mo lo'u saogalemu. Sa ia tatalo mo la'u taavale e leai se ea malulu, aioi atu ia lelei le taavale. Sa ia talosaga mo agelu ia faatasi ma a'u i le taumafanafana atoa. Sa ia tatalo ma tatalo ma tatalo.

O le filemu lea na aumai e lena tatalo na ou maua ai le lototele e faatuatua i le Alii ae aua le faalagolago i lo'u lava atamai. Na taialaina lo'u ala

e le Alii i le tele o faaiuga sa ou faia i lena taumafanafana.

Ao tatou faia se mausa o le o atu i le Tama Faalelagi i le tatalo, o le a tatou iloaina le Faaola. O le a tatou faalagolago ia te Ia. O le a avea atili o tatou manaoga faapei o Ona [manaoga]. O le a mafai ona tatou mauaina mo i tatou lava faapea ma isi faamanuiaga ua sauni le Tama Faalelagi e tuuina mai pe a tatou ole atu i le faatuatua.⁵

Tolu, e mafai ona tatou iloaina le Alii ma faalagolago ia te Ia pe a tatou auauna atu i isi. Ou te faasoa atu le tala lenei i se faatagaga mai ia Amy Wright, lea na oo ina iloaina le mataupu faavae o le auaunaga e oo lava i le lotolotoi o se gasegase matautia ma lamatia ai le soifua. Na tusia e Amy:

"I le aso 29 Oketopa, 2015, na ou iloa ai ua ou maua i le kanesa. O lo'u kanesa ua 17 pasene le tulaga o le faasaoina mai ai. Sa lei i ai i se tulaga lelei. Na ou iloa o le a ou tauivi ma le luitau sili o lo'u olaga. Sa ou naunau e tauivi i le mea e gata ai lo'u malosi e le gata mo a'u lava ia ae, na sili ona taua, mo lo'u aiga. O Tesema, na amata



ai o'u togaftiga. Sa ou masani i le tele o aafiaiga o vailau mo le kanesa, ae ou te lei iloa na mafai ona ola pea se tagata ua ma'i tigaina.

"I se tasi taimi, sa ou ta'uua le togaftiga o le kimo o se soliga lea o le aia tatau o tagata. Sa ou ta'uina i lo'u toalua ua ou lelavā. Ua ou faamaamulu! Ou te le toe alu i le falema'i. I lona atamai, sa faalogo ma le onosai la'u pele ona tali mai lea, "Ia, lona uiga la e tatau ona matou sailia se tasi e auaua atu i ai."

E a? Na ia misia ea le faamatalaga ua maua lona toalua i le kanesa ma ua lelavā tatali se isi ma'i oso pe toe tasi lava se taimi o le tiga matuitui?

Sa faaaaua pea Amy: "Sa faateteleina lo'u ma'i ma oo ai i le tulaga e tasi pe lua ni o'u aso 'lelei' i le masina [lea] e mafai ai ona ou ola ma manava e pei o se tagata ola. O aso faapena na mafai ai e lo matou aiga ona saili ni auala e auaua atu ai."

O se tasi o na aso, na seti ai e le aiga o Amy se konaseti laitiitii i le falemai ma tufatufa atu ni taga kimo i isi tagata mama'i, o taga ua faatumulia i mea e faafafia ai ma fesoasoani e tuuititia ai äüga o le ma'i. A le mafai e Amy ona moe, ona ia mafaufau lea i ni auala e faafafia ai se aso o se isi tagata. O nisi auala e tetele, ae o le tele lava o ni tamai faamatalaga po o ni savali feaveai o le faamalosiauga ma le alofa. O na po pe afai ua matuitui tele lona tiga e moe ai, na te taoto i le moega ma lana iPad ma saili ni sauniga o loo manao-mia ona faamaeaina mo ona tuaa ua maliliu. Na faaititia le tiga i se tulaga faavavega, ma sa mafai ona ia onosaia.

"O le auaua," na molimau mai ai Amy, "na faasaoina ai lo'u ola. O le mea na iu ina ou maua ai lo'u malosi e faaaaua ai pea i luma, o le fiafia lea sa ou mauaina i le taumafai e tuuititia mafatiaga o i latou o siomiaina a'u.

Sa ou tulimatai atu i a matou galuega faatino ma le olioli tele ma le naunau-taiga. E oo mai lava i lenei aso e foliga mai e pei o se faamatalaga ese feteenai. Atonu e te mafaufau faapea o se tagata sa poo le ulu, onā, ma tauivi mo [lona] ola sa fetuutuunai i le mafaufau faapea 'o le taimi nei ua nao au lava mea uma.' Peitai, ina ua ou mafaufau e uiga ia te a'u lava ia, lo'u tulaga, o'u mafatiaga ma tiga, na amata ona matua pogisa ma faanoanoa le lalolagi. Ae ina ua liliu atu lo'u taulaiga i isi, sa i ai le malamalam, faamoemoe, malosi, lototele, ma le olioli. Ou te iloa e mafai lenei mea ona o le mana lagolago, faamalolo, ma le gafatia o le Togiola a Iesu Keriso."

Na oo ina faalagolago Amy i le Alii ina ua ia iloaina o Ia. Ana faapea sa ia faalagolago laitiiti lava i lona lava atamai, atonu e teena le manatu e na te auaua atu. O le auaua atu na mafai ai ona ia tatalia lona tiga ma mafatiaga ma ola ai

i lenei mau: "Pe a outou auauna atu i o outou uso a tagata, ua nao lo outou auauna atu lava lea i lo outou Atua."⁶

O Iesu Keriso na manumalo i le lalolagi. Ma ona o Ia, ona o Lana Togiola le iu, ua tofu maua ai e i tatou uma se mafuaaga e faalagolago ai, ia iloa ai o le a iu ina lelei mea uma.

Uso e, e mafai e i tatou taitoatasina ona faatuatua i le Alii a e *aua le faalagolago [sese]*. E mafai ona faatutotonu o tatou olaga i le Faaola e ala i le iloaina o Ia, ma o le a Ia taitaia o tatou ala.

Ua tatou i ai i le lalolagi e faataitaina lena lava faalagolago e tasi ia te *Ia* lea e faatagaina i tatou e tutu faatasi ma Iesu Keriso ma folafola atu, "O A'u lenei, auina atu a'u."⁷

O'u uso pele, na molimau mai Peresitene Thomas S. Monson "e le mafuataina o tatou faamanuiaga folafolaina. E ui ina fofou mai afa, e ui ina to mai uaga i o tatou luga, ae o lo tatou malamalama i le talalelei ma lo tatou alolofa i lo tatou Tama Faalelagi ma lo tatou Faaola, o le a faamafanafanaina ma lagolagoina i tatou . . . pe a tatou savavali sa'o. . . . O le a leai se mea o lenei lalolagi e mafai ona manumalo ia i tatou."⁸

E faaopoopo atu la'u molimau i le molimau a lo tatou perofeta pele. Afai tatou te [faalagolago] i lo tatou Tama Faalelagi ma i lo tatou Faaola a e aua le faalagolago i lo tatou lava atamai, o le a La taitaia o tatou ala ma o le a faalautele mai le aao o le alofa muti-mutivale ia i tatou. I le suafa, o Iesu Keriso, amene. ■

Faamatalaga: O le aso 1 Aperila, 2017, na faamalolo ai Sister Cordon o se Fesoasoani Luga i le Au Peresitene Aoao o le Peraimeri ma valaauina ai o se Fesoasoani Muamua fi le Au Peresitene Aoao o le Peraimeri.

FAAMATALAGA

1. Gordon B. Hinckley, "Ua Tafa Ata o se Aso Matagofie," *Liahona*, Me 2004, 81.
2. 2 Nifae 32:3.
3. Mosaea 1:7.
4. Moronae 7:48.
5. Tagai Tatala i Tusitusiga Paia, "Tatalo," scriptures.lds.org.
6. Mosaea 2:17.
7. Aperaamo 3:27.
8. Thomas S. Monson, "Ia Avea ma Tagata Sili e Mafai ona Avea ai Oe," *Liahona*, Me 2009, 92.



Saunia e Carol F. McConkie

Fesoasoani Muamua i le Au Peresitene o Tamaitai Talavou

○ Le Malumalu e Matagofie

Ua saunia e lo tatou Tama oi le Lagi mea uma e manaomia mo i tatou ina ia tatou paia e pei o la.

Ao o'u sauni mo lenei sauniga, na liliu atu lo'u loto i le toatele o uso faamaoni o e na ou feiloi i ai, latalata ma mamao. Mo a'u, ua sili ona faamatalaina i latou i se salamo o le faafetai a le Tupu o Tavita: "Ia outou avatua ia Ieova le viiga o lona suafa; ia outou avatu taulaga, ma outou o atu i ona luma, ia outou ifo atu ia Ieova i le malumalu e matagofie."¹

Ua ou vaai i le malumalu e matagofie i uso o e taulai atu o latou loto i mea lelei uma, o e fia avea faapei o le

Faaola. Latou te ofo atu lo latou agaga, loto, mafaufau, manatu, ma le malosi atoa i le Alii i le auala o latou ola ai i aso uma.² O le paia o loo i ai i le tau-mafai ma le tauivi ina ia tausia poloaiga ma faamamalu i feagaiga sa tatou osia ma le Atua. O le paia o le faia o filifiliga o le a avea ai pea le Agaga Paia ma o tatou taiala.³ O le paia o le tuuese lea o tatou faanaunauga natura ma ia avea ma se tagata paia e ala i le togiola a Keriso le Alii.⁴ O taimi uma lava o [tatou] olaga e tatau ona paia i le Alii.⁵





Na poloaiina e le Atua o le lagi le fanauga a Israaelu, “Aua o A’u o Ieova lo outou Atua; ia faapaiaina outou e outou, ma ia paia outou; aua e paia lava a’u; aua lava nei leaga outou.”⁶

Na aoao mai e Elder D. Todd Christofferson: “O lo tatou Tama Faalelagi o se Atua o ni faamoemoega maukuluga. . . . Ua la apoapoi mai ina ia faapaiaina i tatou ia mafai ai ona tatou ‘nonofo i se mamalu selesitila’ (MF&F 88:22) ma ‘nonofo ai i lona afioaga’ (Mose 6:57).”⁷ Ua faamalamalama mai e le *Lectures on Faith*, “E leai se tagata e mafai ona fiafia i lona mamalu e aunoa ma le mauaina o lona atoatoaga ma le paia.”⁸ E silafia i tatou e lo tatou Tama o i le Lagi. E alofa o Ia ia i tatou, ma ua Ia saunia mea e manaomia mo i tatou uma ina ia tatou paia e pei o Ia.

O i tatou o afafine o le Tama Faalelagi, ma ua tofu i tatou ma se talatuu faalelagi o le paia. Ua folafola mai e lo tatou Tama o i le Lagi, “Faauta, o A’u o le Atua; o le Tagata Paia o lo’u Igoa lea.”⁹ I le muai olaga, sa tatou alolofa i lo tatou Tama ma ifo ia te Ia. Tatou te mananao ia pei o Ia. Ona o le alofa atoatoa faatamā, na Ia auina mai ai Lona Alo Pele, o Iesu Keriso, e avea ma o tatou Faaola ma Togiola. O Ia o le Atalii o le Tagata e Paia.¹⁰ O Lona “suafa e Paia,”¹¹ “o le Paia e Toatasī o Israaelu.”¹²

O lo tatou faamoemoe mo le paia ua faatotonugalemu ia Keriso, i Lona alofa

mutimutivale ma Lona alofa tunoa. O le faatuatua ia Iesu Keriso ma Lana Togiola, e mafai ai ona tatou mamā, aunoa ma se ila, pe a tatou faafiti i tatou lava mai mea e le faaleatua¹³ ma salamo faamaoni. E papatisoina i tatou i le vai mo le faamagaloga o agasala. E faapaiaina o tatou agaga pe a tatou maua le Agaga Paia ma loto matala. O vайасо тaitasi, tatou te aai ma feinu ai i le sauniga o le faamanatuga. I le agaga o le salamo, ma manaoga faamaoni mo le amiotonu, tatou te osifeagaiga ai ua tatou malilie e tauave i o tatou luga le suafa o Keriso, manatua pea o Ia, ma tausi Ana poloaiiga ina ia tatou maua pea Lona Agaga e faatasi ma i tatou. Mulimuli ane, ao tatou taumafai e le aunoa ina ia tasi ma le Tama, le Alo, ma le Agaga Paia, o le a tofusia i tatou ma se vaega o lo latou natura paia.¹⁴

O Le Paia o le Tausia Lea o a Tatou Feagaiga

Ua tatou iloaina le anoanoai o tofotofoga, faaososoga, ma faigata lea e mafai ona tosoesea i tatou mai mea uma e mama ma tauleleia i luma o le Atua. Peitai ua ofo mai e o tatou aafiafa faaletino le avanoa e filifili ai le paia. E masani lava o osigataulaga tatou te faia e tausia ai a tatou feagaiga lea e faamainai ai i tatou ma faapaiaina.

Sa ou vaiai le paia i foliga o Evangeline, o se teineitiiti e 13 tausaga

i Kana. O se tasi o auala na te tausia ai ana feagaiga, o le faalautele lea o lona valaauga o se peresitene o le vasega Ofagapi. Sa ia faamatala mai ma le lotomaualalo lona alu i fale o ana uo, tamaitai talavou ua le o toe toaaga mai, e talosaga atu i o latou matua e faataga i latou e o mai i le lotu. Sa tau atu e matua ia te ia e faigata tele ona o Aso Sa e tatau ona faia e fanau feau o le aiga. O lea e alu ai Evangeline ma fesoasoani i feau, ma o ana taumafaiga e masani ona faataga ai ana uo e o mai i le lotu.

Afai o le a tatou tausia feagaiga fesootai, o le a suia, faapaia, ma saunia i tatou e sauniga paia o le perisitue e ulu atu i le afioaga o le Alii.¹⁵ O lea tatou te tauave ai avega a le tasi ma le isi; tatou te faamalosia le tasi ma le isi. Tatou te faatumauina le faamagaloga o agasala pe a tatou tuuina atu le toomaga faaleagaga ma faaletino i e matitiva, e fia ‘aai, e lē lavalava, ma e mama’i.¹⁶ Tatou te tausia i tatou mai le pisia mai le lalolagi pe a tatou tausia le aso Sapati ma talia ma le agavaa le faamanatuga i le aso paia o le Alii.¹⁷

Tatou te faamanuiaina o tatou aiga ma faia o tatou fale e avea ma nofoaga paia. Tatou te pulea o tatou tuinanau ina ia faatumuina i tatou i le alofa mama ma tumau.¹⁸ Tatou te aapa atu i isi i le agalelei, ma le agaalofa, ma tutu o ni molimau o le Atua. E avea i tatou ma nuu o Siona, e tasi le lotu ma le mafaufau, o se nuu e mama o e na nonofo faatasi i le lotogatasi ma le amiotonu.¹⁹ Aua e ao ina faateleina Siona i le matagofie, ma i le paia.²⁰

Uso e, o mai i le malumalu. Afai o le a avea i tatou ma se nuu paia ua saunia e talia le Faaola i Lona afio mai, e tatau ona tatou tutulai ae ma oofu o tatou ofu matagofie.²¹ O le malosi ma le mamalu, tatou te lafoai auala o le lalolagi ma tausi a tatou feagaiga ina ia “faaoofuina i [tatou] i le mamā, ioe, i le ofu talaloa lava o le amiotonu.”²²

O Le Paia o le Avea Lea o le Agaga Paia ma o Tatou Taiala

O le paia o se meaalofa a le Agaga. Tatou te taliaina lenei meaalofa pe a tatou filifili e faia na mea o le a

faateleina ai le mana faapaiana o le Agaga Paia i o tatou olaga.

Ina ua talaina e Maretia Iesu Keriso i lona pale, sa ia lagoinaina se manaoga sili ia auauna atu i le Alii i le mea e gata ai lona malosi. O lona uso, o Maria, na filifili e saofai "i vae o Iesu" ma faalogo i Ana fetalaiga. Ina ua tiga Maretia i le auauna atu e aunoa ma se fesoasoani, sa muimui o ia, "Le Alii e, e te le manatu mai ea, ina ua tuu mai e lo'u uso ia te au e sauni toatas?"

Ou te fiafia i upu aoai sili ona agamalu e mafai ona ou mafaufauina. Faatasi ai ma le alofa atoatoa ma le agaalofa e le uma, na apoapoi atu ai le Faaola:

"Maretia e, Maretia e, ua e popole ma ua pupu lou loto i mea e tele:

"A o le mea lava e tasi e ao ina ia maua: ua filifilia foi e Maria lea mea lelei, e le aveeseina ia te ia."²³

Uso e, ina ia mafai ona tatou paia, e ao ona tatou aoao ia saofafai i vae o le Paia e Toatas o Israuelu ma tuu atu le taimi ia faapaiaina ai. O tatou tuuiseina le telefoni, lisi e le muta o mea e fai, ma popolega faalelalolagi? O le tatalo, suesue, ma le usiusitai i le afioga a le Atua e valaaulia ai Lona alofa faamainma ma faamalolo e oo mai i totonu o o tatou agaga. Sei o tatou faaaluina se taimi e faapaia ai, ina ia faatumuina i tatou i Lona Agaga paia ma le



faapaiaina. O le avea ai o le Agaga Paia ma o tatou taiala, o le a tatou saunia e talia le Faaola i le matagofie o le paia.²⁴

O Le Paia o le Avea lea ma se Tagata Paia e ala i le Togiola a Iesu Keriso

E tusa ai ma upu musuia a le Tupu a Peniamina, o i latou o avea ma tagata paia e ala i le Togiola a Iesu Keriso o i latou ia e usiusitai, agamalu, lotomaualalo, onosai, ma tumu i le alofa.²⁵ Na ia valoia o Iesu Keriso, "le Alii Mamana Aoao o lē nofotupu, o lē sa i ai, ma o loo i ai mai le faavavau atoa e oo i le

faavavau atoa, ma o le a mau o ia i se pale apitaga omea." Na Ia afio mai e faamanua i e mama'i, pipili, tutuli, ma e tauaso ma faatutuina mai ē ua oti. Ma sa Ia mafatia "e sili atu i lo le mea e mafai e le tagata ona onosaia, vagana ai ua oti."²⁶ Ma e ui ua na o Ia e toatas e ala mai ai le olataga, sa ulagia o Ia, sauaina, ma faasatauroina. Peitai na toetu mai le Alo o le Atua mai le tuugamau ina ia mafai e i tatou ona manumalo uma i le oti. O Ia lea o le a tulai e faamasino le lalolagi i le amiontonu. O Ia lea o le Paia e Toatas o Israuelu. O Iesu Keriso o le matagofie o le paia.

Ina ua faalogo le nuu o le Tupu o Peniamina i ana upu, sa latou pauu i le eleele, sa matua faamaualalaloina i latou ma migao mo le alofa tunoa ma le mamalu o lo tatou Atua. Sa latou iloaina lo latou tulaga faaletino. O tatou vaai atu ea i lo tatou faalagolago atoa atu i le alofa tunoa ma le alofa mutimutivale o Keriso lo tatou Alii? O tatou iloaina ea o soo se meaalofa lelei lava, e faaletino ma faaleagaga, e oo mai ia i tatou e ala mai ia Keriso? O tatou manatuaina ea e tusa ai ma le fuafuaga e faavavau a le Tama, o le filemu i le lalolagi ma mamalu o le faavavau e a tatou ia ma ua na o Lona Alo paia e ala mai ai.

Ia tatou auai faatasi ma le nuu o le Tupu o Peniamina ma alalaga leotetele i le leo e tasi, "E, ia alofa mutimutivale



ina ia mafai ona tatou paia, e ao ona tatou aoao, e pei o Maria, ia saofafai i vae o le Paia e Toatas o Israuelu ma tuu atu le taimi ia faapaiaina ai.

mai ia, ma faaaoga le toto togiola o Keriso ina ia mafai ai ona matou maua le faamagaloga o a matou agasala, ma mafai ona faamamāina o matou loto; ona ua matou talitonu ia Iesu Keriso, le Alo o le Atua, o lē na foaoaina le lagi ma le fogaeleele, ma mea uma lava.”²⁷

Ou te molimau atu a o tatou o atu i le Paia e Toatasi o Isaraelu, o le a afio ifo i o tatou luga Lona Agaga, ina ia faatumuina i tatou i le olioli ma maua le faamagaloga o agasala ma le filemu o le mafaufau.

Ua tuuina mai e le Atua ia i tatou taitoatas i le gafatia ina ia paia ai. Tau ina ia tatou faia le mea sili e tausia ai a tatou feagaiga ma avea le Agaga Paia ma o tatou taiala. O le faatuatua ia Iesu Keriso, tatou te avea ai ma tagata paia e ala i Lana Togiola, ina ia tatou maua le tino ola pea ma le ola e faavavau ma avatu le viiga i le Atua lo tatou Tama i Lona suafa. Tau ina ia avea pea o tatou olaga o se taulaga paia, ina ia tatou tutu atu i luma o le Alii i le matagofie o le paia. I le suafa paia o Iesu Keriso, amene. ■

FAAMATALAGA

1. Nofoaiga a Tupu 16:29.
2. Tagai Matapu Faavae ma Feagaiga 20:31-34.
3. Tagai Mataupu Faavae ma Feagaiga 45:57.
4. Mosaea 3:19.
5. Brigham Young, “Remarks,” *Deseret News*, Apr. 2, 1862, 313; tagai foi James E. Faust, “Tutu i Mea Pea,” *Liahona*, Me 2005, 62.
6. Levitiko 11:44.
7. D. Todd Christofferson, “Ou Te Aoai Atu ma Sasa ia i Latou Uma Ou te Alofa I Ai” *Liahona*, Me 2011, 97.
8. *Lectures on Faith* (1985), 77.
9. Mose 7:35.
10. Tagai Mose 6:57.
11. Tagai Isaia 57:15.
12. Tagai 1 Nifae 22:21, 24, 26, 28.
13. Tagai Moronae 10:32-33.
14. Tagai i le 2 Peteru 1:4.
15. Tagai Mataupu Faavae ma Feagaiga 84:20.
16. Tagai i le Mosaea 4:26.
17. Tagai Mataupu Faavae ma Feagaiga 59:9.
18. Tagai Alema 38:12.
19. Tagai Mose 7:18-19.
20. Mataupu Faavae ma Feagaiga 82:14.
21. Tagai 2 Nifae 8:24.
22. 2 Nifae 9:14.
23. Tagai Luka 10:38-42.
24. Tagai Mataupu Faavae ma Feagaiga 45:57-59.
25. Tagai Mosaea 3:19.
26. Mosaea 3:5, 7.
27. Mosaea 4:2.



Saunia e Linda K. Burton
Peresitene Aoao o le Aualofa

○ Fafine Mausali

O fafine mausali o ni soo e taulai atu i le Faaola o lesu Keriso ma e i ai le faamoemoe e ala i le folafolaga o Lana taulaga Togiola.

O u uso e pele, e maeu lo matou alolofa ia te outou ma faafetai atu mo lo outou tali mai ma le agamalu ma le naunautai i le valaaulia a le Au Peresitene Sili ma le taumafaiga o le #SaFaiA'umaTagataEse. Faamolemole ia tatalo pea, faalogo i musumusuga a le Agaga, ma faatino ia uunaiga e te maua.

Pe ou te femalagaa'i i le lotoifale po o le lalolagi atoa, o se mea masani mo se tasi le fesili mai, “E te manatuaina a'u?” Ona ou te matua le atoatoa lava, e tatau ona ou tautino atu e tele ina ou le manatuaina ni igoa. Peitai, ou te manatu le alofa tonu ma le moni ua faatagaina a'u e le Tama Faalelagi ia lagonaina a o ou feiloai atu i Ona afafine ma atalii faapelepele.

Talu ai nei sa ou maua ai le avanoa e asiiasi atu ai i nisi o tamaitai pele o loo i le falepuipui. A o matou faamavae ai ma le lotomomomo, sa aioi mai le tasi tamaitai pele, “Sister Burton, faamolemole au ne'i faagaloina i matou.” Ou te faamoemoe o le a ia lagonaina faatasi ma isi o loo mananao ina ia manatuaina, lena mea a o ou faasoa atua ni nai manatu ia te outou.

O Tamaitai Faapitoa i Aso o le Faaola: Faatutotunu i le Faaola o lesu Keriso

O o tatou uso i soo se vaitausaga na faaalia le mamanu faamaoni o le avea

ma soo lea foi tatou te taumafai i ai. “O loo aofia i le Feagaiga Fou ni tala o tamaitai [faapitoa] ua iloa ma lemailoa, o e na faatinoina le faatuatua ia Iesu Keriso [ma i Lana Togiola], sa aoao ma ola i Ana aoaoga, ma molimau e uiga i Lana galuega, vasega, ma le mamalu. O nei tamaitai na avea ma ni soo ua fai ma faataitaiga atoa ai ma molimau taua i le galuega o le faaolataga.”¹

Mafaufau i tala nei i le tusi a Luka. Muamua, i le taimi o le galuega a le Faaola:

“Mulimuli ane . . . ua faataamilo [Iesu] i aai ma faoa aai, ua talai ma folafola le tala lelei o le malo o le Atua; ua faatasi foi ma ia le toasefulu ma le toalua,

“Atoa ma nisi *fafine faapitoa*, . . . o Maria ua ta'ua o le Makatala, . . . ma Ioana . . . , ma Susana atoa ma isi fafine e toatele, e na auauna atu ia te ia.”²

Na sosoo ai ma Lona Toetu:

“[Ma o] nisi *fafine faapitoa* . . . sa i le tuugamau i le tafa o ata;

“. . . [Ina ua] lei iloa e i latou lona tino, a ua latou o atu, ma faapea atu, . . . ua iloa e i latou agelu na faaali mai, e na fai mai ua soifua o ia.”³

Ua ou faitauina ma pasia faafia muamua le faamatalaga e foliga mai e le ofoofogia “fafine mausali” ae talu ai nei a o ou mafaufau loloto ma le faaeteete



atili lava, o na upu sa foliga mai e oso ese mai le itulau. Mafaufau i nei upu uiga tutusa ma le upu *mausali* e pei ona fesootai atu i *fafine mausali* faatua-tua: "faatalitonuina," "lelei," "to'afimalie," "mautu," "maoti," "faamautinoaina," ma le "faatuuatuaina."⁴

A o ou mafaufau loloto i na faamataga mamana, sa ou manatuaina le toalua o na *fafine mausali* o le Feagai-ga Fou o e na tuuina atua ni molimau lelei, to'afimalie, mautu, ma faamautinoaina e uiga i le Faaola. E ui e pei foi i laua o i tatou, o ni *fafine* e le atoatoa, ae o le la moilmau e musuia.

Manatua le *fafine* e lemailoa le igoa i le vaieli sa valaauliaina isi e o mai ma vaai i le mea sa ia aoaoina e uiga i le Faaola? Sa ia tuuina atu lana molimau *mausali* i se ituaiga o fesili: "Pe le o le Keriso ea lea?"⁵ O lana molimau ma le valaaulia sa matua faatauanau lea na "toatele . . . [ai] e na faatuatua ia te ia."⁶

I le mavae ai o le maliu o lona tuagane, o Lasalo, o Maret, le soo pele ma le uo a le Alii, na tautino mai ma se

lagona sa ono matua ootia lava, "Le Alii e, ana e iinei, po ua le oti lo'u tuagane." Mafaufau i lona *mausali* a o faia pea lana saunoaga, "Ae ui lava i lea, *ua ou iloa*, o mea uma e te faatoga atu ai i le Atua, e foaiina mai e le Atua ia te oe." Sa ia toe molimau mai, "Ua ou talitonu lava, o oe le Keriso, le Alo o le Atua, o lē maliu mai i le lalolagi."⁷

Ua tatou aoao mai nei uso o *fafine mausali* o ni soo e taulai atu i le Faaola o Iesu Keriso ma e i ai le faamoemoe e ala i le folafolaga o Lana taulaga Togiola.

O Fafine Tausi-Feagaiga Mausali o le Toefuataiga: Loto e Ositaulaga

I aso anamua, na ositaulaga *fafine mausali* a o latou molimau atu ma ola i aoaoga a Iesu. Sa faia e *fafine mausali* lea mea e tasi i le popofou o le Toefuataiga. O Drusilla Hendricks ma lona aiga o se tasi o i latou na, a o avea ma tagata fou liliu mai, na mafatia i taimi o sauaga o le Au Paia i le Itumalo o Clay Misuri. Sa pipili ai lava lona toalua i le taimi o le Taua o le Vaitafe o Crooked.

Sa tuua ai o ia e tausi [lona toalua] faapea ai ma le tausiga o lona aiga.

"I se tasi taimi patino o le faanoanoa, ina ua leai se meaai a le aiga, sa ia manatua na ta'u atu e se leo ia te ia, 'Onosai, aua o le a tausi mai le Alii.'"

Ina ua manaomiaina lona atalii e ofofua atu mo le Autau a Mamona [mo le malo], i le taimi muamua sa tetee i ai Drusilla ma tauivi ai i le tatalo ma le Tama Faalelagi seia oo "ina peiseai o se leo na faapea atu ia te ia, 'E te le manao ea i le mamalu aupito sili ona mau-luga?' Sa vave ona tali atu, 'Ioe,' ma sa toe faapea mai le leo, 'E faapefea la ona e manatu e te mauaina e aunoa ma le faia o ni osigataulaga silisili?"⁸

Ua tatou aoao mai lenei *fafine mausali* o le tausiga o feagaiga e manaomia ai lo tatou naunautaiga e ositaulaga.

O Fafine Mausali o Aso Nei: Manatuaina ma le Sauniaina e Faamanatu Lona Toe Afio Mai

Sa ou ta'ua ia *fafine mausali* i taimi o le Faaola atoao ai ma le popofou o aso o le Toefuataiga o le talalelei, ae

faapefea ia faataitaiga o le avea ma sooo ma molimau o *fafine mausali* i o tatou aso?

I so'u tofiga talu ai nei i Asia, sa toe musuia ai foi a'u e le tele o *fafine mausali* na ou feiloiat atu i ai. Sa patino lava le faagaeetiaina o a'u i tagata o uluai tupulaga na auai i le ekalesia i Initia, Meleisia, ma Imitonesia, o loo tauiv i ola i le aganuu o le talalelei i o latou lava aiga, o nisi taimi e faia ni osigataulaga tetele ona e tele lava ina feteenai le ola i le talalelei ma aganuu faaleaiga ma faaleatunu. O augatupulaga e tele o *fafine mausali* sa ou feiloiat i ai i Hong Kong ma Taiuani o loo faaauau pea ona faamanuiaina ai olaga o o latou aiga, tagata o le Ekalesia, ma nuu e ala i le faatumauina o le taulai atu i le Faaola ma le ositaulagaina ma le loto i ai e tausi ia feagaiga. O loo i ai foi ni *fafine mausali* faapena i le Ekalesia atoa.

O se *fafine mausali* ua faamanuiaina ai lo'u olaga mo le tele o tausaga, ua silia ma le 15 tausaga o tauivi pea ma le faama'i faigata o le gagase o le tino, ma le faateleina o le vaivai ua ta'ua o le Inclusion Body Myositis. E ui ua noatia i lana nofoa faataavalevale, ae o loo tauivi pea o ia ia lotofaafetai ma tausisi i lana "Lisi o Mea e Mafai": o se lisi o mea e *mafai* ona ia faia, e pei o le mafai ona ou manava, e mafai ona ou [ai ma inu], e mafai ona ou tatalo,

ma e mafai ona ou lagonaina le alofa o lo'u Faaola. Na te tuu atu lana molimau *mausali* e taulai atu ia Keriso e toetoe lava o aso uma i aiga ma uo.

Talu ai nei sa ou faalogo ai i le tala a Jenny. O ia o se faifeautalai ua maea le misiona, ae na tete'a ona matua a o i ai o ia i lana misiona. Sa ia faamatalaina le mafaufau atu i le toefoi atu i le aiga "na matuai fefe ai lava o [ia]." Peitai i le faa-iuga o lana misiona i Italia, ao ia malolo ai i le fale o le misiona i lona agai atu i le aiga i le Iunaite Setete, sa auauna atu ma le alofa ia te ia se *fafine mausali*, o le faletua o le peresitene o le misiona, i le na o le seluina o lona lauulu.

I ni tausaga mulimuli ane, o se isi *fafine mausali*, o Terry—o se peresitene o le Aualofa a le Siteki ma o se soo o Iesu Keriso—na faamanuiaina le olaga o Jenny ina ua valaauina Jenny o se peresitene o le Aualofa a le uarota. I lena taimi, sa galue ai Jenny e tusi faauma lana pepa o sailiiliga mo lana faailoga faafomai. Sa le gata na auauna atu Terry o se faufautua ia Jenny o se taitai, ae sa ia nofo foi faatasi ma ia mo le 10 itula i le falemai ina ua maua Jenny i le faamai matautia o le lukimia. Sa asiati atu Terry i le falemai ma ave ia Jenny e vaai ana fomai. Sa tautino mai Jenny, "Ou te manatu atonu sa ou faasuati faatele i totonus o lana taavale."

E ui lava i lona gasegase, ae sa faaauau pea ona auauna atu ma le



Jenny (ogatotonu), o loo auauna atu o se peresitene o le Aualofa a le uarota e ui o loo maua i le lukimia, faatasi ai ma uso o lana pulega.

lototoa Jenny i le avea ai ma peresitene o le Aualofa a le uarota. E oo lava i ona tulaga sili ona faigata, sa ia valaauiliaina uso ia o atu e vaai o ia. Sa ia lafo atu ni kata ma ni tusi i tagata, ma alofa atu i ona uso mai se mea mamao. Ina ua talosagaina e lana uarota se atapue o lana au peresitene mo le talafaasolopito o le latou uarota, o le ata lenei sa latou maua. Ona o Jenny o ia lava o se *fafine mausali*, sa ia valaaulia ai tagata uma ia tauave faatasi avega a isi, e aofia ai lana lava ia avega.

I le avea ai ma se *fafine mausali* sa molimau mai Jenny: "E le gata ua tatou i ai iinei e laveai isi ae ia laveai foi i tatou lava. Ma o lena faaolataga e sau mai le faigapaaga ma Iesu Keriso; mai le malamalamia i Lona alofa tunoa ma Lana Togiola ma Ona lagona o le alofa mo tamaitai o le Ekalesia. E tupu lena mea e ala i mea faigofie e pei o le seluina o le lauao o se isi tagata, auina atu o se tusi o loo i ai se savali faafaaaliga musuia, ma manino o le faamoemoe ma le alofa tunoa, po o le faatagaina foi o tamaitai e auauna mai ia i tatou."⁹

Uso e, pe a oo ina faalavelaveina i tatou, masalosalo, faalotovaivaia, agasala, faanoanoa, po o le lofituina o le agaga, tau ina ia tatou taliaina le valaaulia a le Alii ia feinu i Lana vai ola e pei ona faia e le *fafine mausali* i le vaieli, ma valaaulia isi e faia lea mea e tasi a o tatou tuuina atu a tatou molimau *mausali*: "Pe le o le Keriso ea lenei?"

Pe a foliga mai ua le talafeagai le olaga, e pei ona sa foliga ai ia Maretia i le maliu o lona tuagane—pe a tatou oo i le lototiga ma le tuuatoatasi, i le mafai ona fanauina o fanau, maliliu o e pele, o avanoa ua ma'umau pe ua misia mo se faaipoipoga ma le faia o se aiga, aiga malepelepe, faanoanoaga mamafatu, faamai faaletino ma faalemafaufau, lofituina i le atuatuvala, popole, vaisu, faigata o mea tautupe, po o le anoanoai o isi avanoa—tau ina ia tatou manatuina Maretia ma tautino atu la tatou molimau *mausali* talitutusa: "Ae ua ou iloa . . . [ma] ua ou talitonu lava, o oe le Keriso le Alo o le Atua."

Tau ina ia tatou manatuaina le toatele o *fafine mausali* o e na mumusu e tuulafoai i lo tatou Faaola pele i taimi o aafiaga tiga matuitui na Ia mafatia ai i luga o le satauro ma i itula mulimuli ane na faamanuaina ai e avea ma se tasi o molimau *mausali* o Lona Toetu mamalu. Ia maua lava i tatou o tumau le latalata ia te Ia i le tatalo ma le suesueina o tusitusiga paia. Ia tatou faalatalata atu i tatou lava ia te Ia e ala i le sauniaina mo, ma le taumamafa i faatusa paia o Lana taulaga togiola i vasio taitasi i le taimi o le sauniga o le faamanatuga ma pe a tatou tausia feagaiga e ala i le auaua atu i isi i o latou taimi o mafatiaga. Masalo atonu tatou te fia avea ma vaega o *fafine mausali*, o soo o Iesu Keriso, o e o le a faamanatuina Lona toe foi mai ma le mamalu pe a toe afio mai o Ia.

Uso e, ou te molimau atu i Matua Faalelagi agaalofa; i lo tatou Faaola, o Iesu Keriso; ma Lana Togiola le mafuatia mo i tatou. Ou te iloa na muai faauuina le Perofeta o Iosefa Samita e avea ma perofeta o le Toefuataiga. Ou te iloa o le Tusi a Mamona e moni ma sa faaliliuina e le mana o le Atua. Ua faamanuaina i tatou i se perofeta soifua i o tatou lava aso, o Peresitene Thomas S. Monson. O nei upumoni ua ou *mausali ai!* I le suafa, o Iesu Keriso, amene. ■

Faaaliga: Sa faamaloloina mai Sister Burton o se Peresitene Aoao o le Aualofa i le aso 1 Aperila, 2017.

FAAMATALAGA

1. *O Afafine i Lo'u Malo: O Le Talafaasolopito ma le Galuega a le Aualofa* (2011), 3.
2. Luka 18:1–3; faaopoopo le faamamafa.
3. Luka 24:22–23; faaopoopo le faamamafa.
4. I le FaaPeretania, o le upu *certain* e i ai sona uiga lona lua o "se filifiliga o" po o se "eseesega o." Ae o le uiga o le faamatumino, to'a, ma le faamaoni lea e sili ona ou manao ia faamamafaina i le aso.
5. Ioane 4:29.
6. Ioane 4:39.
7. Ioane 11:21–22, 27; faaopoopo le faamamafa.
8. Tagai *At the Pulpit: 185 Years of Discourses by Latter-day Saint Women* (2017), 51–52.
9. Faaaogaina i le faatagaga a le tustatala, Jennifer Reeder, o se tagata tomai faapitoa o talafaasolopito o tamaitai o le seneturi lona 19 i le Matagaluega o Talafaasolopito a le Ekalesia.



Saunia e Peresitene Henry B. Eyring
Fesoasoani Muamua i le Au Peresitene Sili

"Ou Te Tuuina Atu Ia Te Outou Le Manuia"

*Ua folafola mai e le Alii le filemu i Ona soo ina o le a la tuua i latou.
Ua la faia lea folafolaga e tasi ia i tatou.*

Ou tuafafine pele, ua faamanuaina lava i tatou i le Agaga o le Atua i le po nei. O savali musuia mai taitai tamaitai malolosi ma musika ua faamalosia ai lo tatou faatuatua ma faateleina ai lo tatou manao ia tausia feagaiga paia ua tatou osia ma lo tatou Tama Faalelagi alofa. Ua tatou lagonaina

se faatelega o lo tatou alofa mo le Alii o Iesu Keriso ma le talisapaia o le mealofo oooofogia o lana taulaga togiola.

O lau savali i le po nei e faigofie lava. Ua tatou lagonaina uma le filemu i le po nei. Tatou te fia lagonaina e le aunoa lea filemu i totonu o i tatou lava, i o tatou aiga, ma tagata o siomia i





tatou. Ua folafola mai e le Alii le filemu i Ona soo ina o le a Ia tuua i latou. Ua Ia faia lea folafolaga e tasi ia i tatou. Ae na Ia fetalai mai e Na te tuuina mai le filemu i Lona ala, ae le pei o ala a le lalolagi. Sa ia faamatalaina Lona ala o le auina mai o le filemu:

“A o le Fesoasoani, o le Agaga Paia lea, e auina mai e le Tama i lo’u igoa, o ia lava na te aoao ia te outou i mea uma lava, e faamanatu mai foi o ia ia te outou i mea uma ua ou fai atu ai ia te outou.

“Ou te tuuina atu ia te outou le manuia, o lo’u manuia ou te avatu ai ia te outou; ou te le avatu ia te outou faapei ona avatu e le lalolagi. Aua le atuatuvale o outou loto, aua foi tou te matatau” (Ioane 14:26–27).

Sa manaomia e atalii o Mosaea lena meaalofa o le filemu a o latou o atu i o latou misiona i le au sa Lamana. E sili atu ma sina atuatuvale a o latou lagonaina le mamafatu o la latou galuega,

sa latou tatalo mo se faamautinoaga. Ma sa “asiasi mai le Alii ia te i latou e ala i lona Agaga, ma fetalai mai ia te i latou: Ia faamafanafanaina outou. Ma sa faamafanafanaina i latou” (Alema 17:10; tagai foi Alema 26:27).

E i ai taimi, e te manaomia ai le filemu a o e feagai ma le lē mautonu ma mea e foliga ia te oe o ni faigata o le a oo mai. Na aoaoina e atalii o Mosaea le lesona na aoao atu e le Alii ia Moronae. O se taitala lea mo i tatou uma: “Ma afai e o mai tagata ia te au o le a ou faaali atu ia te i latou o latou vaivaiga. Ou te avatu i tagata ia vaivai- ga, ina ia faalotomaualalo ai i latou; ma ua lava lo’u alofa tunoa mo tagata uma o e e latou te faalotomaualaloina i latou lava i o’u luma; aua afai latou te faalotomaualaloina i latou lava i o’u luma, ma faatuatua mai ia te au, ona ou faia lea o mea vaivai ia avea ma mea malolosi ia te i latou” (Eteru 12:27).

Sa fai mai Moronae ina ua ia “faalogoina o ia upu,” sa “faamafanafanaina” o ia (Eteru 12:29). E mafai ona avea [na upu] ma se faamafanafanaga ia i tatou uma. O i latou e le iloaina o latou vai- vaiga e le alualu i luma. O lou iloaina o lou vaivaiga o se faamanuiaga, ona e fesoasoani ia te oe e tumau ai i le loto- maualalo ma faatumauina ai lou liliu atu pea i le Faaola. E le gata ina faama- fanafana oe e le Agaga, ae o Ia foi o le ala lea e galueaiina ai e le Togiola se suiga i lou lava natura. Ona avea lea o mea vaivai ma mea malolosi.

O le a i ai foi taimi o le a luitauina ai foi lou faatuatua e Satani; e tupu i soo uma lava o Iesu Keriso. O lau puipuiga e tetee atu i nei osofaiga o le faatu- mauina lea o le Agaga Paia e fai ma au soa. O le a musumusu e le Agaga le filemu i lou loto. O le a ia uunaia oe ia agai i luma i le faatuatua. Ma o le a Ia toe aumaia le manatuaga o taimi na e lagonaina ai le malamalamā ma le alofa o Iesu Keriso.

Atonu o le manatuaina o se tasi lea o meaalofa aupito faapelepele e mafai e le Agaga ona tuu atu ia te oe. O le a Ia “faamanatu mai foi o ia ia te outou i mea uma ua fai atu ai [le Alii] ia te outou” (Ioane 14:26). O le manatuaga atonu o se tali i se tatalo, o se sauniga faaleperisitua, o se faamautinoaga o se molimau, po o se taimi na e vaaia ai le aao taitai o le Atua i lou olaga. Masalo i se aso o lumanai pe a e manaomia- ina le malosi, e mafai e le Agaga ona aumaia i lou manatuaga ia lagona o loo e mauaina i lenei sauniga. Ou te tatalo ia faapea lava ona faia.

O le tasi manatuaga e tele lava ina aumai e le Agaga i lo’u mafaufau o se sauniga faamanatuga i se afiafi sa faia i se fale apa i Oseteria (Austria), i le tele o tausaga ua mavae. O le fale apa sa i lalo ifo o se auala mo nofoaafi. Pe a ma le sefululua ni tagata sa i ai, sa nonofo i luga o nofoa laupapa. O le toatele o i latou o tamaitai, o nisi sa talavou ae o isi sa matutua atu. Sa ou vaaia ni loi- mata maligi o le agaga faafetai a o tufa atu le faamanatuga i lenei tamai poto- potoga. Sa ou lagonaina le alofa o le Faaola mo na Au Paia, ma sa lagonaina foi e i latou. Ae o le vavega e sili ona



manino ou te manatuaina o le malamalama na pei e faatumulia ai lena fale apa, ma aumaia faatasi ai ma le lagona o le filemu. O se taimi o le po ma sa leai ni faamalama, ae sa malama le potu e peiseai o le susulu o le la i le aoauli.

Susulu ma faateleina le malamalama o le Agaga Paia i lena aafifi. Ma o faamalama na auala mai ai i totolu le malamalama o loto faamaulalo o na Au Paia, o e na o mai i luma o le Alii ma saili le faamagaloga o a latou agasala ma tautino pea e manatua pea o Ia. Sa lei faigata le manatuaina o Ia i lena taimi, ma o le manatuaina o lena aafifi paia sa faigofie ai mo au ona manatua o Ia ma Lana Togiola i tausaga ia na sosoo ai. I lena aso o le folafolaga i le tatalo faamanatuga o le a faatasi mai le Agaga ma i tatou sa faataunuui ma sa aumaia lagona o le malamalama ma le filemu.

E pei o oe, ou te faafetai lava mo le tele o auala ua asiasi mai ai le Alii ia te au faatasi ma Le Faamafanafana i taimi sa ou manaomiaina ai le filemu. Ae e le na o lo tatou mafanafana o loo popole ai lo tatou Tama oi le Lagi ae faapena foi lo tatou alualu i luma. O "Le Faamafanafana" ua na o le tasi lea o auala o loo faamatalaina ai le Agaga

Paia i totolu o tusitusiga paia. O le isi lea: "Ma o lenei, e moni, e moni, Ou te fai atu ia te oe, ia tuu atu lou faalagolago i le Agaga lena lea na te taitai ia fai mea lelei" (MF&F 11:12). E masani lava, o le lelei o le a Ia taitai atu i ai oe o le a aofia ai le fesoasoani atu i se isi tagata ia maua le mafanafana mai le Atua.

I Lona atamai, ua aumaia faatasi outou e le Alii i faalapotopotoga ma vasega i Lana Eklesia. Ua Ia faia lenei mea ina ia faateleina ai lou malosi e fai le lelei. I totolu o nei faalapotopotoga, ua i ai ni ou tiute patino e auauna atu i isi mo Ia. Mo se faataitaiga, aafai o oe o se tamaitai talavou, atonu e talosagaina oe e lou epikopo po o lou taitai o Tamaitai Talavou ia aapa atu i se Lora ua oo ina avea ma se tasi lea tatou te ta'ua i nisi taimi "ua le toe toaga." Atonu e sili atu lou iloaina o ia nai lo le epikopo po o le taitai o Tamaitai Talavou. Atonu e te iloaina o loo ia lagonaina le atuatuvalue i le aiga po o le a'oga pe masalo foi o mea uma e lua. Atonu e le iloaina e ou taitai le mafuaaga na latou lagonaina ai le uunaiga e talosagaina oe e aapa atu ia te ia, ae ua silafia e le Alii, ma o loo Ia taitaia lenei galuega e ala i musumusuga a Lona Agaga.

O le tulaga manuia o au taumafaiga o le a manaomia ai se vavega o suiga i lou loto atoa ma i le loto o le tamaitai talavou na auina atu oe e laveai mai—ma e manaomia i lena mea le mafutaga a le Agaga Paia. O le a Ia faatagaina oe e vaai atu i le Lora e pei ona silasila mai i ai le Alii ia te ia. Na te silafia lona loto ma lou loto, ma Na te silafia mea e mafai e loto ona suia. E mafai ona Ia asiasi atu ia te oulua uma e ala i Lona Agaga ia uunaia le lotomaualalo, faamagaloga, ma le alofa.

O lena Agaga e mafai ona musuia ia upu, galuega, ma le onosai e mafai ai e oe ona valaaulia se tamai mamoe e toe-foi mai le lafu. Ma e mafai ona ia pa'i atu i loto o le lafu i le vasega o le Lora ina ia alolofa ma talileleia le mamoe ua leiloa, a oo la ina toefoi mai o ia, o le a ia lagonaina ua ia toe foi mai i le aiga.

O lou malosiaga e fai ai mea lelei o se vaega o afafine o le Atua o le a faalagolago lea, i se tikeri tele lava, i le lotogatasi ma le alofa lea e i ai ia te outou. O le isi meaalofa lea e sau mai le Agaga Paia.

Sa malamalama i ai Alema. O le mafuaaga lena sa ia augani atu ai i lona nuu "ia le tatau ona i ai se finau o le tasi ma le isi, ae e tatau ona latou tagai i luma ma le mata e tasi, i le faatuatua e tasi ma le papatisoga e tasi, ua fili faatasi o latou loto i le lotogatasi ma le alofa o le tasi i le isi" (Mosaea 18:21).

E manaomia le lotogatasi ina ia tatou maua ai le Agaga i a tatou vasega ma i o tatou aiga. Ae ua e silafia mai i mea e tutupu, e pei ona ou iloa, o lena lotogatasi agaalofa e faigata ona faatumauina. E manaomia ai le Agaga Paia e fai ma soa ia tatou iloa mea e silafia e le Atua ma faamalulüina o tatou lagona.

Ou te manatua i se tasi taimi le soona oosooso ai o le ma atalii e fitu pe valu tau-saga i luga o lona moega sa ou faapea ai o le a gau. Sa ou lagona le faateteleina o le ita, ma sa vave ona ou agai e faatulaga lou fale. Sa ou tago atu i ona tauau iti ma sii i luga i le mea na fetau ai o ma mata.

Sa tuu e le Agaga ni upu i lo'u mafaufau. Sa pei o se leo lemu, ae sa tuia ai lo'u loto: "O loo e u'uina se tagata maoae." Sa ou toe tuu ifo ma le filemu o ia i luga o le moega ma faatoese atu i ai.



O le taimi nei ua avea o ia ma tagata sili lea na faatagaina e le Agaga Paia a'u e vaai i ai i le 40 tausaga talu ai. Ou te faafetai e faavavau i le laveaiina o au e le Alii mai lagona leaga e ala i le auina mai o le Agaga Paia e faataga au ia ou vaai i se atalii o le Atua e pei ona sa Ia silasila mai i ai.

O le lotogatasi o loo tatou sailia i totonus o o tatou aiga ma i totonus o le Ekalesia o le a oo mai pe a tatou faatagaina le Agaga Paia ia i ai se aafiaga o mea tatou te vaai i ai pe a tatou vaai atu—i le tasi ma le isi. E silasila le Agaga ma le alofa mama o Keriso. Faafogoa i upu a Mamona na faaaogaina e faamatala ai le alofa mama. Mafaufau i taimi na e lagonaina ai:

“O le alofa mama e loa ona tali-tiga, ma e agalelei, ma e le losilosivale, ma e le faafefeteina, e le sailia e ia ana lava, e le faaitagofie, e le mafaufau i se mea leaga, ma e le olioli i le amioletonu ae olioli i le upu moni, e onosaia mea uma, e talia mea uma, e faamoemoe i mea uma, e onosai i mea uma.

“O le mea lea, ou uso pele e, afai e le ia te outou le alofa mama o ni mea noa outou, ona e le uma le alofa mama. O le mea lea, ia outou fusi ai i le alofa mama, le mea ua silisili lea i mea uma, ona e iu mea uma—

“Ae o le alofa mama o le alofa le pona lea o Keriso, ma e tumau e faava-vau; ma o soo se tasi e maua ua i ai ia te ia i le aso gataaga, o le a lelei ia te ia.

“O le mea lea, ou [tuafafine] pele e, ia outou tatalo atu i le Tama ma le malosi atoa o le loto, ina ia faatumulia outou i lenei alofa, lea ua ia faaee mai i luga o i latou uma o e o soo moni o lona Alo, o Iesu Keriso; ina ia mafai ona avea o outou ma [afafine] o le Atua; a oo ai ina afio mai o ia o le a tatou faapei o ia, ona o le a tatou vaai ia te ia e pei ona i ai o ia; tau ina ia tatou maua lenei faamoemoe; tau ina ia mafai ona faamamaina i tatou e pei lava ona mama o ia” (Moronae 7:45–48).

O le sini lenei o loo i ai i lo outou Tama oi le Lagi mo outou, o Ona afafine faapelepele. Atonu e foliga atu ia te oe o se sini mamao lava, ae mai i Lana silafaga, e te le o mamao lava. O lea e asiasi atu ai o Ia e ala i Lona Agaga e faamafanafana oe, faamalosiau atu ia te oe, ma musuia oe ia faaauau pea le malaga.

Ou te tuu atu la'u molimau mautu e silafia oe e le Tama—silafia ou manaoga ma lou suafa—alofa ia te oe, ma e faafogoa i au tatalo. O loo valaaulia oe e Lona Alo Pele e sau ia te Ia. Ma La te auina mai le Agaga Paia e faatasi ma oe i au taumafaga e auauna atu i isi mo i Laua.

Ona o le Togiola a Iesu Keriso, o le a i ai i le mafutaga faifai pea a le Agaga Paia se aafiaga faapaiaina ma faamamina i lou agaga. O le a e lagona i lena taimi le filemu na folafola mai e le Faa-ola e tuu atu i Ana soo. Ma lena filemu o le a oo mai se faamoemoe susulu ma se lagona o le malamalama ma le alofa mai le Tama ma Lona Alo Pele, o loo taitaiga Lona malo i le fogaelele e ala i faaaliga i Lana perofeta soifua. Ou te molimau atu ai i le suafa o le Alii o Iesu Keriso, amene. ■





Saunia e Peresitene Henry B. Eyring
Fesoasoani Muamua i le Au Peresitene Sili

Faapotopotoina o le Aiga o le Atua

*E finagalo le Atua le Tama i Lana fanau ia toefoi atu i le aiga,
i auaiga ma i le mamalu.*

Ou uso e ma tuafafine pele, ua ou olioli lava i le avanoa e faatasi ai ma outou i le amataga o lenei sauniga o le konafesi aoao. E silisili ona faafeiloai atu ia te outou ma le fafia.

O le konafesi aoao ua avea pea ma taimi e potopoto ai le Au Paia o Aso e Gata Ai. Ua faatupulaia tele le Ekalesia ma ua faigata ai ona potopoto faatasi i se nofoaga se tasi, ae ua saunia e le Alii ni auala mo faamanuiaga o le konafesi aoao e oo atu ai ia te outou po o fea lava o outou i ai. E ui e faagaeetia le vaaia o le potopoto ai o le Au Paia i lenei Maota Autu tele mo Konafesi, ae o i matou o loo tutu atu i lenei pule-laa e vaai atu pea faalemafaufau i le faitau miliona o tagata o loo faatasi ma i matou i le lalolagi atoa e maimoa ma faafogfa i le konafesi. E toatele outou o loo potopoto faatasi ma tou aiga; o nisi atonu o loo potopoto faatasi ma uo po o tagata lava o le Ekalesia.

Po o fea lava o outou i ai ma pe o le a foi le auala o outou faafogfa mai ai i lo'u leo, faamolemole ia iloa e ui lava tou te le o i ai patino iiinei, ae matou te lagonaina lo outou faatasi mai i la le agaga. Matou te faamoemoe o le a outou lagonaina uma le tasi ai

ma i matou—o le a outou lagonaina le mana faaleagaga lea e sau mai i soo se taimi e potopoto ai le tino tele e tasi o e talitonu i le suafa o Iesu Keriso.

Ua faagaeetia lava a'u e talanoa atu ia te outou i le asō e uiga i se isi ituaiga o potopotoga. O lenei ituaiga e le na o le ta'i ono masina e tupu ai, e pei o le konafesi aoao. Ae, ua leva ona faaauau pea talu mai uluai aso o le Toefuataiga o le Ekalesia, ma ua faanatinatina lava i tausaga ua mavae atu nei. Ou te faasino i le faapotopotoina o le aiga o le Atua.

Ina ia faamatalaina lenei faapotopotoga, atonu e aupito sili ona amata mai le taimi ae tatou te lei fananau mai, ae lei ta'uaina e le Tusi Paia “o le amataga” (Kenese 1:1). I lena taimi, sa tatou mau faatasi ai ma le Tama Faalelagi o ni Ana fanau agaga. E moni lenei mea i tagata uma ua ola mai i lenei lalolagi.

Tou te silafia, o igoa “uso” ma le “tuafafine” ua le na o ni faafeiloaiga faaleuo po o ni faaupuga faapelepele





mo i tatou. O ni faailoaga na o se upu moni e faavavau: O le Atua o le Tama moni lava o tagata uma; o i tatou uma o vaega taitasi o Lona aiga e faavavau. Ona e alofa o Ia ia i tatou i se alofa o se Tama atoatoa, ua finagalo ai o Ia ia i tatou ia alualu i luma ma siitia ia avea e pei o Ia. Sa Ia faauuina se fuafuaga lea o le a tatou o mai ai i le lalolagi, i aiga, ma maua aafiaga ia o le a saunia ai i tatou e toefoi atu ia te Ia ma ola e pei ona Ia soifua ai.

O le elemene tutotonu o lenei fuafuaga o le folafolaga e faapea o le a ofo mai e Iesu Keriso o Ia lava e fai ma tau-laga, e laveai i tatou mai le agasala ma le oti. O la tatou galuega i lena fuafuaga o le taliaina o le taulaga a le Faaola e ala i le usiusitai i tulafono ma sauniga o le talalelei. O oe ma a'u sa taliaina lenei fuafuaga. O le mea moni, na tatou olioli ai, e ui o le a tatou tuua ai le afioaga o

lo tatou Tama ma galo ai mea na tatou lagonaina iina faatasi ma Ia.

Ae sa lei auina mai i tatou iinei i le pogisa atoatoa. Sa tofu i tatou ma se vaega o le malamalamo o le Atua na tuuina mai i ai, ua ta'ua o le "Malamalamo o Keriso," e fesoasoani ia i tatou ia iloaina le eseesege i le va o le lelei ma le leaga, le sa'o ma le sese. O le mafuaaga lenei e oo lava ia i latou o e ola ma sina iloa po o le leai o se iloa e uiga i le fuafuaga a le Tama e mafai lava ona lagonaina, i o latou loto e i ai lava ni amioga amiotonu ma mama ae o isi e leai.

O lo tatou lagonaina o le sa'o ma le sese e foliga mai e malolosi faapitoa a o tatou tausii ae a tatou fanau. E toetoe lava o matua uma e i ai le manao natura e aoao lana fanau i amioga mama. O le vaega lenei o le wavega o le fuafuaga a le Tama Faalelagi. E finagalo i Lana fanau ia o mai i le lalolagi i ni aiga, ma

mulimuli i le mamanu e faavavau o aiga o loo i ai i le lagi. O aiga o le iunite faavae faalefaalapotopotoga o malo e faavavau, ma o lea ua Ia faamoemoe ai mo i latou foi ia avea ma iunite faavae o le lalolagi. E ui o aiga faalelalolagi e matua mamao lava mai le atoatoa, ae latou te avatu i fanau a le Atua le avanoa silisili e talileleia ai i latou i le lalolagi i le alofa e tasi i le lalolagi lea e latalata atu i le mea na tatou lagonaina i le lagi—le alofa faamatua. O aiga o le auala sili foi lea e faasaoina ai ma tuufaasolo ai amioga mama ma mataupu faavae ia o le a sili ona taitai atu ai i tatou e toefoi atu i le afioaga o le Atua.

Ua nao sina vaega toalaiti lava o fanau a le Atua e mauaina, i lenei olaga, se malamalamo atoatoa e uiga i le fuafuaga a le Atua, faatasi ai ma le mauaina o sauniga ma feagaiga o le perisitua lea e faagaoioia atoatoa ai le mana togiola o le Faaola i o tatou olaga. E oo lava ia i latou e matua lelei lava matua atonu e ola faatuatua e tusa ma le malamalamo ua latou maua ae e lei faalogo lava e uiga ia Iesu Keriso ma Lana Togiola pe valaaulaiaina foi ina ia papatisoina i Lona suafa. E moni lenei mea mo le fia miliona lemafaitaaulia o o tatou uso ma tuafafine i le talafaasolopito ato o le lalolagi.

E manatu nisi e le fea lenei mea. E mafai ona latou manatu o se faamaoniga lea e faapea e le o i ai se fuafuaga, leai ni mea patino e manao-mia mo le faaolataga—ua lagonaina e le fatuina e se Atua amiotonu ma alofa se fuafuaga e avanoa i se vaega toalaiti o Lana fanau. O isi ua tamau e faapea atonu ua leva lava ona fuafua e le Atua po o ai Ana fanau o le a Ia laveaiina ma faia le talalelei ia avanoa ia i latou, ae o i latou e lei faalogo lava i le talalelei sa lei "filifilia" lava i latou.

Ae ua e iloaina ma ou iloaina, ona o upumoni na toefuataiina e ala mai i le Perofeta o Iosefa Samita, o le fuafuaga a le Atua e matua sili lava le alofa ma le amiotonu nai lo lena. O loo naunau lo tatou Tama Faalelagi ia faapotopoto ma faamanuia Lona aiga atoa. E ui Na te silafia e le o i latou uma o le a filifili ina potopoto, ae ua tuu atu e Lana fuafuaga i Ana fanau taitoatas i le avanoa e

talia ai pe teena ai Lana valaaulia. Ma o aiga o loo i ai i le fatu o lenei fuafuaga.

I seneturi ua alu, sa ta'u mai ai e le perofeta o Malaki e faapea, i se aso a sau, o le a auina mai ai e le Atua ia Elia e "faaliliuina loto o tamā i fanau, ma loto o fanau i o latou tamā" (Malaki 4:6).

Sa taua tele lenei valoaga, na toe sii mai e le Faaola ina ua Ia asiiasi atu i Amerika i le mavae ai o Lona Toetu (tagai 3 Nifae 25:5–6). Ma ina ua asiiasi atu le agelu o Moronae i le Perofeta o Iosefa Samita, na ia sii maia foi le valoaga e uiga ia Elia ma loto, tama, ma fanau (tagai Iosefa Samita—Talafaasolopito 1:36–39).

O le asō o le aso 1 o Aperila. I le lua aso mai le asō, 3 o Aperila, e faailogaina ai le 181 tausaga mai le aso na faataunuina ai le valoaga a Malaki. I lena aso, na oo mai ai Elia, ma ia tuu atu ai ia Iosefa Samita le mana o le perisitua e faamau ai aiga e faavavau (tagai MF&F 110:13–16).

Mai lena aso i le asō, ua matua faatupulaia ai lava le naunau o se tasi e sailili talafaasolopito o aiga. I se sao-asaoa matua faateleina, ua foliga mai tagata ua tosina atu i o latou tuua e sili atu i le na o se fialoa masani. O faletusi o mea tau gafa, faalapotopotoga, ma tekinolosi ua faatutu i le lalolagi atoa e lagolago ai lenei naunautaiga. O le malosiaga o le initonetia e faaleleia ai fesootaiga ua mafai ai e aiga ona galulu faatasi e fai saililiga o talafaasolopito o aiga i se saoasaoa ma le maeaea sa lei mafai muamua.

Aisea ua tutupu ai nei mea uma? Ona o le leai o se isi faaupuga sili atu, ua tatou ta'ua ai o le "agaga o Elia." E mafai foi ona tatou ta'ua i lea lava valaauga e tasi o le "faataunuuga o le valoaga. Ou te molimau atu na oo mai Elia. O loto o fanau—o oe ma a'u—ua liliu atu i o tatou tamā, i o tatou tuua. O aafia e te lagonaina mo ou tuua o se vaega lea o le faataunuuga o lena valoaga. E faalagolago tonu lava i lou lagona po o ai oe. Ae e faatatau i mea e sili atu nai lo nao DNA e tuufaasolo mai tuua.

Mo se faataitaiga, a e mulimuli i uunaiga e aoao e uiga i lou talafaasolopito o le aiga, atonu e te iloaina ai o se tasi o lou aiga e mamao le piitaga e



tali tutusa lava lua foliga po o le fiafia i ni tusifaitau po o au taleni mo le pese. E ono mata'ina tele lenei mea ma faagaeetiaina foi. Ae afai e gata iina lau galuega, o le a e lagonaina o loo i ai se mea o misi. E mafua lenei mea ona o le faapotopotoina ma le tuufaatasia o le aiga o le Atua e manaomia ai ni mea se tele atu nai lo na o ni lagona mafanafana. E manaomia ai ni feagaiga paia e faia e fesootai ma sauniga o le perisitua.

O le toatele o ou tuua sa lei mauaina na sauniga. Ae i le sauniaina ai e le Atua, na e maua ai. Ma sa silafia e le Atua o le a e lagonaina le tosina atu i ou tuua i le alofa ma o le a e mauaina le tekinolosi e talafeagai e faailoa ai i latou. Sa Ia silafia foi o le a e ola i se taimi o le mauaina o malumalu paia, ia e mafai ona faatinoina ai sauniga, ua sili atu i lo se isi lava taimi muamua i le talafaasolopito. Ma sa Ia silafia e mafai ona Ia faatuatuaina oe ia faataunu lenei galuega e fai ma sui o ou tuua.

Ioe, ua i ai ia i tatou uma ni tiutetatauve faananati ma taua se tele e manaomia ai lo tatou taimi ma le gauai atu i ai. Ua maua e i tatou uma ni vaega o mea ua faamoemoeina i tatou e le Alii e fai, ia tatou te manatu tatou te le gafatiaina. O le mea e lelei ai, ua saunia e le Alii se auala mo i tatou taitoatasie ma maua ai le to'afimalie ma le faamalieina

i a tatou auaunaga uma, e aofia ai auaunaga mo talafaasolopito o aiga. Tatou te maua le malosi e fai ai mea ua Ia faatonu mai e ala i lo tatou faatuatua e faapea e le aumaia lava e le Faaola se poloiga "vagana o le a saunia e ia se ala mo i [tatou] ina ia mafai ai ona [tatou] faataunuina o le mea ua ia poloaiina" (1 Nifae 3:7).

Ou te iloa e moni lenei mea mai aafia. I le tele o tausaga ua mavae, a o avea ma se tamaititi aoga i se iunive-site, sa ou feiloai ai i se alii sa faigalugega mo se tasi o kamupani komepiuta sili ona tele i le lalolagi. O lenei mea sa tupu i aso popofou o komepiuta, ma i lena tulaga sa auina atu ai o ia e lana kamupani e faatau atu ia komepiuta i le Ekalesia a Iesu Keriso o le Au Paia o Aso e Gata Ai.

E tusa ma se mea e mafai ona ou iloaina, sa leai ma se faatuatua faalelotu o lenei tagata faatau oloa. Ae sa ia fai mai ma le maofa ma le faateia, "I lenei ekalesia o loo latou faia ai mea ua latou ta'ua o 'gafa,' sailiga mo igoa o tagata ua maliliu, i le taumafai ai e faailoa o latou tuua. E saili solo e tagata, o le toatele lava o tamaitai, le tele o kapaneta o faila, saili i tamai kata laiti mo ni faamatlagi. Afai ou te manatuaina sa'o, sa ia fai mai sa faaaoga e tamaitai ni seevae tenisi ina ia mafai ona latou tamomoe



saoasaoa teisi atu. Sa faaauau pea le alii, "Ina ua ou vaiai le tulaga lautele o mea o loo latou taumafai e fai, sa ou iloa ai ua ou mauaina le mafuaaga mo le fatufatua'iga o komepiuta.

Ia, sa sa'o o ia i se isi itu. O komepiuta o se vaega taua o le lumanai o le galuega o talafaasolopito o aiga—ae le o ituaiga o komepiuta na ia faatau atua. Sa filifili se taitai musuia o le Eklesia e aua nei faatauina ana komepiuta. Sa ao ona faatalitali le Eklesia mo tekinolosi lea sa lei ono mafaufauna i lena taimi. Ae ua ou aoaoina i le tele o tausaga talu mai lena mea e oo lava foi i ni tekinolosi silisili ona lelei, e le mafai lava ona suitulaga i faaaliga mai le lagi, e pei o le [faaaliga] lea na maua e lena taitai o le Eklesia. O se galuega faaleagaga lenei, ma o loo taitaia e le Alii e ala mai i Lona Agaga Paia.

I ni nai vайaso talu ai, sa ou galue ai i le talafaasolopito o lo'u aiga faatasi ma se faufautua i o'u talaane ma se isi na fesoasoani mai i luga o le telefoni. I le lau o le komepiuta na i o'u luma sa i ai se faafitauli na matua le mafai e lo'u malosi faaletino ona foiaina. Sa ou vaiai ni igoa se lua, na auina mai ia te au e le ofoofogia o tekinolosi, o ni tagata atonu o loo faatalitali mo se sauniga o le malumalu. Pei o le faafitauli sa i ai, o le eseese o igoa, ae sa i ai se mafuaaga na talitonu ai o i laua lava o le tagata e tasi. O la'u galuega la o le fuafua po o le fea le sa'o.

Sa ou fesili i o'u faufautua e tau mai ia te a'u. Sa la fai mai ia te a'u, "Leai, e tatau ona e filifili." Ma sa laua mautinoa atoatoa o le a ou mauaina le mea moni. O le komepiuta, faatasi ma lona malosiaga atoa ma faamatalaga, na tuu maia ia te au le faamanuiaga o le sioa atu i na igoa i luga o le lau, iloiloina ia faamatalaga ua maua, sue isi saililiga, tatalo leleo, ma ia maua le mea sa'o. A o ou tatalo, sa ou iloaina ma le mautinoa le mea e fai—e pei lava ona faia i isi foi tulaga pe a ou manaomaina ona faalagolago i le fesoasoaniga faalelagi e foia ai se faafitauli.

Tatou te le iloa po o a fatufatua'iga ofoofogia o le a musuia e le Atua ia tagata e fatua'i e fesoasoani ai i Lana galuega o le faapotopotoina o Lona aiga. Ae po o a lava fatufatua'iga ofoofogia e ono oo mai, o lo latou faaogaaga o le a manaomia ai le Agaga e galue i totolu o tagata e pei o oe ma a'u. E le tatau ona faateia ai i tatou i lenei mea. I mea uma lava, o i latou o atalii ma afafine faapelepele o le Atua. O le a Ia auina maia soo se musumusuga e manaomia latou te maua ai le avanoa e toefoi atu ai ia te Ia.

I ni tausaga talu ai nei, na tali mai ai le autalavou o le Eklesia i le agaga o Elia i se auala musuia. E toatele ua umia nei a latou lava pepa faataga o le malumalu e tapulaa le faaaogaina ma ua faaaoga soo. Ua matua pisi atu lava ia vai papatiso o malumalu i lo se isi lava taimi muamua; o nisi malumalu ua fetuunaia a latou taimi faatulagaina ia taulimaina ai le faateleina o le aofai o talavou e auai i malumalu.

Sa masani lava o se mea e seasea tupu ae sa talileleia le tuusaunoaga mo talavou e aumai ia igoa o o latou lava tuaa i le malumalu. O le taimi nei ua fai ma mea masani, ma ua tele lava, o talavou lava ia ua mauaina na tuaa.

Ma le isi, ua toatele talavou ua iloaina o le foai atu o o latou taimi e faia ai sailiga o talafaasolopito o aiga ma galuega faalemalumalu ua faalolotoina ai la latou molimau o le fuafuaga o le faaolataga. Ua faateleina ai le uunaiga a le Agaga i o latou olaga ma faaitiitia ai faatosinaga a le fili. Ua fesoasoani ai ia i latou e lagona le latalatala atili i o

latou aiga ma latalata atili ai i le Alii o Iesu Keriso. Ua latou aoaoina o lenei galuega e le na o tagata ua maliliu e faaolaina ai; e faaolaina ai foi i tatou uma (tagai MF&F 128:18).

Ua pueina e le autalavou le vaaiga mamao ma le faamemelo; ua manao-mia nei e o latou matua ona pueina foi. Ua toatele nei tagata ua taliaina le papatisoga i le lalolagi o agaga, ona o le galuega o loo faia e le autalavou, ma o loo latou faatalitali mo isi sau-niga e na o tagata matutua e mafai ona faatinoina i malumalu i le lalolagi. O le galuega o le faapotopotoina o le aiga o le Tama Faalelagi e le mo na o le autalavou, ma e le mo na o matua matutua foi. E mo tagata uma. O tatou uma e faapotopotoina i latou.

O le galuega lenei o la latou auga-tupulaga, lea na ta'u e le Apostolo o Paulo "o le sauniga o le faaatoaga o tausaga," lea na ia fai mai ai o le a "[faapotopotoina ai e le Atua] ia Keriso, o i latou uma lava o i le lagu, atoa ma i latou o i le lalolagi" (Efeso 1:10). Ua mafai lenei mea e ala i le galuega togiola a Lona Alo Pele o le Atua, o Iesu Keriso. Ona o Ia, o o tatou aiga, "o [ē] sa vava mamao anamua ua faatalataina mai ai i le toto o Keriso. Aua o ia tatou te lelei ai, ua na faia ia tasi e sa [toalual], ua na soloia foi le pa vaeloto sa vaeluaina ai [tatoul]" (Efeso 2:13–14). Ua outou lagonaina lenei mea, e pei ona ou lagonaina, ina ua e lagonaina se faateleina o le alofa a o e tagai atu i le ata o se tuaa. Na e lagonaina i totolu o le malumalu, ina ua foliga mai le igoa i luga o se kata e sili atu i lo na o se igoa, ma lē mataofia le lagona e faapea o lenei tagata sa iloaina lava oe ma lagonaina lou alofa.

Ou te molimau atu o loo finagalo le Atua le Tama i Lana fanau ia toefoi atu i le aiga, i auaiga ma i le mamalu. O loo soifua le Faaola. O loo Ia taitaiina ma faamanuiaina lenei galuega, ma o loo Ia leoleoina ma taialaina i tatou. O loo Ia faafetai atu ia te oe mo lau auau-naga faamaoni i le faapotopotoina o le aiga o Lona Tama, ma ou te folafola atu ia te oe le fesoasoaniga musuia o loo e sailia ma manaomia. I le suafa, o Iesu Keriso, amene. ■



Saunia e Brother M. Joseph Brough

Fesoasoani Lua i le Au Peresitene Aoao o Alii Talavou

O Lona Aao Taiala i Aso Uma

*E silafia e le Tama Faalelagi le mea e sili ona manaomia
e oe ma au i lo se isi lava.*

O se tasi o meafaigaluega sili ona pele a le Tama Faalelagi e taitai ai Lana fanau o matua matutua amiotonu. Sa faapena le tina o lo'u tama. I se mea sa tupu a o ou latiiti tele e manatuaina, sa aoa'i ai au e lou tama. O le matauina o lenei aoaiga, sa faapea mai ai lou tinamatua, "Monte, ou te talitonu o loo e so'ona aoa'i o ia."

Sa tali lo'u tama, "Tina, ou te faasa'o-inu lau fanau e pei ona ou manao ai."

Ma sa faailoa lemu atu e lou tinamatua atamai, "Ma ou te faia foi."

Ou te mautinoa sa lagona e lou tama le taitaiga atamai a lona tina i lena aso.

Pe a mafaufau i le taitaiga, atonu tatou te mafaufau i se viiga tatou te iloa uma ma fafia ai—"O A'u se Atalii o le Atua." I le tali tatou te maua ai upu "Ta'u mai, savali mai i o'u tafatafa, ina ne'i o'u sese."¹

Talu ai nei, sa faatoa ou malamalama ai i lena tali o le taitaiga paia i matua. A o mafaufau ai i nei upu, sa ou iloaina a o aofia ai lena taitaiga, o loo i ai se faauigaga sili atu. Tatou te augani atu taitoatasi i aso uma ia taitai i tatou e le Tama Faalelagi, faasino i tatou, ma savali i o tatou autafa.

Sa faamatala e Peresitene Dieter F. Uchtdorf: "E silafia lelei lava e lo tatou Tama oi le Lagi manaoga o Lana fanau nai lo o se isi lava tagata. O Lana galuguega ma le mamalu o le fesoasoani pea lava pea ia i tatou, ma tuuina mai ia ni punaoa matagofie faaletino ma faale-agaga e fesoasoani i la tatou savaliga e toe foi atu ia te Ia."²

Faafofoga i na upu: E silafia lelei lava e lo tatou Tama oi le Lagi mea e

manaomia e oe ma au i lo o se isi lava tagata. O se taunuuga, ua la atiaeina se ato o mea manaomia e fetau ia i tatou taitoatasi. E i ai ni vaega e tele. E aofia ai Lona Alo ma le Togiola, le Agaga Paia, poloaga, tusitusiga paia, tatalo, perofeta, aposetolo, matua, matua matutua, taitai o le Ekalesia i le lotoifale, ma le tele o isi—e fesoasoani uma ia i tatou ia toe foi atu ma nonofo faatasi ma la i se aso.

Sei ou faasoa atu i le aso na o ni nai vaega o le ato o mea manaomia lea ua ou iloa ai o se Tama agaalofa o loo taitaia, faasino, ma savali i o'u autafa ma lou aiga. O lau tatalo o le a iloa e outou taitoatasi i o outou aafiaga o le Tama oi le Lagi e taitaia, faasino, ma savali i o outou autafa ma, faatasi ma lena malamalama, tou te amata i le lototoa, ma le iloaina e le o tuuatoatasi moni lava outou.

O poloaga a le Tama Faalelagi o vaega autu ia o le ato o mea manaomia. Sa tautino mai Alema "E lei avea lava le amioleaga ma fafia."³ O le faatagaina o amioga le talafeagai e aunoa ma le aoaiga agaalofa o le alofa sese ma e faamalosia ai le manatu masani atonu o le amioleaga lava o le fafia moni lea. Sa faamanino mai e Samuelu le sa Lamana le sese o lenei manatu: "Sa outou saili mo le fafia i le fai o le amioletonu, o se mea lea ua le tusa ai ma le natura o lena amiotonu lea o loo i lo tatou FaaAo silisili ma Faavavau."⁴





E ala i Ana perofeta, e faamanatu mai pe a le Tama Faalelagi ia i tatou o le amiontu o le fiafia lea. Mo se faataitaiga, sa aoao e le Tupu o Peniamina e “manaomia [e le Tama Faalelagi] ia outou faia e pei ona ia poloaiina ai outou; o se mea a outou faia, e faamanuia vave mai lava o ia ia te outou.”⁵ E sau mai i se isi viiga le faamanatu faapena:

*Tausi poloaiga; tausi poloaiga!
O i ai le malū; ma le filemu.
E faamanuia mai.*⁶

I le vaitaimi o lou aso fanau lona 14, sa ou aoao e uiga i nisi o faamanuia ga nei. Sa ou matauina ai le eseese o uiga mai i o’u matua. O le mafaufau ai i le mea sa ou matauina, sa ou fesili atu ai, “Tatou te o i se misiona?” Sa faamautinoa e foliga te’i a lou tina lou fia iloa. Mulimuli ane, i se fonotaga faaleaiga, sa matou iloaina ma o’u tei ua valaaulia o matou matua e pule faamalumalu i se misiona.

Sa matou nonofo i se faatoaga matagofie i Wyoming. Mai i lau vaaiga, sa lelei atoatoa le olaga. E mafai ona ou sau i le fale mai le aoga, faamaea au feau, ma alu e tulimanu, fagota, pe tafafao ma la’u taifau.

E lei leva talu le iloaina e uiga i le valaauga, sa ou iloaina e ao ona ou

tuua la’u taifau, o Blue. Sa ou alu atu i lo’u tama, ma fesili po o le a sa’u mea e tatau ona fai ia Blue. Sa ou manao e faamamafa atu le le fea o le mea na manaomia e le Atua. O le a le galio ia te au lenei tali. Sa ia faapea mai, “Ou te le o mautinoa. Masalo e le mafai ona alu o ia ma i tatou, o lea e tatau la ona e fesili atu i le Tama Faalelagi.” E le o le tali lena sa ou faamoemoe i ai.

Sa amata ona ou fatauina le Tusi a Mamona. Sa ou tatalo faatauanau ia iloa pe tatau ona ou aveesea la’u taifau. E lei oo mai lau tali i se taimi vave; o se manatu faapitoa sa oo mai pe a i lou mafaufau: “Aua le avea ma se avega i ou matua. Aua nei avea ma se avega. Ua ou valaauna ou matua.”

Sa ou iloa le mea na manaomia e le Tama Faalelagi. E lei tuuititia e lena malamalamala le tiga o le aveesea o la’u taifau. Peitai, e ala i lena ositaulaga itiiti, sa faamaluluina lou loto ma ou maua le filemu i le sailia o le finagalo o le Tama Faalelagi.

Ou te faafetai i lou Tama Faalelagi mo faamanuia ga ma le fiafia sa ou maua e ala i tusitusiga paia, tatalo, le Agaga Paia, ma se tama faalelalolagi agavaa o lē na opomauina lana matafaioi o se faiaoga autu o le talalelei o lana fanau. Sa la taitaia au, faasino au, e oo lava i le savavali i ou autafa e fesoasoani ia te au

ia maua le ala—aemaise pe a tatau ona ou faia se mea faigata.

E faaopoopo i le mauaina o le ato o vaega o mea manaomia sa ou ta’ua, ua faamanuiaina taitoatas i tatou i se taitai perisitua e taitai ma faasino i tatou.

Na saunoa mai Peresitene Boyd K. Packer: “O Epikopo e musuia! O i tatou uma e i ai le faitalia e talia pe teena fautuaga mai o tatou taitai, ae ‘aua lava ne’i le amanaiaina le fautuaga a lau epikopo, pe tuuina atu i luga o le pulelaa pe tuuina atu taitoatas.”⁷

E taumafai nei tamalii e fai ma sui o le Alii. Pe o tatou matutua pe talavou, e manao Satani ia tatou mafaufau ua leai se faamoemoe, o loo i ai iiha epikopo e taiala i tatou. A talanoa ma epikopo, ua ou maua se autu masani e faatatau i le ta’uta’u atu o le lē usiusitai po o le mafatia ma le lē iloa mai i mea sese matautia. E manao vave Epikopo e faailoa atu le alofa o le Tama Faalelagi mo le tagata ma se manao ia savali i ona autafa a o ia sailia le ala i le aiga.

Atonu o le vaega aupito sili o le ato o mea manaomia ua faamatalaina i upu nei: “Aua ua faapea lava ona alofa mai o le Atua i le lalolagi, ua ia au mai ai lona Atalii e toatasi.”⁸

Ia aoao i tatou uma i mea e tatau ona fai, sa taitai e Iesu Keriso le ala i le tuuina mai o le faataitaiga atoatoa lea e

tatau ona tatou taumafai e faataitai i ai. Ua Ia augani mai ia i tatou faatasi ai ma aao mafola e o mai, ma mulimuli ia te Ia.⁹ Ma pe a tatou toilalo, lea tatou te oo uma ai, Na te faamanatu mai ia i tatou, "Aua faauta, o A'u, o le Atua, na mafatia i nei mea mo tagata uma, ina ia latou le mafatia pe afai latou te salamo."¹⁰

Oka o se meaalofa ofoofogia! O le salamo e le o se faasalaga, o se faamanuiaga. O se faamanuiaga e taitai ma faasino i tatou. Leitioa a tautino mai tusitusiga paia e tatau ona tatou lē aoao atu se mea, vagana ai le salamo.¹¹

E i ai i le Tama Faalelagi le tele o punaoa, ae e masani ona Ia faaaogaina le isi tagata e fesoasoani ia te Ia. Na te aumaia avanoa i aso uma e taitai ai, faasino, ma savali ai i autafa o se tagata e manaomina. E tatau ona tatou mulimuli i le faataitaiga a le Faaola? O i tatou foi e faia le galuega a le Tama Faalelagi.

I le avea ai ma Au Peresitene Aoao o Alii Talavou, matou te iloa e faamanuiaina le autalavou pe a latou maua ni matua ma taitai o e galulue mo le Tama Faalelagi i le taitaiina, faasinoina, ma le savavali ai i o latou autafa. E tolu mataupu faavae¹² o le a fesoasoani ia i tatou e avea ma vaega o le ato o mea manaomia a le Tama Faalelagi mo isi:

Muamua, ia faatasi ma le autalavou. Sa faamamafa e Peresitene Henry B. Eyring lenei tulaga: "E i ai nisi mea e mafai ona tatou faia e sili atu ona taua. O le a sili atu ona mamana a tatou faataitaiga o le ola ai i le aoaoga faavae nai lo le faaaogaina o upu tatou te aoao atu ai le aoaoga faavae."¹³ Ina ia taitai le autalavou e manaomia le i ai faatasi ma i latou. O le taimi tuuto o se faailoaga o le alofa lea e faatagaina i tatou e aoao atu i le upu ma le faataitaiga.

Lua, ina ia taitai moni le autalavou, e tatau ona tatou faafesootaia i latou ma le lagi. E oo mai pea le taimi e tatau ai ona tu taitoatasi le tagata na o ia. Ua na o le Tama Faalelagi e mafai ona i ai iina e taitai i taimi uma ma i nofoaga uma. E tatau ona iloa e o tatou talavou le auala e saili ai le taitaiga a le Tama Faalelagi.

Tolu, e tatau ona tatou tuu atu ia taitai le autalavou. E pei o matua alolofa o e uuina le lima o se tamaitiiti laitiiti o aoao e savali, e tatau ona tatou tuu



i latou ina ia alualu i luma le autalavou. O le tuu atu i autalavou e taitai e manaomia ai le onosai ma le alofa. E faigata atu ma e manaomia ai le tele o le taimi i lo le faia e i tatou lava. Atonu latou te tautevateva i le ala, ae tatou te savavali i o latou autafa.

Uso e ma tuafafine, o le a i ai taimi i o tatou olaga e foliga mai ai o loo mamao pe e leai ni faamanuiaga o le taitaiga. Mo ia taimi o le lē mautinoa, sa folafola mai Elder D. Todd Christofferson: "Ia avea au feagaiga ma mea e sili ona taua ma ia tonu foi ma atoatoa lou usiusitai. Ona mafai lea

ona e ole atu i le faatuatua, aua lava nei masalosalo, e tusa ai ma mea e te manaomia, ona tali mai lea o le Atua. O le a Ia lagolagoina oe a o e mataituna ma galue. I Lona lava taimi e tatau ai ma Lana lava ala, o le a Ia faaloaloa mai ai Lona aao ia te oe ma faapea mai, 'O A'u lenei.'¹⁴

I se taimi faapea, sa ou saili ai le apoapoaiga a le Tama Faalelagi e ala i le tatalo faifai pea ma le faamaoni mo le silia ma le tausaga e saili le fofo i se tulaga faigata. Sa ou iloaina lava e tali mai e le Tama Faalelagi tatalo faamaoni uma. Ae sa ou oo i se atugaluga i

se tasi o aso lea na ou auai atu ai i le malumalu ma se fesili e tasi: "Tama Faalelagi, E te popole moni ea?"

Sa ou nofo latalata i le pito i tua o le potu faatalitali o le Malumalu o Loga Iuta ma, sa faate'ia au, sa ulufale mai i le potu i lena aso le peresitene o le malumalu o Vaughn J. Featherstone, o se ue mamae ia te au. Sa ia tu i le pito i luma o le faapotopotoga ma faafeiloai i matou uma. Ina ua ia iloa mai au faatasi ma tagata ulu, sa ia le toe talanoa, tilotilo mai i o'u mata, ma faapea mai, "Brother Brough, fiafia lava e vaai ia oe i le malumalu i le aso."

O le a le galolava le lagona o lena taimi faigofie. E pei sa faaloaloa mai e le Tama Faalelagi—i lena faafeiloaiga—Lona aao ma fetalai mai, "O A'u lenei."

E popole moni le Tama Faalelagi ma faafogfa ma tali mai i tatalo a tamaiti uma.¹⁵ I le avea ai o se tasi o Lana fanau, ou te iloa o le tali i a'u tatalo sa oo mai i le taimi a le Alii. Ma e ala i lena aafiaga, sa sili atu ona ou malamalama nai lo seisila lava taimi o i tatou o fanau a le Atua ma sa Ia auina mai i tatou iinei ina ia mafai ona tatou lagona Lona faatasi mai i le taimi nei ma ia toe foi atu ma mau faatasi ma Ia i se aso.

Ou te molimau atu, o le Tama Faalelagi e taitai, faasino, ma savali i o tatou autafa. A tatou mulimuli i Lona Alo ma faalogo i Ana auauna, o apusetolo ma perofeta, o le a tatou maua le ala i le ola e faavavau. I le suafa, o Iesu Keriso, amene. ■

FAAMATALAGA

1. "O Le Atua lo'u Tama," *Viiga*, nu. 184.
2. Dieter F. Uchtdorf, "O Lo Tatou Tama, O Lo Tatou Fautua," *Liahona*, Iuni 2016, 5.
3. Alema 41:10.
4. Helaman 13:38.
5. Mosaea 2:24.
6. "Tausi Poloaiga," *Viiga*, nu. 186.
7. Boyd K. Packer, "O Le Epikopo ma Ona Fesoasoani," *Liahona*, Iulai 1999, 72.
8. Ioane 3:16.
9. Tagai Luk 18:22.
10. Mataupu Faavae ma Feagaiga 19:16.
11. Tagai i le Mosaea 18:20.
12. Tagai "Young Men Auxiliary Training," lds.org/callings/aaronic-priesthood/auxiliary-training.
13. Henry B. Eyring, "O Le Perisitua Sauniuni," *Liahona*, Nov. 2014, 61.
14. D. Todd Christofferson, "O Le Mana o Feagaiga," *Liahona*, Me 2009, 22.
15. Tagai "O Le Tatalo a le Tamaitiiti," *Tusipea a Tamaiti*, 12–13.



Elder Weatherford T. Clayton
O Le Fitugafulu

○ Le Fuafuaga Mamalu a lo Tatou Tama

Ona o le fuafuaga paia a le Atua, ua tatou iloa ai o le fanau mai ma le oti ua na o ni taimi iloga ia o la tatou malaga i le ola e faavavau e faatasi ma lo tatou Tama Faalelagi.

le popofou o a'u aoaoga o se fomai, sa ou maua ai le avanoa e fesoasoani ai i se tina talavou e faafanau lana uluai pepe. Sa to'a o ia, gauai, ma fiafia. Ina ua fanau mai le pepe, sa ou tuu atu ia te ia le pepe fou faapelepele. Faatasi ma loimata o le fiafia na tafe ifo i ona fofoga, sa ia avatu le pepe fou, sii i ona lima ma suesue o ia mai le ulu i tamai-vae. Sa ia fusi ia te ia ma alofa ia te ia i le auala e na o le tina na te mafaia. O se faamanuiaga le i ai i totonu o lena potu faatasi ma ia.

E faapena le amataga o le olaga mo i tatou taitoatasi. Ae o lo tatou fanau mai ea o le amataga moni ea lena? E vaai le lalolagi i le fanau mai ma le oti o le amataga ma le gataaga. Ae ona o le fuafuaga paia a le Atua, ua tatou iloa ai o le fanau mai ma le oti ua na o ni taimi iloga ia o la tatou malaga i le ola e faavavau e faatasi ma lo tatou Tama Faalelagi.¹ O ni vaega taua ia o le fuafuaga a lo tatou Tama—o taimi paia ia lea e fesootai ai le olaga faaletino ma le lagi. O le asō, i le mafaufau ai i le mea ua ou aoaoina mai le matauina o le fanau mai ma le oti e ala i le tele o tausaga o faatinoga faafomai ma auaunaga faale-Ekalesia, ou te

fia molimau atu ai e uiga i le fuafuaga mamalu a lo tatou Tama.

"Ae tatou te lei fananau mai, sa tatou mau faatasi ma le Atua, le Tama o o tatou agaga. O [i tatou uma] lava i le lalolagi o ni uso ma tuafafine moni i Lona aiga,² ma e pele i tatou taitoatasi ia te Ia. Sa tatou ola faatasi ma Ia mo se taimi umi lava ae tatou te lei fananau mai i le olaga nei—aoao, filifili, ma saunia.

Ona e alofa le Tama Faalelagi ia i tatou, ua Ia finagalo ai ia tatou maua le





meaalofa aupito silisili e mafai ona Ia foai mai, le meaalofa o le ola e faavavau.³ E le mafai ona tau na ona Ia foai maia lenei meaalofa; sa ao ona tatou taliaina e ala i le filifili o Ia ma Ona ala. Sa manaomia ai i lenei mea lo tatou tuua o Lona afioaga, ma amatalia se malaga matagofie ma luitauina o le faatuatua, tuputupu ae, ma le avea ai. O le malaga na saunia e lo tatou Tama mo i tatou ua ta'ua o le ata o le faaolataga po o le fuafuaga o le fiafia.⁴

I se fono tele i le lagi, sa ta'u mai ai e lo tatou Tama ia i tatou Lona fuafuaga.⁵ Ina ua tatou malamalama i ai, sa tatou fiafia tele lea sa tatou alalaga ai i le olioli, ma "sa pepese faatasi fetu o le taeao."⁶

O lena fuafuaga o loo fausia i luga o ni poutu autu se tolou: o poutu o le faavavau.⁷

O le poutu muamua o le Foafoaga o le lalolagi, o le faatulagaga mo la tatou malaga faaletino.⁸

O le poutu lona lua o le Pa'u o o tatou uluai matua, o Atamu ma Eva. Ona o le Pa'u, sa tuuina mai ai ia i tatou nisi o mea ofoo fogia. Na mafai ai ona tatou fananau mai ma maua se

tino faaletino.⁹ O le a ou faafetai pea e faavavau i lo'u tina mo le aumaia o o'u uso ma a'u i lenei lalolagi ma aoao i matou e uiga i le Atua.

Ua tuuina mai foi e le Atua ia i tatou le fitalia—o le tomai ma le avanoa e filifili ai ma faatino mo i tatou lava.¹⁰ Ina ia fesoasoani ia i tatou ia filifili lelei, na aumai ai e le Tama Faalelagi ia i tatou ia poloaiga. O aso taitasi, pe a tatou tausia Ana poloaiga, ua tatou faaali atu i le Atua tatou te alolofa ia te Ia ma Ia faamanuia ai o tatou olaga.¹¹

I le silafia ai o le a le lelei pea a tatou filifiliga—pe i nisi faaupuga—agasala, na aumai ai e le Tama ia i tatou le poutu lona tolou: o le Faaola o Iesu Keriso ma Lona Togiola. E ala i Ona puapuaga, na totogi ai e Keriso le tau mo le otu faaletino ma le agasala.¹² Sa Ia aoao mai: "Aua ua faapea lava ona alofa mai o le Atua i le lalolagi, ua ia aumai mai ai lona Atalii e toatasi, ina ia le fano se tasi e faatuatua ia te ia, ae ia maua le ola e faavavau."¹³

Na soifua Iesu Keriso i se olaga atoatoa, i le tausiga o poloaiga a Lona Tama i taimi uma. "Na ia femaliuai i auala o Palesitina," aoao atu upumoni

o le faavavau, "faamalolo i e mama'i, faapupula i e tauaso, ma faatutu mai e na otu."¹⁴ Sa Ia "femaliuai ma agalelei"¹⁵ ma "augani atu i tagata uma ina ia mulimuli atu i Lona faataitaiga."¹⁶

I le faaiuga o Lona soifua i la le tino, sa Ia tootuli ai ma tatalo, ma faapea atu:

"Tama e, a e finagalo i ai, ia e ave ese lenei ipu ia te au; a e aua le faia lo'u loto, a o lou finagalo. . . .

"Ua puapuaga o ia, ua atili ai lana tatalo; o lona afu foi ua pei o alualu toto ua pau ifo i le eleele."¹⁷

Ua fesoasoani Keriso ia tatou malamalama atili i le loloto o Ona puapuaga ina ua Ia ta'u atu i le Perofeta o Iosefa Samita:

"O A'u, o le Atua, na mafatia i nei mea mo tagata uma, ina ia latou le mafatia pe afai latou te salamo;

"A e peitai, afai latou te le salamo e ao ina latou tiga e pei o A'u;

"O le tiga lea na faagateteina ai a'u lava, o le Atua, le silisili ese i mea uma, ona o le tiga, ma na maligi ai le toto mai pu laiti uma lava o le tino, ma na tiga le tino atoa ma le agaga."¹⁸

O iina i le Faatoaga o Ketesemane, na amata ai ona Ia totogia le tau mo a



tatou agasala ma ma'i, o tatou tiga ma o tatou vaivaiga.¹⁹ Ona sa Ia faia, o le a le tuua ai lava na o i tatou i na vaivaiga pe afai tatou te filifili e savavali faatasi ma Ia. "Na pue faapagotaina o Ia ma faasalaina i ni tuua'iga sese, na ta'usalaina ina ia faamalie ai le motu o tagata, ma faasalaina i le oti i luga o le satauro i Kalevario." I luga o le satauro "na Ia foai atu ai Lona soifua e togiola ai mo agasala a tagata uma [il] se mealofa maoae e fai ai ma sui mo tagata uma o le a ola ma soifua mai i le lalolagi."²⁰

Sa Ia tautino mai:

"Faauta, o Au o Iesu Keriso, o le na molimau i ai perofeta o le a sau i le lalolagi.

"Ma faauta, o A'u o le malamalamama ma le ola o le lalolagi, ua ou inu foi i lena ipu oona na tuuina mai ia te au e le Tama, ma ua ou faamamaluina le Tama i le aveina i ou luga o agasala a le lalolagi."²¹

Ona oo lea i le uluai aso o le vaisapati,²² sa Ia toetu mai le tuugamau ma se tino toetu atoatoa, e le toe oti lava. Ma ona sa Ia [toetu], o le a faapena foi i tatou.

Ou te molimau atu e moni lava na toetu mai le Keriso mai le tuugamau. Ae ina ia toetu mai lena tuugamau,

sa ao ona maliu muamua o Ia. Ma e faapena foi i tatou.

O le isi o faamanuiaga maoae o lo'u olaga o le lagonaina lea o le latalata mai o le lag i na taimi ou te nofo ai i talaane o moega o nai tagata a o latou maliliu atu. I se taeao po lava i ni nai tausaga ua mavae, sa ou ulufale atu ai i le potu o le falemai o se tina ua oti lana tane o le Au Paia o Aso e Gata Ai na maua i le kanesa. E toalua lana fanau teine sa latou saofafai faatasi ai. A o ou alu atu i talaane o lona moega, sa vave ona ou iloaina e le o toe tigaina o ia, ona faatoa maliu atu lava.

I lena taimi o le maliu, sa faatumulia le potu i le filemu. Sa maua ana tama teine i se faanoanoaga suamalie, ae sa faatumulia o la loto i le faatuatua. Sa la iloaina e le o alu ese atu lo latou tina ae ua toe foi atu i le aiga.²³ E oo lava i o tatou taimi o le loloto sili o le faavauvau, i taimi e foliga mai e le te'a ese faigata ma foliga mai e le fea le olaga, e mafai ona tatou maua le mafanafana i lo tatou Faaola, ona na puapuagatia foi o Ia.²⁴ O se faamanuiaga mo a'u le i ai i totonu o lena potu.

A tatou feoti, e tuua e o tatou agaga o tatou tino ma tatou o atu ai i le isi laasaga e sosoo ai o la tatou malaga,

le lalolagi o agaga. O se nofoaga o aoaoga, salamo, faamagaloga, ma le avea ai²⁵ le nofoaga tatou te faatalitali ai i le Toetutu.²⁶

I se aso sili i le lumanai, o tagata uma na fananau mai o le a toetutu mai le tuugamau. O le a toe faatasia o tatou agaga ma o tatou tino faaletino i lo latou tulaga atoatoa. O le a toetutu tagata uma, "o e matutua ma e talavou, . . . tane uma ma fafine, o e amioleaga ma e amiontonu," ma "o le a toefuataiina mea taitasi i lona tulaga atoatoa."²⁷

A uma le Toetutu o le a tatou maua le faamanuiaga silisili o le faamasinoina e lo tatou Faaola, lea na fetalai mai:

"O le a ou aumai ai tagata uma ia te au, ina ia faamasinoina i latou e tusa ma a latou galuega.

"Ma o le a oo mai foi, o le a faatumina soo se tasi e salamo ma papatiso i lo'u igoa; ma afai e tumau o ia seia oo i le iuga, faauta, o ia lea o le a ou le tausalaina i luma o lou Tamā i lena aso pe a ou tu e faamasino i le lalolagi."²⁸

Ona oo lea, e ala ia Keriso ma Lana Togiola, o i latou uma na filifili e mulimuli ia te Ia e ala i le faatuatua, salamo, papatisoga, taliaina o le Agaga Paia, ma le tumau seia oo i le iuga²⁹ o le a iloaina o le mutaaga o la latou malaga o le mauaina lea "o lo latou taunuuga faalelagi o le avea ma suli o le ola e faavavau."³⁰ O le a latou toefoi atu i le afioaga o lo latou Tama e mau faatasi ma Ia e faavavau. Ia tatou filifili lelei.

E tele lava isi mea sili atu i lo tatou olaga nai lo mea e tutupu i le va o le fanau mai ma le oti. Ou te valaaulia outou ia o mai ma mulimuli ia Keriso.³¹

Ou te valaaulia tagata uma o Le Ekalesia a Iesu Keriso o le Au Paia o Aso e Gata Ai, ia "o mai ia Keriso [i aso uma], ma faaatoatoaina ia te ia, ma faafiti outou lava mai mea uma e le faaleatua, . . . [le] ala i le faamaligiina o le toto o Keriso, . . . [e mafai ai ona] outou paia, ua aunoa ma se ila."³²

Ou te valaaulia i latou e le o ni tagata o lenei Ekalesia ia o mai ma fai tau i le Tusi a Mamona ma faafofoga atu i faifeatalai. O mai ma ia maua le faatuatua ma salamo mai i a outou agasala. O mai ma ia papatisoina, ma maua le Agaga Paia. O mai ma ola i se

olaga fiafia e faatumulia ia Keriso. A o outou o mai ai ia te Ia ma tausi i Ana poloaga, ou te folafola atu e mafai ona outou mauaina le filemu ma le faamoemoega i lenei olaga faaletino ua tele ina faigata atoa ai ma le "ola e faavavau i le lalolagi a sau."³³

Mo i latou ua lagoinaina nei upumoni ma mo soo se mafuaaga lava ua tou se ese ai, ou te valaaulia outou e toefoi mai. Toe foi mai nei. E alofa lo tatou Tama ma le Faaola ia te oe. Ou te molimau atu o loo i ai ia Keriso le mana e tali ai au fesili, faamalolo ai ou tiga ma faanoanoaga, ma faamagalo ai au agasala. Ou te iloa e moni lenei mea. Ou te iloa e moni nei mea uma lava. O loo soifua Keriso; O Lana Ekalesia lenei. I le suafa, o Iesu Keriso, amene. ■

FAAMATALAGA

1. Tagai 2 Nifae 31:18.
2. "Plan of Salvation," Gospel Topics, topics.lds.org.
3. Tagai Matapu Faavae ma Feagaiga 14:7; Moses 1:39.
4. Tagai Alema 42:8.
5. Tagai Aperaamo 3:24-28.
6. Iopu 38:7.
7. Tagai Russell M. Nelson, "Standards of the Lord's Standard-Bearers," *Ensign*, Aug. 1991, 5-6.
8. Tagai 3 Nifae 9:15.
9. Tagai 2 Nifae 2:22-25.
10. Tagai Thomas S. Monson, "O Filifiliga," *Liahona*, Me 2016, 86; "Agency," Gospel Topics, topics.lds.org.
11. Tagai Ioane 14:15, 23; tagai foi Alema 38:1.
12. Tagai Alema 34:8-16.
13. Ioane 3:16; tagai foi Ioane 3:17.
14. "O Le Keriso Soifua: O Le Molimau a le Au Apostolo," *Liahona*, Ape. 2000, 2.
15. Galuega 10:38.
16. "O Le Keriso Soifua," 2.
17. Luka 22:42, 44.
18. Matapu Faavae ma Feagaiga 19:16-18.
19. Tagai Isaia 53:4-6; Alema 7:11-13.
20. "O Le Keriso Soifua," 2.
21. 3 Nifae 11:10-11.
22. Tagai Ioane 20:1.
23. Tagai Alema 40:11.
24. Tagai i le 1 Peteru 2:20.
25. Tagai Matapu Faavae ma Feagaiga 138:57-59.
26. Tagai Alema 40:2-12.
27. Alema 11:44.
28. 3 Nifae 27:15-16.
29. Tagai *Tala'i La'u Talalelei: O Se Taiala mo le Galuega Faafafeautalai* (2004), 1.
30. "O Le Aiga: O Se Folafolaga i le Lalolagi," *Liahona*, Nov. 2010, 129.
31. Tagai 2 Nifae 9:50-51; 31:13.
32. Moronae 10:32-33.
33. Matapu Faavae ma Feagaiga 59:23.



Saunia e Elder Dale G. Renlund
O Le Korama a Apostolo e Toasefululua

O Lo Tatou Leoleo Mamoe Lelei

O lesu Keriso, lo tatou Leoleo Mamoe Lelei, e mauaina le olioli i le silasila mai i Ana mamoe mama'i o agai i luma i le faamalologa.

Tatou te maua sina vaaiga i le uiga o lo tatou Tama Faalelagi pe a tatou iloaina Lona agaalofa na'ua mo tagata agasala ma talisapaia le eseesege Na te faia i le va o le agasala ma i latou e agasala. O lenei vaaiga itiiti e fesoasoani ia i tatou ia maua se "[malamalamamaaga] sa'o o lona tagata, tulaga atoatoa, ma uiga

paia"¹ ma o le faavae lea o le faatinina o le faatuatua ia te Ia ma i Lona Alo, o Iesu Keriso. O le agaalofa o le Faaola e tusa lava po o a o tatou le atoatoa, e tosina atu ai i tatou ia te Ia ma faaosofia ai i tatou i a tatou tauiviga faifai pea ia salamo ma mulimuli ia te Ia. A oo ina tatou avea atili e faapei o Ia, tatou te aoao ia taulimaina





isi e pei ona Ia faia, e tusa lava po o a ni uiga ma ni amioga faaalia.

O le aafiaga o le iloaina o le ese-esega i le va o uiga faaalia o se tagata ma le tagata lava ia e tutotonu i le tusifaitau o le *Les Misérables*, a le tusitala Farani o Victor Hugo.² I le amataga o le tusifaitau, na folasia mai ai e le faamatalaupu o Bienvenue Myriel, le epikopo o Digne, ma talanoaina ai se faafitaupu na feagai ma le epikopo. Pe tatau ea ona ia asiiasi atu i se tagata na tau-tino mai e le talitonu i se Atua ma na inosia e le nuu ana amioga i le tuanai i Vevesiga i Farani?³

Na ta'uua e le faamatalaupu e faapea sa ono mafai lava ona lagona e le epikopo se lagona ita i lea tagata. Ona fai mai lea e le faamatalaupu se fesili faigofie: “Pe tatau ea i le leoleo mamoe ona aluese ona ua papala le mamoe?”⁴ I le tali atu mo le epikopo, na tuu mai ai e le faamatalaupu se tali maoti, “Leai”—ona faaopoopo mai lea o se tala mālie: “Ae ese foi lea mamoe sole!”⁵

I lenei fuaitau, ua faatusatasa ai e Hugo ia “vaivaiga” o le tagata i se faama'i o le pa'u i mamoe ma faatusatasa le epikopo i se leoleo mamoe o le e le aluese pe a faafeagai ma se mamoe ua ma'i. O le epikopo e agaalofa ma mulimuli ane i le tusi na faaalia ai lea lava agaalofa talitutusa mo se isi tagata, le tagata autu i le tusi, o se pagota inosia, o Jean Valjean. O le alofa mutimutivale ma

le agaalofa o le epikopo na uunaia ai Jean Valjean e sui le auala o lona olaga.

Talu ai e faaaoga e le Atua faama'i e fai ma faatusa mo agasala i tusitusiga paia, e talafeagai lava le fesili faapea, “E faapefefa ona tali mai Iesu Keriso pe a feagai ma o tatou faama'i faafatusa—a tatou agasala?” Ae e pei ona fetalai le Faaola Na te “le mafai ona vaai i luga o le agasala ma sina tikeri ititi o le faatagaina”,⁶ e mafai la faapefefa ona Ia silasila mai ia i tatou, i lo tatou le atoatoa, e aunoa ma le aluese atu i le inoino ma le ita?

O le tali e faigofie lava ma manino. I le avea ai ma Leoleo Mamoe Lelei,⁷ e silasila mai Iesu Keriso i faama'i o Ana mamoe o se tulaga e manaomia ia togafitiga, tausiga, ma le agaalofa. O lenei leoleo mamoe, lo tatou Leoleo Mamoe Lelei, e mauaina le olioli i le silasila mai i Ana mamoe mama'i o agai i luma i le faamalologa.

Na muai ta'u mai e le Faaola o le a Ia “fafagaina lana lafu e pei o le leoleo mamoe,”⁸ “sailia foi le ua se, . . . [toe] aumaia le ua tulia, . . . fusia le ua gau, ma . . . faamalosia le [ua] vaivai.”⁹ E ui ina faaalia Isaraelu fouvale i se tulaga ua faataugaina i “manu'a, ma faalavallava, atoa ma le papala ua aati,”¹⁰ o le agasala, ae sa faamalosia pe a le Faaola, apoapoi, ma folafola mai le faamalologa.¹¹

O le galuega a le Faaola i la le tino sa faailogaina moni lava i le alofa, alofa mutimutivale, ma le agaalofa. Sa lei savali o Ia ma le faatauemu i auala pefu o Kalilaia ma Iutaia, ma tau soso mamao ese pe a vaaia tagata agasala. Na te lei aloese mai ia i latou i le faateia tele. Leai, sa Ia talisua faatasi ma i latou.¹² Sa Ia fesoasoani ma faamanuia, siitia ma faagaeetia, ma suia le fefe ma le faanoanoa i le faamoemoe ma le olioli. E pei lava ona avea o Ia ma Leoleo Mamoe Lelei, Na te sailia i tatou ma maua i tatou e ofo mai i ai le toomaga ma le faamoemoe.¹³ O le malamalamama ai i Lona agaalofa ma le alofa o le a fesoasoani lea ia i tatou e faatino le faatuatua ia te Ia—e salamo ai ma faamaloloina.

O loo faamaumauina i le Talalei a Ioane le aafiaga o le agaalofa o le

Faaola i se tagata agasala. Sa aumai e le au Tusiupu ma le au Faresaio i le Faaola se fafine na maua tonu o mulilua. Sa mananao i latou na moliaina o ia e tatau ona fetogi o ia i maa, ia tausisia ai le tulafono a Mose. I le tali atu o Iesu i le tuu fesili mai pea, na iu ai na Ia fetalai atu ia i latou, “O so outou e leai sana agasala, ia lua'i tog i se maa ia te ia.”

Sa o ese atu e na moliaina o ia, “ua tuua na o Iesu lava, ma le fafine o loo tu i totonu.

“Ua silafia [e Iesu] ua leai se tagata, ua na o le fafine lava, ona fetalai atu lea o ia ia te ia, Funia e, o ifea ea i latou na molia oe? ua le faasala mai ea se tasi ia te oe?

“Ua fai mai o ia, Le Alii e, e leai lava se tasi. Ona fetalai atu lea o Iesu ia te ia, Ou te le faasala foi ia te oe; alia ia oe, aua e te toe agasala.”¹⁴

E mautinoa lava, sa lei faatagaina e le Faaola le mulilua. Ae sa Ia le'i faasalaina foi le fafine. Sa Ia faamalosiau ia te ia e toe faafouina lona olaga. Sa faaosofia o ia e sui ona o le agaalofa ma le alofa mutimutivale [o Iesu]. O le Faaliliuga a Iosefa Samita o le Tusi Paia o loo faamaonia ai lona avea mulimuli ane ma soo: “Ma sa vivii atu le fafine i le Atua mai lena itula, ma sa talitonu i lona suafa.”¹⁵

E ui e agaalofa le Atua, ae e le tatau ona tatou talitonu sese Na te taliaina ma manatu e faia ni fetuunaiga i le agasala. Na te le faia lena mea. Na afio mai le Faaola i le lalolagi e laveai i tatou *mai* a tatou agasala ma, o le mea taua, e le mafai ona laveaiina tatou *i a* tatou agasala.¹⁶ O se tagata atamai fai fesili, o Seseroma sa taumafai e mailei Amoleka i le fesili atu: “O le a faaolina ea [e le Mesia o le a afio mai] ona tagata ia latou agasala? Ma sa tali atu Amoleka ma fai atu ia te ia: Ou te fai atu ia te oe e lē faaolaina e ia, ona e lē mafai e ia ona faafitia lana afioga. . . . E le mafai ona ia faaolaina i latou ia latou agasala.”¹⁷ Sa tautala atu Amoleka i se upumoni taua e faapea ina ia faaolaina mai ia tatou agasala, e tatau ona tatou tausisia ia “tuutuuga o le salamo,” lea e faamatuu mai ai le mana o le Togiola e laveai o tatou agaga.¹⁸



O le agaalofa, alofa, ma le alofa mutimutivale o le Faaola e tosina atu ai i tatou ia te ia.¹⁹ E ala i Lana Togiola, ua le toe faamalieina ai i tatou i lo tatou tulaga o le agasala.²⁰ Ua manino lava le Atua i le mea e sa'o ma mea Na te taliaina atoa ai ma mea sese ma le agasala. E le o faia lenei mea ona ua finagalo o Ia ia i ai ni soo usiusitai e aunoa ma le mafaufau. Leai, e finagalo lo tatou Tama Faalelagi ia filifili Lana fanau ma le iloa ma le loto i ai ia avea e pei o Ia¹² ma agavaa mo le ituaiga o olaga o loo Ia olioli ai.²² I le faia o lea mea, e ausia ai e Lana fanau o latou taunuuga paia ma avea ai ma ē mauaina mea uma ua ia te Ia.²³ Mo lenei mafuaaga, e le mafai ai e taitai o le Ekalesia ona fetuunaia poloaiga a le Atua po o aoaoga faavae e feteenai ai ma Lona finagalo, ina ia talafeagai pe lauiloa ai.

Peitai, i la tatou sailiga i le olaga atoa e mulimuli ia Iesu Keriso, o Lana faataitaiga o le agalelei ia i latou o e agasala e patino lava le faagaeetia. O i tatou, o e agasala, e tatau lava, ona pei o le Faaola, e aapa atu i isi i le agaalofa ma le alofa. O la tatou matafaoi foi o le fesoasoani ma faamanuia, siitia ma faagaeetia, ma sua le fefe ma le faanoanoa i le faamoemoe ma le olioli.

E aoa'iina e le Faaola tagata o ē ō ese mai isi ua latou vaai i ai o ni tagata eleelea ma ē e faamasino atu ma le faafiaamitonu i isi ae e sili atu lo latou agasala i lo latou na.²⁴ O le lesona autu lena na faamamafa atu e le Faaola ia i latou na "faatuatua ia te i latou [lava] fa'i

ua amiotonu, a e faaleaogaina nisi." Na Ia fetalai atu i lenei faataoto:

"Na o ae i le malumalu tagata e toalua e tatalo, o le faresaio le tasi, a o le telona le tasi.

Na tulai le faresaio ua tatalo lemu atu i nei upu, Le Atua e, ou te faafetai atu ia te oe, ina ua ou le pei o isi tagata, o e fao mea, o e amio leaga, o e mulilulua, e le pei o lela telona foi.

"E tailua i vaiasosa ona ou anapogi, ou te avatu mea e sefulu a'i mea uma ou te maua.

"O le telona foi, ua tu mamao atu, e le mafai ona tepa ae ona mata i le lagi, a ua pōpō lona fatafata, ua faapea atu, Le Atua e, ia e alofa mai ia te au le tagata agasala."

Ona faamaea lea e Iesu e faapea, "Ou te fai atu ia te outou, na alu ifo lena tagata i lona fale ua ta'uamitonuina, a e le faapea le isi [le Faresaio]; auu o se faamaualuga ia te ia, e faamaulaloina lea; ma o le faamaulalo ia te ia, e faamaualugaina lea."²⁵

Ua manino lava le savali mo i tatou: o se tagata agasala ua salamo e latalata atili atu o ia i le Atua nai lo le tagata faafiaamitonu ua ia ta'usalaina le tagata agasala.

O lagona faaletagata o le faafiaamitonu ma le faamasino atu sa i ai foi i aso o Alema. A o "amata ona faatu atoatoa atili [le tagata] le ekalesia . . . sa amata ona faasolo faamaualuluga tagata o le ekalesia . . . sa amata ona fefete i luga tagata o le ekalesia i le faamaualuluga o

o latou mata, . . . sa amata ona latou inoino, o le tasi i le tasi, ma amata ona latou sauaina ai i latou o ē sa le talitonu e tusa ma o latou lava loto ma filifiliga."²⁶

I lenei sauaga sa patino lava le faasaina: "O lenei sa i ai se tulafono sa'olele i totonus o tagata o le ekalesia, ia leai se tagata e auai i le ekalesia, e tu a'e ma sauaina i latou o e e lē auai i le ekalesia, ma ia leai ni sauaga e i ai i totonus o i latou lava."²⁷ O le mataupu faavae o loo ttaialaina ai le Au Paia o Aso e Gata Ai e tutusa lava. E le tatau ona tausalaina i tatou i le sauaina o soo se tasi i totonus o o fafo atu o le Ekalesia.

O i latou ua sauaina mo soo se mafuaaga ua iloaina lagona e oo i ai o le le fea ma le faailogalanu. A o talavou lava ma nofo ai i Europa i le vaitau o le 1960, sa ou lagonaina le faitioina o a'u ma tauemuina ona o a'u o se Amerika ma ona o a'u o se tagata o le Ekalesia. Sa taulimaina a'u e nisi o tamaiti a'oga e pei o a'u sa nafa patino ma aiaiga faavae le lauiloa a le Iunaite Setete. Sa taulimaina foi a'u e peiseai o la'u tapuaiga o se faatiga i malo sa ou nofo ai ona sa ese mai le tapuaiga lautele a le malo. Mulimuli ane, i le tele o atunuus esesee o le lalolagi, sa tele ni tamai vaaiga i le leaga tele o le faailogalanu ma le faaitau na mafatia ai i latou na osofaia ona o o latou ituaiga po o tagatanuu.

E oo mai sauaga i le tele o ituaiga: faitioga, faasaunoa, faatauemu, tuliesea ma le faisea, po o le inosiaina o le isi tagata. E tatau ona tatou teteet atu i le



faailogalanu lea e siisii ona uiga leaga e faasaga ia i latou e i ai ni manatu eseese. E faailoa mai lava e le faailogalanu ia lava, i fasivaega, i le le manao e faamatuu atu le saolotoga tutusa o le faaaliga o manatu ma lagona.²⁸ O tagata uma, e aofia ai tagata o tapuaiga, ua i ai le aia tatau e faaali ai ona lava manatu i tulaga lautele. Ae e leai ma se tasi e i ai se laisene e itagia ai fua isi a o faaalia na lagona.

Ua tuuina mai i le talafaasolopito o le Eklesia se faamaoniga tele o o tatou tagata sa taulimaina i le ita ma le faailogalanu. E matua faanoanoa tele lava pe afai tatou te taulimaina isi e pei ona sa taulimaina ai i tatou. Sa aoao mai le Faaola, "O mea uma foi tou te loto i ai ia faia e tagata ia te outou, ia faapea lava ona outou faia ia te i latou."²⁹ Mo i tatou e talosagaina le faaaloalogiaina, e tatau ona tatou faaaloalo atu. Ma le isi, o lo tatou liuaina moni lava e aumaia ai le "agamalu ma le maualalo o le loto," lea e valaaulia ai "le Agaga Paia" e faatumuina i tatou i le "alofa atoatoa,"³⁰ se "alofa faamoni"³¹mo isi.

E le masuia lo tatou Leoleo Mamoe Lelei ma lagonaina le ala lava e tasi i le asō e uiga i le agasala ma tagata agasala e pei ona ia lagonaina a o ia savalia le fogaeleele. Na te le aluese lava ma tatou ona ua tatou agasala, e tusa lava pe Na te manatu i nisi taimi, "Ae e ese foi lea mamoe sole!" E alofa tele o ia

ia i tatou lea na Ia saunia ai se ala mo i tatou e salamo ai ma toe faamamaina ina ia mafai ona tatou toefoi atu ia te Ia ma lo tatou Tama Faalelagi.³² I le faia o lea mea, sa faia ai foi e Iesu Keriso le faataitaiga mo i tatou e mulimuli ai—e faaali ai le faaaloalo i tagata uma ma le le inoino i se tasi.

I le avea ai ma Ona soo, ia tatou faataitai atoatoa i Lona alofa ma tatala atoatoa atu le alofa i le tasi ma le isi ina ia le lagonaina ai e se tasi le tuulafoaiina, tuuatoatasi, po o le leai o se faamoemoe. Ou te molimau atu o Iesu Keriso o lo tatou Leoleo Mamoe Lelei, e alofa ia i tatou ma popole mo i tatou. Na te silafia i tatou ma na foai mai Lona soifua mo Ana mamoe.³³ O loo soifua foi o Ia mo i tatou ma finagalo ia tatou iloaina o Ia ma faatino le faatuatua ia te Ia. Ou te alofa ma faamemelo ia te Ia, ma ou te matua faafetai tele mo Ia, i le suafa o Iesu Keriso, amene. ■

FAAMATALAGA

1. *Lectures on Faith* (1985), 38.
2. O le tusi faitau o le *Les Misérables*, a Victor Hugo (1802–85), o loo faamatalaina ai le tala ia Jean Valjean o le sa faia se solitulafono ititi i le gaoiina o se papa falaoa e fagaga ai lona aiga. Sa faasalaina mo le umi e 5 tausaga i le falepuipui, sa faaalu ai e Valjean le 19 tausaga e fai ai galuega mamafaa ona o taumafaiga faafaa e sola ese. Sa aluese mai le falepuipui o se tagata lotomaaa ma maitaita.
3. Ona o ana faamaumauga solitulafono, sa le mafai ai e Valjean ona maua se galuega, meaai, ma se mea e nofo ai. I le vaivai ma le le fiafia, sa iu ai ina ia maua se mea e
4. nofo ai ma epikopo o Digne, o le sa faaali atu ia Valjean le agalelei ma le agaalofa. I le po, sa lolo atu ai Valjean i se lagona o le leai o se faamoemoe ma gaoia ai ia tui, sipuni ma naifi siliva a le epikopo ma solaese ai.
5. Sa pueina ma toe faafoi atu Valjean i le epikopo. I le le mautonu ma le feteenai ma faamoemoega o Valjean, sa tau atu e le epikopo i leoleo sa foai atu ia Valjean ia tui, sipuni ma naifi siliva ma fai atu ia Valjean e ave foi ma moligao siliva e lua. (Tagai Hugo, *Les Misérables* [1987], book 2, chapters 10–12.)
6. Tagai Hugo, *Les Misérables*, book 1, chapter 10.
7. Sa fesili le faamatalaupu, *Toutefois, la gale de la brebis doit-elle faire reculer le pasteur?* (Hugo, *Les Misérables* [1985], book 1, chapter 10, page 67). *Gale*, i suesuega faafomai o faamai o pa'u, e faasino atu ai i soo se itu-aiga o faamai o pa'u e mafua mai i utu sia-ma ma iloagofie i le toulu o fulfulu manu ma papala e oso mai le pa'u ("mange" i le Faa Peretania). O lenei fuaitau ua faaliliuina i le tele o auala i le FaaPeretania.
8. O le faamatalaga malie o le tusiga a le faamatalaupu e uiga i le tagata na auai i le fonotaga o le *Mais quelle brebis!* Ua tele lava ia faaliliuina o le "Ae ese lea mamoe uliuli sole."
9. Mataupu Faavae ma Feagaiga 1:31.
10. Mataupu Faavae ma Feagaiga 50:44.
11. Isai 40:11.
12. Esekiel 34:16.
13. Isai 1:6.
14. Tagai Isaia 1:18.
15. Tagai Luk 15:1–2.
16. Tagai Mataio 18:11.
17. Tagai Ioane 8:3–11.
18. Faafiliuga a losefa Samita, Ioane 8:11 (i le Ioane 8:11 vaefaaamatalaga i).
19. Mataupu D.Todd Christofferson, "Tumau i Lo'u Alofa," *Liahona*, Nov. 2016, 48.
20. Alema 11:34, 37.
21. Tagai Helaman 5:10–11.
22. Tagai Nifae 27:14–15.
23. Iaso nei, ua faamanino mai ai e le Faaola: "O ia o lē e solia se tulafono, ma lē ola i le tulafono, ae saili e avea ma se tulafono ia te ia lava, ma loto e ola i le agasala, ma ola atoa i le agasala, e lē mafai ona faapaiaina i le tulafono, pe i le alofa mutimutivale, faamasinotonu, po o le faamasinoga. O lea, o le a tumau pea i latou i le eleelea." (Mataupu Faavae ma Feagaiga 88:35).
24. Tagai2 Nifae 2:26–27.
25. Tagai Mataupu Faavae ma Feagaiga 14:7; 132:19–20, 24, 55.
26. Tagai Roma 8:16–17; Mataupu Faavae ma Feagaiga 84:38.
27. Tagai Mataio 23:13.
28. Tagai Luka 18:9–14.
29. Alema 4:4, 6, 8.
30. Alema 1:21.
31. Tagai Oxford English Dictionary, "bigotry" ma le "intolerance," oed.com.
32. Mataupu Faavae o le Faatuatua 1:3.
33. Tagai Ioane 10:11–15.



Saunia e Elder Ulisses Soares
O Le Au Peresitene o Fitugafulu

Ta'u Atu i le Atua ma le Le Masalosalo

Afai tatou te tumau ma aua le masalosalo i lo tatou faatuatua, o le a faateleina e le Alii lo tatou gafatia e siitia ae ai i tatou lava i luga o luitau o le olaga.

Uso e ma tuafafine pele, ou te fia amata la'u savali i le asō i le molimau atu ou te iloa o Peresitene Thomas S. Monson o le perofeta a le Atua i o tatou nei aso. O ona fesoasoani i le Au Peresitene Sili ma Aposetolo e Toasefululua, e moni lava, o ni perofeta, tagatavaai, ma talifaaaliga foi. Latou te fai ma sui o le Alii o Iesu Keriso ma ua i ai le aia tatau e folafola atu Lona mafaufau ma Lona finagalo e pei ona faaalia ia i latou. Ou te molimau atu o loo i ai le saogalemu i le mulimuli i a latou fautuaga. Ua musuia i latou e le Alii ina ia faamamafa mai le faamalosia o lo tatou faatuatua i le Tama Faalelagi ma i Lona Alo, o Iesu Keriso, ma Lana Togiola ina ia aua ne'i o tatou masalosalo pe a tatou fetaiai ma luitau o o tatou aso.

I le Tusi a Mamona tatou te faitau ai i se alii e igoa ia Amona lea na auina atu mai le laueelele o Saraemila i le laueelele o Liae-Nifae e fesili e uiga i ona uso. Na ia maua ai iina le Tupu o Limae ma lona nuu, o loo nofopologa ia sa Lamana. Sa uunaia le Tupu o Limae i mea sa faasoaina e Amona ia te ia e uiga i lona nuu i Saraemila. Na

ma auauna atu ia te ia ma le filiga atoa o le mafaufau, . . . o le a laveaiina outou e ia e tusa ma lona lava loto ma lona finagalo, i fafo mai le pologa.”¹

Na matua aafia lava le faatuatua o le nuu o le Tupu o Limae i upu a Amona o lea sa latou osifeagaiga ai ma le Atua e auauna atu ia te ia ma tausi Ana poloaiga, e ui lava i o latou tulaga faigata. Ona o lo latou faatuatua, sa mafai ai ona latou faia se fuafuaga e sosolaese ai mai lima o le au sa Lamana.²

Uso e ma tuafafine, faamolemole mafaufau i le taua o le valaaulia na tuu atu e le Tupu o Limae i lona nuu ma lona fitoitonu ia i tatou. Na fai mai o ia, “O lea, ia ea i luga o outou ulu, ma ia olioli, ma tuu atu lo outou faalagolago i le Atua.” Faatasi ai ma nei upu, na valaaulia e Limae lona nuu ia tagai i le taimi nei ma i le lumanai e ala i mata o le faatuatua; ia sui o latou popolega i le talitonuga i le faamoemoe e fanau mai le faatuatua; ma aua le masalosalo i le tuuina atu o lo latou faatuatua i le Atua e ui i o latou tulaga.

O le olaga faaletino o se taimi o le tofotofoga ma o le a tofotofoina ai i tatou e vaai pe tatou te faia mea uma ua poloaiina ai i tatou e le Alii lo tatou Atua.³ E manaomia e lenei mea le faatuatua le femoumoua’i ia Keriso e oo lava i taimi o le luluti o faigata. O le

faatumulia lona loto i se faamoemoe ma le olioli tele lea na ia faapotopoto ai lona nuu i le malumalu ma faapea atu:

“O lea, ia ea i luga o outou ulu, ma ia olioli, ma tuu atu lo outou faalagolago i le Atua. . . .

“. . . Ae afai tou te liliu atu i le Alii ma le faamoemoe atoa o le loto, . . . ,



a manaomia lo tatou fetaomi atu i luma ma le tumau i le faatuatua ia Keriso, tai-alaina e le Agaga ma faalagolago atu o le a tausia e le Atua o tatou manaoga.⁴

I le faaiuga o Lana galuega faalelalolagi, a o lumanai le faapagotaina, na aoao atu e le Faaola Ona soo: “E maua foi outou e le puapuaga i le lalolagi, a ia outou loto tetele, ua ou manumalo i le lalolagi.”⁵

Mafaufau loloto faatasi ma a'u mo sina taimi—o Iesu Keriso, le Alo e Toatasī na Fanaua a le Tama, na soifua i se olaga e leai se agasala ma na manumalo i faaososoga, tiga, luitau, ma mafatiaga uma o le lalolagi. Na afu toto o Ia i Ketesemane; Na Ia mafatia

i tiga matautia e le mafaamatalaina. Na Ia tauaveina i Ona lava luga o tatou tiga ma ma'i. Ua tu o Ia e saunia e fesoasoani mai—e fesoasoani ia i tatou taitoatasī—i avega uma. E ala atu i Lona soifuaga, mafatiaga, malu, ma le Toetu, ua Ia aveesea ai papuipui uma i lo tatou fiafia ma le mauaina o le filemu i lenei lalolagi. O faamanuiaga o Lana taulaga Togiola ua faasafua atu ia i latou uma o e ua taliaina o Ia ma faagalo i latou lava faapea ma i latou o e tauave Lana satauro ma mulimuli atu ia te Ia e avea ma Ona soo moni.⁶ O le mea lea, a tatou faatuatua ia Iesu Keriso ma Lana Togiola, o le a faamalosia i tatou, o le a māmā a tatou avega, ma

e ala atu ia te Ia o le a tatou manumalo i le lalolagi.

Uso e ma tuafafine, ao tatou mafau-fau i le malosi ma le faamoemoe lea e mafai ona tatou maua mai le Faaola, ua ia i so tatou faamoemoe e sii ae o tatou ulu, olioli, ma agai i luma i le faatuatua e aunoa ma le masalosalo, “aua o lē masalosalo e tusa ia ma le peau o le sami ua sousou i le matagi ma felafola-foaiina. . . . O le tagata faalotolotolua e faaletumau ia i ona ala uma.”⁷

Na uunaia foi i tatou e le Tupu o Limae, “Tuu atu lo outou faalagolago ia te ia, . . . ma auauna atu ia te ia ma le filiga *atoa* o le mafaufau, afai tou te faia lena mea, o le a laveaiina outou e ia e tusa ma lona lava loto ma lona finagalo, i fafo mai le pologa.”⁸

Faalogo i upu a le Faaola a o Ia aioi mai ia i tatou:

“Aua le atuatuvalo o outou loto, ia outou faatuatua i le Atua, ia faatuatua mai foi ia te a'u. . . .

“Afai tou te alofa mai ia te a'u, ia outou tausi mai i a'u poloaiga. . . .

“O le ua ia te ia a'u poloaiga ma tausī i ai, o ia lea e alofa mai ia te a'u: o lē alofa mai foi ia te a'u e alofaina o ia e lo'u Tama, ou te alofa foi ia te ia, ma ou faaali ia te ia.”⁹

E faamanuiaina i tatou e le Atua e tusa ma lo tatou faatuatua.¹⁰ O le faatuatua o le puna lea o le ola i se faamoemoea paia ma se vaaiga e faavavau. O le faatuatua o se mataupu faavae aoga e musuia ai le maelega. O se malosiaga taua ma ola o loo faaalia i o tatou uiga lelei ma manao ai ina ia faia ma le naunautai mea uma ua manaomia e le Atua ma Iesu Keriso mai ia i tatou. E avatu ai i tatou i o tatou tulivae ia ole atu i le Alii mo le taitaiga ma ia tulai ae ma faatino ma le talitonuga, ina ia ausia mea ia ogatusa ma Lona finagalo.

I tausaga ua mavae a o galue ai o se peresitene o le misiona, sa ou maua se valaau mai le telefoni mai matua o se tasi o matou faifeautalai pele na tau mai ai ia te a'u e uiga i le maliu o lona tuafafine. Ou te manatua, i le lagona maaleale o lena taimi, na ma talanoa ai ma lena faifeautalai i le ata ofoofogia o le faaolataga a le Atua mo Ana fanau



ma le auala o le a faamafanafana ai o ia e lenei malamalama.

E ui ina sa lofituina o ia ma faanoa-noa i lena mea faigata, ae sa olioli lena faifeautalai—e ala atu i ona loimata ma le faatuatua i le Atua ma Lana fuafuaga sili o le fiafia—i le olaga o lona tuafafine. Sa ia faaalia le lototeli e le masalosalo i le alofa mutimutivale o le Alii. Ma le mautinoa, sa ia tau mai ia te a'u o le a faaaaua peea ona ia auauna atu i lana misiona ma le faatuatua ma le maelega atoatoa ina ia mafai ona agavaa i folafolaga ua i ai i le Atua mo ia ma lona aiga. I lenei taimi o mafatiaga, na liliu atu le loto o lena fai-fautealai faamaoni i le Atua, tuu atoa atu lona faalagolago atoa ia te Ia, ma faafou lona tautinoga e auauna atu i le Alii ma le faamaoni ma le filiga atoa.

Uso e ma tuafafine, afai tatou te le mauaa i le faalagolago mausali atu i le Atua ma naunau e auauna atu ia te Ia ma le filiga atoa, e mafai e aafiaga tiga o le olaga faaletino ona taitai atu i tatou ia lagona e peiseai ua mamafatu i tatou i se avega mamafa; ma e mafai ona tatou ma'umauina ai le uunaiga e ola atoatoa ai i le talalelei. A aunoa ma le faatuatua, o le a iu ina tatou ma'umauina le gafatia e talisapaia ai na mamanu a lo tatou Atua e faatatau i mea o le a tutupu mulimuli mai i o tatou olaga.¹¹

I nei taimi o tofotofoga, o le a tau-mafai le fili—lea o loo taulamalama mai pea—e faaaoga o tatou mafaufauga ma filifiliga e faasagatau ai ia i tatou. O loo ia taumafai e faatalitonu i tatou e leai se aoga o le ola i mataupu faavae o le talalelei. Uso e ma tuafafine, faamolemole ia manatua e “le talia e le [mafaufau o le tagata natural] mea a le Agaga o le Atua: aua o mea valea ia ia te ia.”¹² Manatua o le tiapolo “o se fili [o] le Atua, ma ua faasagatau pea ia te ia, ma ua valaau ma faatosina [i tatou] i le agasala, ma ia latou faia pea le mea leaga.”¹³ E le tatau ona tatou faatagaina o ia e faasese i tatou; aua a tatou faia, o le a vaivai lo tatou faatuatua ma aveesea ai le mana e maua ai faamanuiaga a le Atua.

Afai tatou te tumau ma aua le masalosalo i lo tatou faatuatua, o le a faateleina e le Alii lo tatou gafatia e siitia ae ai i tatou lava i luga o luitau o le olaga. O le a mafai ona tatou faatoilaloina manaoga



le lelei ma o le a tatou atiae le gafatia e foia ai, e tuna lava pe foliga e, lofituina ia faafitauli. O le mea lea na mafai ai e le nuu o le Tupu a Limae ona faia se solaaga mata'ina mai lo latou nofopologa ia sa Lamana.

Uso e ma tuafafine, ou te valaaulia outou e tuu atu lo outou faalagolago i le Atua ma i aoaoga o Ana perofeta. Ou te valaaulia outou ina ia faafou a outou feagaiga ma le Atua, ia auauna atu ia te Ia ma tou loto atoa, e ui i faigata o le olaga. Ou te molimau atu ia te outou o le mana o lo outou faatuatua ma le masalosalo ia Keriso, o le a outou saoloto ai mai le pologa i le agasala, masalosalo, lē talitonu, lē fiafia, mafatiaga; ma o le a outou mauaina uma faamanuiaga folafolaina mai lo tatou Tama Faalelagi alofa.

Ou te molimau atu e moni le Atua. O loo soifua o Ia. E alofa o Ia ia i tatou. E faafogoa o Ia i a tatou tatalo i o tatou taimi o le fiafia faapea ma le masalosalo, faanoanoa, ma le popole tele. Ou te molimau atu o Iesu Keriso o le Faaola o le lalolagi. O Ia o le Togiola.

E faaiu atu la'u tautalaga i le asō i upu o se pese “Not Now by in the Coming Years,” o loo maua i le tusipese Potukale:

*Afai o ao ae le o le la e faapaoloa o matou loto,
Afai o tiga matou te mafatia ai, e le afaina; o le a le pine ae matou iloa Oe.
E taiala i tatou e Iesu i Ona aao, ma o le a Ia ta'u mai pe aisea;
Afai tatou te faalogo i Lona siufogoga, o le a Ia tau mai pea lava pea.
Ta'u atu i le Atua ma le le masalosalo, ma tuu atu ia te Ia e tauis i tatou; Pese atu pea Lona mamalu, aua o le a Ia tau mai mulimuli ia i tatou.¹⁴*

Ou te fai atu ai nei mea i le suafa paia o Iesu Keriso, amene. ■

FAAMATALAGA

1. Mosaea 7:19, 33.
2. Tagai Mosaea 21:32; 22:1-14.
3. Tagai Aperaamo 3:25.
4. Tagai 1 Nifae 4:6-7; 2 Nifae 31:20.
5. Ioane 16:33.
6. Tagai Luka 9:23.
7. Iakopo 1:6, 8.
8. Mosaea 7:33; faaopoopo le faamamafa.
9. Ioane 14:1, 15, 21.
10. Tagai 2 Nifae 27:23; Alema 37:40; Eteru 12:29.
11. Tagai Mataupu Faavae ma Feagaiga 58:3.
12. 1 Korinito 2:14.
13. Moronae 7:12.
14. “Not Now but in the Coming Years,” faali-luina mai le “Agora não, mas logo mais,” Tusipese i le FaaPotukale, nu. 156.



Saunia e Elder Mark A. Bragg
O Le Fitugafulu

Tupu Susulu Pea Lava Pea seia oo i le Aso e Atoatoa Ai

E oo lava i taimi sili ona faigata ma pogisa, e i ai lava le malamalama ma le agalelei o siomia ai i tatou.

Sa faasoa atu e Paulo se savali matagofie o le faamoemoe i Korinto:

“Ua puapuagatia i matou i mea uma, a e le faaatuatuvalaueina; ua fememeai, a e le matua fememeai;

“Ua sauaina, a e le tuulafoaiina; ua lafotuina i lalo, a e le fano.”¹

O le a le puna o le faamoemoe o Paulo? Faalogo i lana faamatalaga: “Aua o le Atua o le na fai atu ia pupula mai le malamalama mai le pouliuli, ua faapupula mai e ia i o matou loto, ina ia malamalama e iloa ai le mamalu o le Atua i fofoga o Iesu Keriso.”²

E oo lava i taimi sili ona faigata ma pogisa, e i ai lava le malamalama ma le agalelei o siomia ai i tatou. Ia Oketopa ua tuanai atu, sa faamanatu mai ai e Peresitene Dieter F. Uchtdort ia i tatou, “O loo siomia i tatou e se tamaoaiga ofoofogia tele o le malamalama ma le upumoni lea ou te tomanatu ai pe o tatou talisapaiaina moni ea mea ua tatou maua.”³

Ae peitai, e manao le fili ia tatou tauai i “puao o le pogisa . . . ia e faatauaso

e mauaina le malamalama, ma tumau pea i le Atua, e mauaina le malamalama atili; ma o lena malamalama o le a tupu susulu malamalama tele pea lava pea seia oo i le aso e atoatoa ai.”⁵

O i tatou o fanau a le Atua. O le mauaina o le malamalama, tumau pea i le Atua, ma le mauaina o isi malamalama o mea ia na foaoaina ai i tatou e fai. Mai i le amataga, sa tatou mulimuli i le malamalama, sa tatou mulimuli i lo tatou Tama Faalelagi ma Lana fuafuaga. O le sailia o le malamalama o loo i totonu o i tatou.

Sa ou faalogo o aoaoina ma le matagofie lenei upumoni e faavavau i se nofoaga e lei mafaufauina. A o o’u galue ai mo se faletupe tele, sa valaauilia au e auai i se polokalama faapitoa i le Iunivesite o Michigan. I le taimi o le polokalama, sa aoao e Polofesa Kim Cameron le manatu faavae o le taitaiga lelei ma ona aafiaga o le malamalama. Sa ia faamatala: “E faasino lenei mea i le fegauiaiga i vaega uma o loo feola agai i le [malamalama] malosi e lelelei ma o ese mai le [pogisa] malosi e lelelei. Mai meaola ninii e taitasi sela (cell) e oo atu i le lavelave o totoga faaletagata, o mea uma e ola e i ai se manao faale-natura ia agai atu i ni mea lelei ma alu ese mai le mea e lelelei.”⁶

I le lagolagoina ai e le tele o suesuga, sa ia taulai foi i vaega taua e tolu

ai mata, . . . faamaaa . . . loto . . . , ma . . . taitai . . . ese atu ai.”⁴

Ae, faatasi ai ma le malamalama atoatoa i luitau o o tatou aso, sa folofola mai le Alii, “O le mea e mai i le Atua o le malamalama lea; a o ia o le



o se aga manuia o falefaigaluega: agaloa, faamagaloga, ma le loto faafetai.⁷ E matua sao atoatoa le faapea, a o liliu atu tagata agai i le (malamalama) lelei, o loo i ai ia uiga e atoatoa ona faaalia e le Malamalama o le Lalolagi, o Iesu Keriso!

Uso e ma tuafafine, faamolemole ia maua le mafanafana o loo avanoa mai le malamalama mo i tatou. Tau ina ou fuitua atu ni vaega se tolu lea o le a tatou maua ai *pea* le malamalama:

1. O Le Malamalama o le Ekalesia

O le Ekalesia o se sulu o le malamalama i se lalolagi pogisa. O se avanoa lelei lenei e avea ai o se tagata o Le Ekalesia a Iesu Keriso o le Au Paia o Aso e Gata Ai! Ua sili atu le malosi o le Ekalesia i lo seisi taimi⁸ ma e tupu malosi moni i aso taitasi a o auai mai tagata fou, fatuina faalapotopotoga fou, valaauna faifeautalai fou, ma tatalaina teritori fou i le talalelei. Tatou te vaaia i latou o e ua le o toe toaaga i le Lotu mo se taimi ma toe foi mai a o aumaia e le laveai na mafaufauina e Peresitene Thomas S. Monson ni vavega i aso taitasi.

Sa ou asiasi atu talu ai nei i le autalavou i Parakuei, Iurukuei, Chile, ma Atenitina i le taimi o le latou konafesi o le Mo Le Malosi o le Autalavou. Sa faaaluina e le faitau afe ma afe o alii ma tamaitai talavou se vaiaso e faamalolosia ai lo latou alolofa i le Faaola ma toe foi atu i o latou aiga ma uo ma faasusulu atu le malamalama ma le alofa o Keriso.

Vaai, o le a ai pea lava tagata e fai-tio i le Ekalesia. Sa faapena lava mai le amataga ma o le a faaauau ai pea e oo i le iuga. Peitai tatou te le faatagaina ia faitioga e faavaivaia ai lo tatou mauaina gofie o le malamalama ua avanoa mo i tatou. O le iloaina o le malamalama ma le sailia o le a tatou agavaa ai mo le malamalama sili atu.

I se lalolagi pogisa, o le a tupu susulu pea le *malamalama o le Ekalesia* seia oo i le aso e atoatoa ai.

2. O Le Malamalama o le Talalelei

O le malamalama o le talalelei o le ala e “[susulu pea lava pea e oo i le



aso e atoatoa ail]”⁹ ma e matua susulu lava i o tatou aiga ma i malumalu i le lalolagi atoa.

Ua taua e le *Tala'i La'u Talalelei*: “O le malamalama o le talalelei, e mafai ai e aiga ona foia ni feesesea'iga, fefinua'iga, ma luitau. O aiga ua mavaevae i le feesesea'i e mafai ona faaleleia e ala i le salamo, faamagaloga, ma le faatuatua i le mana o le Togiola a Iesu Keriso.”¹⁰ Ia sili atu nei i lo se isi lava taimi, le tatau ona avea o o tatou aiga ma puna o le malamalama sili i tagata uma o siomia i tatou. E faateleina le

malamalama i aiga a o latou faateleina le alofa ma le agalelei. A o tatou atiaeina ni aiga o le “faatuatua, . . . salamo, faamagaloga, faaloalo, alofa, [ma le] agalelei,”¹¹ tatou te lagona se alofa faateleina agai i le Faaola ma i le tasi ma le isi. O le a tupu malosi atu le aiga, ma o le a tupu susulu atili le malamalama ia i tatou taitoatas.

Tatou te faitau i le Lomifefilo o le Tusi Paia, “ua na o le aiga e mafai ona faatusalia i le malumalu le paia.”¹² Ua i ai nei a tatou malumalu e 155 o loo faagaoioia ma isi o le a vave oo mai. E tele

ma anoanoai aiga e faamauina mo le olaga nei ma le faavavaau atoa. Ua auina mai e tagata le tele ma le tele o igoa o tuua i le malumalama e faatino ai o latou sauniga faaola. O loo tatou lagonaina moni le olioli sili ma le fiafiaga i itu uma o le veli!

I se lalolagi pogisa, o le a tupu susulu pea le *malamalama o le talalelei* seia oo i le aso e atoatoa ai.

3. O Le Malamalama o Keriso

E le mafai ona e talanoa i le malamalama i le lalolagi e aunoa ma le talanoa i le Malamalama o le Lalolagi, o Iesu Keriso. O se faailoaga o se Tama Faalelagi alofa e faapea, o tagata uma e o mai i lenei olaga ua faamanuiaina i le Malamalama o Keriso e fesoasoani ai ia i latou e toe foi i le aiga. Na aoao mai Peresitene Boyd K. Packer: “O le Agaga o Keriso e i ai lava iina. O le Malamalama o Keriso e mo le lalolagi atoa e pei o le susulu o le la lava ia. Soo se mea lava o i ai le tagata ola, o loo i ai foi le Agaga o Keriso.”¹³ O le Malamalama o Keriso e “valaau ma faatosina mai ia faia mea lelei e le aunoa”¹⁴ ma saunia tagata uma o e saili le mea lelei ma le upumoni ia maua le Agaga Paia.

Ua aoao mai le Faaola o Ia o le malamalama e “faamalamalamaaina o outou mata,” “faapupulaina o outou malamalamaaga,” ma “tuuina le ola i mea uma.”¹⁵ O le Malamalama o

Keriso o le a fesoasoani ia i tatou e vaai ai i isi e ala i fofoga o le Faaola. O le a atili ona tatou alolofa ma malamalama ai i tauiviga a isi. O le a fesoasoani ia i tatou ia onosai atili ia i latou o e atonu e le mafai ona tapuai e pei ona tatou tapuai pe auauna atu e pei ona tatou mafaia. O le a fesoasoani ia i tatou ia malamalama atoatoa atili ai i le fuafuaga sili o le fiafia ma vaai i le auala tatou te avea uma ai ma se vaega o lena fuafuaga alofa. E avautua le ola, uiga, ma le faamoemoega i mea uma tatou te faia. I le taimi nei, faatasi ai ma le fiafiaga atoa o le a oo mai ia i tatou pe a tatou malamalama atoatoa atili i le Malamalama o Keriso, e le mafaatusaliaina i le olioli tatou te lagonaina pe a tatou vaaia le Malamalama o Keriso o galue i isi—aiga, uo, e oo lava i tagata ese.

Sa ou lagona lena olioli ina ua ou faalogo e uiga i taumafaiga a se vaega o tineiafi totoa o e sa taumafai e faasao se nofoaga autu o se siteki sa mu i Saute Kalefonia i le 2015. A o sasao le afi, sa valaau e se taitaiau sana uo o le Ekalesia e fesili i ai po o fea sa teu ai mea paia ma ipu o le faamanatuga ina ia mafai ona faasaoina i latou. Sa faamautinoa atu e lana uo ia te ia e leai ni mea paia ma o ipu o le faamanatuga e mafai tele lava ona toe sui. Ae sa lagona e le taitai e tatau ona ia faia se mea sili atu, lea sa ia toe auina atu ai le

au tineiafi i totolu o le fale o loo mu e aveese mai ata vali uma o Keriso mai puipui ina ia faasaoina. Sa latou tuu foi se [ata vali o Keriso] e tasi i totolu o le loli fuimu ma le faamoemoe o le a mafai ona leoleoina le au tineiafi. Sa ou ootia moni i le agalelei, agaalofa, ma le mauaina gofie e le taitaiau o le Malamalama, i se taimi matautia ma faigata.

I se lalolagi pogisa, o le a tupu susulu pea le *Malamalama o Keriso* seia oo i le aso e atoatoa ai!


Ou te toe faaleo atu upu a Paulo: “Ia tatou oofu i ofu tau o le malamalama.”¹⁶ Ou te molimau atu e uiga ia Keriso. O Ia o le Malamalama o le Lalolagi. Tau ina ia faamalosia i tatou e ala i le malamalama o loo avanoa mo i tatou e ala i le auai atili i le lotu ma le faaaogaina atili o mataupu faavae o le talalelei i o tatou aiga. Tau ina ia tatou vaaai soi i le Malamalama o Keriso i isi ma fesoasoani ia i latou ia vaaia i totolu o i latou lava. A o tatou mauaina lena malamalama, o le a faamanuiaina i tatou i isi malamalama, seia oo i le aso atoatoa pe a tatou toe vaaia “le Tama o malamalama,”¹⁷ lo tatou Tama Faalelagi. Ou te molimau atu ai i le suafa paia o le Malamalama o le Lalolagi, o Iesu Keriso, amene. ■

FAAMATALAGA

1. 2 Korinito 4:8–9.
2. 2 Korinito 4:6.
3. Dieter F. Uchtdorf, “E, Le Sili Siliese Na’ua o le Fuafuaga a lo Tatou Atual!” *Liahona*, Nov. 2016, 20.
4. 1 Nifae 12:17.
5. Mataupu Faavae ma Feagaiga 50:24.
6. Kim Cameron, *Positive Leadership: Strategies for Extraordinary Performance*, 2nd ed. (2012), xii; tagai foi Kim S. Cameron, “Leading with Energy,” Wheatley Institution Fellow Notes, Feb. 17, 2017, wheatley.byu.edu.
7. Tagai Kim Cameron, *Positive Leadership*, 33, 36, 39.
8. Tagai Quentin L. Cook, “O Le Alii o Lou Malamalama Ia,” *Liahona*, Me 2015, 65.
9. Faataoto 4:18.
10. *Tala’i La’u Talalelei: O Se Taiala mo le Galuega Faafaifeautalai* (2004), 3.
11. “O Le Aiga: O Se Folafolaga i le Lalolagi,” *Liahona*, Nov. 2010, 129.
12. Bible Dictionary, “Temple.”
13. Boyd K. Packer, “O Le Malamalama o Keriso,” *Liahona*, Ape. 2005, 13.
14. Moronae 7:13.
15. Mataupu Faavae ma Feagaiga 88:11, 13.
16. Roma 13:12.
17. Iakopo 1:17; Mataupu Faavae ma Feagaiga 67:9.



Faasaoina e se tineiafi se atavalu o le Faaola mai se nofoaga autu o le siteki i Kalefonia, ISA o loo mu.



Saunia e Peresitene Russell M. Nelson
Peresitene o le Korama a Aposetolo e Toasefululuā

Mauaina o le Mana o Iesu Keriso i o Tatou Olaga

O le talalelei a Iesu Keriso ua faatumulia i Lona mana, lea ua avanoa i afafine po o atalii uma o le Atua e saili atu ma le naunautai.

Ou uso e ma tuafafine pele, ua tatou ola i se tisipenisione ua sili ona faigata. O luitau, feteeniga, ma faigata ua siomia ai i tatou. O nei taimi faigata na muai vaaia lava e le Faaola. Na Ia lapataia i tatou e faapea i o tatou aso o le a faaoso ai e le fili le ita i loto o tagata ma taitai ese atu ai i latou.¹ Ae, sa lei faamoemoe lava lo tatou Tama Faalelagi o le a tatou taulimaina na o i tatou lava ia fenumiaiga o faafitauli faaletagata lava ia ma faafitauli faalemaloo.

E matua alofa lava le Atua i le lalolagi ua Ia auina mai ai Lona Alo e Toatasi na Fanaua² e fesoasoani ia i tatou.³ Ma o Lona Alo, o Iesu Keriso, na foai maia Lona soifua mo i tatou. Ina ia mafai ai ona tatou maua le mana faaleatua—le mana lea ua lava e taulimaina ai avega, faafitauli, ma faaosoosoga o o tatou aso.⁴ O le asō, ou te fia talanoa atu ai e uiga i le *auala* e mafai ona tatou maua ai i o tatou olaga le mana o lo tatou Alii ma le Matai, o Iesu Keriso.

Tatou te amata e ala i le aoao e uiga ia te Ia.⁵ “E le mafai lava ona faaola-inia [i tatou] i le lē iloa” o se mea.⁶ O le faateleina o lo tatou iloa e uiga i le galuega ma le misiona a le Faaola⁷—o

le faateleina lea o lo tatou malamalamā i Lana aoaoga faavae⁸ ma le mea na Ia faia mo i tatou—o le faateleina foi lena o lo tatou iloaina e mafai ona Ia auina mai le mana lea tatou te manaomiaina mo o tatou olaga.

I le amataga o lenei tausaga, sa ou talosagaina ai talavou matutua o le Ekalesia ia faapaiaina se vaega o lo latou taimi i vaiaso taitasi e suesue ai i *mea uma* na fetalai ai Iesu ma fai e pei ona tusia i tusitusiga faavae.⁹ Sa ou valaaulaina i latou ia avea ia mau o tusitusiga paia e uiga ia Iesu Keriso o loo i le Taiala i Tusitusiga Paia ma a latou mataupu aoaoina autu faaletagata lava ia.¹⁰

Sa ou tuu atua lena lu'i ona ua uma ona ou taliaina e a'u lava ia. Sa ou faitauina ma vase lalo o fuaiupu *uma* o loo ta'uua ai Iesu Keriso, e pei ona lisiina i lalo o ulutala autu ma soa ulutala e 57 i le Taiala i Tusiusiga Paia.¹¹ Ina ua ou faamaeaina lena galuega, sa fesili mai lo'u toalua ia te a'u po o le a se aafiaga ia te au o lena mea. Sa ou ta'u atu ia te ia, “O a'u o se tagata ua sui!”

Sa ou lagonaina se tuuto ua faafouina ia te Ia a o ou toe faitauina i le Tusi a Mamona le fetalaiga a le Faaola lava Ia e uiga i Lana misiona i la le tino. Sa Ia tautino mai:

“Ua ou sau i le lalolagi e fai le finagalo o lo'u Tama, aua na auina mai a'u e lo'u Tama.

“Ma na auina mai au e lou Tamā ina ia sii ae au i luga o le satauro.”¹²



I le avea ai ma tagata o le Au Paia o Aso e Gata Ai, tatou te faasino atu i Lana misiona o le Togiola a Iesu Keriso, lea ua mafai ai ona avea le toetutu o se mea moni mo tagata uma ma ua mafai ai ona maua le ola e faavavau e i latou o e salamo i a latou agasala ma taliaina ma tausia ia sauniga ma feagaiga taua.

E le atoatoa le aoaoga faavae pe a tautalagia le taulaga togiola a le Alii e ala i fasifuitau pupuu e pei “o le Togiola,” po o “le mana gafatia o le Togiola,” po o le “faaaogaina o le Togiola,” po o le “faamalosia e ala i le Togiola.” O nei faaupuga e aumaia ai se tulaga lamatia o le taitaiseseina o lo tatou faatuatua e ala i le taulimaina o le *mea na tupu* e peiseai na i ai *sona* lava ia ola ma gafatia e tutoatasi ai mai

lo tatou Tama Faalelagi ma Lona Alo, o Iesu Keriso.

I lalo o le fuafuaga sili o le faavavau a le Tama, o le Faaola na puapuagatia. O le Faaola na motusiaina noataga o le oti. O le Faaola na totogia le tau mo a tatou agasala ma solitulafono ma tafisea ai e tusa ma tuutuuga o lo tatou salamo. O le Faaola na te laveai i tatou mai le oti faaletino ma le faaleagaga.

E leai se tagata noa ua ta'ua “o le Togiola” lea e mafai ona tatou valaau atu i ai mo se fesoasoani, faamalologa, faamagaloga, po o le mana. O Iesu Keriso o le puna lea! O faaupuga paia e pei o le *Togiola* ma le *Toetu* ua faamatala ai le mea na faia e le Faaola, e tusa ma le fuafuaga a le Tama, ina ia mafai ai ona tatou ola i le faamoemoe i

lenei olaga ma maua le ola e faavavau i le lalolagi a sau. O le taulaga togiola a le Faaola—le faatinoga tutotonu o le talafaasolopito o tagata ola uma—e silisili ona malamalamā ma talisapaiaina pe a tatou fesootaia ma le patino ma le manino ia te Ia.

O le taua o le misiona a le Faaola na faamamafa mai e le Perofeta o Iosefa Samita, o lē na tautino mai ma le malosi e faapea, “O mataupu faavae autu o lo tatou talitonuga o molimau a le au Apostolo ma Perofeta, e faatatau ia Iesu Keriso, e faapea na Ia maliu, ma tanumia, ma toetu mai i le aso tolu, ma afio a'e i le lagi; ma o isi mea uma e faatatau i lo tatou talitonuga ua na o ni faaopoopoga i ai.”¹³

O le saunoaga patino lava lenei a le Perofeta na maua ai se uunaiga mo perofeta, tagatavaai, ma talifaaliga e toa 15 ia tuuina mai ma sainia la latou molimau e faamanatu ai le 2,000 tausaga o le soifua mai o le Alii. O lea molimau iloga ua faaulutalaina “O Le Keriso Soifua.”¹⁴ E toatele tagata o le ekalesia ua taulotoina ona upumoni. O isi e tau le iloaina o loo i ai. A o e saili e aoao atili e uiga ia Iesu Keriso, ou te uunaia oe e suesue i le “O Le Keriso Soifua.”

A tatou faalu aoga le taimi e aoao ai e uiga i le Faaola ma Lana taulaga togiola, tatou te tosina atu e auai i se isi elemene autu o le mauaina o Lona mana: tatou te filifili ia maua le faatuatua ia te Ia ma mulimuli ia te Ia.

O soo moni o Iesu Keriso ua loto e tutu atu, tautatala atu, ma ia ese mai ai i tagata o le lalolagi. E le fefefe i latou, ae tuuto ma lototetele. Sa ou iloaina ni soo faapena i le taimi o se tofiga talu ai nei i Mekisiko, lea sa ou feiloai ai i ni taitai faalemalo faapea ai foi ma taitai o isi tapuaiga faalelotu. Sa taufai faafetai mai uma ia te au mo taumafaiga lototoa ma le faamanuiaina a o tatou au paia e puipui ma faasao ia faaipoipoga ma aiga malolosi i lo latou atunu.

E le faigofie pe otometi le avea ma ni soo mamana faapena. O la tatou taulaiga e tatau ona tāmau i le Faaola ma Lana talalelei. E matua manaomia ai se taumafaiga tele faalemafaufau e vaai atu ai ia te Ia i mafaufauga *uma*.¹⁵ Ae a





tatou faia, e o ese o tatou masalosaloga ma popolega.¹⁶

Talu ai nei sa ou aoao ai e uiga i se tamaitai talavou le fefe o le Lora. Sa valauliaina o ia e auai i se tauvaga faalesetete mo lana aoga maualuga i le afiafi lava e tasi sa ia tautino ai e auai i se fonotaga a le Aualofa a le siteki. Ina ua ia iloaina le feteenaiga ma faamalamalama atu i taitai o le tauvaga e ao ona ia vave tuua le tauvaga ina ia auai ai i se fonotaga taua, sa ta'u atu ia te ia o le a faalēaogaina o ia pe afai na te faia lena mea.

O le a le mea na faia e lenei Lora o le au paia o aso e gata ai? Sa ia tausia lana tautinoga ia auai i le fonotaga a le Aualofa. E pei ona folafola atu i ai, sa faaleaogaina mai le tauvaga a le setete. Ina ua fesiligia e uiga i lana faaiuga, sa faigofe lana tali, “Ia, e taua atu le Ekalesia, a ea?”

O le faatuatua ia Iesu Keriso e faaosifaina i tatou e faia ni mea semanu tatou te le faia. O le faatuatua e uunaia i tatou i faatinoga tatou te maua atili ai Lona mana.

Tatou te faateleina foi le mana o le Faaola i o tatou olaga pe a tatou osia feagaiga paia ma tausia na feagaiga i le saolele. O a tatou feagaiga e fusia ai i tatou ia te Ia ma tatou maua ai le mana faaleatua. I le avea ai ma soo faatuatua, tatou te salamo ma mulimuli atu ia te Ia i le vai o le papatisoga. Tatou te savavali i le ala o feagaiga ina ia maua ai foi isi sauniga taua.¹⁷ Ma le lotofaafetai, ua saunia e le fuafuaga a le Atua na faamanuiaga ina ia oo atu i tuua o e na maliliu e aunoa ma se avanoa e maua ai i le taimi o o latou olaga faaletino.¹⁸

E saili e alii ma tamaitai tausi-feagaiga ia auala e tausia ai i latou lava ia lē pisia mai le lalolagi ina ia leai ma se mea e pupunia lo latou mauaina o le mana o le Faaola. Sa tusia e se tasi āvā ma tina lenei mea talu ai nei: “O taimi pagatia ma faigata nei. E maeu lo tatou faamanuiaina i le mauaina o se malamalamalama faateleina o le ata o le faaolataga ma le taitaiga musuia mai perofeta, aposetolo, ma taitai agaalofa e fesoasoani ia i tatou e folau atu ma

le saogalemu i sami sousou. Ua taofia lo matou mausa o le kiina o le leitio i le taeao. Ae, ua matou faalogologo i se lauga o le konafesi aoao i a matou telefoni feaveai i taeao uma a o matou saunia i matou lava mo le aso.”

O le isi elemene i le mauaina o le mana o le Faaola i o tatou olaga o le aapa atu lea ia te Ia i le faatuatua. O sea aapa atu e manaomia ai se taumafaiga filiga ma tuuto.

Tou te manatuaina le tala faatusi paia o se fafine na mafatia mo le 12 tausaga i se faafitaui o le tino gagase ma le maasiasi?¹⁹ Sa ia faatino se faatuatua tele i le Faaola, ma alaga atu, “Afai ou te pa'i atu tau [lava] o lona ofu, ou te ola ai.”²⁰

Sa manaomia e lenei fafine faatuatua ma tuuto ona aapa atu i le mamao na te mafaia ia maua ai Lona mana. O lona aapa atu faaletino o se faatusa lea o lona aapa atu faaleagaga.

E toatele i tatou e alalaga atu ma lagona o'oo'o o o tatou loto i ni upu talitutusa ma upu a lenei fafine: “Ana



mafai ona ou aapa atu faaleagaga ina ia maua le mana o le Faaola i lo'u olaga, semanu ou te iloa taulima o'u faafitaui ogaoga. Semanu ou te iloa le mea e fai. Ma semanu ou te maua le mana e fai ai.

Pe a e aapa atu i luga mo le mana o le Alii i lou olaga i le malosi atoa e tutusa ma se tagata o loo malemo ma tau'ā'ā pea mo le ea, o le mana mai ia Iesu Keriso o le a avea ma ou mana. A silafia e le Faaola e te fia manao moni lava e aapa atu ia te Ia—pe a mafai ona Ia lagonaina le manao silisili o lou loto o le fia mauaina o Lona mana i lou olaga—o le a taitaia oe e le Agaga Paia ia iloa tonu le mea e tatau ona e faia.²¹

A e aapa atu faaleagaga e sili atu i lo se isi lava mea na e faia muamua, o le a tafe mai Lona mana ia te oe.²² Ona e malamalama ai lea i le uiga loloto o upu o loo tatou usuina i le viiga “O Le Agaga o le Atua”:

*Ua fuatai mai e le Atua i le Au Paia. . . .
Ua faalautele o mana o le Atua;
Le lagi ua amata ona le toe punia.*²³

O le talalelei a Iesu Keriso ua faatumulia i Lona mana, lea ua avanoa i afafine po o atalii uma o le Atua e saili atu ma le naunautai. O la'u molimau a tatou mauaina Lona mana i o tatou olaga, o le a tatou olioli uma faatasi ma Ia.²⁴

I le avea ai ma se tasi o Ana moli-mau faapitoa, ou te tautino atu o loo soifua le Atua! O Iesu o le Keriso! Ua toefuatai mai Lana Ekalesia i le lalolagi! O le perofeta a le Atua i luga o le fogaeleele i aso nei o Peresitene Thomas S. Monson, o le ou te lagolagoina ma lo'u loto atoa. Ou te molimau atu ai, faatasi ma le faailoaga o le alofa ma faam-nuiaga mo outou taitoatas, i le suafa o Iesu Keriso, amene. ■

FAAMATALAGA

1. Tagai 2 Nifae 28:19–30.
2. Tagai Ioane 3:16.
3. O Iesu o Le na Faauuina—faauuina e le Tama Faalelagi e fai ma Ona sui patino i mea uma e faataatau i le faaolataga or tagata. Sa faauuina Iesu e fai ma o tatou Faaola ma Togiola. A o lei foafoaina le lalolagi, sa faauuina Iesu e fai le tino ola pea ma mea moni ma le ola e faavavau o se mea e mafai ona maua e fanau uma a le Atua (tagai Ioane 17:24; 1 Peteru 1:20). O lea la, ua tauave ai e Iesu ni suafa tupito se lua: *o le Mesia* (Eperu) ma le *Keriso* (Eleni)—e uiga uma i le “faauuina.” (Tagai Bible Dictionary, “Anointed One.”)
4. E mafai ona tatou puipuia i tatou lava e ala i le iloaina ma le ola i le afioga a le Atua (tagai Efeso 6:17–18; Mataupu Faavae ma Feagaiga 27:18).
5. I lalo o le taitaiga a Lona Tama, sa avea ai Iesu ma Foafoa o le lalolagi (tagai Ioane 1:2–3) ma isi lalolagi e le mafaitaulia (tagai Mose 1:33). A o lei taitai lava soifua mai o Ia i la tino, sa avea Iesu ma le Ieova sili—o le Atua o le Feagaiga Tuai. O Ieova sa talanoa ma Mose i luga o le Mauga o Sinai. O Ieova sa osia se feagaiga ma Aperaamo e faapea o le a manuia nuu uma o le lalolagi e ala i le gafa o Aperaamo. Ma
- o Ieova na osi feagaiga ma tagata o le aiga o Israaelu. O Iesu foi o le Emanuelu na folafolaina, e pei ona valoia e Isaia (tagai Isaia 7:14).
6. Mataupu Faavae ma Feagaiga 131:6.
7. Tagai Mataupu Faavae ma Feagaiga 76:40–41.
8. Tagai 2 Nifae 31:2–21.
9. Tusi Paia, Tusi a Mamona, Mataupu Faavae ma Feagaiga, ma le Penina Tau Tele.
10. Tagai Taiala i Tusitusiga Paia, “Iesu Keriso.” E faaopoopo atu i tusiga i lalo o le ulutala autu, e 57 soaultatala e uiga ia te Ia. Mo lomiga e le FaaPeretania o tusitusiga paia, faaoga le Taiala i Tusitusiga Paia.
11. E silia ma le 2,200 mea ua lisina o loo ta'ua i na itulau e 18 o le Taiala i Tusitusiga Paia.
12. 3 Nifae 27:13–14.
13. *Aoaoga a Peresitene o le Ekalesia: Iosefa Samita* (2007), 53.
14. Tagai “O Le Keriso Soifua: O Le Molimau a le Au Apostolo,” *Liahona*, Ape. 2000, 2–3.
15. Tagai Helaman 8:15.
16. Tagai Mataupu Faavae ma Feagaiga 6:36.
17. Na aoao i tatou e Iesu Keriso i le taua o sauniga paia, e pei o le baptisoga (tagai Ioane 3:5), o le faamanatuga (tagai Mataupu Faavae ma Feagaiga 59:9), ma sauniga o le faaeega paia ma le faamauga i le malu-malu (tagai Mataupu Faavae ma Feagaiga 124:39–42).
18. Tagai Mataupu Faavae ma Feagaiga 124:29–32.
19. Tagai Luko 8:43–44.
20. Mareko 5:28.
21. Tagai Mataupu Faavae ma Feagaiga 88:63.
22. Ina ua pa'i atu le fafine faatuatua i le laei o le Faaola, sa Ia vave tali atu, “Ua ou iloa ua alu atu le mana (*virtue*) [mai le upu Eleni *dynamis*, o lona uiga o le “mana”] nai ia te a'u” (Luka 8:46; faaopoopo le faamamafa).
23. “O Le Agaga o le Atua,” *Viiga*, nu. 2.
24. Tagai 3 Nifae 17:20.



Fofogaina e Peresitene Dieter F. Uchtdorf

Fesoasoani Lua i le Au Peresitene Sili

O Le Lagolagoina o Taitai o le Ekalesia

Uso e ma tuafafine, ua faatonuina au e Peresitene Monson ia ou tuuina atu nei ia te outou le Au Pulega Aoao, Fitugafulu Eria, ma Au Peresitene Aoao o Ausilali o le Ekalesia mo la outou palota lagolago.

E tuuina atu ina ia tatou lagolagoina Thomas Spencer Monson o se perofeta, tagatavaai, ma talifaaaliga ma o le Peresitene o Le Ekalesia a Iesu Keriso o le Au Paia o Aso e Gata Ai; Henry Bennion Eyring o le Fesoasoani Muamua i le Au Peresitene

Sili; ma Dieter Friedrich Uchtdorf o le Fesoasoani Lua i le Au Peresitene Sili.

O e e lagolagoina ia faailoa mai.

O i latou e faatuiese, pe afai e i ai, ia faailoa mai.

E tuuina atu ia tatou lagolagoina Russell M. Nelson o le Peresitene o le Korama a Aposetolo e Toasefululua ma uso nei o lena korama: Russell M. Nelson, Dallin H. Oaks, M. Russell Ballard, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, Neil L.

Andersen, Ronald A. Rasband, Gary E. Stevenson, ma Dale G. Renlund.

O e e lagolagoina, faamolemole ia faailoa mai.

A i ai se faatuiese ia faailoa mai.

E tuuina atu ia tatou lagolagoina ia fesoasoani i le Au Peresitene Sili ma le Korama a Aposetolo e Toasefululua o ni perofeta, tagatavaai, ma talifaaaliga.

O i latou uma e lagolagoina, faamolemole ia faailoa mai.

O e faatuiese, pe afai o i ai, i le faailoga lava lea.

Tatou te faailoa atu ma le agaga faafetai le auaunaga a Elder Bruce D. Porter, la tatou uo ma paaga, lea na maliu i le aso 28 o Tesema, 2016. Matou te faailoa atu lo matou alofa ma faamaisega faamomoiloto ia Sister Susan Porter ma le la fanau ma fanau a fanau. Matou te faafetai lava i le auauna faatasi ai ma lenei tamalii lelei.

E tuuina atu ina ia tatou faamalolo mai ia Taylor G. Godoy ma John C. Pingree Jr. o ni Fitugafulu Eria. O e fia au faatasi ma i matou e faailoa atu le lotofaafetai i nei uso mo le la auaunaga, faamolemole faailoa mai.

UA tuuina mai ina ia tatou faamaloloina mai ma le agaga faafetai Sister Linda K. Burton, Carole M. Stephens, ma Linda S. Reeves o le Au Peresitene Aoao o le Aualofa. E faapena foi ona





tuuina atu le faamalologa i tuafafine o le Fono Faatonu Aoao a le Aualofa.

O e uma e fia auaatasi ma i matou i le faailoa atu o le agaga faafetai i nei tuafafine mo la latou auaunaga maoae ma le tuuto, faamolemole ia faailoa mai.

Ua tuuina mai ina ia tatou faamaloina mai Sister Jean B. Bingham o le Fesoasoani Muamua i le Au Peresitene Aoao o le Peraimeri ma Sister Bonnie H. Cordon o le Fesoasoani Lua i le Au Peresitene Aoao o le Peraimeri.

O e fia au faatasi ma i matou e faailoa atu le lotofaafetai i nei tuafafine ia siitia mai le aao.

Ua tuuina mai ina ia tatou lagolagoina i latou nei o Pulega Aoao fou o Fitugafulu: Taylor G. Godoy, Joni L. Koch, Adilson de Paula Parrella, John C. Pingree, Brian K. Taylor, ma Taniela B. Wakolo.

O i latou uma e lagolagoina, faamolemole ia faailoa mai.

O e faatuiiese i le faailoga lava e tasi.

Ua tuuina mai ina ia tatou lagolagoina Jean B. Bingham e auauna atu o se Peresitene Aoao o le Aualofa ma Sharon L. Eubank o le Fesoasoani

Muamua, ma Reyna I. Aburto o le Fesoasoani Lua.

Ua tuuina mai ina ia tatou lagolagoina Bonnie H. Cordon e avea nei ma Fesoasoani Muamua i le Au Peresitene Aoao o le Peraimeri ma Cristina B. Franco e avea o le Fesoasoani Lua i le Au Peresitene Aoao o le Peraimeri.

O i latou uma e lagolagoina, faamolemole ia faailoa mai.

A i ai se faatuiiese ia faailoa mai.

E tuuina atu ina ia tatou lagolagoina ia uso nei o Fitugafulu Eria fou: Luis R. Arbizú, David A. Benalcázar, Berne S. Broadbent, David L. Buckner, L. Todd Budge, Luciano Cascardi, Ting Tsung Chang, Pablo H. Chavez, Raymond A. Cutler, Fernando P. Del Carpio, José Luiz Del Guerso, Aleksandr A. Drachyov, I. Raymond Egbo, Carlos R. Fusco Jr., Jorge A. García, Gary F. Gessel, Guillermo I. Guardia, Marcel Guei, José Hernández, Karl D. Hirst, Ren S. Johnson, Jay B.

Jones, Anthony M. Kaku, Paul N. Lekias, John A. McCune, Tomas S. Merdegia, Artur J. Miranda, Elie K. Monga, Juan C. Pozo, Anthony Quaisie, James R. Rasband, Carlos G. Revillo Jr., Martin C.

Rios, Johnny F. Ruiz, K. Roy Tunnicliffe, ma Moisés Villanueva.

O e e lagolagoina ia faailoa mai.

A i ai se faatuiiese ia faailoa mai.

Ua tuuina mai tatou te lagolagoina isi Au Pulega Aoao, Fitugafulu Eria, ma Au Peresitene Aoao o Ausilali e pei ona i ai nei.

O i latou uma e lagolagoina, faamolemole ia faailoa mai.

O e faatuiiese pe afai e i ai.

Ua faamauina le palota. O i latou atonu na faatuiiese i soo se tofiga e tatau ona faafesootai o latou peresitene o siteki.

O'u uso e ma tuafafine pele, faafetai atu mo lo outou faatuatua faifai pea ma tatalo mo taitai o le Ekalesia.

Matou te valaaullia nei le Au Fitugafulu Pulega Aoao fou ma le Au Peresitene Aoao o le Aualofa i o latou nofoaga i le tulaga. E saunoa mai lava Peresitene Monson, "O se savali umi lava." Faafetai, tuafafine. Faafetai, uso e. O se tulaga o faamatalaga, o loo auauna atu i le taimi nei Sister Franco faatasi ai ma lana tane i Atenitina. E pei ona outou silafia, sa faatoa lagolagoina o ia, ma o le a amata aloaia lana auaunaga pe a taunu mai ia Iulai. ■

Lipoti a le Matagaluega Suetusi a le Ekalesia, 2016

Fofogaina e Kevin R. Jergensen

Pule Faatonusili, Matagaluega Suetusi a le Ekalesia

*I Le Au Peresitene Sili o Le Ekalesia a Iesu Keriso o le Au Paia
o Aso e Gata Ai*

Uso Pele: E pei ona faamanino mai i le faaaliga o loo i le vaega e 120 o le Mataupu Faavae ma Feagaiga, o le Aufono e Faafoeina ia Sefuluai—lea e aofia ai le Au Peresitene Sili, o le Korama a Apostetolo e Toasefululua, ma le Au Epikopo Pulefaamalumalu—e faatagaina tupe faaalu o tupe a le Ekalesia. E faaaogaina e matagaluega a le Ekalesia tupe ia ogatusa ma paketi ua faamaonia, ma e tusa ai ma aiaiga ma faiga faavae a le Ekalesia.

O le Matagaluega Suetusi a le Eklesia, lea e aofia ai ni tamalii faapolofesa ma e tutoatasi lava mai isi matagaluega uma a le Eklesia, ua i ai le tiutetauvae e faatino ai suegatusi mo le faamoe-moega o le tuuina atu o le faamauti-noaga talafeagai e tusa ai ma saofaga

na tauaoina, o tupe na faaalu, ma le malupuipua o aseta a le Ekalesia.

E tusa ai ma suegatusi ua faatinoina, ua manatu ai le Matagaluega Suetusi a le Ekalesia e faapea, i tulaga uma o meatotino, o saofaga na mauaina, o tupe na faaluina, ma aseta a le Eklesia mo le tausaga 2016 ua faamau-mauina ma faatautaia e tusa ma paketi a le Ekalesia na faamaoniaina, o aiaiga faavae, ma faiga masani faatusitusi. O loo mulimultaia e le Ekalesia ia faiga masani o loo aoaoina atu i ona tagata o le ola lea i se paketi, aloese mai le nofoaitalafu, ma le sefeina o ni tupe mo le taimi e manaomia ai.

E tuuina atu ma le faaaloalo lava,
Matagaluega Suetusi a le Eklesia
Kevin R. Jergensen
Pule Faatonusili ■



Lipoti Faafuainumera, 2016

Fofogaina e Brook P. Hales

Failautusi a le Au Peresitene Sili

Ua tuuina mai e le Au Peresitene Sili ia faafuainumera nei e faata-tau i le tulaga o le Ekalesia e oo mai i le aso 31 o Tesema, 2016.

Iunite a le Eklesia

Siteki	3,266
Misiona	421
Itu	556
Uarota ma Paranesi	30,304

Faitau Aofai o le Eklesia

Aofaiga o Tagata Auai	15,882,417
Tamaiti Fou o Faamaumauga.....	109,246
Tagata Liliu Mai na Papatisoina...	240,131

Faifeatalai

Faifeatalai Faamisiona	70,946
Faifeatalai Auauna Atu a le Eklesia.....	33,695

Malumalu

O Malumalu na Faapaiaina i le 2016 (Malumalu o Provo City Center, Sapporo Japan, Philadelphia Pennsylvania, Fort Collins Colorado, Star Valley Wyoming, ma Hartford Connecticut)	6
O Malumalu na Toe Faapaiaina (Malumalu o Suva Fiti ma Freiberg Siamani).....	2
O Malumalu o loo Faaaogaina e oo mai i le Faaiuga o le Tausaga....	155



Saunia e Elder Robert D. Hales
O Le Korama a Aposetolo e Toasefululua

Avea o se Soo o lo Tatou Alii o Iesu Keriso

O le eseesege o uiga paia lea e avea o se taunuuga mai le faatuatua ia Keriso e manaomia uma mo lo tatou tutu malolosi atu i nei aso e gata ai.

Ole a le uiga o le avea ma se soo o lo tatou Alii o Iesu Keriso? O se soo o se tasi ua papatisoina ma ua naunau e tauave i ona luga le suafa o le Faaola ma mulimuli ia te Ia. O se soo e tauivi ia avea faapei o Ia i le tausia o Ana poloaiga i le olaga faale-tino, e pei ona saili se tagata aperenitisi ia avea faapei o lona matai.

O le toatele o tagata e faalogo i le upu soo ma mafaufau na pau lona uiga

o se “tagata e mulimuli.” Ae o le avea ma soo moni o se tulaga faaletagata. Ua fautuaina mai e lenei mea e sili atu nai lo le suesue ma le faaaogaina o se lisi o uiga paia faaletagata lava ia. E soifua ia soo ina ia mafai ona lalagaina i totonu o latou tagata ia uiga o Keriso, e pei o se ie lalaga faaleagaga.

Faalogo i le valaaulia a le Apos-te-lo o Peteru ina ia avea ma se soo o le Faaola:



“O le mea lava lea ia outou matua faamalosi ai lava, ina ia faoopoipoina le amio lelei i lo outou faatuatua; ia faoopoipo foi le poto i le amio lelei;

“Ma ia faoopoipo foi le le gaoia i le poto; ma ia faoopoipo le onosai i le le gaoia; o le amio Atua foi i le onosai;

“Ia faoopoipo foi le alofa i le au uso i le amio Atua; o le alofa foi i le alofa i le au uso.”¹

E pei ona tou tagai mai, o le lalaga-inia o le ie lalaga faaleagaga o le avea ma soo patino e manaomia ai le sili atu nai lo se filo se tasi. I aso o le Faaola, sa toatele na fai mai e amiotonu i se tasi o vaega po o se isi vaega o o latou olaga. Sa latou faataitaia le mea ua ou ta’ua o le usiusitai filifili. Mo se faataitaiga, sa latou tausia le poloaiga e le galue i le Sapati ae na faitio i le Faaola mo le faamaloloina [o ma’i] i lena aso paia.² Sa latou tuuina atu meaalofa i e matitiva ae na ofoina atu nao mea mai a latou faasiliga—mea latou te lei manaomia mo i latou lava.³ Sa latou anapopogi ae sa faia ma mata faanoanoa.⁴ Sa latou tatalo ae sa faia ina ia vaai i ai tagata.⁵ Na fetalai mai Iesu, “Ua latou faalata-lata mai ia te a’u i o latou laugutu, a o o latou loto ua mamao mai ia te a’u.”⁶ Atonu o taulai atu ia alii ma tamaitai i le aoaoina o se uiga po o se faatinoga faapitoa ae e le o faapea o le a avea e pei o Ia i o latou loto.

Na tautino mai Iesu, e uiga i nei mea:

“E toatele latou te fai mai ia te au i lea aso, Le Alii e, le Alii e, matou te lei perofeta ane ea i lou igoa, o lou igoa foi na matou tulia ai temoni? o lou igoa foi na matou fai ai vavega e tele?

“Ma ona ou tautino atu ai lea ia te i latou i lena taimi: Ou te lei iloa lava outou; ia outou o ese atu mai ia te au, outou o e e faia le amioletonu.”⁷

O uiga paia o le Faaola, e pei ona tatou vaai atu i ai, e le o se tusiga e mulimultaia po o se lisi e siaki. O ni uiga ua lalagaina faatasi, e faoopoipo atu le tasi i le isi, lea e atiinae i totonu o i tatou i ni auala fesootai. I se isi faaupuga, e le mafai ona tatou mauaina se uiga faaKeriso se tasi e aunoa ma le mauaina foi ma le uunaiaina o isi. E pei ona amata ona malosi se tasi o uiga, e faapena foi le tele o isi.

I le 2 Peteru ma le Mataupu Faavae ma Feagaiga vaega e 4, tatou te aoao ai o le faatuatua i le Alii o Iesu Keriso o le faavae lea. Tatou te fuaina lo tatou faatuatua i le mea e taitaiina atu i tatou e faia—e ala i lo tatou usiusitai. Ma ua fetalai mai Keriso, “Afaí tou te faatuatua mai ia te au o le a outou maua le mana e fai ai soo se mea e tatau ai ia te au.”⁸ O le faatuatua o se elemene ola. A aunoa ma galuega, a aunoa ma le ola mama, e leai se mana o lo tatou faatuatua e faaola ai le avea ma soo. O le mea moni, e mate lava le faatuatua.⁹

Ma sa faamatala mai e Peteru, “ia faaopoopoina le amio [mama] i lo outou faatuatua.” O lenei amio mama e sili atu nai lo le mama mai feusuaiga. O le mama ma le paia lea i le mafaufau ma le tino. O le amio mama o le mana foi. A tatou ola faamaoni i le talalelei, o le a tatou maua le mana ina ia mama ai ia mafaufauga, lagona, ma amioga uma. O le a gauai atili atu o tatou mafaufau i

uunaiga a le Agaga Paia ma le Mala-malama o Keriso.¹⁰ Tatou te faataitaia Keriso e le gata i upu tatou te fai atu ma mea tatou te faia ae faapena foi i le tagata ua tatou i ai.

Na faaauau le saunoaga a Peteru, “Ia faaopoopoina le poto i lo outou amio [mama].” A tatou ola i ni olaga mama, o le a tatou iloa lo tatou Tama Faalelagi ma Lona Alo i se auala faapi-toa. “Ai se tasi e fia fai [le] finagalo [o le Tamal], e iloa ai e ia le mataupu.”¹¹ O lenei atamai o se molimau patino, lea na maua mai i se aafiaga patino. O le atamai lea e liua i tatou, ina ia [pipii] atu lo tatou “malamalama i [Lona] malamalama” ma [fiafia] lo tatou “amiomama i [Lona] amiomama.”¹² E ala i lo tatou ola mama, tatou te malaga mai ai i le “Ou te talitonu” i le taunuuga matagofie o le “Ou te iloa.”

Na apoapoaiina i tatou e Peteru ina ia faaopoopo “le le gaoia i le poto; ma le onosai i le le gaoia.” I le avea ai ma

ni soo le gaoia, ua tatou ola i le talalelei i se auala paleni ma tumau. Tatou te le “momo’e televave atu nai lo le malosi ua ia [i tatou].”¹³ Tatou te agai i luma i aso taitasi, leai se faavaivai i luitau ua faaleleia o lenei olaga.

O le le gaoia i lenei auala, tatou te atiinae ai le onosai ma le faala-golago i le Alii. Ua mafai ona tatou faalagolago atu i Lana mamanu mo o tatou olaga, e ui e le mafai ona tatou vaai atu i ai ma o tatou mata faalena-tura.¹⁴ O le mea lea, e mafai ona tatou “filemu ma iloa o [Ia] o le Atua.”¹⁵ Pe a fetaiai ma afa o faigata, tatou te fesili atu, “O le a se mea e Te finagalo ia ou aoao mai lenei aafiaga?” O le i ai o Lana fuafuaga ma faamoemoega i o tatou loto, o le a tatou agai ai i luma e le gata i le lavātia o mea uma ae o le lavātia lelei ma le onosai.¹⁶

O lenei onosai, ua aoao mai e Peteru, e taitaiina atu i tatou i le amio-atua. E pei ona onosai le Tama ia i





tatou, o Lana Fanau, o le a tatou onosai i le tasi ma le isi faapea ma i tatou lava. Tatou te fiafia i le saolotoga o isi ma le avanoa e tuuina atu ia i latou ina ia tuputupu ae i “lea fasifuaitau ma lea fasifuaitau,”¹⁷ “tupu susulu malamalamalama tele pe a lava pea seja oo i le aso e atoatoa ai.”¹⁸

Mai le le gaoia i le onosai, ma mai le onosai i le amioatua, o le a suia o tatou natura. Ua tatou maua le agalelei faaleuso o se uiga tupito lea mo soo moni uma. E pei o le Samaria Agalelei, tatou te sopoia le auala e auauna atu ai i soo se tagata lava o i ai se manaoga, e tusa lava pe le o i ai i le li'o o a tatou oo.¹⁹ Tatou te faamanuia atu ia i latou o e fetuu mai ia i tatou. Tatou te agalelei atu ia i latou o e inoino mai ia i tatou.²⁰ E i ai se isi uiga paia e sili ona amioatua pe faaKeriso?

Ou te molimau atu o taumafaiga o tatou faia ina ia avea ai ma soo o lo tatou Faaola o loo faaopoopoina moni lava i luga seiiloga ua tatou “maua” Lona alofa.²¹ O lenei alofa o se uiga moni o se soo o Keriso.

“Afai ou te tautala i gagana a tagata atoa ma agelu, a e leai so'u alofa, ua avea a'u ma apa memea taalili, po o se sumepalo tagitagi.

“Afai foi o ia te au ona perofeta ane, ma le iloa o mea lilo uma, ma le poto uma lava; afai foi o ia te au le faatuatua uma e aveese ai mauga, a e leai so'u alofa, ou te le aoga lava”²²

O le faatuatua, faamoemoe, alofa mama lea tatou te agavaa ai mo le galuenga a le Atua.²³ “A o lenei, o tumau . . . na mea e tolu; a o le sili o na mea o le alofa lea.”²⁴

Uso e ma tuafafine, ua sili atu i le taimi nei nai lo se isi lava taimi, ua le mafai ona avea i tatou ma se “soo mo na o sina taimi!” E le mafai ona tatou avea ma se soo i le na o se vaega se tasi o le aoaoga faavae ae tuu le isi. O le eseesegaa o uiga paia lea e si'oina faataamilo le faatuatua ia Keriso—e aofia ai ma isi ia na tatou talanoaina i le asō—e manaomia uma mo lo tatou tutu malolosi atu i nei aso e gata ai.

A o tatou taumafai ma le naunautai ia avea ma soo moni o Iesu Keriso, o

le a lalagaina, faaopoopoina i luga, ma faamalosia le fesootaiga o nei uiga i totonu o i tatou. O le a leai se eseesegaa i le va o le agalelei tatou te faaali atu i o tatou fili ma le agalelei o tatou faaee atu i luga o a tatou uo. O le a tatou faamaoni e tusa lava pe leai se tasi o tilotilo mai po o tilotilo atu foi nisi. O le a tatou tuuto atu i le Atua i nofoaga lautele e pei lava foi o tatou faia i nofoaga lilo.

Ou te molimau atu e mafai ona avea tagata uma ma se soo o le Faaola. E le o faatapulaaina le avea ma soo i le matua, itupa, tupuaga faaleaganuu, po o valaauga. E ala atu i lo tatou avea ai taitoatasai ma soo, tatou te fausia ai, o ni Au Paia o Aso e Gata Ai, se malosiaga tuufaatasia e faamanuiaina ai o tatou uso ma tuafafine i le lalolagi atoa. O le taimi lenei e toe tuuto atu ai i tatou lava ma le maelega atoa i le avea ai ma Ona soo.

Uso e ma tuafafine, ua valaauiina i tatou uma e avea ma soo o lo tatou Faaola. Ia avea lenei konafesi ma ou avanoa e “amata [ai] e pei o taimi anamua, ma o mai [ia te Ia] ma o outou loto atoa.”²⁵ O Lana Eklesia lenei. Ou te tuuina atu la'u molimau faapitoa o loo soifua o Ia. Tau ina Ia faamanuia mai ia i tatou i la tatou sailiga e faavavau ina ia avea ma ni soo tuuto ma lotototoa. I le suafa, o Iesu Keriso, amene. ■

FAAMATALAGA

1. 2 Peteru 1:5–7.
2. Tagai Luka 13:14.
3. Tagai Luka 21:4.
4. Tagai Mataio 6:16.
5. Tagai Ioane 14:15, 23; tagai foi Alema 38:1.
6. Iosefa Samita—Talafaaosolopito 1:19; tagai foi Isaia 29:13; Luka 6:46.
7. Mataio 7:22–23.
8. Moronae 7:33.
9. Tagai Iakopo 2:20.
10. Tagai 1 Korinito 3:16.
11. Ioane 7:17.
12. Mataupu Faavae ma Feagaiga 88:40.
13. Mosaea 4:27.
14. Tagai Mataupu Faavae ma Feagaiga 58:3.
15. Mataupu Faavae ma Feagaiga 101:16.
16. Tagai Mataupu Faavae ma Feagaiga 121:8.
17. Mataupu Faavae ma Feagaiga 98:12.
18. Mataupu Faavae ma Feagaiga 50:24.
19. Tagai Luka 10:33.
20. Tagai Mataio 5:44.
21. Moronae 7:47.
22. 1 Korinito 13:1–2.
23. Tagai Mataupu Faavae ma Feagaiga 4:5.
24. 1 Korinito 13:13.
25. Mamona 9:27.



Saunia e Elder Jeffrey R. Holland

O Le Korama a Aposetolo e Toasefululua

O Pese e Usuina ma Lē Usuina

Ou te augani atu ia i tatou uma taitoatasi ia tumau ma le faamaoni pea i le aufaipese.

“**U**a susulu mai nei o le la, i lo’u nei agaga,” sa tusia ai e Eliza Hewitt, “sili lona ia pupula mai, O Iesu lona pogai.”¹ Faatasi ai ma le olioli i nota uma, o lena viiga Kerisiano ofoofogia anamua e toetoe lava a le mafai ona usuina e aunoa ma le ataata. Ae o le asō ou te fia faia ai se isi faaliliuga i se laina lava se tasi e fesoasoani ai i aso pe a faigata ai ona tatou usuina *pe* ataata ma le “filemu fiafia” ua foliga mai ua *le* “tupu.” Afai e i ai se taimi ua e le mafai ai ona faaleoina fati fiafia e te faalogo atu o sau mai isi, ou te talosagaina oe ia taofi mau i le laina i lenei viiga o loo faamautinoia mai ai, “[E] faafogfa mai Iesu i [au] pese fai lemu.”²

Faatasi ai ma isi mea moni o loo tatou fetaiai ai o ni fanau a le Atua o loo ola ma soifua i se lalolagi pagatia, o nisi aso e faigata, o aso e tofotofoina ai lo tatou faatuatua ma lo tatou lototoa. O nei luitau e ono sau mai se mea o misi ia i tatou, o se mea o misi i isi, pe o se mea ua misi lava i le olaga, ae po o le a lava le mafuaaga, ua tatou iloaina e mafai ona latou faoaina mai ia i tatou pese ia tatou te fia usu ai lava, ma faapogisa ai le folafolaga o le “fotu a’e

[o le] loto”³ lea e faamanatu mai e Eliza Hewitt i se tasi o ana fuaiupu.

O le a la le tatou mea e fai i taimi faapena? Mo le tasi mea, tatou te opomauina le fautuaga a le Aposetolo o Paulo ma “faamoemoe i le mea ua [tatou] le vaaia . . . [ma le] faatalitali atu i ai ma le onosai.”⁴ I na taimi pe a oo ina faaititia lo tatou faatuatua i se tulaga ua tatou le toe iloaina ai, atonu e ao ona tatou tutulai ma le filemu mo

se taimi ma tau na ona faalogo atu i isi, ma utu le malosi mai le ofoofogia o musika o siomia ai i tatou. O le toatele o i tatou e “faalelei i mea tau musika” e faamalosia lava lo tatou toafimalie ma le faalelia o lo tatou usu pese e ala i lo tatou tutu i talaane o se tasi e malosi ma mautinoa le leo e pese ai. E mautinoa lava e faapena foi i le usuina o viiga o le faavavau, e tatau ona tatou matua tutu latalata atu i le mea e mafai ai i le Faaola ma le Togiola o le lalolagi—o le e matua atoatoa Lona siufogfa. Ona tatou maua lea o le lototeli mai Lona gafatia e faafogfa ai i a tatou [pese fai lemu] ma maua le faamoemoe mai Lana tatalo faatoga faalemesia matagofie mo i tatou. E moni lava “Pe a lata mai o Ia” e “filemu lo’u loto nei, [ma] le alofa e faaalia.”⁵

I na aso pe a tatou lagonaina ua fai si pa’ulua o o tatou leo, ua itiiti ifo ma mea tatou te mafaufau ua tatou vaaia pe faalogo atu i ai i isi, ou te talosagaina i tatou, aemaise le autalavou o le Ekalesia, ia manatua o le mamanu faalelagi e le o leo uma i le aufaipese a le Atua e tutusa. E i ai eseesega—leo usu, oloto, tena ma le malū—inia ia faaoaina ai musika. Ina ia nono mai se laina na sii mai i le tusi fiafia a ni tamaitai ofoofogia o le Au Paia o Aso e Gata Ai, “O tagata uma o le Atua e tofu lava ma se nofoaga i le aufaipese.”⁶ A tatou manatu faatauvaa i lo tatou tulagaese pe taumafai e faaogatusa ma isi ituaiga



manatu le moni—ituraiga manatu ia e uunaia e se aganuu faaloloto ma lē faamalieina ma manatu e sili atu le lelei i lo se isi lava mea ua iloa e ala o faasalalauga faaleagafesootai—o le a tatou ma'umauina le oa o le eseesega i le va o tagata lea na finagalo i ai le Atua ina ua Ia foaoaina se lalolagi o eseesega.

Ia, e le o faapea atu la e mafai e tagata uma i lenei aufaipese faalelagi ona amata alaga e ia lana ia vaega patino o le pese! O eseesega, e le o le pule a o le tagata i lana mea e fai, ma o aufaipese e manaomia ai le lotopulea—ae mo lo tatou faamoemoega i le asō, Elder Hales, e mafai ona ou faapea atu, o le avea ma soo—ae o le taimi lava tatou te taliaina ai upu paia ua faaalia ma faatonuga e tasi na fatuina ae lei i ai le lalolagi, ona fiafia lea o lo tatou Tama Faalelagi i lo tatou usuina o pese i lo tatou lava leo, ae le o le faataitai fua o le leo o se isi tagata. Talitonu ia te oe lava ia, ma talitonu ia te Ia. Aua ne'i e manatu mama i lou taua pe ta'uafaatauvaina lou sao. E sili i lo mea uma, aua ne'i e lafoaia lau matafaioi i le aufaipese. Aisea? Ona o oe e tulagaese; e le mafai ona suitulagaina oe. O le misi ai o se

leo se tasi e faavaivaia ai isi uma tagata pepese i la tatou nei aufaipese faaletino tele, e aofia ai le leiloloa atu o i latou ua lagonaina e le o taliaina i latou e faalapotopotoga po o le Ekalesia.

AE e tusa foi lava pe ou te uunaia *oe* ia maua le faatuatua e tusa ma pese atonu e faigata ona usuina, ou te faa iloa atu ma le naunautai e faapea mo mafuaaga eseese *ou te* tauivi foi ma isi ituaiga o pese e tatau ona usuina—ae le o—usuina lava.

A ou vaaia le lofituina o le le tutusa faaletamaoiga i le lalolagi, ou te lagonaina sina ta'usalaina ma usu faatasi ma Mrs. Hewitt o “manuia mai le [Atua], ma fiafia o i 'luga.”⁷ E le mafai ona usuina atoatoa ma le faamaoni le pese vagana ua tatou tausia ma le faamaoni e matativa. O le faaletonu o le tamaoiga o se fetuu lea e faaauau pea ona fetuuina, i lea tausaga ma lea tausaga ma lea tupulaga i lea tupulaga. Na te faatamaiaina tino, faamanualiaina agaga, faaleagaina aiga, ma faaumatiaina miti. Afai e mafai ona tatou faia nisi mea se tele atu e aveesea ai le mativa, e pei ona poloai mai pea Iesu ia i tatou e fai, atonu o le a mafai e nisi tagata vaivai i le lalolagi

ona usuusuina ni nai nota o le “Ua Susulu Mai Nei o le La,” masalo mo le taimi muamua lava i o latou olaga.

E faigata tele foi ia te au ona usu ni upu fiafia ma olioli ae o loo toatele tagata o siomiaina i tatou o loo mafatia mai faamai o le mafaufau ma lagona, po o isi tapulaa faalesoifuamaloloina lofituina. Ae paga lea, o nisi taimi e tumau ai lava nei avega e ui i taumafaiga lototoa a le tele o ituaiga o fomai, e aofia ai ma tagata o le aiga. Ou te tatalo ina ia tatou le tuu atu nei fanau a le Atua ia mafatia leleoa ma o le a faaee mai ia i tatou Lona gafatia tatou te faalogo atu ai i pese e le mafai ona latou usuina.

Ma ou te faamoemoe i se aso o le a laugatasia uma ai le lalolagi atoa e tusa lava po o le a le ituaiga ma gagana, ma tautino atu o fana ma upu faatiga, taua ma upu malolosi e *le* o le auala lea e taulimaina ai feteeaina faaletagata. O tautinoga o le tagisa mai o le lagi ia i tatou e faapea e na o le pau le auala e foia ai ma le faamalieina ia faafitauli faigata faalemaloo le alofa lea i le Atua ma tauri Ana poloaiga, o lea e tatala atu ai le faitotoa i le ala faaola tumau e tasi ia alofa le tasi i le isi o ni tuaoi.



Na aoao mai le perofeta o Eteru e tatau ona tatou "faamoemoe mo se lalolagi sili atu ona lelei." I le faiatuaia ai o lena manatu i le afe tausaga mulimuli ane, sa tautino mai ai Moronae o le sa vaivai i taua ma vesiga e faapea o le "ala e sili-sili ona lelei" i lena lalolagi o le talalelei lea a Iesu Keriso.⁸

Tatou te faafetai tele i le lotolotoi o nei ituaiga o luitau e oo mai ai, i lea taimi ma lea taimi, se ituaiga pese e matua ese lava lea tatou te iloaina e le mafai ona usuina, ae mo se mafuaaga e ese ai. O nei lagona e matua loloto lava ma patino, e taufaafefe foi, ia e le mafai pe le tatau foi ona faailoaaina—e pei o le alofa o Cordelia mo lona tama, lea na ia fai mai ai: O lo'u alofa . . . e le mafaamatalaina. . . . E le mafai foi e upu ona faamatalaina o'u lagona."⁹ E oo mai ia i tatou i se ala paia, se mea paia, o nei lagona e le mafaamatalaina—e mamana faaleagaga—e pei o le tatalo na faia e Iesu mo fanau a sa Nifae. O i latou o e na molimauna lena mea na tupu na faamaumauina:

"E lei vaaia lava e le mata, pe na faalogoina foi . . . e le taliga, le tetele ma le ofoo fogia naua o mea e pei ona matou vaai ma faalogo o fetalaia e Iesu i le Tamā;

" . . . E le mafai e se laulaufaiva ona tautala ai, pe mafai foi e se tagata ona tusia, pe mafai foi e loto o tagata ona malamalamama i mea e faapea ona tetele ma le ofoo fogia naua e pei ona matou vaaia ma faalogoina o fetalaia e Iesu."¹⁰

O nei ituaiga o taimi faapaiaina e tumau pea ona le mafaamatalaina aua a faailoa atu, e tusa lava pe mafai, e ono aveesea ai le tulaga paia.

Uso e ma tuafafine, ua tatou ola i se lalolagi faaletino faatasi ma le tele o pese e le o mafai ona usuina, pe tatou te le o usuina foi. Ae ou te augani atu ia te i tatou uma taitoatasia ia nonofo tumau ai ma le faamaoni i le aufaipese, ma olioli e faavavau i lena viiga sili ona faapelepele o pese uma—le pese o le alofa togiola."¹¹ O le mea e lelei ai o nofoa mo lenei pese patino e le faatapulaaina. O loo i ai le avanoa mo i latou e tautatala i gagana eseese, o loo faamanatuina le eseesege o aganuu,



ma potopoto mai le tele o nofoaga faavaomalo. O loo i ai le avanoa mo e nofufua, mo e ua faaipoipo, i latou e toatele aiga, ma e e leai ni fanau. O loo i ai le avanoa mo i latou na i ai ni fesili e faatatau i lo latou faatuatua ma le avanoa mo i latou o loo i ai pei ni fesili. O loo i ai se avanoa mo i latou e eseese tosinaga faalefeusuaga. I se faapuupuuga, o loo i ai se nofoaga mo tagata uma e alolofa i le Atua ma faamamalu i Ana poloaiga ua fai ma tulaga faatonuina sili ona taua mo amioaga faaletagata, aua afai o le alofa o le Atua o le fati lea o la tatou pese e tasi, e mautinoa lava o lo tatou sailiga e tasi ia usitai ia te Ia o le faigaleo taua e tasi lea o loo i ai. Faatasi ai ma poloaiga paia o le alofa ma le faatuatua, salamo ma le agaalofa, faamaoni ma le faamagaloga, o loo i ai se avanoa i lenei aufaipese mo i latou uma e fia auai.¹² "Sau i le tagata o e i ai," o loo fetalaia mai ai se Tama alofa ia i tatou taitoatasia, ae ua Ia faaopoopo mai, "Aua ne'i e fuafua e te tumau ai lava i le tagata o e i ai." Tatou te ataata ma manatua o loo naunau lava le Atua ia faia i tatou ia sili atu i lo tagata na tatou mafaufau e mafai ona avea ai i tatou.

I lenei pese tele o Lana fuafuaga lena mo le faaeaga, tau ina ia tatou mulimuli atu ma le lotomaualalo i Lana taitai pese ma galulue pea i pese e le mafai ona tatou usuina pe le o usuina foi, seja oo ina tatou ofo atua na "[viiga] i [lo tatou] Tupu."¹³ Ona oo lea i se tasi aso, e pei ona ta'ua e la tatou viiga e sili ona fiafia i ai:

Ia tatou pepese ma autau a le lagi, Osana, osana i le Atua ma Iesu! Pe a toe afio mai Iesu i Lona mamalu!¹⁴

Ou te molimau atu o lena lava itula o le a oo mai, o le a toe auina mai ai e le Atua lo tatou Tama Faavavau i le lalolagi Lona Alo e Toatasi na Fanaua, i lenei taimi e pule ma nofotupu o le Tupu o tupu e faavavau. Ou te molimau atu o Lana Ekalesia toefuataiina lenei ma o le auala lea e oo mai ai aoaoga ma sauniga faaola o Lana talalelei i tagata uma. Pe a oo atu Lana savali ma "seia oo atu i konetineta uma [ma] asia nuu uma,"¹⁵ e moni lava o le a "[faaali mai e Iesu] ona fofoga fiafia."¹⁶ O le a i ai le lasusulu e faavavau mo le agaga i lene aso. Ina ia oo mai lenei itula na folafolaina, ou te tatalo ai ma le naunau-tai i le suafa o Iesu Keriso, amene. ■

FAAMATALAGA

1. "Ua Susulu Mai Nei o le La," *Viiga*, nu. 140.
2. *Viiga*, nu. 140.
3. *Viiga*, nu. 140.
4. Roma 8:25.
5. *Viiga*, nu. 140.
6. Bill Staines, "All God's Critters Got a Place in the Choir," in Laurel Thatcher Ulrich and Emma Lou Thayne, *All God's Critters Got a Place in the Choir* (1995), 4.
7. *Viiga*, nu. 140.
8. Tagai Eteru 12:4, 11.
9. William Shakespeare, *King Lear*; act 1, scene 1, lines 79–80, 93–94.
10. 3 Nifae 17:16–17; faaopoopo le faamamafa.
11. Alema 5:26; tagai foi Alema 26:13.
12. Tagai 2 Nifae 26:33.
13. *Viiga*, nu. 140.
14. "O Le Agaga o le Atua," *Viiga*, nu. 2.
15. *Aooga a Peresitene o le Ekalesia: Josefa Samita* (2007), 151.
16. *Viiga*, nu. 140.



Saunia e Elder Gary B. Sabin
O Le Fitugafulu

Tutu i Luga i Totonu ma Tuuto Atoa Atu

Tau ina ia toe suia lo tatou ala pe afai e manaomia ma ia taulai atu i luma ma le faamoemoe ma le faatuatua sili. Tau ina ia tatou “tutu i luga i totonu” e ala i le faamaoni ma “tuuto atoa atu.”

nai tausaga ua mavae sa tamoe mai ai le afafine laitiiti a le ma tama ma tau mai ma le fiafia tele, “Tamamatua, Tamamatua na ou sikoaina uma ‘ai i la’u taaloga soka ananei!”

Sa ou tali atu ma le fiafia tele, “Lelei tele, Sara!”

Sa tilotilo mai ma le ataata lona tina ia te a’u ma fai mai, “O ‘ai e lua i le tasi.”

Ou te lei fiafesili po o ai na malo!

O le konafesi o se taimi o le manututu, faaaliga, ma o nisi taimi o le *toe faatonutonuina*.

E i ai se kamupani e lisia taavale ma se polokalama GPS e ta’ua o le E Le Leiloa Lava. Afai e te faia se afega sese pe a uma ona e taina i ai le nofoaga manaomia, e le faapea mai le leo taiala, “Lou vale!” Ae, i se leo malu lava, e faapea mai, “Toe sui lou ala—pe a fai e mafai, ia toe liliu faaletulafono.”

I le Esekielu, tatou te faitau ai i lenei folafolaga matagofie:

“Afai e liliu ese le ua amio leaga ai ana agasala uma na ia faia, ma tausi i a’u tulafono uma, ma faia e ia le amio tatau ma le amiontonu, e ola lava ia e le oti.

“O ana solitulafono uma na ia faia e le tautau ia te ia.”¹

Oka o se folafolaga maoae, ae e manaomia ai faatinoga *uma* e lua ina ia maua ai le folafolaga lona tolu. Liliu ese mai mea uma: tausi mea uma; ona faamagaloina lea o mea uma. E manaomia ai le “tuuto atoa atu!”

E le tatau ona tatou faapei o le tagata o lē, e pei ona lipotia mai e le *Wall Street Journal*, na auina atu se teutsi e tumu i se tinoitupe faatasi ai ma se tusi faalilolilo i le Tautua Tutotonu o Tupe [Internal Revenue Service] lea na faapea atu, “Mo le IRS, O loo auina faatasi atu ma lenei tusi le tupe na ou nofo aitalafu ai mo lafoga ua mavae.



P.S. A mavae lenei mea ae le maua se toofilemu o lo’u mafaufau, o le a ou auina atu le tupe o totoe.”²

E le o le ala lena tatou te faia ai! Tatou te le taofiofi ia vaai po o le a le tulaga maualalo e mafai ona tatou aloese mai ai. E manaomia e le Alii le loto ma le mafaufau malie.³ O o tatou loto atoa! A tatou papatiso, e faatofuina atoa i tatou o se faatusa o la tatou folafolaga ina ia mulimuli atoatoa i le Faaola, e le o se afa loto. A tatou tautino atoa atu ma “tuuto atoa atu,” e luluina le lagi mo lo tatou lelei.⁴ Afai e faaleogalua pe ua na o se vaega lo tatou tuuto, tatou te le mauaina nisi o faamanuiaga silisili o le lagi.⁵

I le tele o tausaga ua mavae, sa ou aveina ni Sikauti i se tolauapiga i le toafa. Na momoe tama i autafa o se afi tele sa latou faia, ma e pei o taitai Sikauti lelei uma, sa ou moe i tua o la’u lolii. I le taeao ina ua ou nofo ae i luga ma tilotilo atu i le tolauapiga, sa ou iloa atu se Sikauti e toatasii, o le a ou ta’ua o Paulo, na foliga mai e lei lelei sana malologa. Sa ou fesili atu pe na a mai lana moe, ma sa ia tali mai, “E lei lelei tele.”

Ina ua ou fesili atu pe aisea, ae na tali mai, “Na ou maalili; na pe le afi.”

Sa ou tali atu, “Ia, e faapena ia ‘afi. E lei lava le mafanafana o lau palanikeke?”

Leai se tali.

Ona faamatala leotele mai lea e se tasi o isi Sikauti, “Na te lei faaaogaina lana palanikeke.”

Sa ou fesili atu ma le le talitonu, “Aisea, Paulo?”

Sa le magagana—ona tuuina mai lea o se tali matamuli: “Ia, sa ou mafaufau afai ou te le tatalaina, ou te le toe taaiaina.”

Tala moni: sa ia tumau mo le tele o itula ona sa ia taumafai e sefe le lima minute o le galue. Atonu tatou te manatu: “Oka se valea! O ai e faia se mea faapena?” Ia, tatou te faia i taimi uma i auala e sili ona matautia. O le mea moni, o loo tatou mumusu e tatala o tatou palanikeke faaleagaga pe a tatou le faaaluina se taimi e tatalo ai, suesue, ma ola faamaoni ai i le talalelei i aso taitasi; e le gata o le a pe le afi, ae o le a tatou le malupuipua ma maalilili i le tuputupu ae faaleagaga.

A faamalieina a tatou feagaiga, e le tausalaina i tatou i taunuuga. Ua fautuaina i tatou e le Alii “ia faaeteete e faatatau ia te outou lava, ia outou gauai ma le filiga i upu o le ola e faavavau.”⁶ Ma sa Ia folafola atili mai, “O le a le faamamaina i latou e lo’u toto pe afai latou te le faalogo mai ia te a’u.”⁷

O le mea moni, e faigofie atu le “tuuto atoa atu” i lo le faaleogalua. A tatou faaleogalua pe le tuuto atoa atu, i le *Star Wars* o loo i ai muagagana, “e i ai se mea e le o sa’o.” Tatou te le o ogatasi ma le finagalo o le Atua ma e tatou te le o ogatasi foi ma le natura o le fiafia.⁸ Fai mai Isaia:

“A o e amio leaga e tusa i latou ma le sami ua sousou, e le mafai ona to’ā filemu, a e lafoia ae e le suasami le eleele ma le palapala.

“Ua fetalai mai lo’u Atua, e leai se filemu i e amio leaga.”⁹

O le mea e lelei ai, tusa lava po o fea o tatou i ai po o le mea sa tatou i ai, tatou te le o mamao lava mai le Faaola, o le na fetalai mai: “O lea, soo se tasi e salamo ma sau ia te au e pei o se tamaitiiti, o ia lea o le a ou talia, ona ua faapea i latou o le malo o le Atua. Faauta, e mo i latou ia na ou tuuina ai i lalo lou ola, ma ou toe avea ai i luga.”¹⁰

Ao faaaauau pea ona tatou salamo ma faalagolago i le Alii, tatou te maua le malosi pe a suia atoa i tatou i le mauaina o le lotomaualalo ma le faatuatua o se tamaitiiti laitiiti,¹¹ faata-maoaigaina i le poto lea e oo mai i le olaga o aafiaga. Na folafola mai e Iopu, “O le ua amiontonu e tumau pea o ia i lona ala, o ia foi ua mamā ona lima e faaopoopoina pea lona malosi.”¹² Na tusia e Tennyson, “O lo’u malosi e pei o le malosi o le toasefulu, ona e mama lo’u loto.”¹³ Ua fautua mai le Alii, “Ia outou tutu ai i nofoaga paia, ma aua le masii ese.”¹⁴

Na maliu le ma tama o Justin i le 19 o ona tausaga ina ua mavae se tauiviga umi ma se ma’i. I se lauga o le sauniga faamanatuga sa ia faia ao lei umi ae ona tuua i matou, sa ia faasoai se tala masalo sa aoga ia te ia e uiga i se tamā ma sona atalii laitiiti lea sa alu i totonu o le faleoloa o meataalo ma sa i ai se polo tu’i feula e foliga i se tagata. Na tu’i e le



tamaitiiti le polo tu’i e foliga i se tagata, lea na pa’ū i luma ma vave ona toe tu faasao pe a mavae tu’i taitasi. Sa fesili le tamā i lona atalii laitiiti pe aisea e toe tu faasao ai le tagata. Na mafaufau le tama mo se minute ona fai mai lea, “Ou te le iloa. Ou te matea ona o loo ia tu i luga i totonu.” Ina ia “tuuto atoa atu,” e tatau ona tatou “tutu i luga i totonu,” “ia tuu po o le a lava se mea e tupu.”¹⁵

Tatou te tutu i luga i totonu pe a tatou faatalitali ma le onosai i le Alii e aveese pe aumai ia i tatou le malosi e onosaia ai mea matuitui i o tatou tino.¹⁶ O ia mea matuitui o ni faama’i, mana-oga faapitoa, ma’i faalemafaufau, maliu o se tasi e pele, ma le anoanoai o isi mea faigata.

Tatou te tutu i luga i totonu pe a tatou siina i luga lima ua tautau i lalo.

Tatou te tutu i luga i totonu pe a tatou puipua le upumoni e tetee atu i se lalolagi leaga ma faalelalolagi lea ua faateleina le le toafilemu i le malamalamā, ua fai mai ua lelei le mea leaga, ae leaga le mea lelei¹⁷ ma “tausalaina e amiontonu ona o lo latou amiontonu.”¹⁸

E mafai ona tutu i luga i totonu e ui i faigata ona o le mafaufau manino, le faamalosiau ma le faamafanafana faamautinoa mai a le Agaga Paia ma se vaaiga faavavau lea e sili atu i lo le malamalamā faaletagata.¹⁹ Sa tatou alalaga fiafia i le muai olaga mo le avanoa e tofo ai i le olaga faitino.²⁰ Sa tatou “tuuto atoa atu” ao tatou faia ma le fiafia tele se filifiliga ia avea ma tagata puipui lotototoa i le fuafuaga a lo tatou Tama Faalelagi. Ua oo i le taimi e tu ai i luga ma ia toe puipua Lana fuafuaga!



Na maliu talu ai nei lo'u tamā e 97 tausaga le matua. Soo se taimi lava e fesili ai se tagata ia te ia po o a mai o ia, o lana tali lava e tasi o le "I se fua o le 1-10, pe a ma le 25 lea ou te i ai!" Na oo lava ina ua le toe mafai ona tu i luga pe saofai lenei tamalii pele, ma sa faigata ona tautala, ae o lana tali lava lea e tasi. Sa na tu pea lava i luga i totonu.

Ina ua 90 tausaga o lo'u tamā, sa matou i ai i le malaevaalele ma sa ou fesili ia te ia pe aumai sona nofoa faataavalevale. Fai mai o ia, "Leai, Gary—masalo pe a oo ina ou matua." Ona ia fai mai lea, "Ma le isi mea, afai ou te lelava savali, e mafai lava ona ou tamoe." Afai e le mafai ona tatou "tuuto atoa atu" i le tulaga o tatou savavali ai i le taimi nei, masalo e tatau ona tatou tamomoe; atonu e tatau ona toe sui o tatou ala. Atonu e ono tatau foi ona tatou faia se toe liliuga. Atonu e tatau ona tatou sue-sue atili ma le totoa, tatalo faatauanau, po o le faamatuu atu o nisi o mea ina ia tatou uumau ai i mea e sili ona taua. Atonu e tatau ona tatou faamatuu ese atu le lalolagi ina ia tatou pipiimau ai i le faavavau. Na iloa e lo'u tamā lenei mea.

Ao i ai o ia i le neivi i le Taua Lona II a le Lalolagi sa i ai i le fale tele ma le ateatea i latou²¹ o e na ulagia ana mata-upu faavae, ae o ana uo seila e toalua, o Dale Maddox ma Don Davidson, na matauina ma e lei ulagia o ia. Sa la fesili atu, "Sabin, o le a le mea e ese ai oe mai tagata uma? E maualuluga ou tulaga faavae ma e te le inupia, ulaula,

pe palauvale, ae e te foliga lava e te to'a ma fafia."

E lei tutusa o la lagona lelei e uiga i lo'u tama ma mea sa aoao ai i la'ua e uiga i Mamona, ma sa aoaoina ma papatisoina e lo'u tama ana uo seila uma e toalua. Sa matuai le fafia matua o Dale ma lapataia o ia afai e auai o ia i le Ekalesia e le toe maua e ia lana manamea, o Mary Olive, peitai sa feiloi lava [Mary Olive] i faifeatalai i le talosaga [a Dale] ma sa papatisoina foi.

Ina ua lata i le faaiuga o le taua, sa valaau mai Peresitene Heber J. Grant mo ni faifeatalai, e aofia ai ma nisi alii ua faaipoipo. I le 1946, sa fuafuaina e Dale ma lona toalua, o Mary Olive, e tatau ona auauna atu Dale e tusa lava pe o faatalitali le la tama muamua. Na iu ina la mauaina se fanau e toaiva—tolu tama ma teine e toaono. Na auauna atu uma le toaiva i misiona, sosoo ai ma Dale ma Mary Olive o e na auauna atu i ni a la'ua foi misiona se tolu. Na auauna atu foi le toatele o fanau a fanau. E toalua le la fanau tama, o John ma Matthew Maddox, o loo pepese nei i le Aufaipese a le Tapeneko, faapea foi le atalii faaletulafono a Matthew o Ryan. Ua 144 nei le fuainumera o le aiga o Maddox ma o ni faataitaiga maoae o le "tuuto atoa atu."

Ao sailili ai i pepa a lo'u tama, sa matou maua ai se tusi mai ia Jennifer Richards, se tasi o afafine e toalima o le isi seila, o Don Davidson. Sa ia tusia: "O lou amiontonu na suia ai o matou

olaga. E faigata ona malamalama i le tulaga semanu e i ai o matou olaga e aunoa ma le Ekalesia. Na maliu lo'u tama o fafia lava i le talalelei ma tau-mafai ia ola ai e oo i le iuga."²²

E faigata ona fuaina le aafiaga mo le lelei e mafai ona maua e tagata taitoatas i le tutu i luga i totonu. Na mumusu lo'u tama ma ana uo seila e toalua e faalogo ia i latou sa i ai i le fale tele ma le ateatea ia na tusitusi mai le tamata-mailima o le faatauemu.²³ Na latou iloa e sili atu le lelei o le mulimuli i le Foafoa nai lo le motu o tagata.

Atonu na faamatalaina e le Apostolo o Paulo o tatou aso ina ua ia ta'u atu ia Timoteo "ua sese ai nisi i ia mea, ua latou liliu ane i upu le aoga."²⁴ E tele naua "upu le aoga" o loo i ai i le lalolagi i aso nei. O le talanoaga lea a i latou o i le fale tele ma le ateatea.²⁵ I le tele o taimi e foliga mai o se ituaiga 'alofaga lea e tauamitonu ai le amio-leaga po o le faaali mai o ia lava pe a lei loloa e tagata o latou auala ma o saoasaoa ese atu. O nisi taimi e o mai ia i latou o e e lei totogiina le tau ina ia "tuuto atoa atu" ma fafia e mulimuli i le tagata natura e ese mai ai i le perofeta.

Ma le agaga faafetai, tatou te iloa le auala e iu ai mo le au faamaoni. A tatou "tuuto atoa atu," ua tatou maua le faamautinoaga maoae o le a "galulue faatasi mea uma e lelei ai i latou o e ua alofa atu i le Atua."²⁶ E pei ona saunoa mai Elder Neal A. Maxwell, "Aua le fefe, tau lava o le ola amiontonu."²⁷

Sa faiaoga le tamā o lo'u toalua i le BYU ma fafia i le lapaki a BYU ae sa le mafai ona ia matamata ia latou taaloga ona e matuai popole lava i le taunuuga. Ona tupu lea o se mea matagofie—ua manamuina le VCR, lea na mafai ai ona ia pueina ia taaloga. Afai na manumalo BYU, ona ia matamata lea i le ata na pue ma le talitonuga atoatoa, matuai mautinoa lava le faaiuga! Afai na faasala ma le le talafeagai, manu'a, pe na foliga o le a faiaina i le kuata lona fa, na te le popole la ona ua ia iloa o le a latou manumalo! Atonu e mafai ona e faapea atu sa i ai ia te ia "se susulu atoatoa o le faamoemoe!"²⁸

E faapena foi i tatou. A tatou faamaoni, e mafai ona tatou maua le

faamautinoaga tutusa o le a lelei mea uma mo i tatou i le iuga. Ua mautinoa lava folafolaga a le Alii. E le faapea la o le a faigofie pe aunoa ma le tele o loimata, ae e pei ona tusia e Paulo, “O mea e lei vaia e mata, e lei lagona foi e taliga, e lei oo foi i le loto o se tagata, o mea ia ua saunia e le Atua mo i latou o e alofa ia te ia.”²⁹

Uso e ma tuafafine, e leai se tasi ua agasala taeao. Tau ina ia toe sui lo tatou ala pe afai e manaomia ma ia taulai atu i luma ma le faamoemoe ma le faatuatua sili. Tau ina ia tatou “tutu i luga i totonu” e ala i le faamaoni ma “tuuto atoa atu.” Tau ina ia tatou mamā ma lototetele i le puipuiga o le fuafuaga a lo tatou Tama Faalelagi ma le misiona a Lona Alo, lo tatou Faaola. Ou te tuuina atu la’u molimau o loo soifua lo tatou Tama, o Iesu o le Keriso, ma e moni le fuafuaga tele o le fiafia. Ou te talosagaina ia faamanuiaga silisili a le Alii i o outou luga, ma ou te faia ai i le suafa o Iesu Keriso, amene. ■

FAAMATALAGA

1. Esekielu 18:21–22.
2. Tagai, mo se faataitaiga, Roy B. Zuck, comp., *The Speaker’s Quote Book: Over 5,000 Illustrations and Quotations for All Occasions* (2009), 107–8.
3. Tagai Matapu Faavae ma Feagaiga 64:34.
4. Tagai Matapu Faavae ma Feagaiga 21:6.
5. Tagai Faaliga 3:15–16.
6. Matapu Faavae ma Feagaiga 84:43.
7. Matapu Faavae ma Feagaiga 29:17.
8. Tagai Alema 41:11.
9. Isaia 57:20–21.
10. 3 Nifae 9:22.
11. Tagai 3 Nifae 11:37–38.
12. Iopu 17:9.
13. Alfred, Lord Tennyson, “Sir Galahad,” i le *Poems of the English Race*, sel. Raymond Macdonald Alden (1921), 296.
14. Matapu Faavae ma Feagaiga 87:8
15. Tagai Joseph B. Wirthlin, “Ia Tuu Po o le A Lava se Mea e Tupu, Ia Fiafia Pea,” *Liahona*, Nov. 2008, 26–28.
16. Tagai 2 Korinito 12:7.
17. Tagai Isaia 5:20.
18. Helamana 7:5.
19. Tagai Filipi 4:7
20. Tagai Iopu 38:7.
21. Tagai 1 Nifae 8:26.
22. Tusi a Jennifer Richards ia Marvin Sabin, tusia i le aso 5 Iulai, 2009.
23. Tagai 1 Nifae 8:27, 33.
24. 1 Timoteo 1:6.
25. Tagai i le 1 Nifae 8:26–28.
26. Roma 8:28.
27. Tagai Bangambiki Habyarimana, *Inspirational Quotes for All Occasions* (2013).
28. 2 Nifae 31:20.
29. 1 Korinito 2:9.



Saunia e Elder Valeri V. Cordón
O Le Fitugafulu

O Le Gagana o le Talalelei

O aoaoga mamana e matuai taua tele e faasaoina ai le talalelei i o tatou aiga, ma e manaomia ai le filiga ma taumafaiga.

na ua mavae ona valaaufina o se Pulega Aoao, sa matou siitia atu ma lo’u aiga mai Costa Rica i le Aai o Sate Leki mo lo’u uluai tofiga. I le i ai iinei i le Iunaite Setete, ua faamanuiaina a’u e asiiasi i tagata matagofie o talaaga ma aganuu eseese. O le toatele o i latou, e faapei o a’u, sa fananau mai i atunuui i Amerika Latina.

Na ou iloa o le toatele o le augatupulaga muamua o tagata Hispanics iinei o le faaSipaniolo la latou gagana autu e tautatala ai ma e lava foi le faaPeretania e fesoottai ai ma isi. O le augatupulaga lona lua, a le o le Iunaite Setete na fananau ai pe na o mai ao laiti lava ma aooga iinei, e lelei tele le tautatala faaPeretania ma masalo e tauatoi le faaSipaniolo. Ma e masani lava e oo atu i le augatupulaga tolu, o le faaSipaniolo, le gagana tautala a o latou tuaa, ua leiloa.¹

I faaupuga faalegagana, e ta’ua lenei mea o le “leiloa o le gagana”. E mafai ona tupu le leiloa o le gagana pe a siitia atu aiga i se atunuui ese lea e le o avea ai la latou gagana ma se gagana tautala. Na tupu e le gata i le au Hispanics, ae faapea foi i le faitau aofai o tagata i le lalolagi atoa lea e sui

ai se gagana moni i se gagana fou e mananaao i ai.² Na oo foi ia Nifae, o se perofeta i le Tusi a Mamona, sa popole i le leiloa o le gagana moni a ona tama ao ia sauniuni e masii atu i le nuu folafolaina. Na tusia e Nifae, “Ma faauta, o le poto o i le Atua ua tatau ai ona tatou maua o ia talafaamaumau, *ia mafai ai ona tatou faasaoina mo a tatou fanau le gagana a o tatou tamā*.³

Ae na popole foi Nifae i le leiloa o le isi ituaiga o gagana. I le fuaiupu e





sosoo ai, sa ia faaauau ai, "Ma ia mafai ai foi *ona tatou maua o ia talafaamau-mau, ia mafai ai ona tatou faasaoina mo i latou upu na tulei mai fofoga o perofeta paia uma*, na tuu mai ia te i latou e le Agaga ma le mana o le Atua, talu mai le amataga o le lalolagi, e oo mai lava i le taimi lenei."⁴

Na ou matauina se mea e tutusa ai le faasaoina o se gagana moni ma le faasaoina o le talalelei a Iesu Keriso i o tatou olaga.

I le asō, i la'u tala faatusa, ou te fia faamamafa atu ai, e le o soo se gagana faalelalolagi faapitoa ae o se gagana e faavavau lea e tatau ona faasaoina i o tatou aiga ma aua lava ne'i leiloa. Ou te tautala atu i le gagana⁵ o le talalelei a Iesu Keriso. O le "gagana o le talalelei," o lona uiga o aoaoga uma a o tatou perofeta, o lo tatou usiusitai i na aoaoga, ma lo tatou mulimuli i tu masani amiontonu.

O le a ou talanoa i auala e tolu e mafai ona faasao ai lenei gagana.

Muamua: la Matua Filiga ma Popole i le Aiga

I le Mataupu Faavae ma Feagaiga, ua valaaulia ai e le Alii le tele o tagata iloga o le Eklesia, e aofia ai Newel K. Whitney, e faatulaga o latou aiga. Na fetalai mai le Alii: "O la'u auauna foi o Newel K. Whitney . . . ua manaomia

foi ona aoaiina, ma faatulaga tatau lona aiga, ma vaai ia *latou filiga atili ma popole i le aiga*, ma tatalo e le aunoa, po o o le a aveesea i latou mai lo latou tulaga."⁶

Se tasi o vaega e uunaia ai le leiloa o se gagana, pe a le faaaluina lea e matua se taimi e aoao ai le gagana moni ia latou fanau. E le lava le na o le *tautala i le gagana i le aiga*. A mananao matua e faasao a latou gagana, e tatau ona *aoao atu*. Ua maua i suesuega o matua o e faia se taumafaiga mataalia i le faasaoina o le latou gagana moni e masani ona manuia i le faatinoga.⁷ O le a la se taumafaiga mataalia e faasao ai le gagana o le talalelei?

Na lapatai mai Elder David A. Bednar o le Korama a Aposetolo e Toasefulua faapea "o le vaivai o aoaoga o le talalelei ma le faataitaiga i le aiga" o se mafuaaga malosi lea e ono gausia ai le li'o o le tele o augatupulaga o aiga i le Eklesia.⁸

E mafai la ona tatou faaiuina faapea o aoaoga malolosi e matuai taua tele e faasaoina ai le talalelei i o tatou aiga, ma e manaomia ai le filiga ma le taumafaiga.

Ua valaauliaina soo i tatou ina ia faia se mausa o le suesue o tusitusiga paia faaleaiga ma faaletagata lava ia i aso taitasi.⁹ O le toatele o aiga o loo faia lenei mea ua faamanuiaina i aso taitasi i

le lotogatasi ma se mafutaga vavalalata sili ma le Alii.

O a fea e tupu ai le suesueina o tusitusiga paia i aso taitasi? O le a tupu pe a taulimaina e matua tusitusiga paia faatasi ai, ma le alofa, valaaulia le aiga ina ia potopoto faatasi e suesue. E fai-gata le vaai atu o tupu lenei suesuega i soo se isi lava auala.

Tamā ma tinā, aua nei misia nei faamanuiaaga maoae. Aua le faatali seja tuai!

Lua. Faataitaiga Malosi i le Aiga

Sa tusia e se tasi o tagata faapitoa e suesue i gagana faapea o le faasaoina o se gagana moni "e tatau ona e *faatumauina le ola o le gagana* mo lau fanau."¹⁰ Tatou te "faaolaina le gagana" pe a galulue faatasi a tatou aoaoga ma faataitaiga.

Ao o'u laitiiti, sa ou faigaluega i le pale suisui a lo'u tamā i taimi o tuuaga. O le fesili muamua e masani ona fesili mai ai lo'u tamā pe a maua lo'u totogi o le: "O le a lau mea e fai i lau tupe?"

Na ou iloa le tali ma tali atu ai: "Totogi la'u sefuluai ma sefe mo la'u misiona."

Ina ua mavae le galue ai mo le valu tausaga pe ā, ma le tali atu pea i lea lava fesili e tasi, sa manatu ai lo'u tamā ua ia aoaoina a'u i le totogiina o la'u sefuluai. O le mea na te lei iloaina sa na o le tasi lava le faaiuga o le vaiaso na ou aoaoina ai lenei mataupu faavae taua. Sei ou ta'u atua le auala na ou aoaoina ai lena mataupu faavae.

Ina ua mavae ni mea na tutupu e fesootai i se taua i le lotoifale i Amerika Tutotonu, na gau le pisinisi a lo'u tamā. Na sau mai le 200 tagata faigaluega tumau pe ā i le itiiti ifo ma le lima tagata suisui o e na galulue pe a manaomia i le faletaavale o lo matou pale. I se tasi aso, i na taimi faigata, sa ou faalogo i o'u matua o talanoa pe tatau ona totogi le sefuluai pe faatau meaai mo tamaiti.

I le Aso Sa, sa ou taumulimuli atu i lo'u tama ia vaai po o le a le mea o le a ia faia. Ina ua maea a matou sauniga Lotu, sa ou vaai o ia aveina se teutusi ma tuu i ai lana sefuluai i totonu. Sa na o se vaega lena o le lesona. O le fesili

na toteo mo a'u o le a se mea o le a matou aai ai.

I le taeao po o le Aso Gafua, na tuitui mai ai nisi tagata i lo matou fai-totoa. Ina ua ou tatalaina, sa latou fesili mo lo'u tamā. Sa ou fonō atu ia te ia, ma ina ua taunuū mai, sa tau atu e le au asiiasi ia te ia se oka suisui faavavave latou te manaomia vave lava pe a talafeagai ai. Na latou tau atu ia te ia e matuai manaomia vave lava le oka ma o lea o le a latou muai totogiina ai loa. I lena aso sa ou aoaoina ai le mataupu faavae o le totogiina o le sefuluai ma faamanuiaga ia e mulimuli mai ai.

I le Feagaiga Fou, o loo talanoa ai le Alii i faataitaiga. Na Ia fetalai: "E moni, e moni, ou te fai atu ia te outou, e le mafai e le Atalii ona fai o se mea, na o ia lava, a o mea na te vaai atu i le Tamā o faia: o mea foi o faia e ia, o loo faia foi ia lava mea e le Atalii."¹¹

E le lava le na o le *talanoa* i a tatou fanau e uiga i le taua o le faaipoipoga faalemalumalu, anapogi, ma le tausia ia paia o le aso Sapati. E tatau ona latou vaavaai mai ua tatou faaavanoaina o tatou taimi faatulagaina ia auai soo i le malumalu i le tele tatou te mafai. E manaomia lo latou vaai i la tatou tautinoga ia anapogi soo¹² ma tausia ia paia le aso Sapati atoa. Afai e le mafai

ona anapogi la tatou autalavou mo ni 'aiga se lua, e le mafai ona suesue soo i tusitusiga paia, ma e le mafai ona tapeina le TV i le taimi o se taaloga tele i le Aso Sa, mata o le a latou maua le malosi faaleagaga e pulea ai i latou lava e tetee atu ai i faaososoga malolosi o le lalolagi luitauina i le asō, e aofia ai le faaososoga o ponokalafi?

Tolu: Uputuu

O se isi auala e mafai ona suia ai pe leiloa ai se gagana o le faafefilo lea o isi gagana ma uputuu ma se gagana moni.¹³

I le popofou o le Ekalesia toefuatatiina, na valaaulia ai e le Alii le tele o tagata iloga o le Ekalesia ina ia faatulaga tatau o latou aiga. Na amata Lana valaaulia i le faailoa mai o ni auala se lua e mafai ona leiloa ai le malamalamama upumoni mai o tatou aiga: "Ma ona sau lea o le amioleaga e toatasи lena ma *aveese mai le fanauga a tagata le malamalamama ma le upumoni*, e ala i le *lē usisitai*, ma ona o le uputuu a o latou tamā."¹⁴

I le avea ma ni aiga, tatou te manaomia le aloese mai soo se uputuu o le a taofia ai i tatou mai le tausia o le aso Sapati ia paia po o le faia o suesuega o tusitusiga paia i aso taitasi ma tatalo i le aiga. E tatau ona tapunia faitotoa

faatekinolosi o o tatou aiga i ponokalafi ma isi uma faatosinaga leaga. Ina ia tetee atu i uputuu faalelalolagi o o tatou aso, e manaomia lo tatou faaogaina o tusitusiga paia ma leo o o tatou perofeta o aso nei e aoao atu ai a tatou fanau e uiga i lo latou faasinomaga paia, lo latou faamoemoega i le olaga, ma le misiona paia a Iesu Keriso.

Faaiuga

I tusitusiga paia, tatou te maua ai le tele o faataitaiga o le "leiloa o le gagana."¹⁵ Mo se faataitaiga:

"O lenei sa oo ina sa toatele tupulaga faia'e *sa lē mafai ona malamalama i upu* a le tupu o Peniamina, ona o ni fanau laiti i latou i le taimi na sauhoa mai ai o ia i lona nuu; ma sa latou lē talitonu i uputuu a o latou tamā. . . .

"Ma o lenei ona o lo latou lē talitonu *sa lē mafai ai ona latou malamalama i le afioga a le Atua*; ma sa faamaaa o latou loto."¹⁶

Mo le tupulaga faia'e, na avea le talalelei ma se gagana ese. Ma a o avea faamanuiaga o le faatumauina o se gagana moni ma finauga i nisi taimi, i le talaaga o le ata o le faaolataga e *leai se finauga* e uiga i taunuuga e faavavau o le leiloa o le gagana o le talalelei i o tatou aiga.


I le avea ai ma fanau o le Atua, o i tatou o ni tagata lē atoatoa o loo tau-mafai e aoao se gagana atoatoa.¹⁷ E pei lava ona alofa se tinā i ana fanau laiti, e onosai lo tatou Tama Faalelagi i o tatou le atoatoa ma mea sese. Na te faataua-inia ma malamalamama i a tatou taumafaiga vaivai ia tatalo, memumemua ma le faamaoni, e pei o se solo matagofie. E olioli o Ia i le leo o a tatou uluai upu faaletalalelei. Na te aoaoina i tatou ma le alofa atoatoa.

E leai se faamanuiaga i lenei olaga, e ui e taua, o le a talafeagai pe a leiloa la tatou gagana o le talalelei i totonu o o tatou aiga.¹⁸ O la'u molimau o le a faamanua i tatou e le Tama Faalelagi i a tatou taumafaiga ao tatou taumafai e uumau i Lana gagana, e tusa lava pe sei lelei la tatou tautatala i lenei tulaga maualuga o fesootaiga, lea sa avea pea ma o tatou gagana moni. I le suafa, o Iesu Keriso, amene. ■



FAAMATALAGA

1. I le au Hispanics, e oo atu i le augatupula tolu “o le tulaga e na o le faaPeretania e tautatala ai e . . . 72 pasene” (Richard Alba, “Bilingualism Persists, but English Still Dominates,” Migration Policy Institute, Feb. 1, 2005, migrationpolicy.org/article/bilingualism-persists-english-still-dominates).
2. “O le tautatala i le na o le faaPeretania o se manamu autu lea i le augatupula tolu” (Alba, “Bilingualism Persists, but English Still Dominates”).
3. 1 Nifae 3:19; faaopoopo le faamamafa.
4. 1 Nifae 3:20; faaopoopo le faamamafa.
5. E mafai ona faaiugaina se gagana o “se polokalamo a fesootaiga na faaaogaina i se atunuup po o se itumalo faapitoa” (Oxford Living Dictionaries, “language,” oxforddictionaries.com).
6. Matapu Faavae ma Feagaiga 93:50; faaopoopo le faamamafa.
7. “E mafai ona [faasaoina se gagana moni], ae e manaomia ai le tuuto ma le fuafuaina” (Eowyn Crisfield, “Heritage Languages: Fighting a Losing Battle?” onraisingbilingualchildren.com/2013/03/25/heritage-languages-fighting-a-losing-battle). “Mo se faataitaiga, o tagata tautatala i le faaSiamani i Sisifo Ogatotonu, sa manuua le faatumauina o lo latou gagana moni i le tele o augatupula” (Alba, “Bilingualism Persists, but English Still Dominates”).
8. David A. Bednar, “Multigenerational Families,” i le Fonotaga mo Taitai o le Konafesi Aoao, Ape. 2015, broadcasts_lds.org.
9. O se tasi o faataitaiga o aso nei o se faatonuga mai le Au Peresitene Sili: “Matou te fautua atu i matua ma fanau ina ia tuu atu le faamuamua aupito maulaluga i tatalo faaleaiga, afiafi faaleaiga, suesuega ma aoaoga o le talalelei, ma gaoioiga lelei atoatoa faaleaiga” (Tusi a le Au Peresitene Sili, 11 Fep. 1999).
10. “E tatau ona e *faaolaina le gagana* mo lau fanau, ina ia mafai ona latou malamalama ma fesoootai ma lagona se vaega o tagata o fai mai sui o le gagana” (Crisfield, “Heritage Languages: Fighting a Losing Battle?” emphasis added).
11. Ioane 5:19.
12. “O le tausiga sa’o o se aso anapogi e aofia ai le le tagofia o meaai ma vaiinu mo ‘aiga sosoo e lua i se umi e 24-itula, ia auai i le sauniga anapogi ma molimau, ma tuuina atu se taulaga anapogi lotofoai e fesoasoani ai e tausia i latou o e le tagolima” (*Tusitala 2: Taitaiina o le Ekalesia* [2010], 21.1.17).
13. Tagai Omina 1:17.
14. Matapu Faavae ma Feagaiga 93:39; faaopoopo le faamamafa.
15. I le talaaga o lenei lauga, o le “leiloa o le gagana” e faasino i le auala e mafai ona leiloa ai le talalelei (tagai Faamasino 2:10; Omina 1:17; 3 Nifae 1:30).
16. Mosaea 26:1, 3; faaopoopo le faamamafa.
17. Tagai Mataio 5:48; 3 Nifae 12:48.
18. Tagai Mataio 16:24–26.



Sauniga e Elder Neil L. Andersen

O Le Korama a Aposetolo e Toasefululua

Manumalo i le Lalolagi

O le manumalo i le lalolagi e le na o se taimi patino se tasi i le olaga atoa e tupu ai, ae e tupu i le olaga atoa lea e iloa ai lou taunuuga e faavavau.

le tele o tausaga ua mavae, sa faamatala ai e Peresitene Tavita O. MaKei se aafiaga matagofie na ia oo i ai a o folau atu i se vaa e agai i Samoa. Ina ua tofa o ia, sa ia “vaaia se faaaliga, o se mea e le mafuatia lona paia. Mai se mea mamao,” sa ia fai mai ai, “Na ou vaai ai i se aai matagofie ua sinasina. . . . O laau ma o latou fua suamalie . . . ma fugalaau ua fuga ma taufufui i soo se mea. . . . Sa i ai se motu o tagata na agai atu i le aai. Sa taitasi ma laei i se ofutalaloa paepae na lealea. . . . Na vave ona ou gauai atu . . . la’u taulaiga i lo latou taitai, ma e ui sa na o se ataata o ona foliga na mafai ona ou vaaia . . . ,

ae sa ou iloaina lava o ia i se tasi taimi o lo’u Faaola! O le . . . susulu o ona fofoga [sa] mamalu. . . . [O le] filemu e uiga ia te ia . . . sa paia!”

Sa faaauau le faamatalaga a Peresitene MaKei, “O le aai . . . o lona aai . . . le Aai e Faavavau; ma o tagata sa mulimuli atu ia te ia e tatau ona nonofo ai iina i le filemu ma le fiafia e faavavau.”

Sa tomanatu Peresitene MaKei, “Po o [ai] i latou na? [O ai nei tagata?]”

Sa ia faamatala le mea na sosoo ai sa tupu:

“E peiseai na faitauina e le Faaola o’u mafauauga, sa ia tali e ala i le faasino atu i [upu i totonusi] o se afal’o lea



... sa i luga a'e o [tagata] ... sa tusia i le auro ... :

"*O i Latou Ia o E Ua Manumalo i le Lalolagi—*

"*O E Moni Ua Toe Fanaufouina!*"¹

Mo le tele o tausaga, ua ou manatua lava upu: "O i latou ia o e ua manumalo i le lalolagi."

O faamanuiaga ua folafola mai e le Alii ia i latou o e manumalo i le lalolagi e ofoofogia lava. O le a "faaofuina [i latou] i ofu sisina . . . ma [tusi lona igoa] i le tusi o le ola." O le Alii foi "o le a ta'u atu [o latou] igoa i luma [o le] Tama, ma luma o ana agelu."² E tofu tagata taitoatasina ma "vaega i le uluai toetutu,"³ maua le ola e faavavau,⁴ ma "e le toe ulufafo lava ia"⁵ mai le afioaga o le Atua.

Mata e mafai ona manumalo i le lalolagi ma maua nei faamanuiaga? Ioe, o lea lava.

Alofa mo le Faaola

O i latou o e manumalo i le lalolagi e atiaeina se alofa atoatoa mo lo tatou Alii ma le Faaola, o Iesu Keriso.

O le paia o Lona soifua mai, Lona soifuaga atoatoa, Lana Togiola le i'u i Ketesemane ma Kolokota, na faamautinoa mai ai le Toetutu o i tatou taitoatasina. Ma o lo tatou salamo faamaoni, ua na o Ia e mafai ai ona faamamaina i tatou mai a tatou agasala, ma faatagaina ai i tatou e toefoi atu i le afioaga o le Atua. "Tatou te alolofa ia te Ia, aua na Ia muai alofa mai ia te i tatou."⁶

Ua apoapoi mai le Alii, "Ia outou loto tetele; ua ou manumalo i le lalolagi."⁷

Mulimuli ane sa Ia faaopoopo mai, "Ou te loto ia outou manumalo i le lalolagi."⁸

O le manumalo i le lalolagi e le na o se taimi patino se tasi i le olaga atoa e tupu ai, ae e tupu i le olaga atoa lea e iloa ai lou taunuuga e faavavau.

E mafai ona amata pe a aoao se tamaititi e tatalo ma usuina ma le migao le, "O loo ou taumafai e avea e pei o Iesu."⁹ E faaauau pea a o suesue se tagata i le soifuaga o le Faaola i le Feagaiga Fou ma mafaufau loloto i le mana o le Togiola a le Faaola i le Tusi a Mamona.



O le tatalo, salamo, mulimuli i le Faaola, ma le mauaina o Lona alofatunoa e taitai atu ai i tatou ia malamalamalama atili i le mafuaaga ua tatou i ai iienei ma pe o ai foi e ao ona tatou avea ai.

Na faamatalaina e Alema i le auala lenei: "Sa oo mai foi se liuga tele [i] o latou loto ma sa latou faamaualalaloina i latou lava ma tuu atu lo latou faalagolago i le Atua moni ma soifua . . . [ma tumau] faamaoni seja oo i le iuga."¹⁰

O i latou o e manumalo i le lalolagi e iloaina o le a latou tali atu i lo latou Tama Faalelagi. O le suia ma le salamo faamaoni mai agasala ua le toe faapologaina ai ae ua tuusaolotoina ai, pe a "[oo ina] sisina e pei o le kiona . . . agasala [sa pei o le] ofu mumu."¹¹

Tali Atu i le Atua

E faigata ia i latou o e o i le lalolagi ona tali atu i le Atua—e pei lava o se tamaititi e pati i le fare o ona matua a o malaga ese atu i laua mai le aai, ma fiafia i le pisapisaō, ae musu e mafaufau i taunuuga pe a toefoi atu matua i le 24 itula mulimuli ane.

E sili atu ona naunau le lalolagi i le faamalieina o le tagata natura nai lo le faatoafimalieina o ia.

O le manumalo i le lalolagi e le o se osofaiga toatele ae o se taua patino faaletagata lava ia, e manaomia ai se tauiviga a le tagata lava ia ma faaososoga o i lona loto.

O le manumalo i le lalolagi o lona uiga o le faatauaina o le poloaiga sili: "Ia e alofa atu i le Alii lou Atua ma lou loto atoa, ma lou agaga atoa, ma lou manatu atoa, ma lou malosi atoa."¹²

Sa faamatalaina e le tusitala Kerisiano o C. S. Lewis faapenei: "Ua fetalai mai Keriso 'Aumai Mea Uma ia te au. Ou te le manao i le tele naua o lou taimi ma le tele naua o au tupe ma le tele naua o au galuega: Ou te manao ia te Oe."¹³

O le manumalo i le lalolagi o le tausia lea o a tatou folafolaga i le Atua—a tatou feagaiga o le papatisoga ma le malumalu ma la tatou tautoga o le faamaoni i a tatou soa e faavavau. O le manumalo i le lalolagi e taitai atu ai i tatou ma le lotomaualalo i le laulau



faamanatuga i vaiaso taitasi, ma ole atu mo se faamagaloga ma folafola atu e “manatua pea o ia ma taus i ana polo-aiga” ina ia tatou “maua pea lona agaga e faatasi ma i [tatou].”¹⁴

O lo tatou alolofa mo le aso Sapat i e le muta pe a tapunia faitotoa o le falesa i o tatou tua, ae e tatala ai faitotoa i se aso matagofie o le malolo mai galuega masani, suesuega, tatalo, ma le aapa atu i aiga ma isi e manaomia lo tatou gauaiga. Nai lo le mapuea pei e matuu atu se avega pe a tuua le lotu ma le tamoe faatopetope e saili se televise ao lei amataina le taaloga lakapi, ia tumau pea lo tatou taulai atu i le Faaola ma Lona aso paia.

O lo faaaauau pea ona lilofoi le lalolagi i se lolovai o leo faatosina ma faaosoosoga.¹⁵

O le manumalo i le lalolagi o le faalagolago atu lea i le leo e tasi lea e lapatai mai, faamafanafana, faamalamalama, ma aumaia le filemu e “le faapei ona [aumai] e le lalolagi.”¹⁶

Manatu Faapito

O le manumalo i le lalolagi o lona uiga o lo tatou liliu atu i isi, ma le manatuaina o le poloaiga lona lua¹⁷:

“A o le sili ia te outou ia fai o ia ma a outou auauna.”¹⁸ O le fiafia o o tatou taitoalua e sili atu le taua nai lo lo tatou lava fiafia. O le fesoasoani i a tatou fanau ia alolofa i le Atua ma taus i Ana poloaiga o se mea faamuamua autu lea. Tatou te naunau e faasoa atu lo tatou manuia faaletino e ala i le sefuluai, tau-laga anapogi, ma le foai atu i e mafatia. Ma a faatumauina pea lo tatou taulai atu i le taitaiga faalelagi, o le a taitai atu i tatou e le Alii ia i latou e mafai ona tatou fesoasoani i ai.

O le lalolagi na te saili ana lava ia mea, ma tautino atu ma le faamaua-luga: “Vaai mai ia te a’u e faatusatusa i o’u tuoai! Vaai i a’u lava mea! Vaai i lo’u taua tele!”

O le lalolagi e faaitagofie, faaituau, ma manaotele, fiafia i viiga a tagata, ae o le manumalo i le lalolagi e aumaia ai le lotomualalo, agalelei, onosai, ma le agaalofa mo i latou e ese mai ia te oe lava ia.

Saogalemu i Perofeta

O le manumalo i le lalolagi o lona uiga o taimi uma lava o le a i ai pea ni o tatou talitonuga e faitioina e le lalolagi. Sa fetalai mai le Faaola:

“Afai e inoino mai le lalolagi ia te outou, ua outou iloa ua muamua ona inoino mai ia te au, i lona inoino ia te outou.

“Afai a ni tagata o le lalolagi outou, po ua alofa mai le lalolagi i ona tagata.”¹⁹

Sa saunoa mai Peresitene Russell M. Nelson i le taeao nei, “O soo moni o Iesu Keriso ua loto e tutu atu, tautatala atu, ma ia ese ai mai tagata o le lalolagi.”²⁰

O se soo o Keriso e le faateia pe a le mauaina e sana faamatulaga [post] e uiga i lona faatuatua ni [likes] se 1,000 po o ni nai ata malie foi o [emojis].

O le manumalo i le lalolagi o le faaftiitia lea o le popole i a tatou fesootaiga i le initonetia ae popole atili i la tatou fesootaiga faalelagi ma le Atua.

O le manumalo i le lalolagi tatou te maua ai le saogalemu pe a tatou usitaia le taitaiga mai i Ana perofeta ma apose-tolo soifua.

Sa aoao mai Peresitene Thomas S. Monson: “E mafai ona luitauna le . . . lalolagi . . . [A tatou o i le malumalu], . . . o le a sili atu ona mafai ona tatou onosaia luitau uma ma manumalo i tofotofoga uma . . . O le a faafouina ma faamalosia i tatou.”²¹

I le faateteleina ai o faaososoga, mea faalavefau, mea pi’opi’o, e taumafai ai le lalolagi e faaseseina ē faamaoni ia aua ne’i amanaiaina aafiaga faaleagaga mamana na latou maua i le tuanai, ma faauigaina o ni mea faavale-valea taufaa’ole’ole.

O le manumalo i le lalolagi o le manatuaina lea o taimi na tatou lagolina ai le alofa ma le malamalamo o le Faaola, e tusa lava pe ua faalotovaivaiva i tatou. Sa faamalamalama mai e Elder Neal A. Maxwell se tasi o nei aafiaga i lenei ala: “Ua faamanuiaina au, ma sa ou iloa na silafia e le Atua na ou iloaina ua faamanuiaina au.”²² E ui atonu tatou te lagolina lē tumau le faagaloina, ae aua nei galo ia i tatou.

O le manumalo i le lalolagi e le faapea ua tatou ola ai i se olaga malupupua, ua puipuia mai mea le talafeagai ma faigata o le olaga faaletino. Ae, e matale ai se vaaiga sili atu ona lautele o le faatuatua, e toso atu ai i tatou i le Faaola ma Ana folafolaga.

E ui e le maea le atoatoa i lenei olaga, ae o le manumalo i le lalolagi e faatumauina ai le momu o lo tatou faamoemoe e i ai se aso tatou te “[tutu] ai i luma [o lo tatou Togiola]; [ma] vaai ai lea i ona fofoga ma le fiafia,”²³ ma faalogo atu i Lona siufogaga: “O mai ia, o outou ua faamanuaina e lo’u Tama, ia fai mo outou tofi le malo ua saunaia mo outou.”²⁴

O Le Faataitaiga a Elder Bruce D. Porter

I le aso 28 o Tesema o le tausaga na tea nei, na maea ai le soifuaga faaletino o le tatou uo pele ma le Pulega Aoao pele, o Elder Bruce D. Porter. Sa 64 ona tausaga.

Na muai ou feiloai ia Bruce a o avea maua ma ni tamaitiaoga i le Iunivesite o Polika Iaga. O ia o se tasi o tamaitiiti sili ona lelei ma sili ona atamai. Ina ua maea lona mauaina o lana faailoga silisili mai le Iunivesite o Harvard, i mataupu faa-Rusia, o mafaufauga ma tusitusiga a Bruce na aumaia le lauiloa ia te ia sa ono faalavelave ia te ia, ae o le oa ma viiga a le lalolagi sa lei puaoa ai lava lana vaai.²⁵ Sa tuuto atu o ia i lona Faaola, o Iesu Keriso; i lana soa e faavavau, o Susan; i lana fanau ma fanau a fanau.



O Elder ma Sister Porter ma le la aiga ao laiti.



O le au Porters, ao auauna atu faatasi i Rusia.



Sa fanau mai Bruce ma se faaletonu o fatuga’o. Sa faia sona taotoga, ae i le aluga o taimi sa faaauau pea ona faaleagaina.

E lei leva ona valaauna Bruce o se Pulega Aoao i le 1995, ae ma auauna atu faatasi ma o ma aiga i Frankfurt, Siamani, lea sa faaaautu ai lana galuega i Rusia ma Europa i Sasae.

Sa matua sua le olaga o Elder Porter i le 1997 ina ua amata ona faaletonu le gaoioi ma le maloloina o ona fatugao. Sa toe foi mai le aiga o Porter i le Aai o Sate Leki.

I le taimi o lana auaunaga e 22 tausaga i le Au Fitugafulu, sa tele taimi na taofia ai Bruce i le falemai, e aofia ai mo ni taotoga se 10. Sa tau atu e fomai ia Susan i ni taimi se lua o le a le aulia e Bruce le taeao, ae sa ia aulia lava.

Mo le silia ma le 12 tausaga o lana auaunaga o se Pulega aoao, o Bruce sa faamamaaina lona toto. Mo le tele o lena taimi, e alu ai afiafi e lima o le vaiaso mo itula e fa i le togafitiga e tasi ina ia mafai ona ia auauna atu i lona vala-auga i le taimi o le aso ma talia tofiga o konafesi i faaiuga o vaiaso. A le faaleleia lona soifuamaloloina i le mavae ai o ni faamanuiga faaleperisitua, sa le mautonu Bruce, ae sa ia iloa lava le e faalagolago i ai.²⁶

I le 2010, sa maua ai e Bruce se fatugao mai lona atalii o David. O le taimi lea, sa lei teenaina ai e lona

tino le togafitiga [o le faapipiina o le fatugao]. O se vavega lava, le aumaia o se malosi toefafouina ma o lea na iu ai ina faatagaina o ia ma Susan e toefoi atu i lo la atunu pele o Rusia, faatasi ai ma lona galue i le Au Peresitene o le Eria.

I le aso 26 o Tesema i le tausaga ua mavae, i le mavae ai o ni tauiviga ma aafiaga faifai pea i se falemai i le Aai o Sate Leki, sa ia talosagaina ia fomai e tuua le potu. Sa tau atu e Bruce ia Susan “ua ia iloaina e ala i le Agaga e le o toe i ai se mea e mafai ona faia e fomai e faasaoina ai lona ola. Sa ia iloa . . . o le a toe ave o ia e le Tama Faalelagi i le aiga. Sa tumu o ia i le filemu.”²⁷

I le aso 28 o Tesema, sa te’ā ai Bruce i tua i lona aiga. I ni nai itula mulimuli ane, a o siomiaina e e pele ia te ia, sa toefoi filemu atu ai o ia i lona aiga faalelagi.

I tausaga ua mavae, sa tusi atu ai e Bruce Porter upu nei i lana fanau:

“O le molimau o ia te au e uiga i le moni ma le alofa o Iesu Keriso ua avea pea ma tapasa o lo’u olaga. . . . O se molimau mama, ma mumu o le Agaga o loo soifua o ia, o ia o lo’u Togiola ma le Uo i taimi uma o mafatiaga.”²⁸

“O la tatou lu’i . . . o le iloaina lea [o le Faaola], ma e ala i le faatuatua ia te ia, e manumalo ai i tofotofoga ma faaososoga o lenei lalolagi.”²⁹

“Ia tatou faatuatua ma faamaoni, ma faalagolago ia te Ia.”³⁰

Ua manumalo Bruce Douglas
Porter i le lalolagi.

Tau ina ia tatou taitoatasi ma taumafai malosi teisi i a tatou taumafaiga ia manumalo i le lalolagi, e le tuusaunoaina agasala matuia ae ia onosai i faaletonu laiti ma measese, faanatinati lo tatou alualu i luma ma le naunautai ma fesoasoani atu ma le agalelei i isi. Ao e faalagolago atoatoa atili i le Faafola, ou te folafola atu ia te oe faamanuiga o le filemu sili atu i lenei olaga ma se faamau-tinoaga sili atu o lou taunuuga e faavavau, i le suafa o Iesu Keriso, amene. ■

FAAMATALAGA

1. *Aoaoga a Peresitene o le Ekalesia: Tavita O. MaKei* (2003), 1–2.
2. Faaaliga 3:5.
3. Matapu Faavae ma Feagaiga 76:64.
4. Tagai Faaaliga 2, autu o le matapu.
5. Faaaliga 3:12.
6. 1 Ioane 4:19.
7. Ioane 16:33.
8. Matapu Faavae ma Feagaiga 64:2.
9. "O Loo Ou Taumafai e Avea e Pei o Iesu," *Tusipese a Tamaiti*, 78.
10. Alema 5:13.
11. Isaia 1:18.
12. Mareko 12:30.
13. C. S. Lewis, *Mere Christianity* (1960), 153.
14. Matapu Faavae ma Feagaiga 20:77.
15. Tagai James E. Faust, "The Voice of the Spirit" (Brigham Young University fireside, Sept. 5, 1993), *speeches.byu.edu*.
16. Ioane 14:27.
17. Tagai Mareko 12:31.
18. Mataio 23:11.
19. Ioane 15:18–19.
20. Russell M. Nelson, "Mauaina o le Mana o Iesu Keriso i o Tatou Olaga," *Liahona*, Me 2017, 40.
21. Thomas S. Monson, "O Le Malumalu Paia —o se Sulu i le Lalolagi," *Liahona*, Me 2011, 93.
22. O se talanoaga patino ma Elder Neal A. Maxwell e faatatau i le tala na faasoaina i lana lauga o le koanfesi ia Aperila 2004, "Ia Outou Manatua le Finagalo Alofa o le Alii" (tagai *Liahona*, Me 2004, 44–46).
23. Enosa 1:27.
24. Mataio 25:34.
25. O se faataitaiga o le malosiaga faaletamai o Elder Porter, o lana tusi e 400 itulau o le *War and the Rise of the State*, sa tuisaina i le 23 tausaga talu ai. O loo maua pea ma e tele ina faiataina e tagata e suesueina faiga faaupufai.
26. Tusi patino mai ia Susan Porter, aso 6 Mati, 2017.
27. Tusi patino mai ia Susan Porter, aso 6 Mati, 2017.
28. Bruce D. Porter, *King of Kings* (2000), 14, 15.
29. Bruce D. Porter, *The King of Kings*, 7.
30. Bruce D. Porter, *The King of Kings*, 18.



Sauniga e Elder M. Russell Ballard
O Le Korama a Aposetolo e Toasefululua

Toefoi Atu ma Mauaina

O le toefoi atu i le afioaga a le Atua ma le mauaina o faamanuiga e faavavau lea e sau mai le osia ma le tausia o feagaiga, o sini aupito sili ia ona taua e mafai ona tatou setiina.

Ou uso e ma tuafafine, ua oo mai nei i lo'u tofiga e lauga atu ia te outou ae o la outou tofiga o le faalogo. O la'u sini o le faamaea o lo'u tofiga a o lei maea la outou tofiga. O le a ou faia le mea sili.

I le aluga o tausaga, ua ou matauina ai o i latou o e aupito tele mea latou te ausiaina i lenei lalolagi o i latou ia e i ai se vaaiga mamao mo o latou olaga, faatasi ma ni sini e faatumau ai lo latou taulaiga i la latou vaaiga mamao atoa ai ma fuafuaga faataatitia i auala e ausia ai. O le iloaina o le mea e te alu i ai ma le auala ua e faamoemoeina e taunu ai iina e mafai ona aumaia ai le uiga, faamoemoega, ma le ausiaga i le olaga.

O nisi e faigata ona latou iloaina le eseesegea i le va o se sini ma se fuafuaga seia oo ina latou iloaina o se sini o se taunuuga po o se *mutaga*, ae o le fuafuaga o le auala lea e te atunu ai iina. Mo se faataitaiga, e mafai ona i ai se tatou sini e tietie atu i se nofoaga patino e le masani ai, ma e pei ona silafia e nisi o outou tuafafine, e masani lava ona manatu matou o tamaloloa matou te iloaina le auala e oo ai iina—e tele ina faapea, "Ou te iloa e pei lava o le pi'oga lea e sosoo atu." Atonu o loo ataata mai lo'u toalua. Sa manino le sini, ae sa leai se fuafuaga lelei na faataatia e taunu ai i le taunuuga.



O le faatutuina o sini e taua le amata faatasi ma le taunuuga i le mafaufau. Ma o le fuafuaga o le fatuina lea o se auala e taunu ai i lena taunuuga. O se ki i le fiafia o loo taoto lea i le malamalama po o a tonu lava taunuuga e taua—ona faaalu lea o lo tatou taimi, taumafaiga, ma le gauaiga i mea e fatua'i ai se auala mautino a taunu ai iina.

Ua tuuina mai e le Atua, lo tatou Tama Faalelagi, ia i tatou le faataitaiga atoatoa o le faatutuina o sini ma le fuafuaina. O Lana sini o le “aumaia [o] le tino ola pea ma le ola faavavau o le tagata,”¹ ma o Lana auala ia ausia ai, o le ata o le faaolataga.

O le fuafuaga a lo tatou Tama Faalelagi pele ua aofia ai le foaiina mai ia i tatou o se olaga faaletino e ola ai, ausia mea sili atu, ma aoao lea e mafai ai ona tatou avea atili e faapei o Ia. O le faaofuina o o tatou agaga e faavavau i tino faaletino; ola i aoaoga ma poloaiga a Lona Alo, le Alii o Iesu Keriso, ma le faia o ni aiga e faavavau ua faatagaina ai i tatou, e ala i le Togiola a le Faaola, e faataunuu le sini a le Atua o le tino ola pea ma le ola e faavavau mo Lana fanau faatasi ma Ia i Lona malo selesitila.

O le setiina o sini atamai e aofia ai le malamalama e faapea e na o le pau le taimi e aoga ai sini mo se taimi puupuu pe afai lea e taitai atu i le malamalamaaga manino i sini mo se taimi umi. Ou te talitonu o se tasi o ki taua i le fiafia o le aoao lea o le auala e seti ai a tatou lava sini ma faavae a tatou lava fuafuaga i totonu o le auivi o le fuafuaga e faavavau a lo tatou Tama Faalelagi. Afai tatou te taulai atu i lenei ala e faavavau, o le a mautino lava tatou te agavaa e toe foi atu i Lona afioaga.

E lelei le i ai o sini ma fuafuaga mo a tatou matata, mo a tatou a'oga, e oo lava i a tatou taalogia tapolo. E taua foi le i ai o ni sini mo a tatou faaipoipoga, o tatou aiga, ma a tatou aufono ma valaauga i le Ekalesia; e faapitoa le moni o lenei mea mo faifeautalai. Ae o a tatou sini aupito sili ona faamuamua e tatau ona ogatusa ma le fuafuaga e faavavau a le Tama Faalelagi. Na fetalai Iesu, “Ia outou muai saili le malo o le Atua ma lana amiontonu, ma o le a faapoopo atu ia te outou nei mea uma.”²



O tagata atamamai i le setiina o sini na tau maia ia i tatou e faapea o le fai-gofie atu ma le sili ona tuusao o se sini, o le faateleina foi lena o le mana o le a i ai. A mafai ona tatou faaitiitia se sini i se ata manino se tasi pe tasi foi pe lua ni upu mamana ma fafaatusa, e mafai ona avea lena sini ma se vaega o i tatou ma taiala ai toetoe lava o mea uma tatou te mafaufau i ai ma fai. Ou te talitonu e lua ni upu o i ai i lenei anotusi o loo fai ma faatusa o sini a le Atua mo i tatou ma a tatou sini sili ona taua mo i tatou lava. O le upu *toefoi atu* ma le *mauaina*.

O le *toefoi atu* i Lona afioaga ma le *mauaina* o faamanuiaga e faavavau lea e sau mai le osia ma le tausia o feagai-ga, o sini aupito sili ia ona taua e mafai ona tatou setiina.

Tatou te *toefoi atu* ma *mauaina* e ala i le i ai o le “faatuatua le

mafaagaeetia [i le Alii o Iesu Keriso], faalagolago atoa” i Ana galuega, feta-omi atu i “luma ma le tumau ia Keriso, ma se susulu atoatoa o le faamoemoe ma le alofa i le Atua ma tagata uma . . . , taumamafa fiafia i le afioga a Keriso, ma tumau e oo i le iuga.”³

Sa lei taliaina e Lusifelo le fuafuaga a lo tatou Tama lea e faatagaina ai i tatou ia *toefoi atu* i Lona afioaga ma *mauaina* Ana faamanuiaga. O le mea moni, sa fouvale Lusifelo ma taumafai e suia atoa le fuafuaga a lo tatou Tama, ma manao ia ave ia te ia lava le viiga, mamalu ma le mana o le Atua. I se taunuuga, na tuliesea o ia faatasi ma e na mulimuli ia te ia mai le afioaga o le Atua ma “avea o ia ma Satani, ioe, o le tiapolo lava lea, o le tamā o pepelo uma, e faasese ma faatauso tagata, ma taitai faatagataotaua i latou i lona loto, le toatele lava lea o i

latou o e e lē faalogo [i le siufofoga o le Alii]" (Mose 4:4).

Ona o ana filifiliga i le muai olaga, e le toe mafai ai e Satani ona *toefoi atu pe mauaina*. Ua na o le pau le mea ua totoe mo ia o le tetea lea i le fuafuaga a le Tama e ala i le faaaogaina o faatosinaga ma faaososoga uma e mafai ai ina ia faatoilaloina i tatou ma faia i tatou ia pagatia e pei o ia.⁵ O le fuafuaga a Satani ia ausia ai lana sini faatiapolo e faatatau lea i tagata uma, tupulaga, aganuu, ma malo. Na te faaaoga leo leotetele—o leo ia e saili e taotaomia i lalo le leo itiiti ma le filemu o le Agaga Paia lea e mafai ona faaali mai ia i tatou "mea uma" e tatau ona tatou faia e *toefoi atu* ai ma *mauaina*.⁶

O nei leo e sau mai ia i latou e le taliaina ia upumoni o le talalelei ma ē o faaaogaina le initonet, ala o faasalalauga faaleagafesootai ma atalolomi, leitio, televise, ma atatifaga e aumai ai i se ala faatosina ia le ola le mama, vesiga, gagana masoa, uiga eelelea ma mea pi'op'i o se auala e faalavelave ai ia i tatou mai a tatou sini ma fuafuaga ua ia i tatou mo le faavavau.

O nei leo e mafai foi ona aofia ai ni tagata ua lelei ni faanaunautaiga ae ua faatausoina e filosofia o le poto salalau o alii ma tamaitai ma o e ua saili e faaumatia le faatuatua ma faaseloa le taulaiga e faavavau a i latou o loo

taumafai ia *toefoi atu* i le afioaga o le Atua ma *mauaina* "mea uma ua i ai i [lo tatou] Tama."⁷

Ua ou iloaina o le faatumauina o le taulaiga i le *toefoi atu* ma le *mauaina* o faamanuiaga folafolaina, e manaomia ai ona ou faaalu soo se taimi e fesili ai ia te au lava ia, "O a'a'u mea o fai?"

E tai pei o la e fai sau oe lava ia faatalanoaga patino ma oe lava ia. Ae afai e faalefetaui lena mea, mafaufau i ai: o ai a se isi tagata i lenei lalolagi e sili atu ona ia iloaina oe nai lo oe lava ia? E te iloaina ou mafaufuga, o au amioga lilo, ou manaoga ma au miti, sini ma fuafuaga. Ma e sili atu lou iloa i lo se isi lava tagata o lou lava alualu i luma i i luga o le auala i le *toefoi atu* ma le *mauaina*.

I le avea ai ma se taimala mo au i le taimi o lenei iloiloga patino faaletagata lava ia, ou te fiafia ai e faiatua ma mafaufau loloto i upu vailili o loo maua i le mataupu lona lima o le Alema, lea o loo fesili ai Alema: "Ua fanauina ea outou faaleagaga i la le Atua? Ua outou maua ea ona foliga i o outou mata? Ua oo ea lenei liuga tele i o outou loto?"⁸ O fesili a Alema o se faamanatu lea i mea e tatau ona aofia i a tatou sini ma fuafuaga ina ia mafai ai ona *toefoi atu* ma *mauaina*.

Manatua le valaaulia a le Faaola ia "outou o mai ia te a'u, outou uma o e tigaina ma mafatia i avega, o a'u foi e malolo ai outou.



"Ia outou amoina la'u amo, ma ia outou faaa'oa'o ia te a'u, aua o a'u lē agamalu ma le loto maulalo, ona maua lea e outou o le malologa mo outou agaga."⁹

A tatou faateleina lo tatou faatuatua i le mana o le Alii o Iesu Keriso tatou te maua ai le malologa mo o tatou agaga e ala i le faamagaloga o agasala, togiolaina o sootaga le atoatoa, faamaloloina o manu'aga faaleagaga lea e fetou ai le tuputupu ae, ma faamalosia ai i tatou ma mafai ai ona tatou atiae ia uiga paia o Keriso, o le a tatou talisapaiaina loloto atili le maoae tele o le Togiola a le Alii o Iesu Keriso.¹⁰

I le gasologa o vaiaso a sau, ia saili se taimi e iloilo ai sini o lou olaga ma au fuafuaga ma faamautinoa ua ogatusa ma le fuafuaga sili a lo tatou Tama Faalelagi mo lo tatou fiafia. Afai e te manaomia ona salamo ma sui, ia mafaufau loa e fai nei lava. Faaalu se taimi e mafaufau ai ma le agaga tatalopo o a ni fetuunaiga e manaomia e fesoasoani ai ia te oe ia faatumauina lou "manatu tasi i le mamalu o le Atua."¹¹

E tatau ona tatou faatumauina le aoaoga faavae ma le talalelei a Iesu Keriso i le totonugalemu o a tatou sini ma fuafuaga. A aunoa ma Ia, e leai ma se sini e faavavau e mafai ona ausia, ma o a tatou fuafuaga ia ausia a tatou sini e faavavau o le a mautinoa lava le le taulau.

O le tasi fesoasoaniga faapoopo, "O Le Keriso Soifua: O Le Molimau a Aposetolo,"¹² lea na faailoa atu i le Ekallesia i le aso 1 o Ianuari, 2000. Tuu se kopi i se mea e mafai ona e iloa atu ai, ma faaalu se taimi e iloilo ai faamata-laga taitasi o loo maua i lenei molimau musuia e uiga ia Keriso e ala i Ana molimau faapitoa na saini ai.

Ou te uunaia oe ia suesue i ai faatasi ma le "O Le Aiga: O Se Folafolaga i le Lalolagi." Ua tele ina tatou talanoa soo e uiga i le folafolaga i le aiga, ae faamolemole manatua e faiatua i ai i le anotusi o le mana faaola o le Keriso soifua. A aunoa ma le Keriso soifua, o le a le faataunuina o tatou faamoemoega sili ona faamemelo. E pei ona taua i le folafolaga i le aiga: "O le fuafuaga paia o le fiafia, ua mafai ai ona faaau- au fegalegaleaiga faaleaiga i tala atu o le tuugamau. Ua mafai i sauniga paia



ma feagaiga ua maua i malumalu paia ona toe foi atu ai tagata taitoatasi i le afioaga o le Atua ma toe faatasia ai aiga e faavavau.”¹³

E na o le pau le mea e mafai ai ona tupu lenei mea ona o le Keriso soifua o le Faaola ma le Togiola lea o le Lalolagi.

I lenei tulaga, e mafai foi ona e mafaufau e sailiili ia tusitusiga paia e faalautele ai lou malamalama e uiga i upumoni patino o loo maua i totonus “O Le Keriso Soifua.”

O le faitauina ma le agaga tatalo “O Le Keriso Soifua” e pei lava o le faitauina o molimau a Mataio, Mareko, Luka, Ioane, ma perofeta o le Tusi a Mamona. O le a faateleina ai lou faatuatua i le Faaola ma fesoasoani ai ia te oe e faatumau lou tauilaiga ia te Ia a o e mulimuli i au fuafuaga ia ausia au sini e faavavau.

E ui lava i a tatou mea sese, lē atoatoa, ō ese mai le talalelei, ma agasala, ae ua faatagaina pea e le Togiola a Iesu Keriso i tatou e salamo, saunia e *toefoi atu* ma *mauaina* ia faamanuiaga lemafaatusalia ua folafola mai e le Atua—ia nonofo e faavavau faatasia ma le Tama ma le Alo i le tikeri sili ona maualuga o le malo selesitila.¹⁴

E pei lava ona outou silafia, e leai lava ma se tasi o le a sola ese mai le otí; o le mea lea, o la tatou sini mo se taimi umi ma fuafuaga e tatau ona taulai atu i le taimi tatou te *toefoi atu* ai i lo tatou Tama Faalelagi, o le a tatou *mauaina* mea uma ua Ia fuafuaina mo i tatou taitoatasi.¹⁵

Ou te molimau atu e leai lava se isi sini e sili atu i le olaga faaletino nai lo le ola e faavavau faatasia ai ma o tatou Matua Faalelagi faapea ma lo tatou Faaola pele, le Alii o Iesu Keriso. Ae e sili atu nai lo le na o la *tatou* lava sini—o la *Latou* sini foi. E i ai so Latou alofa atoatoa mo i tatou, sili atu ona mamana nai lo mea e mafai ona tatou amata malamalama i ai. Latou te ogatusa atoatoa, maeaea ma faavavau ma i tatou. O i tatou o la Latou galuega. O lo tatou mamalu o lo Latou mamalu foi lea. E sili atu i lo se isi lava mea, Latou te finagalo ia tatou foi atu i le aiga—ia *toefoi atu* ma *maua* le fiafia e faavavau i lo Latou afioaga.

Ou uso e ma tuafafine, toe tasi le vaiaso ona tatou faamanatuina lea o le Aso Sa o le Laupama—e faamanatu ai le ulufale manumalo atu o Keriso i Ierusalem. Toe lua vaiaso ona tatou faamanatuina lea o le Aso Sa o le

Eseta—e faamanatu ai le manumalo o le Faaola i le otí.

A tatou faataulai atu o tatou mafaufauga i le Faaola i nei Aso Sa faapitoa e lua, ia tatou manatua o Ia ma faafou a tatou tautinoga o le olaga atoa i le tau-siga o Ana poloaiga. Ia tatou vaai toto'a i o tatou lava olaga, ia seti a tatou lava sini ma taulai atu a tatou fuafuaga ia ogatusa ma le fuafuaga a le Atua i se auala o le a taitai mulimuli atu ai i tatou e agai atu i lo tatou avanoa taua e *toefoi atu* ma *mauaina*—o la'u tatalo faamaualalo lea i le suafa o Iesu Keriso, amene. ■

FAAMATALAGA

1. Mose 1:39.
2. 3 Nifae 13:33.
3. 2 Nifae 31:19–20.
4. Mose 4:4.
5. Tagai 2 Nifae 2:18.
6. Tagai 2 Nifae 32:5.
7. Mataupu Faavae ma Feagaiga 84:38.
8. Alema 5:14.
9. Mataio 11:28–29.
10. Tagai “Becoming Like God,” Gospel Topics, topics.Ids.org.
11. Mataupu Faavae ma Feagaiga 82:19.
12. Tagai “O Le Keriso Soifua: O Le Molimau a le Au Apostolo,” *Liahona*, Apr. 2000, 2–3.
13. “O Le Aiga: O Se Folafolaga i le Lalolagi,” *Liahona*, Nov. 2010, 129.
14. Tagai Mataupu Faavae ma Feagaiga 62; 70.
15. Tagai i le Mataupu Faavae ma Feagaiga 84:38.



Sauniga Aoao a le Au Perisitua | 1 Aperila, 2017

Saunia e Peresitene Thomas S. Monson

Agalelei, Alofa Mama, ma le Alofa

Sei o tatou suesueina o tatou olaga ma naunau e mulimuli i le faataitaiga a le Faaola e ala i le agalelei, agaalofa, ma le alofa mama.

Ou uso pele, ua faamamaluina a'u i le avanoa e lauga atu ai ia te outou i lenei faatasiga i le lalolagi atoa o e umaina ma le faamoni le perisitua a le Atua. O lenei afiafi ou te toe faasino atu i se autu sa ou lauga atu ai muamua.

Sa ototoina e le perofeta o Mamona se tasi o uiga autu o le Faaola lea e ao ona faataitai i ai Ona soo. Na ia saunoa:

“Afaei agamalu ma maualalo se tagata i le loto, ma tautino atu i le mana o le Agaga Paia o Iesu o le Keriso, e ao ina i ai ia te ia le alofa mama; aua afai

e le i ai ia te ia le alofa mama, o se mea noa o ia; o le mea lea e ao ai ina i ai ia te ia le alofa mama.

“Ma o le alofa mama e loa ona talitiga, ma e agalelei, ma e le losilosivale, ma e le faafefeteina, e le sailia e ia ana lava [meal], e le faaitagofie. . . .

“O le mea lea, ou uso pele e, afai e le ia te outou le alofa mama o ni mea noa outou, ona e le uma le alofa mama. O le mea lea, ia outou fusi ai i le alofa mama, le mea ua silisili lea i mea uma, ona e iu mea uma—

Ae o le alofa mama o le alofa le ponalea o Keriso, ma e tumau e faavavau; ma o soo se tasi e maua ua i ai ia te ia i le aso gataaga, o le a lelei ia te ia.”¹

Uso e, tatou te le faamamaluina le perisitua a le Atua pe afai tatou te le agalelei i isi.

O la'u uo pele ma paaga ia Elder Joseph B. Wirthlin o se tamalii agalelei moni lava. Na ia saunoa:

“O le agalelei o le ute lea o se olaga faaselesitila. O le agalelei o le auala lea e taulimaina ai e se tagata FaaKeriso isi. O le agalelei e tatau ona faatumulia ai a tatou upu ma amioga i galuega, i le a'oga, i le lotu, aemaise lava i o tatou aiga.

“O Iesu, o lo tatou Faaola, o le faataitaiga silisili lea o le agalelei ma le agaalofa.”²



Ua aoaoina i tatou e tusitusiga paia e faapea o le faaaogaina ma le amiotonu o le perisitua e faalagolago lea i lo tatou ola ai i matapu faavae o le agalelei, alofa mama, ma le alofa. I le Matapu Faavae ma Feagaiga tatou te faitau ai:

“E leai se mana po o se aafia e mafai pe tatau ona faatumauina ona o le perisitua, nao i le faatauanau, . . . i le agamaualalo ma le agamalu, ma le alofa faamaoni;

“I le agalelei, ma le malamalama manino, lea o le a faalautele tele ai le agaga e aunoa ma le pepelo, ma aunoa ma le faa’ole’ole.”³

Uso e, ia tatou suesueina o tatou olaga ma naunau e mulimuli i le faataitaiga a le Faaola e ala i le agalelei, agaalofa, ma le alofa mama. Ma a tatou faia faapea, o le a tatou i ai i se tulaga lelei atu e valaau atu ai i mana o le lagi mo i tatou lava, mo o tatou aiga, ma mo o tatou uso o malaga i lenei malaga e faigata i nisi taimi, e toe foi atu ai i lo tatou aiga faalelagi. Ou te molimau atu ai i le suafa o Iesu Keriso le Alii, amene. ■

FAAMATALAGA

1. Moronae 7:44–47.
2. Joseph B. Wirthlin, “O Le Uiga Lelei o le Agalelei,” *Liahona*, Me 2005, 26.
3. Matapu Faavae ma Feagaiga 121:41–42.



Saunia e Elder David A. Bednar

O Le Korama a Apostolo e Toasefululua

Valaauina i le Galuega

O se tofiga e galue i se nofoaga faapitoa e tatau ma taua ae e lona lua i se valaauga i le galuega.

Peresitene Monson, ua matua faagaeetia i matou e faalogo atu i lou siufogfa ma maua au aoaoga. Matou te alolofa ia te oe, matou te lagolagoina oe, ma e matou te tatalo e le aunoa mo oe.

Ou te tatalo mo le fesoasoani a le Agaga Paia a o tatou mafaufau faatasi i matapu faavae e faatatau i le galuega maoae o le talaiina o le talalelei i atanuu, ituaiga, gagana, ma nuu uma.¹

Valaauina e Auauna Atu ma Tofia e Galue

O tausaga taitasi e tulimatai atu ai ma le naunautai le fia sefulu afe o alii ma tamaitai talavou, ma le toatele o ulugalii matutua, i le mauaina o se tusi faapitoa mai le Aai o Sate Leki. O anotusi o le tusi e aafia ai e faavavau le tagata o loo faatuatusi atu i ai, faapea foi ma tagata o le aiga ma se aofaiga toatele o isi tagata. A taunu atu, e mafai ona tatalaina lelei ma le onosai le teutusi po o le sasaeina ma le fiafia tele ma le faanatinati tele. O le faitaunia o lenei tusi taua o se aafia e le mafai ona galo.

O le tusi e sainia e le Peresitene o Le Ekalesia a Iesu Keriso o le Au Paia o Aso e Gata Ai, ma o fuaiupu muamua e lua e faitauina faapea: “Ua valaauna oe e avea o se faifeautalai o Le Ekalesia a Iesu Keriso o le Au Paia o Aso e Gata Ai. Ua tofia oe e te galue i le Misiona a . . .”

Faamolemole ia manatua o le fuaiupu muamua o se valaau e auauna atu o se faifeautalai faamisiona i le Ekalesia toefuataiina a le Alii. O le fuaiupu lona lua e faailoa atu ai se tofiga e galue i se nofoaga ma se misiona faapitoa. O le taua o le eseesega o loo faailoa atu i nei fuaiupu e lua e tatau ona tatou malamalama uma i ai.

I le aganuu o le Ekalesia, tatou te talanoa soo i le valaauna e auauna atu





i se atunuu e pei o Atenitina, Polani, Korea, po o le Iunaite Setete. Peitai e le o valaaufina se faifeautalai i se nofoaga; ae, o loo valaaufina o ia e auauna atu. E pei ona tautino mai e le Alii e ala mai i le Perofeta o Iosefa Samita i le 1829, "Afai ua ia te outou le manao e auauna atu i le Atua, ua valaaufina outou i le galuega."²

O valaauga ma tofiga taitasi o le misiona, po o le toe suia o se tofiga mulimuli ane, o se taunuuga lea o faa-aliga e ala mai i auauna a le Alii. O se valaauga i le galuega e sau mai le Atua e ala mai i le Peresitene o le Ekalesia. O se tofiga i se tasi o misiona e silia ma le 400 o loo faagaoioia i le taimi nei i le salafa o le lalolagi e sau mai le Atua e ala mai i se tasi o le Korama a Apostolo e Toasefulu, o loo galue i le faatagaga a le perofeta soifua a le Alii. O meaalofa faaleagaga o valoaga ma faa-aliga e i ai i valaauga ma tofiga uma o le misiona.

O le vaega e 80 o le Mataupu Faavae ma Feagaiga o se faamaumauga o se

valaauga i le misiona ia Stephen Burnett na tuuina atu e le Perofeta o Iosefa Samita i le 1832. O le suesueina o lenei valaauga ia Brother Burnett e mafai ona fesoasoani ia i tatou ina ia (1) malamalamana manino atili i le eseesege o le va o le "valaaufina i le galuega" o se faifeautalai ma le "tofia e galue" i se nofoaga faapitoa ma le (2) talisapaia atoa atili o o tatou tiutetauave ua tofia mai le lagi e folafola atu le talalelei.

O le fuaiupu e 1 o lenei vaega o se valaaufina e auauna atu: "E moni, ua faapea ona fetalai mai o le Alii ia te oe la'u auauna, o Stephen Burnett: Ia e alu atu ia, ia e alu atu ia i le lalolagi ma talai atu le talalelei i tagata uma e oo atu i ai leo."³

O le mea e mataina ai, o le fuaiupu e 2 o loo tau atu ia Brother Burnett e uiga i lana soa faifeautalai ua tofia: "Ma talu ai ona ua e manao i se soa, o le a Ou tuu atu ia te oe la'u auauna o Eden Smith."⁴

O le fuaiupu e 3 o loo ta'ua ai le mea e galulue ai nei faifeautalai e toalua: "O le mea lea, ia oulua o atu ma talai atu la'u talalelei, pe i matu po o i saute, i sasa'e po o i sisifo, e lē afaina, ona e lē mafai ona oulua sese ai."⁵

Ou te le talitonu o le fuaitau "e lē afaina," e pei ona faaaogaina e le Alii i lenei mau, o loo fautua mai ai e le popole o Ia po o fea e galulue ai Ana auauna. O le mea moni, e matua popole lava o Ia. Ae ona o le galuega o le talaiga o le talalelei o le galuega a le Alii, Na te uunaia, taiala, ma taitaiina Ana auauna faatagaina. A o tauivi faifeautalai ia avea atili ma meafaigaluega agavaa ma gafatia i Ona aao ma faia le mea sili latou te mafafia e faataunu ai ma le faamaoni o latou tiute, faatasi ai la ma Lana fesoasoani "e le mafai ona sese"—lava i latou. Masalo o se tasi o lesona o loo aoao mai e le Faaola ia i tatou i lenei faa-aliga e faapea o se tofiga e galue i se nofoaga faapitoa e tatau ma taua ae e lona lua i le valaauga e auauna atu.

O le fuaiupu e sosoo ai o loo faamamafa ai tulaga agavaa taua mo faifeautalai uma: "O lea, alaga atu mea na oulua *faalogo i ai*, ma *talitonu i ai*, ma oulua *iloa ua moni*.⁶

O le fuaiupu mulimuli o loo faamanatu mai ai ia Brother Burnett ma i tatou uma po o ai tonu lava o loo sau ai le valaauga e auauna atu, "Faauta, o le finagalo lenei o ia o lē na valaaufina oulua, o lo oulua Togiola, o Iesu Keriso lava. Amene."⁷

Faatoilaloina o le Malamalamama Sese

Atonu o fesili nisi o outou ia te outou lava pe aisea ua ou filifili ai e talanoaina i se sauniga perisitua lenei eseesege manino i le va o le valaaufina i le galuega ma le tofia e galue. O la'u tali i lenei fesili e tuusao lava: na ou aoaoina mai so'u aafiaga, o nei mataupu faavae e le o malamalamama lelei i ai le toatele o tagata o le Ekalesia.

O le mafuaaga sili e tasi mo le talanoaina o lenei mataupu o se mea sa ou aoaoina i le aluga o taimi e uiga i le atuatuvale, le popole, ma e oo lava i le tausalaina o loo lagonaina e le toatele o faifeautalai o e mo ni mafuaaga eseese na toe tofia i se isi nofoaga e talai ai i le taimi o la latou auaunaga. O ia toe suiga o nofoaga e talai ai e manaomia i nisi taimi ona o mea na tutupu ma tulaga e pei o faalavelave faafuasei ma manuaga faaletino, faatuai ma luitau o le mauaina o visa, lē malupupiuia o faigamalo, faatuina ma le sailia o tagata faigaluega mo misiona fou, po o manaoga faatupulaia ma fesuisuipea i le lalolagi i le galuega o le folafola atu o le talalelei.⁸

A toe tofia se faifeautalai i se isi nofoaga talai, e tutusa pau lava le faagasologa e pei o le tofiga muamua. E saili e uso o le Korama a le Toasefulu, musumusuga ma le taitaiga i le faia o ia toe suiga o nofoaga talai uma.

Sa ou talanoa talu ai nei i se tamalii faamaoni na faasoa maia ia te a'u ona lagona loloto. I se sauniga, faatoa uma ai foi ona ou faamatalaina le eseesege i le va o le valaaufina i le galuega ma le tofia e galue. Na faatalofa mai ai ia te a'u lenei uso lelei ma ona loimata ma fai mai, "O mea na e fesoasoani ou te aoaoina i lenei aso ua aveese atu ai se avega mai o'u tauau sa ou tauaveina mo le silia ma le 30 tausaga. A o avea a'u ma se faifeautalai talavou, sa valaaufina muamua lava a'u e talai i

Amerika i Saute. Peitai sa lei maua so'u visa, o lea na suia ai lo'u valaauga i le Iunaite Setete. O nei tausaga uma sa ou mafaufau ai pe aisea na ou le talai ai i le nofoaga lea na valaauna i ai a'u. Ua ou iloa nei sa valaauna a'u i le galuega ae le o se nofoaga. E le mafaamatalaina le fesoasoani tele o lenei malamalamaaga ia te a'u."

Na ootia lo'u loto mo lenei tamalii lelei. A o ou aoao atu nei mataupu faavae autu i le lalolagi atoa, e le mafaitaulia tagata ua faaalia patino mai ia te a'u lagona lava e tasi e pei o le tamā lea na ou faamatala atu nei. Ua ou tautalagia lenei mataupu i le asō ona e le tatau i se tagata e toatasi o lenei Ekalesia ona tauave se avega le talafeagai o le malamalama sese, le mautonu, ita, po o le tausala e uiga i se tofiga e galue.

"O le mea lea, ia oulua o atu ma talai atu la'u talalelei, pe i matu po o i saute, i sasa'e po o i sisifo, e lē afaina, ona e lē mafai ona oulua sese aí."⁹ A o tou mafaufau i upu o lenei mau ma tatala o outou loto, ou te faamoemoe ma tatalo o le a tou valaauliaina le

Agaga Paia e moliooina i totolu o o outou agaga le malamalama, faamalologa, ma le toefuataiina o loo outou manaomia.

O se tasi o mafuaaga faaopoopo sa ou lagona ai le musuia e talanoa i lenei autu ona o lo'u foi aafiaga i le tofaina o faifeatalai i le tele o tausaga. Mo le Toasefululua, e leai se mea ua faamatuina le moni o faaliga faifapea o aso e gata ai sili ona mamana nai lo le sailia iloa le finagalo o le Alii a o matou faataunuina o matou tiutetauave e tofia faifeatalai i o latou nofoaga talai talafeagai. Ou te molimau atu e silafia e le Faaola ma manatu mai ia i tatou taitoatasina ma i o tatou igoa.

Saunia mo se Valaauga i le Galuega

Ou te fia talanoa puupuu atu nei i se vaega taua e tele ina lē amanaiaina o le saunia mo se valaauga i le galuega.

E tolu ni upu fesootai e fauigaina se mamanu o le sauniuniga ma le alulu i luma mo atalii o le Atua: *perisitua, malumalu, misiona*. O nisi taimi i le avea ai ma ni matua, uo, tagata o le

Ekalesia, tatou te matua taulai atu i sauniuniga a faifeatalai mo alii talavou ae ua tatou faatamala ai i isi laasaga taua i le ala o le feagaiga lea e tatau ona faataunuina a o lei amataina le galuega faamisiona a faafafeatalai. O le galue ai o se faifeatalai e mautinoa lava o le tasi tiute lea, ae le na o le pau lea o se poloka taua e atiaeina i le faagasologa o le fausiaina o se faavae malosi mo se olaga atoa o le tuputupu ae ma le auauaga faaleagaga. O faamanuiaga o le perisitua ma le malumalu, o mea uma ia e lua e muamua a o lei taunu i se nofoaga talai ua tofia i ai, e taua foi ina ia faamalosia ai i tatou faaleagaga i o tatou olaga atoa.

Alii talavou, a o outou faataunuina o outou tiute ma faamamalu le Perisitua Arona po o le perisitua maualalo, ua outou saunia lena e talia ma faalautele le tautoga ma le feagaiga o le Perisitua Mekisateko po o le perisitua maualuga.¹⁰ O le agavaa patino o se tulaga manaomia e tasi ma sili ona taua mo le mauaina o le perisitua maualuga. O se auauaga lē manatu faapito





faaleperisitua o le olaga atoa o loo taoto mai i o outou luma. Saunia nei i le tuuina atu soo o auaunaga anoa. Faamolemole ia aoao e fafia ma tumau i le agavaa. Ia agavaa. Tumau i le agavaa.

A maea ona maua le Perisitua Mekisateko ma se valaauga e auauna atu, e mafai ona faaauppegaina se alii talavou i le mana¹¹ e ala i feagaiga ma sauniga o le malumalu paia. O le alu i le malumalu ma le mauaina o le agaga o le malumalu i totonu o oe e taimua lea i le auaunaga mataalia o se faifeautalai faamisiona. O le agavaa o le tagata lava ia o se tasi o tulaga manaomia sili ona taua mo le mauaina o faamanuiaga o le malumalu mo outou alii talavou ma mo tagata uma o le Eklesia. A o outou ola e tusa ai ma tulaga faatonuina o le talalelei, e mafai ona outou ulu atu i le maota o le Alii ma auai i sauniga paia i le aluga o o outou tausaga faaletupulaga talavou. O lou fafia ma le malamalama i sauniga o le malumalu o le a faamalosia ma faamanuiaina ai outou i o outou olaga atoa. Faamolemole ia aoao e fafia ma tumau i le agavaa. Ia agavaa. Tumau i le agavaa.

E toatele alii talavou ma tamaitai talavou ua umia se pepa faataga aoga o le malumalu e faatapula le faaaoga-ina. I le avea ai ma e umia le Perisitua Arona ua outou sailia igoa o o outou lava aiga ma faatino papatisoga ma

faamauga mo tagata o o outou aiga i le malumalu. O le faatumauina o lou pepa faataga e faaalia ai lou agavaa, ma o le auauna atu i isi i le malumalu o se vaega taua lea o le sauniuni mo le Perisitua Mekisateko.

Alii talavou, o outou taitoatasi o se faifeautalai i le taimi nei. O loo siomia outou, i aso uma, e uo ma tuaoi "o e ua nao na taofia mai le upumoni ona ua latou lē iloa le mea e maua ai."¹² A o taitai outou e le Agaga, e mafai ona outou faasoa atua se manatu, se valaaulia, se tesip o se tuiti [tweet] lea o le a faalauiloa atu ai i a outou uo ia upumoni o le talalelei toefuataiina. E le manaomia ma e le tatau ona outou faatalitali mo lou valaauga aloaia e auai ai ma le naunautai i le galuega faafeautalai.

A o faapotopoto ma "faaopoopoina ia Keriso" faamanuiaga o le perisitua, malumalu, ma le misiona¹³ ma fesootai lelei i le loto, manatu, ma le agaga o se faifeautalai talavou, e mafai ona ia agavaa mo le galuega.¹⁴ E faateleina lona gafatia e faataunu ai le tiutetave e fai ai ma sui faatagaina o le Alii o Iesu Keriso. O le tuufaatasiga malosi faaleagaga o le faamamaluina o le perisitua ma feagaiga o le malumalu, mauaina o le "mano o le faaleatua"¹⁵ e ala i sauniga o le perisitua,¹⁶ auauna atu ma le lē manatu faapito, ma folafola atu

le talalelei e faavavau i fanau a le Atua e mafai ai e se alii talavou ona "tutumau ma mausali . . . i le faatuatua"¹⁷ ma "mauaa . . . ma ia atiina ae ia [Keriso]."¹⁸

I totonu o o tatou aiga ma le lotu, e tatau ona tatou tuuina atu se faama-mafa paleni i elemene uma e tolu i le mamanu o sauniuniga ma le alualu i luma a le Alii mo atalii faamaoni o le Atua: *perisitua, malumalu, misiona*. E manaomia uma e le tolu i tatou ina ia fafia i le agavaa ma tumau ai. Ia agavaa. Tumau i le agavaa.

Folafolaga ma le Molimau

Ou uso pele, ou te folafola atu o le a i ai le meaalofa faaleagaga o faaaliga i lou valaauga i le galuega o le folafola atu o le talalelei ma i lou tofiga i se nofoaga po o ni nofoaga faapitoa o le talaiga. A o outou saunia nei ma le filiga e ala i galuega lē manatu faapito faaleperisitua ma le malumalu, o le a faamalosia la outou molimau o loo soifua moni le Alii. O le a faatumuina lou loto i le alofa mo Ia ma Lana galuega. A o outou aoao ia fafia i le agavaa, o le a avea outou ma meafaigaluega malolosi i aao o le Alii e faamanuia ma auauna atu i le toatele o tagata.

Ma le fafia tele, ou te molimau atu ai o loo soifua lo tatou Tama Faalelagi ma Lona Alo Pele, o Iesu Keriso. O le auai i la Laua galuega o se tasi lea o faamanuiaga silisili e mafai ona tatou mauaina. Ou te molimau atu ai i le suafa paia o le Alii o Iesu Keriso, amene. ■

FAAMATALAGA

1. Tagai Mataupu Faavae ma Feagaiga 133:37.
2. Mataupu Faavae ma Feagaiga 4:3.
3. Mataupu Faavae ma Feagaiga 80:1.
4. Mataupu Faavae ma Feagaiga 80:2.
5. Mataupu Faavae ma Feagaiga 80:3.
6. Mataupu Faavae ma Feagaiga 80:4; faaopoopo le faamamafa.
7. Mataupu Faavae ma Feagaiga 80:5.
8. Tagai Mataupu Faavae ma Feagaiga 124:49.
9. Mataupu Faavae ma Feagaiga 80:3.
10. Tagai Mataupu Faavae ma Feagaiga 84:33–44.
11. Tagai Mataupu Faavae ma Feagaiga 109:22.
12. Mataupu Faavae ma Feagaiga 123:12.
13. Efeso 1:10.
14. Tagai Mataupu Faavae ma Feagaiga 4:5.
15. Mataupu Faavae ma Feagaiga 84:20.
16. Tagai Mataupu Faavae ma Feagaiga 84:19–21.
17. Helamana 15:8.
18. Kolose 2:7.




O Au Pulega Aoao ma Taitai Aoao o Le Ekalesia a lesu Keriso o le Au Paia o Aso e Gata Ai

OLE AU PERESITENE SILI



Henry B. Eyring
Fesoasoani Muamua



Thomas S. Monson
Peresitere



Dieter F. Uchtdorf
Fesoasoani Luu

OLE KORAMA A APOSETOLO E TOASEFULULUA

M. Russell Ballard

Dallin H. Oaks

Quentin L. Cook

Russell M. Nelson

D. Todd Christofferson

Jeffrey R. Holland

Richard L. Evans

Donald L. Hallstrom

L. Whitney Clayton

Craig C. Christensen

Ulfsses Soares

Richard J. Maynes

Gary E. Stevenson

Dale G. Renlund

Gerrit W. Gong

OLE AU PERESITENE O FITUGAEULU



Dieter F. Uchtdorf



Jeffrey R. Holland



Gary E. Stevenson



Ronald A. Rasband



Ulfsses Soares



Richard J. Maynes



Donald L. Hallstrom




L. Whitney Clayton

AU PULEGA AOAO O FITUGAFULU

(I le faasologa faafafapeta)

AOGA SA		TAMAITAI TALAVOU				AUALOFA				TAITAI AOAO				PERAIMERI				OLE AU EPIKOPPO PULEFAAMALUMALU				ALII TALAVOU																	
Marcos A. Andrade	Jose L. Alonso	Wilford W. Andesen	J. Devin Connish	Claudio R. M. Costa	Carlos A. Godoy	Joaquin E. Costa	LeGrand R. Curtis Jr.	Massimo De Feo	Walter F. Gonzalez	Benjamin de Hoyos	C. Scott Graw	O. Vincent Haleck	Taylor G. Grody	Peter E. Heisler	James M. Marino	Hugo Monoya	Marcus B. Nash	K. Brett Nattrass	S. Gifford Nielsen	Eben H. Nelson	Brent K. Taylor	Vern P. Stanfill	Steven E. Stow	Gerald Causé	Epikopo Puulefamalumalu	W. Christopher Waddell	Fescosani Muamua	Stephanie W. Owen	M. Joseph Bough Fescosani Luu										
Valeri V. Cordon	Eduardo Gavaret	Robert C. Gay	Terence M. Vinson	Terence B. Wakolo	Scott D. Whiting	Larry Y. Wilson	Chi Hong Sam Wong	Kazuhiko Yamashita	Jorge F. Zeballos	Chi Hong Sam Wong	John C. Phrigue Jr.	Rafael E. Pino	Michael T. Ringwood	Gregory A. Schwitzer	Joseph W. Slati	V. Craig Zwick	Dean M. Davies	Reinaldo Franco Fescosani Muamua																					
Marcos A. Andrade	Lawrence E. Cobridge	Carl B. Cook	Weatherford T. Clayton	Kim B. Clark	Yoon Hwan Choi	Craig A. Cardon	Mark A. Bragg	Kevin R. Duncan	Larry J. Echo Hawk	Stanley G. Ellis	Enrique R. Falabella	Bradley D. Foster	David J. Evans	Patrick Karan	Larry S. Kaciter	Paul V. Johnson	Alan Ochoa	Alain O'Farrill	S. Mark Palmer	Alison de Paula Pareja	Juan A. Uceda	Amulio Valencia	Jorg Klebingat	Jorg Klebingat	Yon G. Keeth	Yon G. Keeth	Yon G. Keeth	Yon G. Keeth	Yon G. Keeth	Yon G. Keeth	Yon G. Keeth	Yon G. Keeth							
Valeri V. Cordon	Devin G. Durant	Tad R. Galister	Tereseenne	Brian K. Ashton	Carol F. McCookie	Reinaldo Franco Fescosani Muamua																																	
Valeri V. Cordon	Devin G. Durant	Tad R. Galister	Tereseenne	Brian K. Ashton	Carol F. McCookie	Reinaldo Franco Fescosani Muamua																																	





Saunia e Epikopo Gérald Caussé
Epikopo Pulefaamalumalu

Saunia le Ala

E ui lava e eseese o latou tiute ma le pule, ae o le Perisitua Arona ma le Perisitua Mekisateko o ni paaga le mavaevae i le galuega o le faaolataga.

na ua 30 ou tausaga, sa amata ona ou faigaluega mo se kamupani tumaoti i Farani. I se tasi aso sa valaau mai ai le peresitene o le kamupani ia te a'u, o se tamalii lelei e ese lana tapuaiga, ou te alu atu i lona ofisa. O lana fesili na ou tei ai: "Faatoa ou iloa o oe o se ositau-laga i lau eklesia. E sa'o lena mea?"

Na ou tali atu, "Ioe, e sa'o. Ou te umia le perisitua."

O le faagaeitia i la'u tali, na ia fesili ai, "Na e a'oga i se seminālio faalelotu?"

"Ioe," na ou tali atu ai, "i le va o vaitausaga o le 14 ma le 18 ma sa ou suesue i lesona seminare e toetoe lava o aso umal!" Na toeitiiti a pauese o ia mai lona nofoa.

I lo'u te'i tele, o nai vайaso mulimuli ane sa ia toe valaauina atu a'u i lona ofisa e ofa mai ia te a'u se avanoa o le pule faatonusili i se tasi o vaega o kamupani. Sa ou ofo ma faailoa atu lo'u popolega ou te laitiiti tele ma e le lava se poto masani e umia ai sea tiutetauave taua. Ma se ataata agalelei, sa ia fai mai, "Atonu e moni lena mea, ae e le afaina. Ou te iloa ou matapu faavae, ma ou te iloa mea na e aoaoina i lau eklesia. Ou te manaomia oe."

Na sa'o o ia i mea sa ou aoaoina i le Eklesia. O tausaga na mulimuli mai sa luitauina, ma ou te lei iloa pe na mafai

ona faamanuiaina a'u e aunoa ma le poto masani sa ou mauaina i le auauna atu i le Eklesia mai le taimi a o ou alii talavou.

Sa faamanuiaina a'u i le tuputupu ae i se tamai paranesi. Talu ai na toalaiti la matou fuainumera, na valaauina le

autalavou ina ia auai ma le naunautai i vaega uma o le paranesi. Sa ou matuai pisi lava ma fafia i le lagona o le aogā. I Aso Sa sa ou galue i le laulau o le faamanatuga, auauna atu i la'u korama o le perisitua, ma faatino isi valaauga eseese. I le aluga o le vaiaso e masani ona matou o ma lo'u tama ma isi matutua e umia le perisitua e fai a matou asiasiga a faiaoga o aiga, faamafanafana i e mama'i ma mafatia, ma fesoasoani i e le tagolima. E leai ma se tasi na mafaufau ou te laitiiti tele e auauna atu pe taitai foi. Ia te au, na foliga lava o se mea masani.

O auaunaga na faia i na taimi o le talavou na fesoasoani e fausia la'u molimau ma taula lo'u olaga i le talalelei. Sa siosiomia a'u e ni tamalii lelei ma aga-alofa o e na tuuto atu i le faaaogaina o o latou perisitua e faamanuia ai olaga o isi. Sa ou fia avea e pei o i latou. I le auauna atu ma i latou, na sili atu nai lo o lo'u iloaina i lena taimi, sa ou aoao e avea ma taitai i le Eklesia faapea foi i le lalolagi.

E toatele alii talavou o loo auai po o faalogo mai i lenei sauniga i lenei po, o e umia le Perisitua Arona. A o ou vaavaai atu i lenei aofia, ua ou vaai i le





toatele o outou o loo saofafai i autafa o tamalii matutua, atonu o o outou tamā, o outou tamā matutua, o outou uso matutua, po o outou taitai perisitua—o ē umia uma le Perisitua Mekisateko. Latou te alolofa ia te outou, ma i se vaega toatele, na latou malaga mai iinei i lenei po e faatasi ma outou.

O lenei potopotoga o augatupulaga o loo aumaia ai se vaiga matagofie o le lotogatasi ma le tulaga faaleusoga o i ai i le va o perisitua e lua a le Atua. E ui lava e eseese o latou tiute ma le pule,

ae o le Perisitua Arona ma le Perisitua Mekisateko o ni paaga le mavaevae i le galuega o le faaolataga. E o faatasi lava ma e manaomia tele e le tasi le isi.

O le faatusa tonu lava o le sootaga vavalalata o i ai i le va o perisitua e lua na maua lea i le fesootaiga i le va o Iesu ma Ioane le Papatiso. E mafai e se tasi ona mafaufau ia Ioane le Papatiso e aunoa ma Iesu? Mata e faapei le misiona a le Faaola pe a na aunoa ma le galuega sauniuni na faia e Ioane?

Na tuuina ia Ioane le Papatiso se tasi o misiona sili ona matagofie na i ai: “e teuteu le ala o le Alii,”¹ e papatiso o Ia i le vai, ma saunia se nuu ia taliaina o Ia. O lenei tamalii “amiontu . . . ma . . . paia,”² o le na faauuina i le perisitua maualalo, na malamalama atoatoa i le taua ma le tapulaa o lana misiona ma lana pule.

Na lolofi atu tagata ia Ioane e faaologo ma ina ia papatisoina e ia. Sa faamamaluina ma faaaloalogia o ia i lona foi aia tatau o se tagata o le Atua. Ae ina ua faaali ane Iesu, na gauai atu Ioane i se Tasi e sili atu nai lo ia ma tautino atu, “Ou te papatiso i le vai: a o loo tu mai i totonu ia te outou le tasi, . . . o ia lea o loo mulimuli mai, e sili lava o ia ia te au, ou te le aoga ona ou tatalaina le nonoa o lona seevae.”³

Mo Lana vaega, na silafia ma le lotomaualalo, e Iesu Keriso, le Alo e Toatasi na Fanaua e le Tama, o le na umia le perisitua maualuga, le pule a Ioane. O ia, na fetalai ai le Faaola, “E lei tu mai i e na fananau i fafine sē sili ia Ioane le Papatiso.”⁴

Mafaufau po o le a se mea e mafai ona tupu i a tatou korama o le perisitua pe afai na musuia ia fegalegaleaiga i le va o e umia ia perisitua e lua e le mamanu na faavaeina e Iesu ma Ioane le Papatiso. O’u uso talavou pele o le Perisitua Arona, e pei o Ioane, o lau matafaioi o le “saunia le ala”⁵ mo le galuega maoae o le Perisitua Mekisateko. O loo outou faia lenei mea i le tele o auala eseese. O loo outou faatinoina sauniga o le papatisoga ma le faamanatuga. O loo outou fesoasoani e saunia se nuu mo le Alii e ala i le talai atu o le talalelei, e ala i le “[asiasi atu] i pale o tagata taitoatasi,”⁶ ma e ala i le “[leoleo] i luga o le ekalesia.”⁷ O loo outou tuuina atu le fesoasoani i e matitiva ma lē tagolima i le aoina o taulaga anapogi, ma o loo outou auai i le tausiga o falelotu o le Ekalesia ma isi punaoa faaletino. E taua, manaomia, ma paia la outou matafaioi.

O’u uso e matutua, pe o outou o ni tamā, epikopo, faufautua o Alii Talavou, pe nao e o umia le Perisitua Mekisateko, e mafai ona outou mulimuli i le faataiga a le Faaola i le liliu atu i o outou



uso o e umia le perisitua maualalo ma valaaulia i latou ia galulue faatasi ma outou. O le mea moni, o le valaaulia e sau mai le Alii Lava Ia. Na fetalai mai o Ia, "O lea, ia outou ave faatasi ma outou e ua faauuina i le perisitua maualalo, ma auina atu i latou e muamua atu ia te outou e fai tuutuuga, ma saunia le ala, ma faataunu tuutuuga ua lē mafai e outou lava ona faataunu."⁸

A o outou valaauinia o outou uso talavou e "saunia le ala," ua e fesoasoani ia i latou ia iloa ma faamamalu i le pule paia o loo latou umiaina. O le faia o lea mea, ua e fesoasoani ai ia i latou e saunia lo latou lava ala a o latou saunia mo le aso latou te maua ai ma faaaoga le perisitua maualuga.

Faataga mai a'u e faasoa atu se tala moni ia Alex, o se aoao talavou filemu, magafagafa, ma atamai. I se tasi Aso Sa, sa maua ai e le epikopo Alex o loo nofo nao ia i se potuaoga i se tulaga o le faanoanoa tele. Sa faamatala e le alii talavou le tiga o le faigata o le auai i le lotu e aunoa ma lona tamā, lea e le auai i le lotu. Ona ia fai mai lea ma loimata atonu e sili ona lelei mo ia le tuua o le Ekalesia.

O le popole moni mo lenei alii talavou, na vave ai ona tuufaatasia e le

epikopo le aufono a le uarota e fesoasoani ia Alex. Sa faigofie lana fuafuaga: ina ia faatoagaina pea Alex ma fesoasoani ia te ia e atiae se molimau loloto o le talalelei, e manaomia ona latou "siosiomia o ia ma tagata lelei ma tuu atu ia te ia ni mea taua e fai."

Na vave ona tuufaatasia le usoga o le perisitua ma tagata uma o le uarota e fesoasoani ia Alex ma faaali lo latou alolofa ma le lagolago. O le taitai vaega o faitaulaga sili, o se tagata faatuatua ma alofa, na filifilia e avea ma ana soa o faiaoga o aiga. Na lagolagona patino o ia e uso o le au epikopo ma avea o ia ma o latou uo sili ona latalata i ai.

Na saunoa le epikopo: "Sa matou faapisiina Alex. Sa ia faasino nofoa i faaipoipoga, i maliu, fesoasoani ia te a'u i faapaiaga o tuugamau, papatiso nisi o tagata fou, faaauu alii talavou i tofi o le Perisitua Arona, faiaoga i le autalavou, aoao atu ma faifeautalai, tatalaina falelotu mo konafesi, ma lokaina fale i le leva o le po pe a maea konafesi. Sa ia faia ni galuega faatino, na ma o faatasi e asiiasi i tagata matutua ua lata ina maliliu, faia ni lauga i sauniga faamanatuga, tuuina atu le faamanatuga i e mama'i i falemai po o i o latou fale, ma

avea ma se tasi o se vaega toalaiti lava o tagata ou te matuai faalagolago i ai o se epikopo."

Na suia lemu Alex i sina mea itiiti ma sina mea itiiti. Na faateleina lona faatuatua i le Alii. Na ia maua le talitonuga ia te ia lava ma i le mana o le perisitua lea sa ia umia. Na faa'iu le saunoaga a le epikopo: "Na avea Alex ma e avea pea ma se tasi o faamanuia sili i lo'u taimi o se epikopo. O se faamanuia le fegalegaleai faatasi ai ma ia. Ou te talitonu faamaoni e leai se alii talavou ua alu i le misiona e lei matua saunia lelei e lana auaunaga faaleperisitua."⁹

O'u epikopo pele, ua ia te outou, e aofia i lou faauuga ma le vaetofiaina o se epikopo o lau uarota, le valaauga paia e auuana atu o se peresitene o le Perisitua Arona ma le korama a ositau-laga. Ou te iloa o loo outou tauaveina ni avega mamafa, peitai e tatau ona avea o outou tiute i nei alii talavou ma se tasi o a outou faamuamua aupito maualuga. E le mafai ona outou faatama pe faamatuu atu a outou matafaioi i lenei tiutetauave i isi.

Ou te valaaulia outou ina ia mafau-fau i talavou taitasi o loo umiaina le Perisitua Arona i lau uarota. E le tatau

ona lagona e se tasi o i latou le tuulafoaia po o le le aoga. O i ai se alii talavou e mafai e oe ma isi uso o le perisitua ona fesoasoani i ai? Valaulia o ia e galue i ou autafa. E tele taimi tatou te taumafai ai e faafafia a tatou alii talavou ma tuua i latou i se tulaga o se tagata maimoa, ae e sili ona atiae o latou faatuatua ma le alofa mo le talalelei pe a faalauteleina o latou perisitua. E ala i le auai ma le naunautai i le galuega o le faaolataga, o le a latou fesootai ai ma le lagi ma o le a latou malamalama ai i lo latou gafatia paia.

O le Perisitua Arona e sili atu nai lo na o se vaega o le vaitausaga, se polokalama po o se gaoioiga faaleaoaoga, pe oo lava i se faaupuga e faailoga ai alii talavou o le Ekalesia. O le mana ma le pule lea e auai i le galuega sili o le laveaiina o agaga—o agaga o na alii talavou o loo umiaina faapea ma agaga o i latou o loo latou auauna atu i ai. Sei o tatou tuuina le Perisitua Arona i lona nofoaga moni, o se nofoaga filifilia—o se nofoaga o auaunaga, sauniuniga, ma mea e ausia mo alii talavou uma o le Ekalesia.

O'ou uso pele o le Perisitua Mekisateko, ou te valaaulia outou ina ia faamalosia le sootaga taua lea e tuufaatasia ai ia perisitua e lua a le Atua. Ia faamalosia a outou talavou o le Perisitua Arona e saunia le ala i o outou luma. Tau atu ia i latou ma le mautinoa, “Ou te manaomia oe.” Ia te outou talavou o loo umiaina le Perisitua Arona, ou te tatalo, a o outou auauna faatasi ma o outou uso matutua, o le a outou faalogo i le siufogfa o le Alii o fetalai atu: “Ua faamanuaina oe, ona o le a e faia mea tetele. Faauta sa auina atu oe, e pei lava o Ioane, e saunia le ala i o'u luma.”¹⁰ I le suafa, o Iesu Keriso, amene. ■

FAAMATALAGA

1. 1 Nifae 10:7.
2. Mareko 6:20.
3. Ioane 1:26–27.
4. Mataio 11:11.
5. Mataupu Faavae ma Feagaiga 35:4.
6. Mataupu Faavae ma Feagaiga 20:51.
7. Mataupu Faavae ma Feagaiga 20:53.
8. Mataupu Faavae ma Feagaiga 84:107.
9. Tusitusiga patino.
10. Mataupu Faavae ma Feagaiga 35:4.



Saunia e Peresitene Dieter F. Uchtdorf

Fesoasoani Lua i le Au Peresitene Sili

○ Lē Sili ia te Outou


O le taui aupito silisili a le Atua e avatu ia i latou e auauna atu e aunoa ma le faamoemoe mo se taui.

U uso pele, uo pele, ou te faafetai tele e faatasi ma outou i lenei sauniga faaleperisitua musuia i le lalolagi atoa. Peresitene Monson, faafetai mo lau savali ma le faamanuiga. O le a matou taliaina ma le faafetai au upu o le taitaiga, faatuaga, ma le malamalama. Matou te alolofa ma lagolagoina oe, ma e matou te tatalo e le aunoa mo oe. O oe moni lava o le perofeta a le Alii. O oe o lo matou Peresitene. Matou te lagolagoina oe, matou te alolofa ia te oe.

Ua toeitiiti atoa le luasefulu tausaga talu ai, sa faapaiaina ai le Malumalu o Madrid Sepania ma amatalia ana

auaunaga o se maota paia o le Alii. Ma te manatuaina lelei lava ma Harriet ona sa ou auauna atu i le Au Peresitene o le Eria i Europa i lena taimi. Faatasi ai ma isi tagata e toatele, sa matou faaluina ni itula le mafaitaulia e auai ai i le auliliina o fuafuaga ma le faatulagaina o polokalama e oo atu i le faapaiaga.

Ina ua latalata mai le aso o le faapaiaga, sa ou matauina ou te lei mauaina lava se valaaulia e auai ai. Sa le'i mafaufauina lenei mea. Ona i ou tiutetauave uma o le Peresitene o le Eria, sa matua ou aafia i le galuega faatino o lenei malumalu ma sa lagona ai sina vaega o le puleaina.



Sa ou fesili atu ia Harriet pe na vaai i se valaaulia. Sa lei vaai i ai o ia.

Ua mavae aso, ma ua faateleina lo'u popole. Sa ou tomanatu pe ua leiloa le ma valaaulia—masalo pe ua pa'u i le va o momi o le ma sofa. Atonu na fefilo faatasi ma lapisi o meli ma tiai ese ai. Sa i ai i le ma tuaoi se pusi isuisu, ma amata ona ou tilotilo atu i ai ma le masalosalo.

Mulimuli ane, sa faamalosia au e taliana le mea moni: ua le valaauliaina au.

Ae na faapefea ona tupu lena mea? Na ou faia ea se mea e faatiga ai [i se isi]? Pe na manatu ea se tasi ua mamao tele mo maua le faimalaga mai? Pe ua galo ea au?

Mulimuli ane, sa ou iloaina o lenei ituaiga o manatu na taitai atu i se ituaiga o uiga sa ou le manao e maua ai.

Sa ma faamanatuina ia i maua ma Harriet o le faapaiaga o le malumalu sa lei faatatauina ia i *maua*. Sa lei faatatau po o ai e tatau ae po o ai foi e le tatau ona valaauliaina. Sa lei faatatau lava i o ma lagona po o lo ma manatu o le umiaina o se mea.

Sa faatatau i le faapaiaina o se fale paia, o se malumalu o le Atua Silisilise. O se aso o le olioli mo tagata o le Ekalesia i Sepania.

Pe ana valaauliaina au e auai, semanu ou te faia ma le fiafia tele. Ae ana faapea sa lei valaauliaina au, o le a le itiiti lava lo'u fiafia. O le a ma fiafia ma Harriet faatasi ma a ma uo, o alii ma tamaitai pele mai se mea mamao. O le a ma vivii atu i le Atua mo lenei faamanuiaga matagofie e pei lava ona ma faia ma le naunautai mai lo ma fale i Frankfurt e faapena foi ona ma faia mai Madrid.

O Atalii o Faititili

E aofia ai i le Toasefululua na valauina ma faauuina e Iesu o se auso toa-lua, o Iakopo ma Ioane. E te manatua le igoa valaaau na Ia faaigoa ai i lau?

O Atalii o Faititili (Poaneki).¹

E te le maua se igoa valaaau faapena e aunoa ma se mafuaaga taua. O le mea e faanoanoa ai, e le o maua i tusitusiga paia le tele o se faamalamalamaga e uiga i le tupuaga o le igoa valaaau. Peitai, tatou te maua ni nai vaaiga pupuu i uiga o Iakopo ma Ioane. O le auso lava lenei o e na fautuaina ia to ifo le afi mai



le lagi i luga o se nuu i Samaria i le le valaauliaina [o latou] i le aai.²

O Iakopo ma Ioane o ni faifaiva—masalo e itiiti sina poto masani—ae na la iloa lelei elemene o le natura. E mautinoa lava o i laua o ni tamalii o faatinoga.

I se tasi taimi, a o sauniuni le Faaola e fai Lana malaga faaiu i Ierusalem, sa faalatalata atu Iakopo ma Ioane ia te Ia ma se talosaga faapitoa—masalo o se talosaga e agavaa mo lo la igoa valaa.

“Ua ma mananao ina ia e faia mo i maua le mea a ma ole atu ai,” sa la fai atu ai.

Ou te manatu na soisoi atu Iesu a o Ia tali atu, “Se a le mea lua te mananao i ai?”

“Ia e tuu mai ia te i maua, ma te nonofo o le tasi i lou itu taumatau, ma le tasi i lou itu tauagavale i lou mamalu.”

Sa lu'iina i laua e le Faaola ina ia toe mafaufau loloto teisi lava i le mea ua la talosaga atu ai ona fetalai atu lea, “O le nofo i lo'u itu taumatau ma lo'u itu tauagavale, e le o ia te au lea ona avatu, a e tau lava o e ua saunia mo i latou lea mea.”³

I se isi faaupuga, e le mafai ona e maua le mamalu i le malo o le lag i e ala i le fiatautavā i ai. E le mafai foi ona “fai faaālatua” lou auala i le mamalu e faavavau.

Ina ua faalogo atu isi Apostolo e toasefulu i lenei talosaga mai Atalii o Faititili, sa latou le fiafia i lea mea. Na

silafia e Iesu ua puupuu Ona aso, ma o le vaai atu i finauga a i latou o le a tauaveina Lana galuega masalo na popole ai o Ia.

Sa Ia talanoa atu i le Toasefululua e uiga i le natura o le mana ma le auala e aafia ai i latou o e saili atu ma taofimau i ai. “O tagata e faia faatosinaga i le lalolagi,” na Ia fetalai ai, “e faaaogaina o latou tofiga o le pule e pulea ai isi.”

E toetoe lava a mafai ona ou vaai atu i le Faaola, o silasila atu ma se alofa lemafuatia i fofoga o na soo faamoni ma talitonu. E toetoe lava a mafai ona ou faalogo atu i Lona siufofoga o augani atu: “E le o le auala lea e tatau ona outou ola ai. Ae, o se fia sili ia te outou, ia fai o ia ma a outou auauna: O se fia muamua foi ia te outou, ia fai o ia ma tautua a outou uma.”⁴

I le malo o le Atua, o le sili ma taitai o lona uiga o le vaai atu i isi i o latou tulaga moni lava—e pei ona silasila mai i ai le Atua ia i latou—ona aapa atu lea ma auauna atu ia i latou. O lona uiga o le olioli faatasi ma i latou o e fiafia, feta-gisi faatasi ma e faanoanoa, sii i luga i latou o atatuvalle, ma alolofa atu i o tatou tuaoi e pei ona alofa mai Keriso ia i latou. E alofa le Faaola i fanau uma a le Atua e tusa lava po o a o latou tulaga faaletamaoaiga, ituaiga, tapuaiga, gagana, manatu faaupufai, tagatanuu, po o soo se isi lava vaega. Ma e tatau foi la ia i latou!



O le taui aupito silisili a le Atua e avatu ia i latou e auauna atu e aunoa ma le faamoemoe mo se taui. E avatu ia i latou o ē auauna atu e aunoa ma viiga a tagata; o ē e o atu gūgū lava e saili auala e fesoasoani ai i isi; o i latou e auauna atu i isi ona latou te alolofa i le Atua ma fanau a le Atua.⁵

Aua Ne'i Manatu Mamafa | Ai

E lei leva ona valaaufina au o se Pulega Aoao, ae ou maua le avanoa e faafeao atu ai Peresitene James E. Faust mo se faatulagaina o se siteki. A o ou ave atua le taavale i le ma tofiga i le matagofie o Iuta i Saute, sa agalelei tele Peresitene Faust e faaaoga le taimi e faatonu ai ma aoao au. O se tasi o lesona o le a le galu lava ia te au. Na ia saunoa mai, "E faafetai tagata o le Ekalesia i le Au Pulega Aoao. O le a latou taulimaina oe ma le agalelei ma fai atu ni tala mananaia e uiga ia te oe." Ona ia taofi teisi lea ma fai mai, "Dieter, ia faafetai e le aunoa mo lea mea, ae aua ne'i manatu mamafa i ai."

O lenei lesona taua e uiga i auau-naga faale-Ekalesia e faatatau i tagata uma e umia le perisitua i korama uma o le Ekalesia. E faatatau ia i tatou uma i lenei Ekalesia.

A o fautuina e Peresitene J. Reuben Clark Jr. i latou e valaaufina i tofiga o pulega i le Ekalesia, na te ta'u atu ia i latou e aua ne'i galu le tulafono lona ono.

E mautinoa lava, o le a fesili se tagata, "O le a le tulafono lona ono?"

"Aua e te mafafau tele po o a manatu o tagata e uiga ia te oe," na te fai atu ai.

Ioe, e sosoo ai ma se fesili tulitatao: "O a la isi tulafono e lima?"

Ma se foliga ataata i ona fofoga, e faapea mai Peresitene Clark, "E leai se mea."⁶

Ina ia avea ma taitai mataalia o le Ekalesia, e tatau ona tatou aoaoina lenei lesona taua: o le taitaiga i le Ekalesia e le o faatatau tele i le faatonuina o isi e pei o lo tatou naunautaiga ina ia faatonuina i tatou e le Atua.

O Valaauga o Avanoa mo Auaunaga

I le avea ai ma Au Paia a le Atua Silisilise, e ao ona tatou "manatua foi i mea uma, e matitiva ma e le tagolima, o e mama'i ma e puapuagatia, aua o le na te le faia ia mea, e le o sou soo o ia."⁷ O avanoa e o atu ai ma fai mea lelei ma auauna atu i isi e le faatapu-laina. E mafai ona tatou maua i latou i totolu o o tatou nuu, i totolu o a tatou uarota ma paranesi, ma mautinoa lava i totolu o o tatou aiga.

Ma le isi, ua tuu atu i tagata uma o le Ekalesia ni avanoa aloaia patino e auauna atu ai. Tatou te faasino atu i nei avanoa o "valaauga"—o se upu e tatau ona faamanatu mai ai ia i tatou po o ai lea na valaaufina i tatou e auauna atu. Afai tatou te taulimaina o tatou valaauga o ni avanoa e auauna ai i le Atua ma auauna atu ai i isi i le faatuatau ma le lotomau-lalo, o faatinoga uma la o auaunaga o le a avea ma se laasaga i luga o le ala o le avea ma soo. I lea ala, e le gata e atiae ai e le Atua Lana Ekalesia ae atiae ai foi Ana auauna. Ua mamanuina le Ekalesia ina ia fesoasoani ia i tatou ia avea ma ni soo moni ma faamaoni o Keriso, ni atalii ma ni afafine lelei ma malualii o le Atua. E le na o le taimi tatou te o ai i sauniga ma faalogo i lauga e tupu ai lenei mea, ae pe a tatou mafafau foi i isi tagata ma auauna atu i ai. O le auala lea tatou te avea ai ma "sili" i le malo o le Atua.

Tatou te taliaina valaauga ma le alofa tunoa, lotomau-lalo, ma le lotofaafetai. A faamaloloina i tatou mai nei valaauga, tatou te taliana foi le suiga i le alofa tunoa lava e tasi, lotomau-lalo, ma le lotofaafetai.

I fofoga o le Atua, e leai se valaauga i le malo e sili atu sona taua i lo le isi valaauga. O la tatou auaunaga—pe tele pe itiiti—e faafaillele ai agaga, tatala ai pupuni o le lagi, ma faamatuu mai ai faamanuiaga a le Atua e le gata mo i latou tatou te auauna i ai ae faapena foi i o tatou lava luga. Ma a tatou aapa atu i isi, e mafai ona tatou iloaina ma le talitonuga faamau-lalo ua faamama-luina e le Atua la tatou auaunaga i le faamaoniga ma le fiafia. E soisoi mai ia i tatou a o ofo atu o tatou galuega agaalofo loloto, aemaise o galuega e le ma vaaia e isi.⁸

O taimi uma tatou te ofo atu ai i tatou lava i isi, tatou te faia ai lava se laasaga e latalata atili atu ai i le avea ma ni soo moni ma lelei o Lē na foai mai Ana mea uma mo i tatou: o lo tatou Faaola.

Mai le Pulefaamalumalu i le Solo o Savali

I le taimi o le faamanatuina o le 150 tausaga o le taunu o paonia i le Vanu o Sate Leki, sa auauna atu ai Uso Myron Richins o se peresitene o se siteki i Henefer, Iuta. O le fiafia na aofia ai se toefaa-tinoga o le auala a paonia na oso atu i le taulaga.

Sa matua aafia ai lava Peresitene Richins i fuafuaga mo le fiafia, ma sa ia auai ai i le tele o fonotaga faatasi ma le Au Pulega Aoao ma isi i le talanoaina o polokalama. Sa ia gauai atoa atu.

A o lumanai ai le faafiafiaga, sa toe-faatulaga ai le siteki a Peresitene Richins, ma sa faamalolo ai o se peresitene. I se Aso Sa na sosoo ai, sa auai ai o ia i le sauniga perisitua a lana uarota ina ua talosagaina e taitai ni volenitia e fesoasoani i faafiafiaga. Sa sii i luga le lima o Peresitene Richins faatasi ma isi ma tuu atu i ai faatonuga ia laei i ni laei faigalugega ma aumai lana loli ma se suo.

Mulimuli ane, na oo mai le taeao o le gaoioiga tele, ma sa alu atu ai Peresitene Richins i tiute a volenitia.

E na o ni nai vaiaso na muamua atu



ai, sa avea ai o ia ma se tagata faisao-faga tele i le fuafuaina ma le vaavaaiga o lenei polokalama tele. Peitai, i lena aso, o lana galuega o le mulimuli lea i tua o solofanua o le solo ma faamama.

Sa faia e Peresitene Richins ma le fiafia ma le olioli tele.

Sa ia malamalamā e le sili atu le tasi ituaiga o auaunaga i le isi.

Sa ia iloa ma faatinoina le fetalaiga a le Faaola: “A o le sili ia te outou ia fai o ia ma a outou auauna.”⁹

Ia Sa’o le Avea ma Soo

O nisi taimi, e pei o Atalii o Faititili, tatou te mananao ai i ni tofiga laulioa. Tatou te tauivi i le fia iloa. Tatou te saili ia taitai ma faia se saofaga e manatua pea.

E leai ma se mea sese i le manao e auauna atu i le Alii, ae a tatou saili loa ia maua ai ni faatosinaga i le Ekalesia mo lo tatou lava ia lelei—ina ia maua ai viiga ma faamomaluga a tagata—ua tatou maua lo tatou lava taui. A tatou “manatu mamafa” i viiga a isi, o lena viiga o le a avea ma o tatou taui.

O le a le valaauga e sili ona taua i le Ekalesia? O le valaauga lena o loo e umiaina i le taimi nei. E le afaina

po o le a le faatauvaa po o le laulioa e foliga mai ai, ae o le valaauga ua ia te oe i le taimi nei o le valaauga lena o le a faatagaina oe e le gata e siitia ai isi ae faapena foi ona avea ai oe ma tagata o le Atua na foafoaina oe e avea ai.

Au uo ma uso pele i le perisitua, sii i luga i le mea o e tu ai!

Sa aaoa atu e Paulo ia Filipi, “Aua nei faia se mea e tasi ma le finau vale ma le mitamita fua, a ia taitasi outou ma manatu ma le loto maualalo, ua sili nisi uma ia te [oe lava].”¹⁰

Auauna Atu ma le Mamalu

O le saili atu i le mamalu ma viiga i le Ekalesia nai lo auaunaga moni ma lotomaualalo i isi o le tu ma aga ia a Esau.¹¹ Atonu tatou te maua se taui faalelalolagi, ae e sau ma se tau tele lava—o le le mauaina o le faamaoniga a le lagi.

Ia tatou mulimuli i le faataitaiga a lo tatou Faaola, o le na agamalu ma lotomaualalo, o le sa lei saili atu i viiga a tagata ae ia faia le finagalo o Lona Tama.¹²

Ia tatou auauna atu i isi ma le lotomaualalo—i le malosi, lotofaafetai,

ma le mamalu. E ui e foliga mai o a tatou faatinoga o auaunaga e maualalo ma faatauvaa, pe itiiti le taua, ae o i latou e aapa atu i le agalelei ma le agaalofa i isi o le a i ai se aso e iloa ai le taua o la latou auaunaga e ala i le alofatunoa e faavavau ma le manuia o le Atua Silisiliese.¹³

Ou uso pele, uo pele, tau ina ia tatou mafaufau loloto i ai, malamalamā, ma ola i lenei lesona silisili o le puleaga faaletaitai ma faaleperisitua a le Ekalesia: “A o le sili ia te outou e fai lea ma a outou auauna.” O la’u tatalo ma faamanuiaga lea i le suafa paia o lo tatou Matai, lo tatou Togiola, i le suafa o Iesu Keriso, amene. ■

FAAMATALAGA

1. Tagai Mareko 3:17.
2. Tagai i le Luka 9:54
3. Tagai Mareko 10:35–40, New International Version (2011) and King James Version.
4. Tagai Mareko 10:42–44.
5. Tagai Mataio 6:4.
6. Tagai John E. Lewis, “The Gospel and a Sense of Humor, Too,” *Ensign*, June 1974, 24.
7. Mataupu Faavae ma Feagaiga 52:40.
8. Tagai Mataio 6:1–2.
9. Mataio 23:11.
10. Filipi 2:3, New English Translation. (2005)
11. Tagai Kenese 25:33.
12. Tagai Ioane 5:41; 6:38.
13. Tagai i le Mataio 25:31–46.



Saunia e Peresitene Henry B. Eyring
Fesoasoani Muamua i le Au Peresitene Sili

“Savali Faatasi ma A’u”

O lo tatou faauuga i le perisitua o se valaaulia mai le Alii e savavali faatasi ma la, ia faia mea Na te faia, ia auauna atu i le ala o auauna atu ai o la.

Ou uso pele o le perisitua, o lo'u faamoemoega i le aso o le faamautinoa atu ia te outou ma faamalosiau atu ia te outou i la outou auaunaga faaleperisitua. I se isi itu, e talitutusa lava ma le faamoemoega ou te manatu sa i ai a le Faaola ina ua la feiloai i se alii talavou mauoa lea sa fesili atu, “Se a se mea lelei ou te faia ou te maua ai le ola faavavau?” (Mataio 19:16). Atonu na outou o mai i lenei konafesi, e pei ona alu atu lenei alii talavou i le Faaola, mafaufau pe na taliaina la outou auaunaga. Ma i le taimi lava e tasi, atonu o e lagona e tele isi mea e fai—atonu e sili atu! Ou te tatalo ina ia mafai ona ou faailoa atu le faamaoniga alofa a le Alii i mea ua uma ona outou faia, ao ofoina mai foi se vaaiga faamalosiau i mea atonu tou te mafai, faatasi ai ma Lana fesoasoani, ona ausia o se o umiaina Lana perisitua paia.

Na talosagaina le alii talavou mauoa e faatau atu mea uma sa ia te ia ma avatu i e matitiva ma mulimuli i le Faaola; atonu e le manaomia e lo outou agai i luma i le lumanaui lena mea, ae e momomia ai se fuataga o le ositaulaga. Soo se itu lava, ou te faamoemoe o le a le mafua i la'u savali lou “[alul] ese ai . . . ma le tiga” e pei ona faia e le alii talavou. (Tagai Mataio 19:20–22.) Ae,

ou te talitonu o le a outou “o i o outou ala ma le olioli” (MF&F 84:105) ona tou te mananao e faaleleia ma e tou te manatu tou te mafai.

E ui i lea, o se mea masani le lagona o le le atoatoa pe a tatou mafaufau i mea na valaaui mai le Alii ia i tatou e fai. O le mea moni, afai e te fai mai ia te a'u ua e lagonaina atoa e mafai ona faataunuina ou tiute faaleperisitua, atonu ou te popole e te le o malamalama e uiga i ai. I se isi itu, afai e te fai mai ia te a'u ua e lagona le fiu ona ua e le gafatiaina le galuega, ona ou fia fesoasoani atu lea ia te outou ia malamalama i le auala o faalautele ai ma faamalosia ai e le Alii e o umiaina Lana perisitua ina ia faia mea e le mafai ona latou faia na o i latou.

E moni lenei mea mo a'u i lo'u valaauga e pei foi o outou i o outou valaauga. E leai se tasi o i tatou e mafai ona faia le galuega o le perisitua, ma faia ia lelei, ao faalagolago patino lava i lo tatou lava atamai ma taleni. Ona e le o sa tatou galuega lenei—o le [galuega] a le Alii. Pau lava la le auala e faataunu ai o le faalagolago atu ia te Ia, pe o oe o se tiakono fou faamoemoeina faatoa valaauna ma se galuega e aumai sina vaega o le mana faaleagaga i le sauniga o le faamanatuga; po o se

faiaoga o aiga talavou ua tofia e le Alii ia alofa ma auauna atu i se aiga e te le iloa ma e foliga mai e le mananao i lou alofa po o lau auaunaga; po o se tamā o silafia e tatau ona e pulefaamalumalu i lou aiga i le amiontu, ae atonu e te le o mautinoaina le auala e fai ai, ma ua le lava le taimi, ona ua vave ona tuputupu ae na tamaiti ma ua foliga matuai faigata ma vevesi le lalolagi.

Afai la ua e lagonaina sina lofituina, ia avea lena mea o se faailoga lelei. Ua tau atu ia te oe e mafai ona e lagonaina le tulaga o le faatuatuaga ua tuu atu e le Alii ia te oe. O lona uiga o loo i ai sou malamalamaaga laitiiti i le tulaga moni lava o le perisitua.

E toalaiti lava nai tagata i le lalolagi o i ai lena malamalama. Atonu e oo lava ia i latou o e mafai ona tauloto mai se faauigaga talafeagai e le o malamalama moni i ai. E i ai nisi mau, e ala i le mana o le Agaga o latou tauaveina, e mafai ona faateleina lo tatou lagona o le ofo tele e faatau i le perisitua paia. O nisi nei o na mau:

“O le mana ma le pule o le . . .
Perisitua Mekisateko, o le umia lea o ki o faamanuiaga uma faaleagaga o le ekalesia—

“O le mauaina o le avanoa e maua ai mealilo o le malo o le lagi, e tatala mai ai le lagi ia te i latou, e mafuta ai ma le faapotopotoga aoao ma le ekalesia a le Ulumatua, ma olioli i le mafataga ma le afio ai o le Atua le Tamā, ma Iesu le puluvaga o le feagaiga fou.

“O le mana ma le pule o le . . .
Perisitua Arona, o le umia lea o ki o le





auaunaga a agelu” (MF&F 107:18–20).

“O lea, o ona sauniga [o le perisitua], ua faaalia ai le mana o le faale-atau. . . .

“Aua a aunoa ma lea, e leai se tagata e mafai ona vaai i fofoga o le Atua, le Tama, ma ola” (MF&F 84:20, 22).

“O lenei perisitua maualuga ua tusa ma le faatulagaga [a le] Alo [o le Atua], o le faatulagaga lea sa i ai mai le faavaega o le lalolagi; po o ni isi upu, ua leai se amataga o ona aso po o se gataaga o ona tausaga, ona ua saunia mai le vavau e oo i le faavavau atoa, e tusa ma lona muai silafia o mea uma” (Alema 13:7).

“O tagata uma lava ua faauuina e tusa ma lenei faatulagaga ma valaauga e tatau ona maua le mana, e ala i le faatuatua, e soloia ai mauga, e vaevaeina ai le sami, e faapa’umātuina ai vai, e faaliliuese ai vai i o latou alatafe;

“E faafememeaiina ai autau a atunu, e vaevaeina ai le fogaelele, e lepetia ai soo se noataga, e tu atu i luma o le Atua; e faia ai mea uma e tusa ma lona finagalo, e tusa ma

lana poloaiga, e faatoilalo ai itumālō ma mana; ma o lenei mea e ala i le finagalo o le Alo o le Atua lea na i ai a’o lei faavaeina le lalolagi” (Faaliliuga a Iosefa Samita, Kenese 14:30–31 [i le faaopoopoga a le Tusi Paia].

O se tasi o auala e tali atu ai i ia faamatalaga faagaeetia e uiga i le mana o le perisitua o le mafaufau lea e le o faatatau ia mea ia i tatou. O le isi auala e tali atu ai o ni fesili manatunatu, fesili ifo i o tatou lava loto, e pei o fesili nei: Na ou lagona ea na tatalaina mai le lagi ia te a’u? Mata e faaaoga e se tasi le fuaitau “auaunaga a agelu” e faamatala ai la’u auaunaga faaleperisitua? O ou avatua ea le “mana o le faale-atau” i olaga o i latou o ou auauna atu i ai? Pe na ou soloia ea se mauga, faafeme-meaiina se ‘autau, lepetia noataga a se tasi, pe faatoilaloina ni mana faalelalolagi—e tusa lava pe ua na o se tulaga faafaatusa—ina ia faataunu ai le finagalo o le Atua?

O lea suesuega e masani lava ona aumaia ai se lagona faapea e mafai ona

tatou faia nisi mea e tele mo le galuega a le Alii. Ou te faamoemoe o le a aumai ai foi se lagona o lou *fia* faia atili o nisi mea—o se faananauga ina ia auai atoa atili i le galuega faavavega a le Alii. O ia lagona o le laasaga muamua lea i le agai atu i le avea ma se ituaiga o alii lea nu fuaafua ai le auaunaga faaleperisitua e gaosia.

O le isi laasaga o loo faamatalaina i se fegalegaleaiga i le va o Ieova ma Enoka. Ua tatou iloaina o Enoka o se perofeta malosi o le na faavaeina Siona i le lotolotoi o le amioleaga tele. A o lei avea o ia ma se perofeta malosi, sa vaai Enoka ia te ia “ua nao se tama, . . . e amu [le] tautala,” ma inosia e tagata uma (Mose 6:31). Faalogo i upu a le Alii na faaaoga e faamalosiau ia Enoka. O Ana foi upu ia ia te outou o e ua valaauiina e auauna atu i isi i le avea ai ma se e umia le perisitua:

“Ma sa fetalai mai le Alii ia Enoka: Alu atu ma fai e pei ona Ou poloaiina ai oe, ma e leai se tagata o le a atia oe. Tatala lou gutu, ma o le a faatumuina,



ma o le a Ou tuu atu ia te oe upu e te tautala ai, aua ua i o'u lima tagata uma, ma o le a Ou faia e pei ona foliga lelei mai ia te a'u. . . .

"Faauta ua i ou luga lo'u Agaga, o le mea lea o au upu uma o le a Ou ta'utonuina; ma o le a sosola ese mauga i ou luma, ma o le a liliu vaitafe mai i o latou alātafe; ma o le a mau oe ia te a'u, ma a'u ia te oe; o lea, savali faatasi ma a'u" (Mose 6:32, 34).

Uso e, o lo tatou faauuga i le perisita o se valaaulia mai le Alii e savavali faatasi ma Ia. Ma o le a le uiga o le savavali faatasi ma le Alii? O lona uiga o le faia o mea Na te faia, auauna atu i le ala o Ia auauna atu ai. Na Ia ositau-lagaina Lona lava tulaga toafimalie ina ia faamanuia ia i latou e le tagolima, o se mea lena tatou te taumafai e fai. Na foliga mai sa Ia matauina faapitoa ia tagata o e na le amanaiaina ma teena e tagata, o lea e tatau ai foi ona tatou tau-mafai e faia lena mea. Na Ia molimau mai ma le malosi ae alofa i le moni o aoaoga faavae na Ia mauaina mai Lona Tama, e tusa lava pe sa lei taliaina, ma ia tatou faia foi. Sa ia fetalai mai i tagata uma, "O mai ia te a'u" (Mataio 11:28), ma e tatou te fai atu i tagata uma, "O mai ia te Ia." I le avea ai ma e umia le perisita, o i tatou o Ona sui. Tatou te le galulue mo i tatou lava ae mo Ia. Tatou te le tautatala i ni a tatou upu ae o Ana upu. O le a sili ona silafia lelei o Ia e tagata o tatou auauna i ai ona o la tatou auaunaga.

O le taimi lava tatou te talia ai le valaaulia a le Alii "Savavali faatasi ma a'u," o le a suia le natura o la tatou auaunaga faaleperisitu. O le a faafusei lava ona maualuga ma faamamaluina ae ua sili foi ona gafatia, ona ua tatou iloa e le o tuua na o i tatou. Sa ou lagona le sili ona malosi o lenei mea ina ua tuuina e Peresitene Thomas S. Monson ona aao i luga o lo'u ulu i le iva tausaga ua tuanai ma faamanuia a'u ao amataina la'u auaunaga i lo'u valaauga o i ai nei. I lena faamanuia, sa ia taulotoina ai upu nei a le Faaola: "Ai se na te talia outou, o iina o le a Ou i ai foi, ona o le a Ou alu muamua atu i o outou luma. O le a Ou i ai i lo outou lima taumatau ma lo outou agavale, ma o le a i ai lo'u Agaga i o outou loto, ma sio faataamilo outou e a'u agelu, e sapasapai outou i luga" (MF&F 84:88).

Na ou faalagolago i lena folafolaga i le tele o taimi, ma ua ou vaaia le faataunuina i le tele o auala i le aluga o lo'u 72 tausaga o le auaunaga faaleperisitu. Sa tupu ina o avea a'u ma se Perisita Arona fou ma se tofiga e tufaina le faamanatuga. O le fefe tele nei o'u faia se mea sese, sa ou alu ai i fafo o le falesa ao lei amataina le sauniga ma tatalo ma le naunautai ina ia fesoasoani mai le Atua ia te a'u. Sa oo mai ai se tali ia te a'u. Sa ou lagona le faatasi o le Alii ma a'u. Sa ou lagona Lona talitonuga ia te a'u, ma o lea sa ou lagona ai le talitonuga i la'u vaega i Lona galuega.

Sa toe tupu foi ao o'u auauna atu o se epikopo. Sa ou mauaina se valaau mai le telefoni mai se tamaitai o le sa faia se mea sese matautia ma ua feagai nei ma se filifliga faigata e suia ai le olaga. Ao ou asiati atu ia te ia, sa ou lagona ua ou iloa le tali i lana faafitauli, ae sa malosi foi sou lagona e le tatau ona ou tuu atu ia te ia lena tali—e tatau ona ia mauaina mo ia lava. Sa ou fai atu ia te ia "Ou te talitonu o le a tau atu e le Atua ia te oe le mea e te faia pe a e ole atu ia te Ia." Sa lipotia mai e ia mulimuli ane sa ia ole atu ia te Ia ma sa Ia tau atu ia te ia.

I se isi tulaga na oo mai se isi valaau mai le telefoni ao avea au ma se epikopo—o le taimi la lea mai leoleo. Sa tau mai ia te a'u na so'a e se avetaavale 'ona

le tioata o le faapaologa o se faletupe i lana taavale. Ina ua vaaia e le avetaavale le mautonu le faalālā atu e le leoleo faitotoa o lana fana, sa tagi o ia, "Aua le fanaina [a'u]" "O au o se Mamona!"

Na iloaina o le avetaavale 'ona o se tasi o la'u uarota, e lei leva ona papato. A o ou faatalitali e talanoa ia te ia i le ofisa o le epikopo, sa ou fuafuaina a'u upu e tau atu ia te ia ona lagona ai le salamo mo le auala na ia solia ai ana feagaiga ma faamaasiasi ai le Ekalesia. Peitai ao ou nofo ma vaavaai atu ia te ia, sa ou lagona se leo i lo'u mafaufau o fai mai, sa manino lava e pei o talanoa mai se tasi ia te a'u, "O le a Ou tuu atu ia te oe ina ia vaai atu ia te ia e pei ona Ou vaai ia te ia." Ma, mo sina taimi puupuu, sa suia atoa ona foliga ia te a'u. Ou te lei vaaai atu i se alii talavou meia ae o se atalii atamai ma malualii o le Atua. Na faafusei lava ona ou lagonaina le alofa o le Alii mo ia. O lena vaaiga na suia ai la maua talanoaga. Na suia ai foi a'u.

Sa ou aoaoina ni lesona taua mai nei aafiauga o le savavali faatasi ma le Alii i le faia o Lona galuega. Ou te fia faasoatua ma outou ni [lesona] se tolu o [na lesona]. O le [lesona] muamua e faapea e silafia ma o le a lagolagoina e le Atua e oo lava i se tiakono sili ona fou ma laitiiti. E le tatau lava ona e lagona ua e laitiiti tele pe ua e le ttau tele mo Ia Na te silafia ai oe ma le auaunaga o loo e tuuina atu i Lona suafa.

O le lesona lona lua, o le galuega a le Alii e le na o le foia o faafitauli; o le atiinaeina o tagata. A o e savali faatasi ma Ia i le auaunaga faaleperisitu, atonu o le a e iloaina o nisi taimi o mea e foliga o se vaifofo sili ona lelei e le o le vaifofo lea e finagalo i ai le Alii aua e le o faatagaina ai tagata ia tuputupu ae. Afai e te faalogo, o le a Ia aoao atu ia te oe Ona ala. Manatua o le galuega ma le mamalu o le Atua e le na o le faatautaia o se faalapotopotoga aoga; o le "aumaia [o] le tino ola pea ma le ola faavavau o le tagata" (Mose 1:39). O le mafuaaga lenei na Ia tuuina mai ai le pule o Lona perisita i tagata soifua le atoatoa e pei o oe ma a'u ma valaaulia i tatou ina ia auai i Lona galuega. O lo tatou alualu i luma o Lona galuega *lea!*

O le lesona lona tolu la: O le sava-
vali faatasi ma le Faaola i le auaunaga
faaleperisitua o le a suia ai le ala e
te tagai atu ai i isi. O le a Ia aoao atu
outou e tagai atu ia i latou e ala atu i
Ona fofoga, o lona uiga o le tagai atu i
tua atu o foliga o i fafo ma i totonus o le
loto (tagai 1 Samuelu 16:7). O le auala
lea na silasila atu ai le Faaola ia Simona
e le o se faifaiva le faatuatuaina ae o
Peteru, o le taitai malosi i le lumanai o
Lana Ekalesia (tagai Luka 5:1–11). O le
auala lea na Ia silasila atu ai ia Sakaio e
le o se tagata ‘ao lafoga piopio na vaiaia
e isi ae o se atalii faamaoni ma sa’o a
Aperaamo (tagai Luka 19:1–9). Afai ua
leva ona lua savavali ma le Faaola, o
le a e aoao e vaai atu i tagata uma o se
atalii o le Atua ma le gafatia le faatua-
oia, e tusa lava pe na a mai lona [tagata]
ua tuanai. Ma afai e faaauau pea ona
lua savavali faatasi ma le Faaola, o le
a e atiinaeina se isi meaalofa o ia te
Ia—o le tomai e fesoasoani atu i tagata
ia iloa lena gafatia i totonus o i latou
lava ma ia salamo.

O'u uso pele o le perisitua, i le tele
o auala, ua pei i tatou o soo e toalua
o e na savavali i le auala i Emau i lena
uluai Aso Sa o le Eseta. O le taeao lea
o le Toetu, ae sa lei mautinoa e i laua
sa i ai se toetu po o le a foi le uiga o
le toetu. Sa latou “faamoemoe o [Iesu
le Nasareta] o le a togiolaina Isarelui,”
ae ua “loto faigata ona talitonu” i latou
i mea ua aoao atu e tusitusiga paia e
uiga i le toetu. Ao la savavali ma tau-
mafai e fesueai faatasi, “Ona faalatalata
mai ai lea o Iesu, ua o faatasi ma i
laua. A ua punitia o laua mata, o lea
ua le iloa ai o ia e i laua.” (Tagai Luka
24:13–32.)

Ou te molimau atu a tatou savavali
i le ala o le auaunaga o le perisitua,
tatou te malaga faatasi ma le Faaola o
Iesu Keriso, aua o Lona auala, o Lona
ala lea. E muamua atu Lona malama-
lama i o tatou luma, ma sio faataamilo
i tatou e Ana agelu. Atonu e le lava so
tatou malamalamalama atoatoa e uiga i le
perisitua pe faapefea ona faatino e pei
ona Ia faia. Peitai afai tatou te silasila
totoa atu i na taimi pe a “mu [o tatou]
loto i totonus o i taua” (Luka 24:32), o le
a pupula o tatou mata, ma o le a tatou



vaai i Lona aao i o tatou olaga ma i la
tatou auaunaga. Ou te molimau atu o le
a sili ona tatou iloaina o Ia i le galulue
faatasi ma Ia ma auauna atu ia te Ia i le
galuega sili o le aumaia o le faaolataga
i fanau a le Atua. “Aua pe faapefea ona
iloa e se tagata le matai e lei auauna i
ai o ia, ma o se foi o se tagata ese ia te
ia, ma ua mamao mai mafaufauga ma
faamoemoega o lona loto?” (Mosaea
5:13). O Iesu Keriso o lo tatou Matai.
O Lana Ekalesia lenei. O Lana perisitua
lea tatou te umiaina. Tau ina ia tatou
filifili taitoatasati ia savavali faatasi ma Ia
ma ia iloa le ala o loo Ia savavali faatasi ai
ma i tatou.

Ou te tuu atu lau molimau faamaoni
o Iesu o le Keriso, lo tatou Alii toetu.
Ou te molimau atu o le perisitua ua Ia
tuuina mai ia i tatou o le mana lea e
tautatala atu ai ma galulue i Lona suafa.
O i tatou o fanau o se Tama Faalelagi
alofa o lē ē tali mai ia tatou tatalo ma
auina mai le Agaga Paia e faamalosia
i tatou i tiutetauave uma faaleperisitua
ua faamanuiaina i tatou ia mauaina.
Na vaai Iosefa Samita i le Tama ma le
Alo. Na ia mauaina ki o le perisitua lea
na pasi mai ia Peresitene Thomas S.
Monson, o lē o loo faaaogaina i latou
i le asō. Ou te molimau atu ai i le suafa
o Iesu Keriso, amene. ■



Sauniga i le Taeao o le Aso Sa | 2 Aperila, 2017

Saunia e Peresitene Thomas S. Monson

O Le Mana o le Tusi a Mamona

*Ou te augani atu ia i tatou uma ia suesue ma le agaga tatalo
ma mafaufau loloto i le Tusi a Mamona i aso taitasi.*

Ou uso e ma tuafafine pele, ou te faafeiloai atu ia te outou ma le agaga fiafaia tele a o tatou toe feiloi ai foi i se konafesi aoao mata-gofie a Le Ekalesia a Iesu Keriso o le Au Paia o Aso e Gata Ai. Ae ou te lei

amataina lau lauga aloaia i le aso, ou te fia faalauiloa atu malumalu fou e lima lea o le a fausia i nofoaga nei: eria o Brasília, Pasila; Manila lautele, Filipaina; Nairobi, Kenya; Pocatello, Idaho, ISA; ma Saratoga Springs, Iuta, ISA.

O lenei taeao ou te talanoa atu ai e uiga i le mana o le Tusi a Mamona atoa ai ma le manaomia naua e i tatou o tagata o lenei Ekalesia ona suesue, mafaufau loloto i ai, ma faaaoga ona aoaoga i o tatou olaga. O le taua o le i ai o se molimau mausali ma mautinoa o le Tusi a Mamona e le mafai ona faamamafa atili [i lo lenei].

O loo tatou ola i se taimi o faafitauli ma le amioleaga tele. O le a le mea o le a puipuia i tatou mai le agasala ma le leaga ua matua salalau solo i le lalolagi i nei aso? Ou te faamausali atu o se molimau malosi e uiga i lo tatou Faaola, o Iesu Keriso, ma Lana talalelei o le a fesoasoani e taitai i tatou i le saogalemu. Afai e te le o faitauina le Tusi a Mamona i aso taitasi, faamolemole ia fai loa. Afai o le a outou faitauina ma le agaga tatalo, ma se naunautaiga faamaoni ina ia iloa le upumoni, o le a faaali atu e le Agaga Paia ia te outou lona moni. Afai e moni—ma ou te molimau faamaoni atu *e moni lava*—o lona uiga o Iosefa Samita o le perofeta na vaai i le Atua le Tama ma Lona Alo o Iesu Keriso.

Ona e moni le Tusi a Mamona, o Le Ekalesia a Iesu Keriso o le Au Paia



o Aso e Gata Ai o le Ekalesia lea a le Alii iinei i le lalolagi, ma ua toefuatai mai le perisitua paia a le Atua mo le manuia ma faamanuiaga o Lana fanau.

Afai e te lei maua lava se molimau mausali o nei mea, ia e faiamea e tatau ai ina ia maua ai se molimau. E taua mo oe le i ai o sau lava molimau i nei taimi faigata, aua o molimau a isi e faatapulaa lona aoga mo oe. Peitai, a maua loa, e manaomia e se molimau ona faatumauina le taūa ma le ola e ala i le usitai faifai pea i poloaiga a le Atua faapea ma le tatalo e le aunoa ma le suesueina o tusitusiga paia i aso uma.

A'u uo pele i le galuega a le Alii, ou te augani atu ia i tatou uma ia suesue ma le agaga tatalo ma mafaufau loloto i le Tusi a Mamona i aso taitasi. A tatou faia lea mea, o le a tatou i ai i se tulaga e lagona ai le siufogaga o le Agaga, e tetee atu ai i faaosooosoga, e faatoilalo ai le masalosalo ma le fefe, ma maua ai le fesoasoaniga a le lagi i o tatou olaga. Ou te molimau atu ai ma lo'u loto atoa i le suafa o Iesu Keriso, amene. ■



Saunia e Joy D. Jones

Peresitene Aoao o le Peraimeri

O Se Tupulaga e mafai ona Tetee Atu i le Agasala

Ao outou aoao atu, taitai, ma alolofa i fanau, e mafai ona outou maua se faaaliga patino o le a fesoasoani ia te outou i le fatuina ma le faaauupegaina o fanau lotototoa ma mafai ona tetee atu i le agasala.

le tausaga ma le afa ua tea, sa saunoa ai Peresitene Russell M. Nelson i le manaomia o le “aoao atu . . . ma fesoasoani e atinae se tupulaga e mafai ona tetee atu i le agasala.”¹ O lena

faaupuga—“o se tupulaga e mafai ona tetee atu i le agasala”—na i ai se uiga faaleagaga mo a’u.

Tatou te faamamaluina fanau o e taumafai ia ola i ni olaga mama ma usiusitai. Na ou molimauina le malosi o le toatele o fanau i le lalolagi atoa. Ua latou tutu malolosi ma le, “tutumau ma lē masiiese”² i tulaga ma siosiomaga luitauina eseese. Ua iloa e nei fanau lo latou faasinomaga paia, lagona le alofa o le Tama Faalelagi mo i latou, ma saili ia usiusitai i Lona finagalo.

Peitai, o loo i ai ni fanau o loo tauivi ina ia tutu ma le “tutumau ma lē masiiese” ma ua faamanuaina o latou mafaufau maaleale.³ Ua osofaia i latou i itu uma e “ufanafana mu a le fili”⁴ ma ua manaomia se faamalosiauga ma le lagolago. O i latou o se uunaiga maoae mo i tatou ina ia laa i luga ma sii atu se taua e faasaga i le agasala i a tatou taumafaiga e aumai a tatou fanau ia Keriso.

Faafogaga i upu a Elder Bruce R. McConkie i le toeitiiti atoa le 43 tausaga ua tea:

“I le avea ai o i tatou ma uso o le Ekalesia, ua tatou auai i se taua tele



lava. Ua tatou tauina se taua. Ua tusia o tatou igoa i le galuega a Keriso ina ia tetee atu ia Lusifelo. . . .

“O le taua tele o loo tauina nei i itu uma lava ma ua faapea ona oo mai ai le tele o puapuaga, ma o nisi foi puapuaga e matautia lava, e le o se mea fou. . . .

“E leai ni e e ta’ua e faavaevaelua i lenei taua.”⁵

O loo faaaauau pea ma le malosi fatafaleina le taua i le asō. Ua aafia tatou uma i le taua, ma o loo fetaiai a tatou fanau i laina i luma ma ‘autau tete. O le mea lea, ua matua manaomia ai mo i tatou le faamalosia o a tatou metotia faaleagaga.

O le faamalosia o le fanau ina ia tetee atu i le agasala o se galuega ma se faamanuiaga mo matua, matua matutua, tagata o aiga, faiāoga, ma taitai. Tatou te tauaveina le tiutetauave e fesoasoani atu. Peitai, na faapitoa lava le faatonuga a le Alii i *matua* ina ia aoao a latou fanau “ia malamalamā i le mataupu faavae o le salamo, faatuatua ia Keriso le Alo o le Atua soifua, ma e uiga i le papatisoga ma le mealofa o le Agaga Paia” ma “ia tatalo, ma savavali tonu i luma o le Alii.”⁶

O le auala e “tausi a’e a [tatou] fanau i le malamalamā ma le upumoni”⁷ e ono avea ma se fesili tofotofo talu ai e patino mo aiga ma tamaiti taitoatasi, ae ua tuuina mai e le Tama Faalelagi ni taiala lautele e fesoasoani ia i tatou. O le a uunaia i tatou e le Agaga i auala sili ona lelei tatou te puipuia ai faaleagaga a tatou fanau.

Ina ia amata, e manaomia le maua-inā o se faaaliga i le taua o lenei tiutetauave. E ao ona tatou malalamalamā i o tatou—ma o latou—faasinomaga ma faamoemoega paia ae tatou te lei fesoasoani atu ia tatou fanau ia iloa *po o ai* i latou ma pe *aisea* ua latou i ai iinei. E ao ona tatou fesoasoani ia latou iloa e aunoa ma le fesili o i latou o atalii ma afafine o se Tama Faalelagi alofa ma e i ai ni Ona faamoemoega paia mo i latou.

Lua, ia malamalamā e manaomia le aoaoga faavae o le salamo ia mafai ai ona tetee atu i le agasala. O le tetee atu i le agasala e le faapea ua leai se

agasala, ae o loo faatatau ina ia salamo, mataala, agavaa faifaipea. Masalo o le mafai ona tetee i le agasala e sau o se faamanuiaga mai le tetee faifaipea i le agasala. Fai mai Iakopo, “Tetee atu i le tiapolo, ona sola ese ai lea o ia ia te outou.”⁸

Na “matua totoa i le lototele [fitafita talavou] . . . ; ae faauta, sa le ona pau lea—o i latou uma . . . sa faamaoni i taimi uma i soo se mea na faatua-tuina ai i latou. Ioe, . . . sa aoaoina i latou e tausi i poloaiga a le Atua ma savavali ma le tonu i ona luma.”⁹ Na o atu nei alii talavou i le taua ma tauaveina uiga faaKeriso o ni auupega e tau ai ma o latou fili. Sa faamanatu mai e Peresitene Thomas S. Monson ia i tatou e faapea “e manaomia ona maua e i tatou uma taitoatasi le lototele. O aso uma o o tatou olaga e manaomia ai le lototele—e le mo na

o mea e tutupu i le taimi lava lena, ae o le tele o taimi pe a tatou faia ai ni faaiuga pe tali atu i tulaga o siomia ai i tatou.”¹⁰

E ofou e a tatou fanau ni ofutau faaleagaga pe a latou faavaeina manau o le avea ma soo patino i aso taitasi. Atonu o tatou manatu faatauvaa i gafatia o le fanau ia maua le manatu faavae o le avea ma soo i aso taitasi. Na fautuina i tatou e Peresitene Henry B. Eyring ia “vave amata ma ia tutumau.”¹¹ O le ki lona tolu i le fesoasoani i fanau ia mafai ona tetee atu i le agasala o le amata aoao atu ma le alofa i latou i aoaoga faavae ma mataupu faavae autu o le talalelei ao laiti lava—mai tusitusa paia, Mataupu Faavae o le Faa-tuatu, tamaitusi o le *Mo le Malosi o le Autalavou*, pese Peraimeri, viiga, ma a tatou lava molimau—lea o le a taitaiina atu fanau i le Faaola.



O le fatuina o mausa faifaipea o le tatalo, suesue i tusitusiga paia, afiafi faaleaiga, ma tapuaiga i le Sapati e taitai atu ai i le atoatoa, tumau, ma tulaga faatauaina lelei malolosi—i se isi faa-upuga, amiosa'o faaleagaga. I le lalolagi i le asō, lea ua mouese atu ai le amiosa'o, e talafeagai mo a tatou fanau le malamalamā i le amiosa'o moni ma pe aisea e taua tele ai—aemaise ao tatou saunia i latou ia osia ma tausia feagaiga i le papatisoga ma le malumalu. E pei ona aoaoina i le *Tala'i La'u Talalelei* “O le tausia o tautinoga e saunia ai tagata [e aofia tamaiti laiti] e osia ma tausi feagaiga paia.”¹²

Na aoao mai e Elder Jeffrey R. Holland, “A tatou talanoa loa e uiga i le tausia o feagaiga, ua tatou talanoa i le fatu ma le agaga o lo tatou faamoemoega i le olaga nei.”¹³ E i ai se mana uiga ese i le osia ma le tausia o feagaiga ma lo tatou Tama Faalelagi. Ua iloa e le fili lenei mea, o lea ua ia taumafai ai e faasese le mataupu faavae o le osia o feagaiga.¹⁴ O le fesoasoani i le fanau ia malamalamā, osia, ma tausia feagaiga o se tasi lea o ki i le fatuina o se tupulaga e mafai ona tetee atu i le agasala.

E faapefea ona tatou saunia a tatou fanau ia osia ma tausia feagaiga paia ao latou ulu atu ma alualu i luma i auala o le feagaiga? O le aoao atu o fanau e tausia ni folafolaga faigofie ao latou laiti o le a faamalosia i latou e tausia feagai-ga paia i o latou olaga o mulimuli mai.

Sei ou faasoa atua se faataitaiga fai-gofie: I se afiafi faaleaiga, sa fesili ai se tamā, “O faapei mai i tatou o se aiga?” Na tomumu mai Lizzie e lima tausaga na ula lona tuagane matua, o Kevin, ia te ia ma tiga ai ona lagona. Na tautino atu ma le musua e Kevin e sa'o Lizzie. Na fesili le tina o Kevin ia te ia po o le a se mea e mafai ona ia faia e lelei ai le la va ma lona tuafine. Na mafaufau Kevin ma filifili o le a ia folafola atu ia Lizzie na te le toe taufaalili ia te ia mo se aso atoa e tasi.

I le faaiuga o le aso na sosoo ai ao potopoto faatasi tagata uma mo le lotu faaleaiga, na fesili le tamā o Kevin ia Kevin pe na a mai le mea lea sa ia fai mai na te faia. O le tali a Kevin “Tamā, na ou tausia la'u folafolaga!” Na ioe



ma le fiafia i ai Lizzie, ma sa faamalo le aiga ia Kevin.

Ona fautua atu lea o le tina o Kevin afai e mafai ona ia tausia lana folafolaga mo le aso e tasi, aisea e le mafai ai mo ni aso se lua? Na ioe Kevin e toe taumafai. Lua aso ua mavae, na manua le taumafaiga a Kevin e tausi lana folafolaga, ma ua sili atu ona lotofaafe-tai Lizzie! Ina ua fesili lona tama po o le a le mafuaaga ua matuai lelei ai le tausiga o ana folafolaga, fai mai Kevin, “Na ou tausia la'u folafolaga ona sa ou fai atu o le a ou tausiaina.”

O se faasologa o folafolaga laiti na tausia ma le manuia e oo atu ai i le amiosa'o. O le faataitaiga faifaipea o le tausia o folafolaga o le sauniunga faale-agaga lea mo le fanau ina ia maua ai lo latou feagaiga muamua o le papatisoga ma le meaalofa o le Agaga Paia, lea latou te osifeagaiga ai e auaua atu i le Atua ma tausia Ana poloaiga.¹⁵ O folafolaga ma feagaiga e le mafai ona tuveseesesa.

I le tusi a Tanielu ua tatou aoao ai ia Sataraka, Mesako, ma Apeteniko na mumusu e ifo i le tupua a le Tupu o Nepukanesa.¹⁶ Na lapataia i latou e le tupu o le a lafoina i latou i le ogaumu e mu ai le afi pe a latou le usiusitai. Sa latou tetee ma fai atu:

“Afai o lea, ua mafai lo matou Atua, matou te auaua i ai, ona laveai mai ia te i matou ai le ogaumu e mu ai le afi. . . .

“Ae peitai, a le o lea, ia e silafia e oe le tupu e, matou te le auaua i ou atua.”¹⁷

“Ae peitai, a le o lea.” Mafaufau i le uiga o nei upu e ono ma pe faapefea ona latou fesootai i le tausiga o feagai-ga. E lei faavaeina e nei alii talavou e toatolu lo latou usiusitai ina ia laveai-inā. E tusa lava pe laveaiina i latou, o le a latou tausia la latou folafolaga i le Alii ona sa latou tau atu o le a latou tausia. O le tausiaina o a tatou feagaiga e le sua ona o tatou tulaga. O nei alii talavou e toatolu, e pei foi o le autau talavou lotototoa, o ni faataitaiga mata-gofie ia o le tetee atu i le agasala mo a tatou fanau.

E faapefea ona faaaoga nei faataitaiga i o tatou fale ma aiga? O “lea fuaitau i luga o lea fuaitau, ma lea mataupu i luga o lea mataupu,”¹⁸ tatou te fesoasoani ai i fanau ia tofo i faamanuiaga i ū laiti. A o latou tausia a latou folafolaga, latou te lagona le Agaga i o latou olaga. Na aoao mai Elder Joseph B. Wirthlin “o le taui sili o le amiosa'o o le mafutaga faifaipea ma le Agaga Paia.”¹⁹ Ona “solo malosi ai lea o [le] lototeli [a o tatou fanau] i luma o le Atua.”²⁰ O le a tupu ae mai lenei punavai o le amiosa'o se tupulaga malolosi e mafai ona tetee atu i le agasala.

Uso e ma tuagane, opo faalatalata mai a outou tamaiti laiti—ia matua

faalatalata mai ia latou vaai i au amioga faalelotu i aso taitasi ma matamata o e tausia au folafolaga ma feagaiga. “O fanau o ni faataitaiga maoae, o lea ia tuu atu ia i latou se mea maoae e faataitai.”²¹ O loo tatou fesoasoani moni e aoao atu ma faafailele se tupulaga i le Alii e mafai ona tetee atu i le agasala e ala i le folafolaga ma lea folafolaga ma lea feagaiga ma lea feagaiga.

Ou te molimau atu o loo taitaia e Iesu Keriso lenei Ekalesia. Ao outou aoao atu, taitai, ma alolofa i fanau i le ala a le Faaola, e mafai ona outou maua se faaaliga patino o le a fesoasoani ia te outou i le fatuina ma le faaauupegaina o fanau lotototoa ma mafai ona tetee atu i le agasala. O la’u tatalo ia toe ta’ua e a tatou fanau upu a Nifae: “Pe e te faia ea ia te a’u ia ou gatete i le tu mai o le agasala?”²² Ou te molimau atu na totogiina e lo tatou Faaola agasala o le lalolagi²³—ona sa fetalai mai o le a Ia faia—ma e alofa o Ia ia i tatou e sili atu nai lo le silafaina e tagata soifua²⁴—ona sa fetalai mai o le a Ia faia. I le suafa, o Iesu Keriso, amene. ■

FAAMATALAGA

1. Russell M. Nelson, “O Se Talosaga i O’u Tuafafine,” *Liahona*, Nov. 2015, 97.
2. Mosaea 5:15.
3. Tagai Iakopo 2:9.
4. 1 Nifae 15:24; tagai foi Helaman 5:12.
5. Bruce R. McConkie, “Ia Lototele i le Taus o le Faatuatua,” *Liahona*, Ape. 1975, 30.
6. Matapu Faavae ma Feagaiga 68:25, 28.
7. Matapu Faavae ma Feagaiga 93:40.
8. Iakopo 4:7; tagai foi Alema 19:33.
9. Alema 53:20–21.
10. Thomas S. Monson, “Ia Faamalosi ma Loto Tele,” *Liahona*, Me 2014, 67.
11. Henry B. Eyring, “Sauniuniga Faaleagaga: Ia Vave Amata ma Ia Tumau Ai,” *Liahona*, Nov. 2005, 37.
12. *Tala’i La’u Talalelei: O Se Taiala mo le Galuega Faafaeatalalai* (2004), 213.
13. Jeffrey R. Holland, “Tausia o Feagaiga: O Se Savali mo i Latou O Le a Auauna Atu i se Misiona,” *New Era*, Jan. 2012.
14. Tagai 1 Nifae 13:26–28.
15. Tagai Mosaea 18:10.
16. Tagai Tanielu 3.
17. Tanielu 3:17–18.
18. 2 Nifae 28:30.
19. Joseph B. Wirthlin, “O Le Faamaoni E Le Mafaatauinai,” *Liahona*, Nov 1995.
20. Matapu Faavae ma Feagaiga 121:45.
21. Le mafaailoaina.
22. 2 Nifae 4:31.
23. Tagai 3 Nifae 27:14–15.
24. Tagai Ioane 15:13.



Saunia e Elder Yoon Hwan Choi
O Le Fitugafulu

Aua le Vaavaai Solo, Vaai i Luga!

O le valaauliaina o isi e o mai ia Keriso o lo tatou faamoemoega lena, ma e mafai ona tatou faataunuina lenei faamoemoega e ala i le vaai i luga ia lesu Keriso.

Olo’u faamoemoega o le “valaaulia o isi e o mai ia Keriso.”¹ O la outou faamoemoega foi lea. E mafai ona tatou faataunuina lenei faamoemoega e ala i le vaai i luga ia Iesu Keriso.

Sa ou papatiso faatasi ma ou matua ina ua 16 ou tausaga. Sa auai lou uso laitiiti, o Kyung-Hwan, o le sa 14 tausaga le matua, i le Ekalesia e ala i lo’u uncle, o Young Jik Lee, ma sa valaaulia ai i matou e auai i lana lotu. O tagata taitoatasi e toa 10 i lo matou aiga e auai i se lotu ese, sa matou fiafia ai e maua le upumoni ma mananao e faasoa lena fiafia sa matou maua i le talalelei a Iesu Keriso ina ua uma ona papatisoina i matou.

Sa sili atu ona fiafia lou tama ia i matou e aoao ma faasoa atu le upumoni. Sa masani ona ia ala vave i le taeao e suesue tusitusiga paia mo le silia ma le lua itula i aso uma. A maea le galuega, e o faatasi ma faifeautalai e asiiasi i o matou aiga, uo, ma tuaoi toetoe o aso uma. I le fitu masina talu ona matou papatiso, e toa 23 tagata o lo matou aiga na avea ma tagata o le Ekalesia. Sa sosoo ai le vavega o le

vaaia o le 130 o tagata o papatisoina i le tausaga na sosoo ai i le galuega faafeautalai faaleaupai a lou tama.

Sa taua foi le talafaasolopito o le aiga ia te ia, ma sa ia faamaeaina le valu augatupulaga a o matou tuaa. Mai i lena taimi, o fua o lo matou liua faaleaiga sa amata e lou uso laitiiti e 14 tausaga, ua faateleina i le anoanoai o auala e le gata i e o loo soifua ae faapena foi e ua maliliu. I le atiae ai i luga o le galuega a lou tama ma isi, ua faalautele atu ai i lo matou gafa faaleaiga i augatupulaga e 32, ma ua matou faamaeaina nei galuega faalemalumalu mo le tele o tuaa. I le aso, ou te maofa ma lagona le olioli tele i le sootaga a o matou tuaa i o matou suli.

Sa faamaumauina e Peresitene Gordon B. Hinckley se aafiaga faapena i le Malumalu o Ohaio Columbus:

“O le mafaufau ai i soifuaga o [le tamamatua a lou tamamatua, tamamatua, ma lou tama] a’o ou saofai i totonu o le malumalu, sa ou tepa ifo ai i lo’u afafine, i lana tama teine, . . . ma i lana fanau, le fanau a le tama teine a lo’u afafine. Sa vave ona ou iloa ai, sa ou tu i le ogatotonu tonu lava o

nei augatupulaga e fitu—o le tolu na muamua atu ia te a'u ma le tolu ua mulimuli mai ia te a'u.

"I totonu o lena maota paia ma mamalu, na oo mai ai i lo'u mafaufau se manatu o le tele naua o lo'u tiute ina ia tuufaasolo atu mea uma ua ou mauaina mai o se tofi mai o'u augatama i augatupulaga o e ua mulimuli mai nei ia te a'u."²

O i tatou uma o se vaega o se aiga e faavavau. O la tatou matafaioi e mafai ona avea o se tulaga e mafai ai ona tutupu suiga taua i auala lelei pe faalelelei. Sa faaaauau Peresitene Hinckley, "Aua nei *faatagaina oe lava* e avea o se sootaga vaivai i le filifili o lou augatupulaga."³ O le a faamalosia lou aiga e lou faatuatua i le talalelei. E mafai faapefea ona tatou mautinoa o i

tatou o se sootaga malosi i o tatou aiga e faavavau?

I se tasi aso, i nai masina i le maea ai o lou papatisoga, sa ou faalogo i nisi o tagata o faitioina le tasi ma le isi i le lotu. Sa matuai ou faanoanoa lava. Sa ou alu i le fale ma tau i lou tama atonu e le tatau ona ou toe alu i le lotu. Sa faigata le vaaia o tagata o le au paia o faitio i isi faapena. I le maea ai ona faalogo, sa aoao au e lou tama e faapeea sa toefuatai le talalelei ma e atoatoa ae e lei atoatoa lava tagata, ma faapena foi o ia ma au. Sa ia fai mai ma le mautinoa, "Aua nei aveesea lou faatuatua ona o tagata o loo siomia ai oe, ae ia fausia se sootaga malosi ma Iesu Keriso. Aua le vaavaai solo, vaai i luga!"

Vaai i luga ia Iesu Keriso—le faatuaga atamai a lou tama—e faamalosia


ai lou faatuatua i taimi uma ou te feagai ai ma luitau i le olaga. Sa ia aoao au i le ala e faaaoga ai aoaoga a Keriso, e pei ona taua i upu nei: "Vaaai mai ia te a'u i mafaufauga uma; aua le masalosalo, aua le fefefe."⁴

A o ou pulefaamalumalu ai i le Misiona a Uosigitone Seattle, sa timuga le tele o aso o le tausaga. Ae, sa faatonuina lava a matou faifeautalai e o atu ma talai i le timu. Sa masani ona ou tau atu ia i latou, "O atu i le timu, vaavaai i luga i le lagi, tatala o outou gutu ma inu [le timu]! A tou vaavaai i luga, o le a faamalosia outou e tatala o outou gutu i tagata uma e aunoa ma le fefefe." O se lesona faafaatusa mo i latou e vaavaai i luga pe a latou feagai ma luitau e tusa lava pe maea a latou misiona. Faamolemole aua nei faataitai'a lenei mea i nofoaga ua faaleagaina [le siosiomaga].

A o auauna pea i le misiona a Seattle, sa ou maua se telefoni mai lou atalii ulumutua, o Sunbeam, o se ta piano. Sa fai mai o ia o le a ia maua le avanoa e faafafia ai i le Falefafafia o Carnegie i Niu Ioka ona sa ia manumalo i se tauvaga faavaomalo. Sa matou fafia tele ma matuai olioli mo ia. Ae peitai, a o tatalo ma le agaga faafetai i lena afiafi, sa silafia e lou toalua e le mafai ona ma auai atu i lana faafafiafa ma fai atu se mea faapenei i le Tama Faalelagi: "Tama Faalelagi, ou te faafetai mo le faaamanuiaga ua tuuina atu e Lau Afio ia Sunbeam. Ae, ou te faamalie atu e le mafai ona ou alu iina. E ono mafai ona ou alu pe a na tuuina mai e Lau Afio lenei faamanuiaga a o lei faia lenei misiona po o le maea foi [o le misiona]. Ou te le o faitio, ae e i ai sina lagona o le faanoanoa."

I le taimi lava na uma ai lenei tatalo, sa ia faalogoina se leo manino: "Ona e le mafai ona e alu, o lea ua tuuina atu ai i lau tama lenei avanoa. Faamata la e te faafesuaia?"

Sa ofo lou toalua. Sa ia iloa e faamunuiaina fanau i galuega faatuatua a o latou matua i le malo o le Alii, ae o le taimi muamua lenei sa ia malamalamai ai ma le manino lelei i lana matafaioi. Sa ia tali atu i le taimi lena ia te Ia: "Leai, leai, e Lelei mo au le le alu. Tuu atu ia te ia lena avanoa."





Uso e ma tuafafine pele, e le faigofie mo i tatou le iloaina o le alofa o le Tama Faalelagi pe a tatou vaavaai solo ma o tatou mata faaletino ona tatou te muamua lava vaai atu i faafitauli, tiga, avega, po o le tuuatoatasi. I le isi itu, e mafai ona tatou vaavaai i faamanu-iaga i tua atu pe a tatou vaai i luga. Ua faaali mai e le Alii, "Ma a tatou maua se faamanu-iaga mai le Atua, e maua i le usiusitai i lena tulafono ua faavae ai i luga."⁵ Ia i latou o e o atu i *soo* se auaunaga a le Atua, ia iloa o outou o se sootaga malosi mo faamanu-iaga mamana ia i latou e muamua atu ia te outou ma i tupulaga e mulimuli mai ia te outou.

O le asō, ou te faafetai lava i le iloaina o le toatele o tagata o lo matou aiga o loo faamaoni i luga o le ala o le feagaiga ae ou te faanoanoa e vaai faalemafaufau i soo se nofoa o avanoa i o matou autafa. Sa saunoa mai Elder M. Russell Ballard: "Afai e te filifili ia le toe toaga mai pe tuua foi le Ekale-sia toefuataiina a Iesu Keriso o le Au-

Paia o Aso e Gata Ai, o fea o le a e alu i ai? O le a se mea o le a e faia? O le faaiuga o le "le toe feoai" ma tagata o le Ekalesia ma taitai filifilia a le Alii o le a i ai sona aafiga mo se taimi umi lea e le mafai ona vaaia pea i le taimi nei"⁶ Sa faamalosiau mai Peresitene Thomas S. Monson ia i tatou, "Ia tatou matua filifili i le mea faigata e sa'o, nai lo le mea faigofie e sese."⁷

E le o tuai tele le vaai i luga ia Iesu Keriso. O loo tatala mai pea Ona aao ia te oe. O loo i ai tupulaga e muamua atu ma mulimuli ia i tatou o loo faalagolago ia i tatou ia mulimuli ia Keriso ina ia mafai ona tatou avea o se aiga e faavavau o le Atua.

Ina ua faamaloloina lou valaauga o se peresitene o le siteki, sa fiafia ou atalii i le faaaluina o le tele o le taimi ma au. Tolu vaiaso mulimuli ane, sa valaaicina au o se Fitugafulu. I le taimi muamua sa ou manatu atonu latou te le fiafia, ae o le tali faamaualalo a lou atalii sili ona latiiti e faapea, "Tama, aua le popole. O i tatou o se aiga e

faavavau." O se upumoni faigofie ma manino lava! Sa ou popole teisi aua sa ou vaavaai solo muamua i lenei olaga faaletino, ae sa fiafia lou atalii aua sa ia le vaavaai solo ae vaai i luga ma fofoga e taulai i le faavavau ma faamoemoega o le Alii.

E le faigofie pea le vaai i luga pe a tetee ou matua i le talalelei, pe afai o oe o se sui o se iunite laitiiti o le Ekalesia, pe afai o lou toalua e le o se tagata o le eklesia, pe a afai o loo e nofofua pea e ui sa e faia le mea sili ia faaipoipo, pe a se ese se tamaititi, pe a oo ina avea oe lava o se matua nofofua, pe a luitauina oe faaletino pe faalelagona, pe a avea oe o se aafia i se mala, ma isi mea. Pipii mau i lou faatuatua i na taimi faigata. Vaai i luga ia Keriso mo le malosi, mausali, ma le faamalologa. E ala i le mana o le Togiola a Iesu Keriso, "o le a galulue faatasi mea uma mo [lou] lelei."⁸

Ou te molimau atu ia Iesu Keriso, o Ia o lo tatou Faaola ma le Togiola. A tatou mulimuli i lo tatou perofeta soifua, o Peresitene Thomas S. Monson, tatou te vaai atu i luga ia Iesu Keriso. A tatou tatalo ma faitau ia tusitusiga paia i aso uma, ma aai ma feinu i le faamanatuga i vaiaso taitasi, tatou te maua le malosi e vaavaai atu ai *pea* ia te Ia. Ou te fiafia e avea o se sui o lenei Ekalesia ma avea o se vaega o se aiga e faavavau. Ou te fiafia e faasoa atu lenei talalelei maoae ma isi. O le valaauliaina o isi e o mai ia Keriso o lo tatou faamoemoega lena, ma e mafai ona tatou faataunuuna lenei faamoemoega e ala i le vaai i luga ia Iesu Keriso. Ou te molimau atu ai i nei mea uma ma le lotomaualalo i le suafa o Iesu Keriso, amene. ■

FAAMATALAGA

- Tala'i La'u Talalelei: O Se Taiala mo le Galuega Faafaiseautalai* (2004), 1.
- Aoaoga a Peresitene o le Ekalesia: Gordon B. Hinckley* (2016), 82.
- Gordon B. Hinckley, "Keep the Chain Unbroken" (Faigalotu a le Iunivesite o Polika Iaga, Nov. 30, 1999), 3, speeches. byu.edu/faaopoopo le faamamafa.
- Mataupu Faavae ma Feagaiga 6:36.
- Mataupu Faavae ma Feagaiga 130:21.
- M.Russell Ballard, "A Matou O Ea Ia Te Ai?" *Liahona*, Nov. 2016, 91.
- Thomas S. Monson, "Filifiliga," *Liahona*, Me 2016, 86.
- Mataupu Faavae ma Feagaiga 100:15.



Saunia e Elder Ronald A. Rasband
O Le Korama a Aposetolo e Toasefululua

Tuu Atu i le Agaga Paia e Taitai

O lona tofiga faalelagi, e musuia e le Agaga Paia, molimau mai, aoao, ma uunaia i tatou ia savavali i le malamalama o le Alii.

Uso e ma tuafafine, ua ou iloaina, e pei o outou uma, lo tatou vaaia o le faanatinatiina o le galuega a le Alii e ala mai ia Peresitene Thomas S. Monson ma lana savali i lenei taeao. Peresitene Monson, matou te alolofa ia te oe, lagolagoina oe, ma tatalo pea lava mo oe, “lo matou perofeta pele.”¹

Ua matou lagona le faateleina o le Agaga i le faaiuga o lenei vaiaso. Pe o outou i ai iinei i lenei maota tele po o maimoa mai i tou maota po o potopoto i falelotu i vaega mamao o le lalolagi, ua outou maua le avanoa e lagona ai le Agaga o le Alii. Ua faamautinoa atu e le Agaga i o outou loto ma mafaufau ia upumoni ua aoaoina i lenei konafesi.

Mafaufau i upu o lenei viiga masani:

*Agaga e taitai mai;
Mea moni ta'u mai.
Molimau mai ia Iesu,
Faapupula i matou.*²

Ua tatou iloa mai faaaliga o aso e gata ai o le Aiga Atua e aofia ai ni tagata patino ma mavaevae: o lo tatou Tama oi le Lagi; Lona Alo e Toatasi na Fanaua, o Iesu Keriso; ma le Agaga Paia. Ua tatou iloa “ua i ai i le Tamā se

tino o aano ma ivi e mafai ona pa'i i ai e pei o le tagata; ua faapea foi le Alo; ae o le Agaga Paia e leai se tino o aano ma ivi, ae o se peresona o Agaga. A na le faapea, e le mafai e le Agaga Paia ona mau i totonu o i tatou.”³

O la'u savali i le asō e taulai atu i le taua o le Agaga Paia i o tatou olaga. Na silafia e lo tatou Tama oi le Lagi o le a tatou fetaiai i le olaga faalelino ma luitau, puapuaga, ma faigata; na Ia silafia o le a

tatou tauivi ma fesili, faanoanoaga, faaosoosoga ma vaivaiga. Ina ia aumaia ia i tatou le malosi faalelino ma le taitaiga faalelagi, ua Ia tuuina mai le Agaga Paia.

O le Agaga Paia e noataina i tatou i le Alii. O lona tofiga faalelagi, Na te musuia, molimau mai, aoao, ma uunaia i tatou ia savavali i le malamalama o le Alii. Ua ia i tatou le tiutetauave paia ina ia aoao ia iloa Lana faatosinaga i o tatou olaga ma tali atu.

Manatua le folafolaga a le Alii: “O le a ou faaali atu ia te oe ai lo'u Agaga, lea o le a faapupula ai lou mafaufau, lea o le a faatumulua ai lou agaga i le olioli.”⁴ Ou te fiafia i lena faamautinoaga. O le olioli lea e faatumulua ai o tatou agaga e aumaia faatasi ai ma se vaaiga e faavavau e faatusatusa lea i le olaga o aso taitasi. O lena olioli e oo mai o se filemu i le lotolotoi o faigata po o le lototiga. E aumaia le mafanafana ma le lototele, e faaalia mai upumoni o le talalelei, ma faalautele atu lo tatou alolofa mo le Alii ma fanau uma a le Atua. E ui ua matua manaomia tele ia faamanuiaga, ae ua faagaloina ma lafoai e le lalolagi ia [faamanuiaga] i le tele o auala.

O vaiaso taitasi pe a tatou aai ma feinu i le faamanatuga paia, tatou te osia se feagaiga ina ia “manatua pea o ia,” le Alii o Iesu Keriso, ma Lana taulaga togiola. Pe a tatou tausiaina lenei feagaiga paia, ua tuuina mai ai se folafolaga ina ia tatou “maua pea lona Agaga e faatasi ma i [tatou].”⁵





E faapefea ona tatou faia lena mea?

Muamua, tatou te taumafai ia ola agavaa mo le Agaga.

E faatasi le Agaga Paia ma i latou o e "tausisi ia manatua le Alii lo latou Atua mai lea aso i lea aso."⁶ E pei ona fautua mai le Alii, e tatau ona tatou "tuu ese mea o lenei lalolagi, ma saili mo mea o se lalolagi sili atu ona lelei,"⁷ aua "e le afio le Agaga o le Alii i malumalu le paia."⁸ E tatau ona tatou taumafai e le aunoa ia usiusitai i tulafono a le Alii, suesue i tusitusiga paia, auai i le malumalu, ma ola faamaoni i le mataupu faavae o le faatuatua lona sefulu tolu, "ia faamaoni, amiontonu, nofomama, agalelei, amiomama, ma le . . . faia o mea lelei i tagata uma."

Lua, e tatau ona tatou naunau ina ia maua le Agaga.

Na folafola mai e le Alii, "O le a Ou tau atu ia te oe i lou mafaufau ma lou

loto, e ala i le Agaga Paia, lea o le a oo atu i ou luga ma lea o le a mau i lou loto."⁹ Na amata ona ou malamalamai lenei mea a o avea o se faifeautalai talavou i Scotch Plains, New Jersey. I se tasi taeao vevela ia Iulai sa ma lagona ai ma la'u soa le uunaiga e saili se tagata na faasino mai i le Lotoa o le Malumalu. Sa ma tuitui i le faitotoa o le fale o Elwood Schaffer. Na lē taliaina ma le faaaloalo i maua e Mrs. Schaffer.

A o amata ona ia tapunia le faitotoa, sa ou lagona e fai se mea ou te lei faia muamua lava ma ou te lei toe faia lava talu mai lena taimi! Sa tuu lo'u vae i le faitotoa ma fesili atu, "O i ai se isi tagata atonu e fiafia i le ma savali?" O lana tama teine e 16 tausaga o Marti, sa i ai se fialoa, ma sa tatalo faatauanau mo le taitaiga i le aso na muamua atu. Sa matou feiloai ma Marti, ma i le aluga o taimi, sa auai

lona tina i lesona. Na auai uma i laua i le Ekalesia.

O le taunuuga o le papatisoga o Marti, e 136 tagata, e aofia ai le toatele o lona lava aiga, ua uma ona papatiso ma osia ni feagaiga o le talalelei. Ou te faafetai i lo'u faalogo i le Agaga ma tuu lo'u vae i le faitotoa i lena aso vevela o Iulai. O loo i ai iinei i le asō Marti ma se vaega o tagata o lona aiga pele.

Tolu, e tatau ona tatou iloa le Agaga pe a oo mai.

O lo'u aafiaga o i ai e faapeea e tele lava ina fesoootai mai le Agaga o se lagona. E te lagonaina i upu e te masani ai, e i ai se uiga ia te oe, lea e uunaia oe. Mafaufau i le tali a sa Nifae a o latou faalogo i le tatalo a le Alii mo i latou: "Ma sa faalogo i ai le motu o tagata ma latou molimaunina; ma sa matalatala o latou loto ma sa malamalamai i o latou loto upu ia na ia tatalo ai."¹⁰ Sa latou lagona i o latou loto ia upu o Lana tatalo. O le leo o le Agaga Paia e filemu ma itiiti.

I le Feagaiga Tuai, na finau ai Elia ma fataulaga a Paala. Na faamoemoe fataulaga ina ia oo mai i lalo le "leo" o Paala o se faititili ma faamuina ai la latou taulaga i le afi. Ae sa leai se leo, ma sa leai se afi.¹¹

I se mea na tupu mulimuli ane, sa tatalo ai Elia. "Faauta mai, ua afio ane Ieova, o le matagi tetele foi ma le malosi ua lepetia ai mauga, ma momomo ai papa i luma o Ieova; e le'i i ai Ieova i le matagi: ua mulimuli i le matagi o le mafuie; e le'i i ai Ieova i le mafuie:

"E mulimuli i le mafuie o le afi; e le'i i ai Ieova i le afi: e mulimuli i le afi o le leo filemu ma le itiiti."¹²

O e iloaina lena leo?

Na aoao mai Peresitene Monson, "A o tatou malaga i le soifuaga, ia tatou aoao le gagana a le Agaga."¹³ E tautala mai le Agaga i upu lea tatou te lagona ina. O nei lagona e mālū, o se uunaiga e faatino, ia faia se mea, ia fai atu se upu, tali atu ai i se auala faapitoa. Afai tatou te faasamasamanoa po o ua faamalieina i la tatou tapuaga, aveese atu ma matafiese e ala i sailiga o mea faalelalolagi, o le a tatou mauaina i tatou lava ua faaititia lo tatou gafatia

e lagonaina. Na fai atu Nifae ia Lamana ma Lemuelu, "Sa oulua faalogo i lona siuofoga mai lea taimi i lea taimi; ma sa fetalai mai foi o ia ia te oulua i se leo filemu ititi, peitai ua oulua te'a atu ma lē toe lagonaina, na oulua le mafafai ai ona lagona ana fetalaga."¹⁴

Ia Iuni ua tuanai atu, sa ou i ai i se tofiga i Amerika i Saute. Sa matou i ai i se taimi faatulagaina pisi e 10 aso e asi-asi ai i Kolumupia, Peru, ma Ekuatoa. O se mafuie tele na fasiotia le fia selau, manunu'a ai le fia sefulu o afe o tagata, faatamaia ma faaleagaina maota ma alalafaga i aai o Ekuatoa o Portoviejo ma Manta. Sa ou lagona le uunaiga e faaopoopo i la matou taimi faatulagaina se asiasiga i tagata o le ekalesia o loo alala i na aai. O le faaleagaina o auala, matou te lei mautinoa ai pe mafai ona matou oo iina. O le mea moni, sa tau mai ia i matou e le mafai ona matou oo iina, ae sa le alu ese le uunaiga. O le mea lea, sa faamanuiaina

i matou ma sa mafai ona matou asia uma na aai e lua.

O le puupuu o le taimi na logoina atu ai, sa ou faamoemoe o le a na o ni nai taitai perisita i le lotoifale o le a auai i na faatasiga na faatatope ona faatulagaina. Ae peitai, sa matou tau-nuu atu i nofoaga autu o siteki taitasi ma iloa ai ua faatumulia atoa falelotu e oo i tua i le tulaga. O nisi o ni tagata sa auai sa sili ona malolosi o le eria, o ni paionia o e na taofimau pea i le Ekalesia, faamalosiau atu i isi ina ia auai i tapuaiga ma ia lagona le Agaga i o latou olaga. Na saofafai i laina pito i luma ia tagata na maliliu ē pele ia i latou ma tuaoi i le mafuie. Sa ou lagona le uunaiga e faaee atu se faamanuiaga faaapostolo i luga o i latou uma sa auai, o se tasi o a'u [faamanuiaga] muamua lava na tuuina atu. E ui sa ou tu i luma o le potu, ae sa pei lava o tuu o'u lima i luga o o latou ulu taitoatasi ma sa ou lagona afioga a le Alii o lilihi atu.

E lei muta ai iina. Sa ou lagona le uunaiga e tautala atu ia i latou e pei ona faia e Iesu Keriso i le taimi na asiasi atu ai i tagata i Amerika. "Sa ia ave a latou fanau laiti . . . ma faamanuia i latou, ma tatalo atu i le Tamā mo i latou."¹⁵ Sa matou i ai i Ekuatoa, sa matou i ai i le galuega a le Tama, ma o Ana fanau nei.

Fa, e tatau ona tatou faatinoina le uunaiga *muamua*.

Manatua ia upu a Nifae. "Ma sa taitai a'u e le Agaga, ona sa ou lē muā'i iloa muamua mea e tatau ona ou faia. E ui i lea," sa ia fai mai ai, "sa ou alu atu."¹⁶

Ma e tatau foi ia i tatou. E tatau ona tatou talitonu i a tatou uunaiga muamua. O nisi taimi tatou te fetuutunai ai, tatou te mafaufau pe o tatou lagonaina se musumusuga faaleagaga pe na o o tatou lava mafaufauga. A amata loa ona tatou taumateina faalua o tatou lagona, e oo lava i le faatolu—ma ua tatou faia uma lava—ua tatou tulieseina





le Agaga; ua tatou fesiliglia fautuaga faalelagi. Na aoao mai le Perofeta o Iosefa Samita, afai o le a e faalogo i uunaiga muamua, o le a faaiva ona e mauaina le sa'o mai le sefulu.¹⁷

O se lapataiga la lenei: aua e te faamoemoe mo ni mea faapapa ona ua e tali atu i le Agaga Paia. Ia manatua, o loo e i ai i le galuega o le leo itiiti ma le filemu.

Ao auauna atu o se peresitene o le misiona i le Aai o Niu Ioka, sa ou faatasi ai ma nisi o a matou faifeautalai i se fale'aiga i le Bronx. Sa o mai se aiga talavou ma saofafai e latalata mai ia i matou. Sa foliga i latou ua matua saunia mo le talalelei. Sa ou vaavaai i a matou faifeautalai a o faaaauau pea ona latou o mai ia te a'u, ona matau atu lea a o faai'u e le aiga la latou taumafataga ma mouese atu i le faitotoa. Ona ou fai atu lea, "Elders, o loo i ai se lesona iinei i le asō. Na tou vaai i se aiga matagofie na o mai i totonu o lenei fale'aiga. O le a se mea sa tatau ona tatou faia?"

Sa vave ona tali mai se tasi o fai feautalai: "Sa ou mafaufau e tu i luga ma alu atu e talanoa ma i latou. Sa ou

lagonaina le uunaiga, ae ou te lei tali atu i ai."

"Elders," sa ou fai atu ai, "e tatau lava ona tatou faatinoina i taimi uma a tatau uunaiga muamua. O lena uunaiga sa e lagonaina o le Agaga Paia lena!"

O uunaiga muamua o ni musumusuga manino ia mai le lagi. A latou faamaonia mai pe molimau mai ia i tatau, e tatau ona tatou iloaina i latou mo le tulaga o latou i ai ma aua nei o tatou tuuina i latou e see ese atu. O le tele o taimi, o le Agaga lea e uunaia i tatou ina ia aapa atu i se tasi o manaomia se fesoasoani, aemaise lava aiga ma uo. "Ioe . . . o le leo itiiti ma le filemu, lea e musumusu mai ma ati i mea uma,"¹⁸ e faasino mai ia i tatou avanoa e aoao atu ai le talalelei, ia tuuina atu le molimau i le Toefuataiga ma Iesu Keriso, e ofo atu le lagolago ma le popole, ma laveai se tasi o fanau pele a le Atua.

Mafaufau i ai e avea ma se tasi ua ta'uua "o se tagata e muai tali mai. I le tele o nuu, o le tagata e muai tali atu i se faalavelave, mala, po o le malaia o fuimu, leoleo, ma fomai e faigaluega i luga o taavale. Latou te taunu atu ma

moli emoemo, ma ou te fia faaopoopo atu, tatou te matuai faafetai mo i latou. O le ala a le Alii e tau le iloa ae e manaomia ai foi le vave ona tali atu. E silafia e le Alii manaoga o Ana fanau uma—ma e Na te silafia po o ai ua saunia e fesoasoani atu i ai. Afai tatou te tuu atu ia silafia e le Alii i ā tatou tatalo i le taeao ua tatou saunia, o le a Ia valaau mai ia i tatou e tali atu. Afai tatou te tali atu, o le a Ia valaau mai ia i tatou i lea taimi ma lea taimi ma o le a tatou mauaina i tatou lava i lea vaega ua ta'ua e Peresitene Monson o "le galuega a le Alii."¹⁹ O le a avea i tatou ma ē muai tali atu faaleagaga e avatua le fesoasoani mai lugā.

A tatou gauai atu i uunaiga lea e oo mai ia i tatou, o le a tatou tuputupu ae i le agaga o faaaliga ma maua atili se malamalamaga ma taitaiga e uunaia e le Agaga. Na fetalai mai le Alii, "Tuu lou faalagolago i le Agaga lena lea na te taitai ia fai mea lelei."²⁰

Tau ina ia tatou manatu mamafa i le valaau a le Alii ina "ia fiafia, ona o le a Ou taitaia outou i le ala."²¹ Na te taitaina i tatou e ala i le Agaga Paia. Tau ina ia tatou nonofo faalatalata i le Agaga, i le vave ona galulue i o tatou uunaiga muamua, i le iloaina latou te o mai mai le Atua. Ou te molimau atu o le mana o le Agaga Paia e taitaia i tatou, puipua i tatou, ma faatasi ai pea ma i tatou, i le suafa o Iesu Keriso, amene. ■

FAAMATALAGA

1. "Faamanuia le Atua i le Perofeta Soifua," *Viiga*, nu. 9.
2. "Agaga e Taitai Mai," *Viiga*, nu. 78.
3. Mataupu Faavae ma Feagaiga 130:22.
4. Mataupu Faavae ma Feagaiga 11:13.
5. Mataupu Faavae ma Feagaiga 20:77.
6. Alema 58:40.
7. Mataupu Faavae ma Feagaiga 25:10.
8. Helaman 4:24.
9. Mataupu Faavae ma Feaigaiga 8:2.
10. 3 Nifae 19:33.
11. Tagai 1 Tupu 18:17–29.
12. 1 Tupu 19:11–12.
13. Thomas S. Monson, "O Le Agaga e Ola ai," *Ensign*, Julai 1985, 65.
14. 1 Nifae 17:45.
15. 3 Nifae 17:21.
16. 1 Nifae 4:6–7.
17. *Tagai Truman G. Madsen, Joseph Smith the Prophet* (1989), 103.
18. Mataupu Faavae ma Feagaiga 85:6.
19. Thomas S. Monson, "Ia Aoao, Ia Faia, Ia Avea Ai," *Liahona*, Nov. 2008, 62.
20. Mataupu Faavae ma Feagaiga 11:12.
21. Mataupu Faavae ma Feagaiga 78:18.



Saunia e Elder L. Whitney Clayton
O Le Au Peresitene o Fitugafulu

Soo Se Mea Lava E Fai Mai Ai O la la Te Outou, la Outou Faia

A tatou filifili e fai “mea uma ua fetalaia mai e le Atua ia i” tatou, ua tatou tautino atu e faaogatusa a tatou amioga o aso uma ma le finagalo o le Atua.

Na faataunuina e le Faaola Lana uluai vavega faamaumauna i le tausamaaga o se faaipoipoga i Kana i Kalilaia. Sa i ai foi iina Lona tina, o Maria ma Ona soo. Na lagona moni lava e Maria se tiutetauave mo le manuia o le tausamaaga. I le taimi o le tausamaaga, sa tulai ae se faaletonu—ua leai se uaina a e na talimalo. Sa popole Maria ma alu atu ia Iesu. Sa la talanoa puupuu; ona liliu atu lea o Maria i auauna ma faapea atu:

“[Soo] se mea lava e fai mai ai o Ia ia te outou, ia outou faia.

“Sa i ai vai maa tetele e ono. . . [O nei vai maa e lei faaaogaina e teu ai ni vai inu ae mo le sauniga o le faamamaina i lalo o le tulafono a Mose.]

“Ua fetalai atu Iesu i [auauna], Ina faatutumu ia o vai i suavai. Ona latou faatutumuina lea, ua oo i le lau.

“Ua fetalai atu ia ia te i latou, Ina asu ane ia, ina ave i le pule i le tausamaaga. Ona latou avatua lea.

“Ua tofo foi le pule i le tausamaaga i le vai ua liu uaina” ma faaalia le ofo

ona ua tuai tele ona avatu le uaina sili ona lelei i le tausamaaga.¹

E masani ona tatou manatuaina lenei mea ona o le liuaina o le vai i le uaina o se faailoaga o le mana o le Atua—o se vavega. O se savali taua lena, ae e i ai se isi savali taua i le tala a Ioane. Na avea Maria ma “se ipu pele ma filifilia,”² na valaauina e le Atua e fanau mai ai, faafaille, ma tausia le



Alo o le Atua. E sili atu lona silafia o Ia nai lo se isi lava tagata i luga o le fogaeleele. Na te silafia le mea moni o Lona soifua mai faavavega. Sa ia silafia e leai Sana agasala ma sa “lē tautala o ia e pei o isi tagata, sa lē mafai foi ona aoaoina o ia; aua sa lē manaomia e ia soo se tagata e aoaoina o ia.”³ Sa silafia e ia Lona gafatia tulagaese e foia ai ni faafitaui, e aofia ai se tasi patino e pei o le sauniaina o le uaina mo se tausamaaga o le faaipoipoga. Sa ia atiinaeina se talitonuga maumaututu ia te la ma i Lona mana paia. O lana faatonuga faigofie ma tuusao i auauna sa leai ni tulaga manaomia, leai ni agavaa, leai ni tapulaa: “[Soo] se mea lava e fai mai ai o Ia ia te outou, ia outou faia.”

Na avea Maria ma se tamaitai talavou i le taimi na faaali atu ai le agelu o Kaperielu ia te ia. I le taimi muamua sa ia “atuatuvala” i le ta’uina o [ia] o “le ua alofaina” ma “amuia . . . i fafine uma . . . ua taumanatunatu foi o ia, pe se a le uiga o lenei alofa.” Na faamautinoa atu e Kaperielu ia te ia e leai se mea e fefe ai—o tala sa ia aumai e lelei. O le a “to [o ia ma tauave] . . . le Alo o le Silisili ese” ma “fanauina se tama tane . . . [o le o le a fai] ma tupu i le aiga o Iakopo e faavavau.”

Na mafaufau leotele Maria, “A faapefea le mea nei, auā ou te lei iloa se tane?”

Na faamalamalama atu e le agelu, ae sa puupuu, e faamautu atu ia te ia “e leai lava se mea e tasi e le mafaiia e le Atua.”

Na tali faamaualalo atu Maria o le a ia faia soo se mea e finagalo ai le Atua, e aunoa ma le fia iloa o mea patino ma le le masalosalo e ui i le tele o fesili le mafaitauina e uiga i taunuuga mo lona olaga. Na tuuto atu o ia lava e aunoa ma le malamalamama tonu i le mafuaaga ua Ia poloaiina ai o ia ae pe faapefea foi ona faia. Na ia talia vave le afioga a le Atua e aunoa ma ni tuutuuga,⁴ atoa ma sina iloa o mea o i luma atu. Faatasai ai ma se faalagolago faigofie i le Atua, sa fai atu ai Maria, “Faauta o a’u nei o le auauna a le Alii; ia faia ia te au e tusa ma lau fetalaiga.”⁵

A tatou filifili e fai “mea uma ua fetalaia mai e le Atua ia i” tatou, ua tatou



tautino atu e faaogatusa a tatou amioga o aso uma ma le finagalo o le Atua. O ia faatinoga faigofie o le faatuatua e pei o le suesueina o tusitusiga paia, anapogi, ma le faalauteleina o o tatou valaauga e taitai atu ai i le faalolotoina o le gafatia faaleagaga e fetaiai ai ma manaoga o le olaga faaletino. I le aluga o taimi, o mausa faigofie o talitonuga e taitai atu ai i taunuuga ofoofogia. Latou te suia lo tatou faatuatua mai se fatulaau i se mana malosi mo le lelei i o tatou olaga. Ma pe a oo mai ia luitau i o tatou ala, o lo tatou mauaa ia Keriso e maua ai le tumau mausali i o tatou agaga. E faapuupuu e le Atua o tatou vaivaiga, ae faateleina lo tatou olioli, ma faia ina “[ia] galulue faatasi mea uma mo lo [tatou] lelei.”⁶

I nai tausaga ua mavae, sa ou talanoa ai i se epikopo talavou o le sa faaaluina ni itila i vaiaso taitasi e fefautuaai ai ma tagata o lana uarota. Sa ia faia se matauga faagaeetia. O faafitaui o feagai ma tagata o lana uarota, na ia fai mai ai, o [faafitaui] ia o loo feagai ma tagata o le Ekalesia i soo se nofoaga—o faafitaui e pei o le auala e faavaeina ai se faaipoipoga

fiafia; tauiviga ma le faapalenii o galuega, ma tiute o le Ekalesia; luitau i le usitaia o le Upu o le Poto, i galuega, po o i ponokalafi; po o le faafitaui i le mauaina o le filemu e uiga i se aiaiga faavae o le Ekalesia po o se fesili i le talafaasolopito [o le Ekalesia] latou te le malamalamai a ai.

O lana fautuaga masani lava i tagata o le uarota e aofia ai le toe foi i faatinoga faigofie o le faatuatua, e pei o le suesueina o le Tusi a Mamona—e pei ona fautuaina ai i tatou e Peresitene Thomas S. Monson ina ia faia—totogiina o le sefuluai, ma le auauna atu i le Ekalesia ma le tuuto. Ae peitai, o le latou tali masani lava ia te ia o se tali le mautonu: “Ou te le ioe ia te oe, Epikopo. Tatou te iloa *uma* lava o ni mea lelei na e fai. Tatou te talanoa e uiga i na mea *i taimi uma* i le Ekalesia. Ae ou te le mautinoa po o e malamalamai ia te a’u. O le a se mea e faatatau i le faia o *na* mea ma faafitaui o loo *ou* feagai ai?”⁷

O se fesili talafeagai. I le aluga o taimi, sa ma matauina ma lena epikopo o i latou o e na faia ma le iloa ia “mea laiti ma faatauvaa”—usiusitai i ni auala e foliga laiti—ua faamanuiaina i le

faatuatua ma le malosi e sili atu nai lo faatinoga moni o le usiusitai lava ia ma, o le mea moni, e ono foliga e matua le fesootai lava i ai. Atonu e foliga faigata le iloaina o se fesoataiga i le va o faatinoga i aso taitasi o le usiusitai ma vaifofo i faafitaui faigata tetele tatou te feagai. Peitai latou *te* fesoatai. I lo’u aafiaga, o le faasa’oina o mausa laiti o le faatuatua i aso taitasi, o se auala lea e tasi e sili ona lelei e faamalosia ai i tatou e faasaga atu i faafitaui o le olaga, po o a lava. O faatinoga laiti o le faatuatua, e tusa lava pe foliga mai e faaletaua pe ua motusia atoa mai faafitaui patino ia e faapopoleina ai i tatou, e faamanuiaina lava i tatou i *mea uma* tatou te faia.

Mafaufau ia Naamanu, o se “alii e pule i ‘au a . . . Suria” ma “o le toa malosi,” ae o ia o se lepela. Sa tau atu e se teine itiiti pologa e uiga i se perofeta i Israelu o le e mafai ona faamaloloina Naamanu, ma o lea sa ia malaga ai ma se aumalaga o ni auauna, fitafita, ma meaalofa i Israelu, ma mulimuli ane taunu i le tale o Elisaia. O le auauna a Elisaia, ae le o Elisaia, na tauina atu ia Naamanu o le faatonuga a le Alii ia “alu ia, ina taele faafitu i [le Vaitafe o] Ioritana.” O se mea e faigofie. Atonu o lenei faatonuga faigofie na taia ai le toa malosi o se mea matua le talafeagai, faigofie tele, pe ua faatoilaloina lona taua po o tulaga ma sa ia mauaina le fautuaga o se mea faatiga. I se tulaga faatauvaa lava, sa leai ma se uiga o le faatonuga a Elisaia ia Naamanu, “ona liliu ai lea o ia, ua alu ma le ita tele.”

Peitai na faalatalata lemu atu auauna a Naamanu ia te ia ma fai atu ia te ia pe faamata na te faia “se mea tele” pe afai e fai atu ai Elisaia ia te ia e fai. Sa latou matauina talu ai sa faatonuina o ia e faia na o sina galuega itiiti, pe le tatau ea ona ia faia, e tusa lava pe na te le o malamalamai i le mafuaaga? Na toe mafaufau Naamanu i lana tali ma masalo ma le le talitonu, ae sa usiusitai ma, “alu ifo . . . , ma fufui faafitu i Ioritana” ma sa faamaloloina faavavega ai o ia.⁸

O nisi taui o le usiusitai e vave ona oo mai; o nisi e oo mai pe a uma ona tofotofoina i tatou. I le Penina Tau

Tele, ua tatou faitau ai e uiga i le filiga lē faavaivai o Atamu i le tausiga o le poloaga e osi atu ni taulaga. Ina ua fesili atu le agelu ia Atamu pe aisea ua ia osi atu ai taulaga, sa ia tali atu, “Ou te lē iloa, ae na poloaiina ai a'u e le Alii.” Na faamalamalama atu e le Agelu o ana taulaga o “se faatusa lea o le taulaga a le Toatasi na Fanaua e le Tama.” Ae o lena faamalamalamaga na faatoa oo mai ina ua uma ona faaali atu e Atamu lona tuuto e usiusitai i le Alii mo “aso e tele” e aunoa ma le iloaina o le *mafuaaga* sa tatou ai ona ia osi atu ai na taulaga.⁹

O le a faamanuiaina pea i tatou e le Atua mo lo tatou usiusitai tumau i Lana talalelei ma faamaoni i Lana Eklesia, ae e seasea lava ona Ia vave faaali mai ia i tatou Lana taimi faatulagaina mo le

faia o ia mea. Na te le faaalia maia ia i tatou le ata atoa mai le amataga. O le mea lena e manaomia ai le faatuatua, faamoemoe, ma le faalagolago i le Alii.

Ua talosagaina i tatou e le Atua ia onosai atu ia te Ia—ia faalagolago atu ia te Ia ma mulimuli atu ia te Ia. Ua Ia aioi mai ia i tatou ina ia “aua tou te masalosalo ona ua outou le vaia.” Ua lapataia i tatou e le tatau ona tatou faamoemoe i ni tali faigofie po o ni faaleleiga vavave mai le lagi. O le a lelei mea uma pe a tatou tutu mausali i le taimi o le “tofotofoina o lo [tatou] faatuatua,” po o le a lava le faigata o lena tofotofoga e onosaia ai po o le tuai ona oo mai o le tali.¹⁰ Ou te le o tautala atu i le “usiusitai tauaso,”¹¹ ae o le mafaufau mautinoa i le alofa atoatoa ma le taimi atoatoa a le Alii.



O le tofotofoga o lo tatou faatuatua o le a aofia ai *pea* le tumau faamaoni i faatinoga faigofie o le faatuatua i aso taitasi. Ma, o le taimi lava lena, e Na te folafola mai ai o le a tatou mauaina le tali paia lea e tatou te mananao i ai. E na o le faatasi lava le taimi na tatou faamaonia atu ai lo tatou naunautaiga ia faia le mea ua Ia finagalo i ai e aunoa ma le fiamanao ia iloa po o afea, o le aisea, ae pe faapeafea foi ona tatou “selesele ai taui o lo [tatou] faatuatua, ma lo [tatou] filiga, ma le onosai, ma le tali-tiga.”¹² O le usiusitai moni e taliaina atoatoa poloaga a le Atua ma e muai faia.¹³

O le iloaina po o le lei iloaina, tatou te filifili uma lava “po o ai [tatou] te auauna i ai” i aso uma.¹⁴ Tatou te faaalia lo tatou naunautai e auauna atu i le Alii e ala i le gauai atu ma le mausali ma le faamaoni i faatinoga o le tuuto i aso taitasi. Ua folafola mai e le Alii e taitai i o tatou ala,¹⁵ ae mo Ia ina ia faia lena mea, e ao ona tatou savaval, ma le faatuatua o loo Ia silafia le ala aua o Ia o le “ala.”¹⁶ E tatau ona tatou faatumuina a tatou lava vai maa ia oo i le lau. A tatou faalagolago ma mulimuli ia te Ia, e suia o tatou olaga, e pei o le vai i le uaina. O le a avea i tatou ma se mea e sili atu nai lo se isi mea e ono avea ai i tatou. Faalagolago i le Alii, ma “soo se mea lava e fai mai ai o Ia ia te outou, ia outou faia.” I le suafa, o Iesu Keriso, amene. ■

FAAMATALAGA

1. Ioane 2:5–9; tagai foi Ioane 2:10.
2. Alema 7:10.
3. Faaliliuga a Iosefa Samita, Mataio 3:25 (in the Bible appendix).
4. Tagai Jeffrey R. Holland, *Keriso ma le Feagaiga Fou: O Le Savali Faamesia i le Tusi a Mamona* (1997), 75.
5. Tagai Luka 1:26–38.
6. Roma 8:28; Mataupu Faavae ma Feagaiga 90:24.
7. Alema 37:6.
8. Tagai 2 Tupu 5:1–14.
9. Tagai Mose 5:5–11.
10. Tagai Eteru 12:6.
11. Tagai Boyd K. Packer, “Agency and Control,” *Ensign*, May 1983, 66–68; Robert C. Oaks, “Believe All Things,” *Ensign*, July 2005, 30–33.
12. Alema 32:43.
13. Tagai Jeffrey R. Holland, *Christ and the New Covenant*, 18.
14. Iosua 24:15.
15. Tagai Faataoto 3:6.
16. Ioane 14:6.



Saunia e Elder Dallin H. Oaks
O Le Korama a Aposetolo e Toasefululua

O Le Aiga Atua ma le Ata o le Faaolataga

Ona ua i ai ia i tatou le upumoni e uiga i le Aiga Atua ma lo tatou sootaga ia i Latou, ua tatou maua ai le faafanua sili mo la tatou malaga i le olaga faaletino.

I.

O la tatou uluai mataupu faavae o le faatuatua o loo tautino mai: "Matou te talitonu i le Atua, le Tamā Faavavau, ma Lona Alo, o Iesu Keriso, ma le Agaga

Paia." Ua tatou aufaatasi ma isi Kerisiano i lenei talitonuga i se Tama ma se Alo ma se Agaga Paia, ae o le mea ua tatou talitonu i ai e uiga ia i Latou e ese mai talitonuga o isi. Tatou te le talitonu

i le mea ua ta'ua e le lalolagi Kerisiano o le aoaoga faavae o le Tolutasi Paia. I lana Uluai Faaaliga, na vaai ai Iosefa Samita i ni peresona eseese se toalua, e toalua tagata, lea ua faamanino mai ai o talitonuga na taatele i lena taimi e faatatau i le Atua ma le Aiga Atua e le moni.

I se eseesega i le talitonuga e faapea o le Atua o se tagatalilo e le mafai ona malamalamā i ai ma iloaina o le upumoni o le natura o le Atua ma lo tatou sootaga ma la ua iloaina ma o le ki lea i isi mea uma i la tatou aoaoga faavae. O loo tusia i le Tusi Paia le Tatalo Faatoga maoae a Iesu, lea na Ia tautino atu ai e faapea "o le ola e faavavau foi lenei, ia latou iloa oe le Atua moni e toatasi, atoa ma Le ua E auina mai, o Iesu Keriso lea" (Ioane 17:3).

O le taumafaiga ina ia iloa le Atua ma Lana galuega na amataina a o lei i ai le olaga faaletino ma o le a le faamutaina iinei. Na aoao mai le Perofeta o Iosefa Samita, "O le a i ai sina taimi pe a uma ona e pasi atu i le veli faatoa e aoaoina [ai mataupu faavae uma o le faaeaga]." ¹ Tatou te atiae i luga o le malamalamā na tatou mauaina i le muai lalolagi o agaga. O lea, i le tau-mafai ai e aoao Israelu i le natura o le Atua ma Lona sootaga ma Lana fanau, sa tautino mai ai le perofeta o Isaia, e pei ona faamaumauina i le Tusi Paia:


"Tou te faatusa le Atua ia te ai? Se a foi se faatusa tou te faatusaina ai o ia? . . .

"Tou te iloa ea? Tou te lei faalogo ea? E lei ta'uina atu ea ia te outou mai le amataga? Tou te lei lagona ea mai le faavaeina o le lalolagi!" (Isaia 40:18, 21).

Ua tatou iloa o tagata e toatolu o le Aiga Atua o ni tagata mavaevae ma patino. Ua tatou iloaina lenei mea mai le faatonuga na tuuina mai e le Perofeta o Iosefa Samita: "Ua i le Tama se tino o aano ma ivi e mafai ona pa'i i ai e pei o le tagata; ua faapea foi le Alo, ae o le Agaga Paia e leai se tino o aano ma ivi, ae o se peresona Agaga. A na le faapea, e le mafai e le Agaga Paia ona mau i totonu o i tatou" (MF&F 130:22).

E tusa ai ma le tulaga silisili o le Atua le Tama i totonu o le Aiga Atua, e





faapea foi ma matafaioi fitoitonu e faatinoina e peresona taitoatas, na faamalamalama mai ai e le Perofeta o Iosefa:

“Soo se tagata lava na vaaia ua tatala le lagi, e iloa e toatolu Tagata i le lagi o e umia ki o mana, ma e toatasi e pulefaamalumalu ia i latou uma. . . .

“. . . O nei tagata . . . ua ta’ua o le Atua le muamua, o le Foafoa; o le Atua le lua, o Le Faaola; ma le Atua le tolu, o le Molimau po o Le e Molimaunia.

[Ua i ail] le pule i le Tama e pulefaamalumalu ai o le Pule Sili po o le Peresitene, o Iesu o le Puluvgaga, ma le Agaga Paia o le Molimau po o Le e Molimaunia.”²

II. O Le Fuafuaga

Ua tatou malamalama i lo tatou sootaga i tagata o le Aiga Atua mai mea ua faaalia mai e uiga i le ata o le ffaolataga.

O fesili e pei o le, “O fea na tatou mai ai?” “Aisea ua tatou i ai iinei?” ma le “O fea tatou te o i ai?” ua taliina i mea ua ta’ua e tusitusiga paia o le “ata o le ffaolataga,” le “fuafuaga sili o le fiafia,” po o le “fuafuaga o le togiola” (Alema 42:5, 8, 11). O le talalelei a Iesu Keriso ua tutotonu i lenei fuafuaga.

I le avea ai ma fanau agaga a le Atua, i se olaga na muamua atu i le

olaga faaletino nei, na tatou mananao i se taunuuga o le ola e faavavau ae na gata lo tatou alualu i luma ona sa aunoa ma se olaga faaletino i se tino faitino. Ina ia maua lena avanoa, sa pulefaamalumalu ai lo tatou Tama Faalelagi i le Foafoaga o lenei lalolagi, lea, na aveesea ai lo tatou manatua-ina o mea na muamua atu i lo tatou fanau mai i la le tino, ina ia mafai ona tatou faamaonia atu lo tatou naunau-taiga e tausia Ana poloiga ma tofo i ai ma tuputupu ae e ala i isi luitau o le olaga faaletino. Ae i le ala o lena olaga faaletino, ma i se taunuuga o le Pa’u o o tatou uluai matua, o le a tatou mafatia i le oti faaleagaga e ala i le vavaeeseina mai le afioaga o le Atua, ia faaeleleaina i le agasala, ma noatia ai i le oti faaletino. O le fuafuaga a le Tama ua faamoemoeina ma saunia ni auala e faatoilalo ai na papupuni uma.

III. O Le Aiga Atua

I le iloaina o le faamoemoega o le fuafuaga sili a le Atua, tatou iloiloina nei ia matafaioi fitoitonu a tagata e toatolu o le Aiga Atua i lena fuafuaga.

Tatou amata i se aoaoga mai le Tusi Paia. I le faaiuina ai o lana tusi lona lua i tagata Korinito, sa toetoe lava a

faasamasamanoa le Aposetolo o Paulo i le faia o lenei maufaasino i le Aiga Atua o le Tama, le Alo, ma le Agaga Paia: “Ia ia te outou uma lava le alofa tunoa o le Alii o Iesu Keriso, ma le alofa o le Atua, atoa ma le mafutaga [“po o le faaaumea”³] a le Agaga Paia” (2 Korinito 13:14).

O lenei mau o le tusi paia ua fai ma faatusa o le Aiga Atua ma faamaonia ai le alofa manino ma le faaosofia o le Atua le Tama, le misiona alofa mutimutive ma le faaola a Iesu Keriso, ma le faaaumea a le Agaga Paia.

Le Atua le Tama

E amata uma lava i le Atua le Tama. E ui tatou te iloa sina mea e uiga ia te Ia, ae o le mea ua tatou iloa e matua taua lava i le malamalama ai i Lona tulaga silisili, lo tatou sootaga ma Ia, ma Lana matafaioi tupito i le ata o le ffaolataga, le Foafoaga, ma isi mea uma na sosoo mai ai.

E pei ona tusia e Elder Bruce R. McConkie a o lumanai ai lona maliu: “I le lagona silisili ma le faaiu o le upu, e na o le tasi lava le Atua moni ma soifua. O Ia o le Tama, le Elohimia Silisiese, o le Tagata Silisili, le Foafoa ma Pule o le atulaulau.”⁴ O Ia o le Atua ma le Tama o Iesu Keriso, ma faapena foi

ma i tatou uma. Sa aoao mai Peresitene Tavita O. MaKei e faapea “o le uluai upumoni autu lava na fetalai ai Iesu Keriso o lenei, o tua, o luga ma soo se mea lava o loo i ai le Atua le Tama, le Alii o le lagi ma le lalolagi.”⁵

O mea tatou te iloa e uiga i le natura o le Atua le Tama o le mea silisili lea e mafai ona tatou aoaoina mai le galuega ma aoaoga o Lona Alo e Toatasi na Fanaua, o Iesu Keriso. E pei ona aoao mai Elder Jeffrey R. Holland, o se tasi o faamoemoega silisili o le galuega a Iesu o le faaali mai lea i tagata “pe faape'i le Atua lo tatou Tama Faavavau, . . . ina ia faaalia ma faapatino ia i tatou le natura moni o Lona Tama, lo tatou Tama i le Lagi.”⁶ O loo i ai i le Tusi Paia se molimau faaaposepolo o Iesu sa “tusa lava” ma Lona Tama (Eperu 1:3), lea e faamanino atili ai le aoaoga a Iesu lava ia e faapea “o le ua vaai mai ia te a'u ua vaai o ia i le Tama” (Ioane 14:9).

O le Atua le Tama o le Tama o o tatou agaga. O i tatou o Ana fanau. E alofa o Ia ia i tatou, ma o mea uma Na te faia, e faia mo lo tatou manuia e faavavau. O Ia o le Mataisau o le ata o le faaolataga, ma e ala i Lona mana ua

ausia ai e Lana fuafuaga ona faamoe-moega mo le mamalu silisili o Lana fanau.

O Le Alo

I tagata i la le tino, o le tagata aupito sili ona vaiai o le Aiga Atua o Iesu Keriso. O se faamatlagaga sili faaleao-aoga faavae a le Au Peresitene Sili i le 1909 ua tautino mai ai o Ia “o le ulumatua o atalii uma o le Atua—o le alo muamua na fanaua i la le agaga, ma o le alo e toatasi na fanaua i la le tino.”⁷ O le Alo, le silisili e tagata uma, na filifilia e le Tama e faataunu le fuafuaga a le Tama—ia faaaoga le mana o le Tama e foafoa ai lalolagi lemafaitaulia (tagai Mose 1:33) ma ia faaola le fanau a le Atua mai le oti e ala i Lona Toetu ma mai le agasala e ala i Lana Togiola. O lenei taulaga paia ua ta'ua moni lava “o le faatinoga autu lea o le talafaasolopito atoa o le tagata.”⁸

I na taimi tulagaese ma paia na faailoa patino mai ai e le Atua le Tama ia le Alo, Na te fetalai mai lava, “O lo'u atalii pele lena: faalogo ia te ia” (Mareko 9:7; Luka 9:35; tagai foi 3 Nifae 11:7; Iosefa Samita—Talafaasolopito

1:17). O lea, o Iesu Keriso, le Ieova, le Alii le Atua o Isaraelu, o loo fetalai atu ma auala mai i perofeta.⁹ O le mea la lena ina ua faaali atu Iesu ia sa Nifae i le mavae ai o Lona Toetu, na Ia faailoa atu o Ia lava “o le Atua o le lalolagi uma” (3 Nifae 11:14). Ma o le tulaga lena e masani ona fetalai atu ai Iesu i perofeta o le Tusi a Mamona ma le Au Paia o Aso e Gata Ai i le tulaga “o le Tama ma le Alo,” o se ulutala na faamalamalamaaina i le tautinoga faaleaoaoga faavae musuia a le Au Peresitene Sili ma le Korama e Toasefululua i le 100 tausaga talu ai.¹⁰

O Le Agaga Paia

O le tagata lona tolu o le Aiga Atua o le Agaga Paia, ua faasino atu foi i ai o le Agaga Paia, le Agaga o le Alii, ma Le Faamafanafana. O Ia o le tagata o le Aiga Atua o le puna o faaaliga patino. I le avea ai ma se peresona o agaga (tagai MF&F 130:22), e mafai ona afio o Ia i totonu o i tatou ma faatinole matafaioi taua o fesoootaiga i le va o le Tama ma le Alo ma le fanau a le Atua i luga o le fogaelele. E tele mau ua aoao mai ai o Lana misiona o le molimau mai e uiga i le Tama ma le Alo (tagai Ioane 15:26; 3 Nifae 28:11; MF&F 42:17). Sa folafola mai e le Faaola o le Fesoasoani o le a aoao maia ia i tatou mea uma, faamanatu mai ia i tatou mea uma, ma taitai atu i tatou i upumoni uma (tagai Ioane 14:26; 16:13). O lea, ua fesoasoani ai le Agaga Paia ia i tatou ia iloatino le va o le upumoni ma le measese, taiala i tatou i a tatou faaiuga tetele, ma fesoasoani ia i tatou i o tatou luitau o le olaga faaletino.¹¹ O Ia foi le ala e faapaiaina ai i tatou, o lona uiga, o le faamamaina ma le faapaiaina mai le agasala (tagai 2 Nifae 31:17; 3 Nifae 27:20; Moronae 6:4).

IV.

E faapefea la ona fesoasoani le malamalamaaga i lenei aoaoga faavae faalelagi ua faaali mai e uiga i le Aiga Atua ma le ata o le faaolataga ia i tatou i o tatou luitau o aso nei?

Ona ua i ai ia i tatou le upumoni e uiga i le Aiga Atua ma lo tatou sootaga ia i Latou, o le faamoemoega



o le olaga, ma le natura o lo tatou taunuuga e faavavau, ua tatou maua ai le faafanua sili ma le faamautinoaga mo la tatou malaga i le olaga faaletino. Ua tatou iloa po o ai o loo tatou tapuai atu i ai ma pe aisea foi ua tatou tapuai atu ai. Ua tatou iloa po o ai i tatou ma tagata e mafai ona tatou avea ai (tagai MF&F 93:19). Ua tatou iloa le ua mafai ai mea uma lava, ma ua tatou iloa le mea e tatau ona tatou faia ia olioli ai i faamanuiaga silisili e oo mai e ala mai i le ata o le faaolataga a le Atua. E faapefeca ona tatou iloa nei mea uma? Ua tatou iloa e ala i faaaliga a le Atua i Ana perofeta ma ia i tatou taitoatasipatino.”

I le ausiaina o le mea ua faamatalaina e le Aposetolo o Paulo o le “oo i le fua o le ua matua e tatau ma le tumu o Keriso” (Efeso 4:13) e manaomia ai se mea e matua sili atu lava nai lo le mauaina o le malamalama. E matua le lava lava mo i tatou le *faatalitonuina* i le talalelei; ae tatau ona tatou amio ai ma mafaufau ai ina ia mafai ona tatou *liua* ai i le [talalelei]. I se faatusatusaga i faatulagaga o le lalolagi, lea e aoao ai i tatou ina ia *iloa* se mea, ua lu'iina ai i tatou e le ata o le faaolataga ma le talalelei a Iesu Keriso ia *avea* ma se [tagata e tatau ai].

E pei ona aoaoina i tatou e Peresitene Thomas S. Monson i la tatou konafesi aoao talu ai:

“E taua i le fuafuaga [o le faaolataga] o lo tatou Faaola, o Iesu Keriso. Ana le aunoa ma Lana taulaga togiola, semanu e leiloloa tagata uma. Peitai, e le lava le tau na ona talitonu ia te Ia ma Lana misiona. E manaomia ona tatou galulue ma aoao, saili ma tatalo, salamo, ma faaleleia. E manaomia ona tatou iloa tulafono a le Atua ma ola ai. E manaomia ona tatou mauaina Ana sauniga faaola. E na o le faia lava o lena mea o le a tatou maua ai le fiafia moni e faavavau. . . .

“Mai le taele o lo‘u agaga ma i le lotomaualalo atoa,” na folafola mai e Peresitene Monson, “ou te molimau atu i le meaalofa sili, o le fuafuaga lea a lo tatou Tama mo i tatou. O le ala atoatoa lea e tasi i le filemu ma le fiafia iinei ma i le lalolagi a sau.”¹²



E faaopoopo atu la'u molimau i le molimau a lo tatou perofeta-peresitene pele. Ou te molimau atu ua i ai so tatou Tama Faalelagi, e alofa ia i tatou. Ou te molimau atu ua i ai so tatou Agaga Paia, o le e taiala i tatou. Ma ou te molimau ai ia Iesu Keriso, lo tatou Faaola, ua mafaia ai mea uma, i le suafa o Iesu Keriso, amene. ■

FAAMATALAGA

1. *Aoaoga a Peresitene o le Ekalesia: Iosefa Samita* (2007), 151.
2. *Aoaoga: Iosefa Samita*, 45.
3. O se uiga taatele lea o le *communion* na filifilia e le au faaliliu o le King James (tagai *The Oxford Universal Dictionary*, 3rd ed., rev. [1955], 352).
4. Bruce R. McConkie, *A New Witness for the Articles of Faith* (1985), 51.

5. Tavita O. MaKei, i le Conference Report, Oke. 1967, 5.
6. Jeffrey R. Holland, “O Le Silsiliese o le Atua,” *Liahona*, Nov. 2003, 70.
7. First Presidency, “The Origin of Man,” *Ensign*, Feb. 2002, 26, 29.
8. Tagai, mo se faaitaiga, Russell M. Nelson, “Mauaina o le Mana o Iesu Keriso i o Tatou Olaga,” *Liahona*, Me 2017, 40; “O Le Keriso Soifua: O Le Molimau a le Au Aposetolo,” *Liahona*, Ape. 2000, 2.
9. Tagai Joseph Fielding Smith, *Doctrines of Salvation*, comp. Bruce R. McConkie (1955), 1:27.
10. Tagai i le Au Peresitene Sili ma le Korama a Aposetolo e Toasefulula, “The Father and the Son,” *Ensign*, Apr. 2002, 13–18.
11. Tagai Robert D. Hales, “O Le Agaga Paia,” *Liahona*, Me 2016, 105–7.
12. Thomas S. Monson, “O Le Ala Atoatoa i le Fiafia,” *Liahona*, Nov. 2016, 80–81.



Saunia e Peresitene Dieter F. Uchtdorf
Fesoasoani Lua i le Au Peresitene Sili

O Le Alofa Atoatoa e Faateaeseina ai le Fefe

Ia tatou faataatia ese lo tatou fefe ma ola i le olioli, lotomaualalo, faamoemoem, ma se talitonuga maumaututu tele o loo faatasi le Alii ma i tatou.

O u uso e ma tuafafine pele, uo pele, e maeu le avanoa ma le olioli e feiloai ai o se Eklesia i le lalolagi atoa ua lotogatasi i lo tatou faatuatua ma le alofa mo le Atua ma Lana fanau.

E sili lou faafetai mo le faatasi mai o lo tatou perofeta pele, Peresitene Thomas S. Monson. Peresitene, o le a matou taofia pea i o matou loto au upu o le taitaiga, fautuaga, ma le atamai. Matou te alolofa ia te oe, Peresitene

Monson, ma e matou te tatalo e le aunoa mo oe.

I tausaga ua mavae, a o ou auauna atu o se peresitene o se siteki i Frankfurt, Siamani, sa sau ai se tuafafine pele ia te au sa le fiafia i le maea ai o se tasi o a matou sauniga faalesiteki.

“Oka se leaga?” sa ia fai mai ai. “Masalo e toafa pe toalima tagata na matua momoe lelei i le taimi o lau lauga?”

Sa ou mafaufau mo sina taimi ona tali atu lea, “ou te mautinoa lava o lena

moe i le lotu o se moe sili ona maloloina i moe uma.”

Sa faalogo mai ai lo'u toalua lelei o Harriet i lenei talanoaga faasamasamanoa ma mulimuli fai mai o se tasi na o tali sili ona manaia na ou tuu atua.

O Le Fagua Tele

I ni faiata selau o ni tausaga talu ai i Amerika Tutotonu, o se mau na ta'ua o le “Fagua Tele” sa salalau atu i nuumaotua. O se tasi o ona faamoe-moega autu o le fafagu lea o tagata sa foliga mai na momoe e tusa ma mata-upu faaleagaga.

Sa tosina atu i ai le Taulealea o Iosefa Samita i mea na ia faalogo atu i ai mai failauga na avea ma se vaega o lenei fagua faalelotu. O se tasi lea o mafuaaga na tonu ai ia te ia ia saili naunautai atu i le finagalo o le Alii i se tatalo patino.

O nei failauga sa i ai se sitaili faa-failauga malosi ma faalelagona, ma o lauga sa lauiloa mo lo latou faamama-faina tele o le matautia o le afi o seoli o loo faatali mai i le tagata agasala.¹ O a latou lauga sa lei fiamomoe ai tagata—ae atonu sa mafua ai ni nai mea taufaafefe. O lo latou faamoemoega ma le mamanu sa foliga mai e taufaafefe ai tagata ia o mai i le lotu.

O le Fefe o se Taufaasese

I le talafaasolopito, e masani lava ona faaaogaina le fefe o se auala e fai ina ia faia ai e tagata se mea. Ua faaaoga e matua i a latou fanau, o pule i a latou tagata faigaluega, ma le au faiupufai i tagata palota.

O tagata tomai i fefaatauaiga e mala-malama i le malosi o le fefe ma tele ai lava ina faaaogaina. O le mafuaaga lea e foliga mai ai nisi o faasalalauga faatosina e tauaveina se feau lemagagana e faapea afai tatou te le faatauina la latou sirio pe misia foi le taaloga vitio fou lava po o se telefoni feaveai, o le a lamatia i tatou i le ola i se olaga pagatia, o le oti toatasi ma le le fiafia.

Tatou te ataata i lenei mea ma mafaufau o le a tatou le lolo atu lava i ia taufaasese, ae o nisi taimi tatou te lolo ai lava. O le mea leaga, o nisi taimi tatou te faaaogaina ai ni auala faapena



e uunaia ai isi e faia se mea tatou te mananao ai.

O la'u savali e lua ni ona faamoemoega i le asō: O le muamua o le uunaia lea o i tatou ia mafaufau loloto ma iloilo le tulaga lea *tatou te* faaaogaina ai le fefe e uunaia ai isi—e aofia ai i tatou lava. O le lona lua o le fautuaina atu lea o se auala lelei atu.

O le Faafitauli o le Fefe

Muamua, sei o tatou talanoaina le faafitauli o le fefe. I mea uma lava, o ai lava se isi o i tatou e lei faamalosia lava e le fefe ina ia tausami lelei, fai le fusipa'u o le nofoa, faamalositino atili, sefe se tupe, ia po o le salamo foi?

E moni lava e mafai e le fefe ona i ai sana faatosinaga malosi i o tatou uiga ma amioga. Ae o lena faatosinaga e foliga mai e le tumau ma papa'u. E seasea i ai i le fefe le mana e suia ai o tatou loto, ma o le a le suia ai lava i tatou i tagata e fiafia i le mea sao ma le e manao ia usiusitai i le Tama Faalelagi.

O tagata e fefefe e mafai ona *tautatala* ma faia ni mea sa'o, ae latou te le *lagonaina* ia mea sa'o. E tele ina latou lagonaina le leai o se faamoemoe ma le faatiga, po o le ita. I le aluga o taimi, o nei lagona e taitai atu ai i le le faatuaaina, le usiusitai, ma le tetee.

Paga lea, o lenei auala taitaiseseina i le olaga ma le taitaiga e le o tapulaaina i le lalolagi faaletino. Ou te faanoanoa lava e faalogo atu i tagata o le Ekalesia e faaaogaina puleaga amioletonu—pe o totonus o o latou aiga, i o latou valauga faale-Ekalesia, i le galuega, po o a latou fegalegaleaiga i aso taitasi ma isi.

E tele lava ina ta'usalaina e tagata le faatauemu o isi, ae latou te le o mafai ona vaaia lena mea ia i latou lava. Latou te faatonuina le tausisia o a latou lava tulafono faasamasamanoa, ae a le mulimultaia e isi nei tulafono faasamasamanoa, latou te aoai i latou i faamatalaga, faalelagona, ma o nisi taimi e faaletino.

Na fetalai mai le Alii e faapea “ae a tatou . . . faaaoga ai le pule po o le puleaga po o le faamalosi i luga o agaga o le fanauga a tagata, i soo se tikeri o le amioletonu, . . . e aveese e le lagi i latou lava [ma] e faanoanoa le Agaga o le Alii.”²



Atonu e i ai taimi e faaosooosoina ai i tatou e faamaonia a tatou amioga e ala i le talitonu po o a lava auala e faaaoga ae ia faamaonia ai se taunuuga lelei. E oo lava foi ina tatou manatu o le pule-puletutu, taufaasese, ma le soonafai o le a faia mo le lelei o isi. E leai la, aua ua faamanino mai e le Alii, “o fua o le Agaga o le alofa, olioli, filemu, onosai, mataalofa, agalelei, faamaoni, agamalu, [ma le] le gaoia.”³

O Se Ala Sili Atu

O le faateleina o lo'u iloaina o lo'u Tama Faalelagi, o le faateleina foi lea o lo'u vaaia o le auala Na te musuia ma taitai ai Lana fanau. E le ita, e lotofaa-magalo pe e le taui ma sui o Ia.⁴ O Lona lava faamoemoega—o Lana galuega ma Lona mamalu—o le faufautua o i tatou, faaeaina i tatou, ma taitai atu i tatou i Lona atoatoa.⁵

Sa faamatala atu e le Atua o Ia lava ia Mose o sē “alofa mutimutivale, ma le alofa fua, e telegese lona toasa, a e tele le alofa ma le faamaoni.”⁶

O le alofa o lo tatou Tama i le Lagi mo i tatou, o Lana fanau, e matua silisili ese lava mai lo tatou tomai e malamalamai ai.⁷

O le uiga la o lenei mea e le amanaiaina pe faapasi e le Atua ia amioga e feteenai ma Ana poloaiga? Leai, leai lava!

Ae e finagalo o Ia ia sua e sili atu nai lo nao o a tatou amioga. E finagalo o Ia ia sua a tatou lava natura. E finagalo o Ia ia sua o tatou loto.

E finagalo o Ia ia tatou aapa atu ma pipiimau i le āi u'amea, faafetaia'i a o tatou popolega, ma laa i luma ma le lototoa ma agai i luga i le ala lauitiiti ma le vaapiapi. E finagalo o Ia i lenei mea mo i tatou ona e alofa o Ia ia i tatou ma ona o le ala lenei i le fiafia.

O lea la, e faapefea ona uunaia e le Atua Lana fanau ia mulimuli ia te Ia i o tatou aso?

Na Ia Auina Mai Lona Alo!

Na auina mai e le Atua Lona Alo Pele e Toatasi na Fanaua, o Iesu Keriso, e faaali mai ia i tatou le ala sa'o.

E uunaia e le Atua e ala i le faatauanau, tali-tiga, agamaualalo, agamalu, ma le alofa faamaoni.⁸ O loo i ai le Atua i lo tatou itu. E alofa o Ia ia i tatou, ma a tatou pa'u'u, e finagalo o Ia ia tatou tutu-la'i a'e, toe taumafai, ma ia malolosi atili.

O Ia o lo tatou Faufautua.

O Ia o lo tatou faamoemoega sili ma le faapelepele.

E finagalo o Ia ia faaosofia i tatou i le faatuatua.

E faatuatuaaina e Ia i tatou ia aoao mai a tatou measese ma fai a tatou filifiliga sa'o.

O le ala sili lea ona lelei!⁹

O A Mea Leaga o le Lalolagi?

O se tasi o auala e manao Satani tatou te faaseseina ai isi o le nopia'i ai pea ma le soona faamamafaina o mea leaga i le lalolagi.

E mautinoa lava o loo i ai pea le lalolagi ma o le a faaaaua pe a ona i ai le le atoatoa. Ua anoanoai tele tagata ta'umamaina e mafatia ona o tulaga o le natura faapea ai foi mai uiga le mafaufau o tagata. O mea piopio ma le amioleaga i o tatou aso ua tulagaese ma taufaamata'u.

Ae e ui i nei mea uma, ou te le faafesuia'ia le ola ai i lenei taimi ma se isi lava taimi i le talafaasolopito o le lalolagi. Ua faamanuiaina i tatou ma le le mafuatiaina e ola i se taimi o le manuia, malamalamama, ma avanoa lemafaatusalia. Ae o le mea sili o mea uma, ua faamanuiaina i tatou i le mauaina o le atoaga o le talalelei a Iesu Keriso, lea ua tatou maua ai se vaaiga tupito i tulaga lamatia o le lalolagi ma faaali mai ia i tatou le auala e aloese ai pe taulimaina ai foi.

A ou mafaufau i nei faamanuiaga, ou te fia faapa'u i o'u tulivae ma ofo atu viiga i lo tatou Tama Faalelagi mo Lona alofa le muta mo Ana fanau uma.

Ou te le talitonu e finagalo le Atua ia fefefe Ana fanau pe nopia'i ai lava i mea leaga o le lalolagi. "Aua ua le foaina mai e le Atua ia te i tatou le Agaga e mata'u ai, a o le Agaga e faamalosi ai, ma alofa ai, ma mafaufau tonu ai."¹⁰

Ua Ia tuuina mai ia i tatou le anoanoai o mafuaaga e olioli ai. Pau le mea tatou te manaomia o le saili ma ia vaai i ai. E tele ina faamanatu mai e le Alii ia i tatou "ia aua nei matata'u," ae "ia lototetele"¹¹ ma ia "aua le fefe, le lafu mamoe itiiti e."¹²

O Le A Tau e le Alii a Tatou Tausi

Uso e ma tuafafine, o i tatou o le "lafu mamoe itiiti." O i tatou o le Au Paia o aso e gata ai. Ua i ai lava i lo tatou igoa le tautinoga e tepa taulai atu i le toe afio mai o le Faaola ma saunia i tatou lava ma le lalolagi e talia o Ia. O lea, ia tatou auauna atu i le Atua ma alolofa i o tatou uso a tagata. Tau ina ia tatou faia lenei mea ma se lototoa masani, ma le lotomaualalo, ia le vaai maualalo lava i soo se isi tapuaiga po o ni faalapotopotoga o tagata. Uso ma tuafafine, ua poloaiina i tatou e suesue le afioga a le Atua ma usitai i le siufogga o le Agaga, ina ia mafai ona tatou

"iloa faailoga o taimi, ma faailoga o le afio mai o le Atalii o le Tagata."¹³

O le mea lea, e le faapea ua tatou le iloaina luitau o le lalolagi, pe ua tatou le iloa foi faigata o o tatou taimi. Ae e le faapea la e tatau ai ona tatou faamamafatua i tatou lava po o isi i avega o le fefe faifai pe. Ae nai lo le nopiai ai lava i le loloto o o tatou luitau, e le sili ea le taulai atu i le mana lemafuatia sili, lelei ma atoatoa o lo tatou Atua, faalagolago ia te Ia, ma saunia faatasi ma se loto fiafia mo le toe afio mai o Iesu le Keriso?

I le avea ai ma Ona nuu o le feagaga, e le manaomia ai ona faagaseina i tatou e le fefe ona o mea leaga e ono tutupu. Ae, e mafai ona tatou agai i luma i le faatuatua, lototele, naunau-taiga, ma le faalagolago i le Atua a o tatou latalata atu i luitau ma avanoa o i luma atu.¹⁴

Tatou te le savavali na o i tatou i le ala o le avea ma soo. "O Ieova lou Atua . . . lua te o faatasi ma ia; na te le tuuna oe, na te le lafoai ia te oe."¹⁵

"O le a tau Ieova mo outou, a e faalologo outou."¹⁶


I taimi o le fefe, tau ina ia tatou maua lo tatou lototele, ia āo faatasi lo tatou faatuatua, ma maua le talitonuga maumaututu i le folafolaga e faapea "o auupega uma e faia e tau ma oe e le manuia ia."¹⁷

Ua tatou ola ea i se vaitaimi faigata ma faafitaui? Ioe o lea lava.

Ua fetalai mai le Atua lava Ia, "E maua foi outou e le puapuaga i le lalolagi a ia outou lototetele ua ou manu-malo i le lalolagi."¹⁸

E mafai ea ona tatou faatinoina le faatuatua e talitonu ai ma faatino e tusa ai? E mafai ea ona tatou ola e tusa ma a tatou tautinoga ma feagaiga paia? E mafai ea ona tatou tausia poloaiaga a le Atua e oo lava i tulaga lu'itauina? Ioe e mafai ona tatou tausia!

E mafai ona tatou faia ona sa folafola mai e le Atua, "O le a galulue faatasi mea uma mo lo outou lelei, pe afai tou te savavali sao."¹⁹ O lea, Ia tatou faataatia ese lo tatou fefe ma ola i le olioli, lotomaualalo, faamoemoe, ma se talitonuga maumaututu tele o loo faatasi le Alii ma i tatou.





O Le Alofa Atoatoa e Faateaeseina ai le Fefe

Au ue pele, ou uso e ma tuafafine pele ia Keriso, afai tatou te oo ina ola i le fefe ma le po o le atuatuvalo, pe afai foi tatou te iloa o a tatou upu, uiga po o amioga o loo mafua ai le fefe i isi, ona tatou mafaufau lea i lenei vaifoona tofia mai le lagu mo le fefe: o le alofa le pona o Keriso, aua o le "alofa atoatoa e faateaeseina ai le fefe."²⁰

O le alofa atoatoa o Keriso e faatoilalo ai le faaosoosoga e faatiga, faifamalosi, faatauemu, po o le sauva.

O le alofa atoatoa o Keriso e faatagaina ai i tatou e savavali i le lotomauvalo, malualii, ma se talitonuga maumaututu malosi o ni soo o lo tatou Faaola pele. O le alofa atoatoa o Keriso tatou te maua ai le talitonuga maumaututu e agai ai pea i luma e ui i lo tatou fefe, ma tuu atu lo tatou faalagolago atoa i le mana ma le agalelei o lo tatou Tama Faalelagi ma Lona Alo, o Iesu Keriso.

I o tatou aiga, i o tatou nofoaga o pisinisi, i o tatou valaauga i le Ekalesia, i o tatou loto, ia tatou suitulagaina le fefe i le alofa atoatoa o Keriso. O le alofa o Keriso o le a suitulagaina le fefe i le faatuatua!

O Lona alofa o le a tatou mafai ai ona iloaina, faalagolago ma maua le faatuatua i le agalelei o lo tatou Tama Faalelagi, i Lana fuafuaga paia, Lana talalelei, ma Ana poloaga.²¹ O le alofa i le Atua ma o tatou uso a tagata o le a

liliu atu ai lo tatou usiusitai i poloaiga a le Atua i se faamanuiaga nai lo o se avega. O le alofa o Keriso o le a fesoasoani ia i tatou ia agalelei atili, lotofaa-magalo atili, popole atili, ma tuuto atili atu i Lana galuega.

A faatumulaina o tatou loto i le alofa o Keriso, o le a fagua i tatou i se faafouga faaleagaga ma o le a tatou savavali ma le olioli, toafimalie, ma le ola i le malamalamo ma le mamalu o lo tatou Faaola pele, o Iesu Keriso.

Ou te molimau atu faatasi ma le Apostolo Ioane, "e leai se fefe i le alofa [o Keriso]."²² Uso e ma tuafafine, e silafia atoatoa outou e le Atua. E alofa atoatoa o Ia ia te outou. Ua Ia silafia lo outou lumanai. E finagalo o Ia e "aua e te mata'u; tau lava ina e faatuatua"²³ ma "tumau i lona alofa [atoatoa]."²⁴ O la'u tatalo ma le faamanuiaga lea, i le suafa o Iesu Keriso, amene. ■

FAAMATALAGA

1. O George Whitehead ma Jonathan Edwards o ni faataitaiga sili ia o lenei ituaiga o failauga.
2. Mataupu Faavae ma Feagaiga 121:37.
3. Kalatia 5:22–23.
4. I se tasi taimi, sa finagalo ai le Faaola e ulufale atu i se aai a le au Samaria, ae sa teena e tagata Iesu ma le mananao e talia o Ia i lo latou aai. Sa le fiafia Ona soo e toalua i lenei mea ma fesili, "Le Alii e, pe e te finagalo, ma te fai atu ia alu ifo le afi mai le lagu, ia fano ai i latou?" Sa tali atu Iesu ma le faaeteete: "E le iloa e oulu le uiga o oulu loto. Aua e lei sau le Atalii o le tagata e faumatia le ola o tagata, a ia faaolaina" (tagai i le Luka 9:51–56, New King James Version).
5. Tagai Mose 1:39; tagai foi Efeso 3:19.

6. Esoto 34:6.

7. Tagai Efeso 3:19.

8. Tagai Mataupu Faavae ma Feagaiga 121:41. E mautinoa lava afai ua faamoemoeina i tatou e le Atua, o Lana fanau faaletino, ia amio i lenei ala i le tasi ma le isi, o Ia—o se tagata atoatoa ua i ai amioga paia uma—fai ma faataitaiga mo ia amioga.

9. I le Fono i le muai olaga i le Lagi, o se suesuega lelei tele o loo faaalua ai uiga o le Atua. O iina na tuuina mai ai e le Tama Faalelagi Lana fuafuaga mo lo tatou alualu i luma e faavavau. O elemene autu o lena fuafuaga ua aofia ai le faitalia, usiusitai, ma le faaoalataga e ala i le Togiola a Keriso. Peitai, o Lusifelo, na fautuaina atu se isi auala e ese ai. Na ia tautino atu o le a usiusitai tagata uma—ma e leai se tasi o le a leiloa. Na o le pau lava le auala e ausia ai lenei mea o le pulesaua ma le fai faamalosi. Ae sa lei faatagaina e lo tatou Tama Faalelagi alofa lena fuafuaga. Sa Ia faatauaina le faitalia o Lana fanau. Sa Ia silafia e tatau ona tatou faia ni mea sese i le faigamalaga pe afai e ao ina tatou aoao moni lava. Ma o le mafuaaga lena na Ia saunia ai se Faaola, o le ana le taulaga e faavavau e mafai na faamama ai i tatou mai le agasala ma faatagaina ai lo tatou toe ulufale atu i le malo o le Atua.

Ina ua silasila atu lo tatou Tama i le Lagi ua anoanoai Lana fanau pele ua faaseseina e Lusifelo, pe sa Ia fosia ea i latou ia mulimuli i Lana fuafuaga? Pe na Ia faamata'u pe faafe ea i latou o e na faia lea filifiliga matautia? Leai. Sa mautinoa lava e mafai e lo tatou Atua e ou le mana uma ona taofia lenei fouvalega. Sa ono mafai lava ona Ia faamalosia Lona finagalo i luga o e na fouuale ma faia i latou ia usiusitai. Ae, na Ia faatagaina Lana fanau e filifili mo i latou lava.

10. 2 Timoteo 1:7.

11. Tagai, mo se faataitaiga, Iosua 1:9; Isaia 41:13; Luka 12:32; Ioane 16:33; 1 Peteru 3:14; Mataupu Faavae ma Feagaiga 6:36; 50:41; 61:36; 78:18.

12. Luka 12:32.

13. Mataupu Faavae ma Feagaiga 68:11.

14. O loo faaaogaina pea le fautuaga a Mose i tagata o ona aso: "Aua tou te fefefe. . . . Vaai atu i le olataga mai ia Ieova, o le a faia e Ia mo outou i le aso nei" (Esoto 14:13, New King James Version).

15. Teuteronomie 31:6.

16. Esoto 14:14, Lomiga Fou a King James.

17. Isaia 54:17.

18. Ioane 16:33.

19. Mataupu Faavae ma Feagaiga 90:24; tagai foi 2 Korinito 2:14; Mataupu Faavae ma Feagaiga 105:14.

20. 1 Ioane 4:18.

21. Ia tatou manatua e lei auina mai le Faaola "i le lalolagi ina ia faasala i le lalolagi; a ia faaoalaina le lalolagi ia te ia" (Ioane 3:16–17). O le mea moni, "e le faia e ia se mea vagana ai ua mo le manuia o le lalolagi; ona ua alofa o ia i le lalolagi, e oo ina tuu ai lava e ia i lalo lona lava soifua ina ia mafai ona ia aumai o tagata uma ia te ia" (2 Nifae 26:24).

22. 1 Ioane 4:18; tagai foi 1 Ioane 4:16.

23. Mareko 5:36.

24. Ioane 15:10.



Saunia e Elder D. Todd Christofferson

O Le Korama a Aposetolo e Toasefululua

O Le Leo o le Lapataiga

E ui e lagonaina patino e perofeta le tiute e lapatai atu i isi, ae o se tiute foi e tatau ona i ai i isi.

Na soifua mai le perofeta o Esekielu pe a ma le luasefulu tausaga a o lei tuua e Liae ma lona aiga Ierusalem. I le 597 TLM, i le 25 o ona tausaga, o Esekielu o se tasi o le toatele o e na ave faatagatotaua i Papelonia e Nepukanesa, ma o le mea e gata ai lo tatou silafia, sa ia faaaluina lona olaga atoa iina.¹ O ia o se ositaulaga mai le gafa o Arona, ma ina ua 30 ona tausaga, sa avea o ia ma se perofeta.²

I le tofaina o Esekielu, sa faaaogaina e Ieova le faatusa o se tagata vaai.

“A iloa atu e [le tagata vaai] le pelu o loo sau i le nuu, afai na te ilia le pu, ma faailoa atu i le nuu;

“O se na te lagona le leo o le pu, a e le anaana i ai, a oo ane le pelu, ma oti ai o ia, e i luga o lona lava ulu lona toto.”³

I se isi itu, “Afaí e iloa e le tagata vaai le pelu o loo sau, a e le ilia e ia le pu, ma ua le faailoa atu i le nuu; a oo mai le pelu, ma oti ai se tasi o i latou, . . . o lona toto ou te tauiatua lea i le tagata vaai.”⁴

Ona fetalai sao atu lea o Ieova ia Esekielu ma folafola atu, “O oe foi le atalii o le tagata, ua ou tofia oe e fai ma tagata vaai i le aiga o Israel; o le mea lea ia e faalogo mai ai i le upu a lo’u gutu, ma e apoapoi atu ia te i latou i

upu [mo] au.”⁵ O le lapataiga o le liliu ese mai le agasala.

“A ou fai atu i le ua amio leaga, Le tagata amio leaga e, e te oti lava oe; afai e te le tautala atu e apoapoi atu ai i le ua amio leaga, ia liliu ese i lona ala; e oti lena tagata amio leaga i lana amio leaga; a o lona toto ou te tauiatua lea ia te oe.

“A o oe, afai e te apoapoi atu i le ua amio leaga, ia liliu ese o ia i lona ala; afai na te le liliu ese i lona ala, e oti o ia i lana amio leaga; a ua faasaoina e oe lou lava agaga. . . .

“A ou fai atu foi i le ua amio leaga, E oti lava oe; afai e liliu ese ia i lana agasala, ma ua fai e ia le amio tatau ma le amiontonu; . . .

“O ana agasala ua ia faia e le tautau ia te ia; ua ia fai le amio tatau ma le tonu; e ola lava ia.”⁶

O le mea e mata’ina ai, o lenei lapataiga e faatatau foi i e amiontonu. “A ou fai atu i le ua amiontonu, e ola lava ia; afai e faalagolago ia i lana amiontonu, ma ua fai le amio leaga, ona le manatua lea o ana amiontonu uma, a e oti o ia ona o amio leaga ua ia faia.”⁷

I le augani atu ai i LANA fanau, na fetalai atu ai le Atua ia Esekielu, “Fai atu ia ia te i latou, O loo fetalai mai le Alii o Ieova, Ou te ola a’u, ou te le fiafia lava i le oti o lē amio leaga, a ia liliu mai ia

lē amio leaga ai lona ala, ma ola ai; liliu ia outou, ina outou liliu ese ia i o outou ala leaga; aua pe se a ea le mea tou te fia oti ai, le aiga o Israel?”⁸

Nai lo le naunau ia faasala, o loo saili e lo tatou Tama Faalelagi ma lo tatou Faaola lo tatou fiafia ma augani mai ia i tatou ina ia salamo, ma ia iloa lelei “e lei avea lava [ma o le a le avea lava] le amioleaga ma fiafia.”⁹ O lea la o Esekielu ma soo se perofeta o i luma atu ma talu ai nei, na tautatala i le afioga a le Atua mai le loto atoa, na lapataia tagata uma o e o le a liliu ese mai ia Satani, o le fili o o latou agaga, ma “filifili le saolotoga ma le ola e faavavau, e ala i le Puluvaga sili o tagata uma.”¹⁰

E ui e lagonaina patino e perofeta le tiute e lapatai atu i isi, ae o se tiute foi e tatau ona i ai i isi. O le mea moni, “ua tatau i tagata taitoataso i e ua uma ona lapataia ona lapatai atu i le la te tuaoi.”¹¹ O i tatou o e ua mauaina se malamalamo o le fuafuaga sili o le fiafia—ma poloaiga e fesootai i ai—e tatau ona lagona se manao e faasoa atu lena malamalamo ona e faia ai se eseesega tele iinei ma i le faavavau. Ma afai tatou te fesili ifo, “O ai lo’u tuaoi e tatau ona ou lapataia?” e moni o le a maua le tali i se faataoto lea e amataina, “O le tasi tagata na alu ifo



mai Ierusalem i Ieriko, ua maua o ia e tagata fao mea,”¹² ma faaaauau ai pea.

O le mafaufau ai i le faataoto o le Samaria agalelei i lenei talaaga ua faamanatu maia ia i tatou o le fesili “O ai lo’u tuaoi?” na noatia i poloaiga sili e lua: “E te alofa atu i le Alii lou Atua ma lou loto atoa, ma lou agaga atoa, ma lou malosi atoa, ma lou manatu atoa; e te alofa atu foi i le lua te tuaoi, ia pei o oe lava ia te oe.”¹³ O le unaiga mo le siitiaina o le leo o le lapataiga, o le alofa lea—alofa i le Atua ma le alofa i uso a tagata. O le lapatai atu o le popole lea. Ua faatonuina e le Alii ina ia faataunuina “i le mālū ma i le agamalu”¹⁴ ma “i le faatauanau, i le tali-tiga, i le agamaualalo. . . , ma i le alofa faamaoni.”¹⁵ E mafai ona faafusei, e pei ona tatou lapataia se tamaititi e aua le tuua lona lima i se afi. E tatau ona manino ma i nisi taimi ia mausali. O nisi taimi, o le lapataiga e ono avea ma tulaga o le aoaiga “pe a uunaia ai e le Agaga Paia,”¹⁶ ae ia faavae pea i le alofa. Molimau atu, mo se faataitaiga, le alofa lea e uunaia ai le auaunaga ma le osigataulaga a o tatou faifeautalai.

E mautinoa lava o le alofa o le a faamalosia matua e lapatai atu i o latou “tuaoi”—e sili ona latalata i ai, o a latou lava fanau. O le uiga o lenei mea o le aoao atu ma le molimau atu i upumoni o le talalelei. O lona uiga o le aoao atu o le aoaoga faavae a Keriso i fanau: faatuatua, salamo, papatisoga, ma le mealofo o le Agaga Paia.¹⁷ Ua faamanatu mai e le Alii i matua, “Ua Ou poloaina outou ia tausi a’e a outou fanau i le malamalama ma le upumoni.”¹⁸

O se elemene taua o le tiute faamataua ina ia lapatai atu e le gata i le faamatala atu o taunuuga faataumaoi o le agasala ae o le olioli foi i le savali ma le usiusitai i poloaiga. Toe mafaufau i upu a Enosa e uiga i le mea na taitaina o ia e saili i le Atua, mauaina o se faamataloga o agasala, ma ia liuaina:

“Faauta, sa ou alu e tuli manu i le vao; ma o upu sa ou faalogo soo o tautala i ai lo’u tamā e uiga i le ola e faavavau, *ma le olioli o le au paia*, sa gotouga ifo i lo’u loto.

“Ma sa matelaina lo’u agaga; ma sa ou tootuli i lalo i luma o lo’u Tufuga,



ma ou tagi atu ia te ia i le tatalo malosi ma le faatauanau mo lo’u lava agaga.”¹⁹

Ona o Lona alofa ma le popole e le mafaatusalia mo isi ma lo latou fiafia, e lei faatali Iesu e lapatai mai. I le amataga o Lana galuega, “na afua ona talai atu e Iesu, ua faapea atu, Ina salamo ia outou; aua ua latalata mai le malo o le lagi.”²⁰ Talu ai ua Ia silafia e le taitai atua i tatou i soo se auala i le lagi, o lea na Ia poloai mai ai:

“Ia outou ulu atu i le faitotoa vaapiapi: aua e va tele le faitotoa, e lautele foi le ala, e tau atu i le malaia, e toatele foi i latou o e ui atu ai:

“Aua e vaapiapi le faitotoa, e lauitiiti foi le ala e tau atu i le ola, e toaitiiti foi i latou o e maua”²¹

Sa Ia tuuto atu le taimi i e agasala, ma fetalai atu, “Ou te lei sau e valaau i e ua amiontonu, a o e ua agasala, ina ia latou salamo.”²²

“Ai mo le au tusiupu, Faresao, ma le au Satukaio, sa maumaututu Iesu i le tausalaina o lo latou pepelo. O Ana lapataiga ma poloaiga na tuusao atu: “Oi talofa ia te outou tusiupu ma faresao, tagata pepelo! Ua outou avatu mea e sefulu a’i o le mili, ma le aneto, ma le kumina, a ua tuu e outou o mea silisili o i le tulafono, o le amiontonu, ma le alofa, ma le faamaoni.”²³ E moni

e leai se tasi o le a tuuaia le Faaola i le alofa atu i nei tusiupu ma Faresao—ua i le iuga lava, sa Ia puapuagatia ma maliu e laveaiina ai foi i latou. Ae o le alofa ia i latou, e le mafai ai ona Ia tuua i latou e faaaauau pea i le agasala e aunoa ma le faasa’oina ma le manino o i latou. Sa matauina e se tasi tagata matau, “Sa aoaoina e Iesu ona soo ia faia e pei ona Ia faia: ia talia soo se tagata ae ia aoao atu foi e uiga i le agasala, talu ai o le alofa e manaomia ai le lapataia o tagata e uiga i mea e mafai ona faatiga ai i latou.”²⁴

O nisi taimi o i latou o e sii ae le leo o le lapataiga ua le amanaiaina ona ua faapea ua faamasinosino. Ae peitai, i se eseesega, o i latou o e fai mai o le upumoni e fua i le manatu o le tagata ia, ma o tulaga faatonuina o le amio mama o se mataupu e fua i le mea e fiafia i ai le tagata lava ia, e masani lava o i latou lava ia e sili ona faitio leaga i tagata ia e le taliaina mea ua manatu i ai tagata lautele o se “manatu sa’o.” Sa faasino i ai se tasi o tusitala i lenei mea o se “aganuu maasiasi”:

“I se aganuu tausalaina e te iloa lou lelei po o lou leaga i le mea e tau atu e lou mafaufau. I se aganuu maasiasi e te iloa lou lelei po o lou leaga i le mea e tau atu e tagata o le nuu e uiga ia te oe,

pe faamamaluina ai oe pe faieseaa ai oe. . . [I se aganuu maasiasi,] o le olaga mama e le o fausia i luga o le fuafaataau o le lelei ma le leaga; o loo fausia i luga o le fuafaatatau o le faaaofia ma le faieseaa. . . .

“. . . O le a tumau ai pea le le mautu o tagata uma i se faatulagaga o amioga mama e fua i le faaaofia ma le faieseaa. E leai ni tulaga faatonuina tumau, ua na o faamasinoga fesuisuiai a tagata lautele. O se aganuu o lagona maaleale gofie, soona maoaluma ma le popolevale po o le a le mea sa’o ae po o le a le mea sese, e lagona ai e tagata uma le faamalosia e ioe atu i ai. . . .

“O le aganuu tausalaina e ono soonafai, ae o le mea e sili ai e mafai ona e ita i le agasala ae alofa pea i le tagata agasala. O le aganuu maasiasi o nei onapo e tatau ona faatauaina le faaaofiaina ma le faapalepale, ae ono tulaga ese le le alofa ia i latou o e le ioe [i se meal] ma i latou e ese mai le toatele o tagata.”²⁵

E faatusatusa i lenei mea “le papa o lo tatou Togiola,”²⁶ o se faavae mausali ma tumau o le faamasinoga tonu ma le mama. E sili atu le lelei o le i ai o le tulafono e lemasuia a le Atua lea tatou te faatino ai le filifilia o lo tatou tau-nuuga nai lo le faapologaina e tulafono lē mautu ma le maemaea a se vaega leaga o ala faasalalau faaagafesootai. E sili atu le lelei o le iloa o le upumoni nai lo le “felafoaiina e pei o peau, ma feaveaiina i matagi uma lava o mata-upu.”²⁷ E sili atu le lelei o le salamo ma tulai ae i tulaga faatonuina o le talalelei nai lo le faafoliga e leai se sa’o po o se sese ma pagatia ai i le agasala ma le faanoanoa.

Ua folafola mai e le Alii, “O le leo o le lapataiga ua mo tagata uma, e ala atu i fofoga o o’u soo, o e ua Ou filifilia i aso nei e gata ai.”²⁸ I le avea ai ma tagata vaai ma soo, e le mafai ona tatou tutu faaleogalua e uiga i lenei “aula e silisili lava.”²⁹ E pei o Esekielu, e le mafai ona tatou vaai i le pelu o loo sau i luga o le laueleele “ma le ilia . . . le pu.”³⁰ E le o faapea atu e tatau ona tatou tu’itu’i faitotoa o o tatou tuaoi pe tutu i nofoaga faietele ma alaga atu, “Ia salamo!” E moni, ae mafaufau i ai,



ua tatou maua i le talalelei toefuataiina mea ua matua mananao lava i ai ia tagata. O lea la o le leo o le lapataiga e le masani le na o le faaaloalo, ae i se fasifuaiteau a le au fai Salamo, o se “alalaga fiafia.”³¹

Na tusia e le tusitala o manatu a le *Deseret News* o Hal Boyd se tasi o faataitaiga o uiga sese o le nofonofo e le tautala. Sa ia matauina e ui o le manatu i faaipoipoga o loo avea pea ma se mataupu o “finauga faaleatamai” i tagata iloga o le malo o Amerika, o le faaipoipoga lava ia e le o se mataupu o le finauga mo i latou i mea o loo latou faia. “O tagata iloga e faaipoipo ma tumau ai i faaipoipoga ma faamautinoa

o loo fiafia a latou fanau i faamanuiaga o se faaipoipoga mautu.’ . . . Peitai, o le faafitauli, [latou] te le o faamoemoe e talai atu mea o loo latou faia.” Latou te le o mananao e “fosi” atu ia i latou o e mafai moni lava ona faaaogaina la latou taitaiga lelei, ae “masalo ua oo i le taimi mo i latou ua aoaoina ma ua i ai aiga malolosi ina ia taofia le faafoliga o le tu faaleogalua ma amata ona talai atu mea o loo latou faia e faatatau i faaipoipoga ma tulaga faamatua . . . [ma] fesoasoani atu i o latou uso a tagata Amerika ia taliaina.”³²

Matou te talitonu aemaise lava outou le tupulaga faiae, talavou ma talavou matutua lea e tatau ona faalagolago i

ai le Alii mo le manuia o Lana galuega i tausaga o i le lumanai, o le a lagolagoina ia aoaoga o le talalelei ma tulaga faatonuina o le Ekalesia i nofoaga faitele faapea foi i [nofoaga] patino. Aua nei tuulafoaia i latou o e atonu e taliaina le upumoni ina ia tauivi ma toilalo ai i le iloa o se mea. Aua le gauai atu i manatu sese o le faapalepale po o le fefe—fefe i le faaletonu, le taliaina, pe oo lava i le puapuagatia. Ia manatua le folafolaga a le Faaola:

“Amuia outou pe a latou upu leaga, ma faasaua ia te outou, ma latou tuuaina pepelo outou i mea leaga uma ona o a'u.

“Ia outou olioli ma fiafia lava; aua o i le lagi lo outou taui e tele; aua na faapea ona latou faasaua i perofeta e na muamua ia te outou.”³³

I le taimi mulimuli lava, tatou te tali uma atu i le Atua mo a tatou filifiliga ma olaga o tatou ola ai. Na folafola mai e le Faaola, “Ma na auina mai au e lou Tamā ina ia sii ae au i luga o le satauro; ma a mavae ona sii ae o au i luga o le satauro, ina ia mafai ona ou aumai o tagata uma ia te au, ina ia pei ona sii ae o au i luga e tagata ia faapea foi ona sii ae i luga o tagata e le Tamā, e tutu i ou luma, e faamasinoina i a latou galuega, pe ua lelei pe ua leaga.”³⁴

O le iloaina o lenei mea, o le silisiiese o le Alii, ou te aioi atu ai i upu a Alema:

“Ma o lenei, ou uso e [ma tuafafine], ou te moomoo mai le vaega totonugalemu o lo'u loto, ioe, ma le atutuvale tele e oo lava i le tiga, ina ia outou faalogo mai i au upu, ma lafo ese a outou agasala, ma aua le faatuatuai le aso o lo outou salamo;

“Ae ia outou faamaualalalo outou lava i luma o le Alii, ma valaau atu i lona suafa paia, ma mataala ma tatalo e lē aunoa, ina ia lē faaososoina outou i luga atu o le mea e mafai ona outou lavatia, ma faapea ona taitaiina ai outou e le Agaga Paia . . . ;

“Ua faatuatua i le Alii; ua i ai se faamoemoe o le a outou maua le ola e faavavau; ua i ai le alofa o le Atua e le aunoa i o outou loto, ina ia mafai ona sii a'e outou i luga i le aso mulimuli ma ulu atu i lona malologa.”³⁵



Tau ina tatou faapea atu taitoatas i le Alii faatasi ma Tavita: “Ou te lei natia lava i lo'u loto lau amiontonu; ua ou tauina atu lou faamaoni ma lau faaolataga: ou te lei faalilolilo lou alofa ma le mea moni mai ia te oe i le faapopotoga tele. Ieova e, aua e te taofi e oe lou alofa mutimutivale ia te a'u.”³⁶ I le suafa, o Iesu Keriso, amene. ■

FAAMATALAGA

1. Tagai Richard Neitzel Holzapfel, Dana M. Pike, and David Rolph Seely, *Jehovah and the World of the Old Testament* (2009), 344.
 2. Tagai Esekielu 1–3; Holzapfel, *Jehovah and the World of the Old Testament*, 344.
 3. Esekielu 33:3–4.
 4. Esekielu 33:6.
 5. Esekielu 33:7.
 6. Esekielu 33:8–9, 14, 16.
 7. Esekielu 33:13.
 8. Esekielu 33:11.
 9. Alema 41:10.
 10. 2 Nifae 2:27.
 11. Mataupu Faavae ma Feagaiga 88:81.
 12. Luka 10:30.
 13. Luka 10:27.
 14. Mataupu Faavae ma Feagaiga 38:41.
 15. Mataupu Faavae ma Feagaiga 121:41.
 16. Mataupu Faavae ma Feagaiga 121:43.
 17. Tagai Mataupu Faavae ma Feagaiga 68:25.
 18. Mataupu Faavae ma Feagaiga 93:40.
 19. Enosa 1:3–4; faaoopoopo le faamamafa. E pei ona faaali mai e Peresitene Russell M. Nelson i le konafesi aoao i le ono masina ua mavae: O o'u uso e ma tuafafine pele, o le olioli o tatou lagonaina e ititi lava se mea e faatatau i tulaga o tatou olaga ao mea uma o loo faatatau i le taulaiga o o tatou olaga. . . . O le olioli e sau mai ia [Iesu Keriso] ma ona o [Iesu Keriso]. O Ia o le puna o le olioli uma” (“Olioli ma le Ola ai Faaleagaga,” *Liahona*, Nov. 2016, 82).
 20. Mataio 4:17.
 21. Mataio 7:13–14.
 22. Luka 5:32.
 23. Mataio 23:23.
 24. Chris Stefanick, *Absolute Relativism: The New Dictatorship and What to Do about It* (2011), 33.
 25. David Brooks, “The Shame Culture,” *New York Times*, Mar. 15, 2016, A29.
 26. Helamana 5:12.
 27. Efeso 4:14. E tatau ona tatou mafaufau faapea o nisi o loo tatou sailia e lapataia atonu e le iloa lo latou malaia. Ua fetalai mai le Alii e uiga i le toatele i o tatou aso ina ua ia fetalai mai:
- “Aua ua e fai mai, Ou te se mauoa, ua faatamaoaigaina a'u, ou te le mativa foi i se mea e tasi; a ua e le iloa o oe o le malaia, ma le pagatia, ma le mativa, ma le tauaso, ma le le lavalava:
- “Ou te fai atu ai ia te oe, ia e faatau atu ia te au le auro ua faamamaina i le afi, ina ia e tamaoaiga ai; ma ofu sisina ina ia e ofu ai, ina nei iloa le ma o lou le lavalava, ma le vaimata e nini a'i ou mata, ina ia e pupula [moni] ai” (Faaaliga 3:17–18).
28. Mataupu Faavae ma Feagaiga 1:4; tagai foi Mataupu Faavae ma Feagaiga 1:5.
 29. 1 Korinito 12:31.
 30. Esekielu 33:6.
 31. Salamo 66:1; 98:4.
 32. Hal Boyd, “Hey Progressive Elites! It’s Time to Preach What You Practice,” *Deseret News*, Oct. 20, 2016, deseretnews.com. Ua ia taua foi le sociologist o le Iunivesite o Virginia o W. Bradford Wilcox.
 33. Mataio 5:11–12.
 34. 3 Nifae 27:14.
 35. Alema 13:27–29.
 36. Salamo 40:10.



Saunia e Elder Joaquin E. Costa
O Le Fitugafulu

I Uo ma Tagata Sailiili o le Ekalesia

Afai e te totogia le tau o faaaliga, lotomualalo oe lava, faitau, tatalo, ma salamo, o le a matala mai le lagi ma o le a e silafia ai o lesu o le Keriso.

le aoauli o le aso Faraile, 16 Setema 1988, i le falelotu o le Uarota a Vicente López i Buenos Aires, Atenitina, sa papatiso ai au o se tagata o Le Ekalesia a Iesu Keriso o le Au Paia o Aso e Gata Ai. Sa papatiso au e se uo lelei i lena aso, ma sa ou lagona le fiafia, mafanafana, ma le naunau e aoao atili.

Ou te fia faasoa atu i le aso ni lesona sa ou aoaoina i lo'u ala i le liua—o lesona ou te faamoemoe e mafai ona fesoasoani ia te outou o loo faafogoga mai e le o ni tagata o le Ekalesia. Ou te tatalo ina ia pa'i atu le Agaga i o outou loto e pei o au.

Muamua, Feiloai i Faifeautalai

Aisea e manao ai se tagata e aunoa ma ni luitau faamalosi, manaoga, po o ni fesili e feiloai i faifeautalai ma faalogo i a latou lesona? Ia, mo au o le alofa—o le alofa mo se teine, o se teine e suafa ia Renee. Sa ou alofa ia te ia, ma sa ou manao e faaipoipo ia te ia. Sa ese o ia ma sa i ai ni tulaga faatonuina e ese mai le tele o tamaitai talavou sa ou iloa. Ae sa ou alofa ia te ia ma talosagaina o ia e faaipoipo ia te au—ma sa ia fai mai e leai!

talanoa e uiga i ana sini—o le faaipoipo atu i se tasi na te mafai ona ave o ia i le malumalu—ma sa ia teena lau talosaga. Sa ou manao e faaaauau le faigauo, o lea sa ou ioe ai e faalogo i faifeautalai. Pe o se mafuaaga lelei ea lenei e feiloai ai i faifeautalai? Ia, sa lelei mo au.

Ina ua ou feiloai i faifeautalai mo le taimi muamua, ou te lei malamalama tele i mea sa la tau mai, ma e tau atu le mea moni ia te outou, masalo sa ou le faalogo tele ia i laua. Ou te lei fia faalogo i se tapuaiga fou. Sa na o lou manao lava e tau atu e sese i latou ma maua le taimi e tauanau ai Renee e faaipoipo pea ia te au.

I le aso, sa auauna atu lau fanau ma o loo auauna atu i misiona, ma ou te malamalama i osigataulaga o loo faia e nei alii ma tamaitai talavou e aoao atu le talalelei a Iesu Keriso. Ia ou te momoo maimau pe ana ou gauai atili atu ia Elder Richardson, Elder Farrell, ma Elder Hyland, o faifeautalai lelei tele na aoaoina au.

O lea, mai la'u lesona muamua, ou te faapea atu ia te outou o uo ma tagata sailiili o le Ekalesia: *o le taimi*



tou te feiloai ai i faifeautalai, faamole-mole ia gauai atoatoa ia i latou, ua latou tuu atu tausaga taua o o latou olaga mo outou.

Lua, Alu i le Lotu

O le taimi muamua sa ou auai ai i se sauniga Lotu, e tele upu sa ou faalogo i ai ou te lei malamalama i ai. O ai sa avea ma Ofagapi? O le a le Peristiua Arona? o le Aualofa?

Afai o le taimi muamua lenei ua e auai ai i se sauniga Lotu ma o loo e lagona le lē mautonu i se mea e te le malamalama ai, aua le popole! Sa leai foi sou iloa. Ae ou te manatua pea lagona, lagona fou o le filemu ma le olioli sa ou oo i ai. Ou te le'i iloa i lena taimi, ae sa musumusu mai le Agaga Paia i ou taliga ma i lou loto, “E sao le mea lenei.”

Ia sei ou tuuina atu lenei lesona i se fuaiupu se tasi: *afai o e lē mautonu, aua le popole—manatua lagona na e oo i ai; o na lagona e sau mai le Atua.*

Tolu, Faitauina o le Tusi a Mamona

I le mavae ai o nai feiloaiga ma faifeautalai, sa ou le alualu tele i luma. Sa ou lagona ou te le'i mauaina se faamautinoaga o le moni a'ia'i o le talalelei.

I se tasi aso, sa fesili mai Renee ia te au, “O e faitauina le Tusi a Mamona?”

Sa ou tali atu, “Leai.” Sa ou faalogo i faifeautalai—e lē lava ea lena mea?

Ma loimata i ona fofoga, sa faamautinoaga mai e Renee ia te au sa ia iloa e moni le Tusi a Mamona ma faamatala mai, a ou manao e iloa pe moni, na o le pau le auala o le—mate mai la—ia faitau i ai! Ona ole atu lea!

Faitau, mafaufau i o outou loto, ma “ole atu i le Atua, le Tama Faavavau, i le suafa o Iesu Keriso, . . . ma le loto faamaoni, ma le manatu moni i ai, ma le faatuatua ia Keriso” (Moronae 10:4) pe moni le Tusi a Mamona, pe o le Ekalesia moni ea lenei.

O le lesona lona tolu la, i se fuaiupu se tasi: *pe a outou maua nei mea—le Tusi a Mamona—ma ua apoapoiaina oe e faitau ma ole atu i le Atua pe moni nei mea, tau lava o le fai!*



Mulimuli, Salamo

O le aafiaga mulimuli ou te manao e faasoat atu, o le salamo. Ina ua maea ona ou aoao uma i lesona a faifeautalai, ou te lei talitonu lava ou te manaomia ona sui se mea i lou olaga. O le Alii faifeautalai o Cutler, o se alii talavou mautinoaga ma sinia faaSipaniolo, sa fai mai i se tasi o aso, “Joaquin, ta faitau faatasi le Alema 42, ma o le a ta tuu i ai lou igoa a o ta faitauina.”

Sa ou manatu e faavalevalea, ae sa ou faia e pei ona fai mai ai Elder Cutler ma faitau i le fuaiupu 1: “Ma o lenei, lo'u atalii e [Joaquin], ua ou vaai ua i ai isi mea e tele teisi atu ua popole i ai lou mafaufau, ia ua le mafai ona e malamalama i ai.” Oi! Sa talanoa mai le Tusi ia te au.

Ma sa ma faitau i le fuaiupu 2: “O lenei faauta, lo'u atalii e [Joaquin], o le a ou faamalamalama atu ia te oe lenei mea,” ma ona faamatala mai ai lea o le Pau o Atamu.

Ona sosoo ai lea i le fuaiupu 4: “Ma ua faapea ona tatou vaai ai, e i ai se taimi ua tuu mai [ia] [Joaquin] e salamo ai.”

Sa ma faaauau le faitauina lemu, fuaiupu i le fuaiupu, seia ma taunu i fuaiupu mulimuli e tolu. Ona taia lea o au e se mana malosi. Sa talanoa *sao* mai le tusi ia te au, ma sa amata ona ou tagi a o ou faitauina, “Ma o lenei, [Joaquin,] lo'u atalii e, ou te manao ia e tuu nei mea ia le toe faalavelave ia te oe, ae ia nao au agasala ia e popole i ai, le popole lena e aumai ai oe . . . i le salamo” (fuaiupu 29).

Ua ou iloa nei sa ou faamoemoe e maua le faaaliga e aunoa ma le faia o le taumafaiga e manaomia. Seia oo i lena taimi, ou te lei talanoa moni lava i le Atua, ma o le manatu e talanoa i se tasi e le o i ai iina na foliga faavalevalea. Sa ao ona faamaualalo au lava ma fai le mea sa talosagaina au e fai e tusa lava pe, i lou mafaufau faalelalolagi, e pei e faavalevalea.

Sa tatala atu lou loto i lena aso i le Agaga, manao ia salamo, ma manao ia papatiso! A o lei oo i lena taimi, sa ou mafaufau i le salamo o se mea e lē lelei, e na o le agasala ma mea sese e fesootai ai, ae sa faafuasei lava ona ou vaiaia i se malamalama—e pei o se mea lelei sa faamamaina le ala i le tuputupu ae ma le fiafia.

O loo iinei Elder Cutler i le aso, ma ou te fiafaetai atu ia te ia mo le fesoasoani mai ia te au ina ia ou malamalama. O faaiuga uma sa ou faia i lou olaga talu mai lena taimi sa uunaia e lena taimi sa ou faalotomaualaloina ai au lava, tatalo mo le faamagaloga, ma o le Togiola a Iesu Keriso mo au na avea ma vaega o lou olaga.

Ia o le lesona mulimuli, i se faaupuga e tasi: *ia faatinō le salamo; e leai se mea e te latalata atili ai i le Alii o Iesu Keriso i lo se manao e suaia.*

Ou tagata sailiili pele, uo o le Ekalesia, afai o e faafogoga mai i le aso, ua e latalata tele i le ausiaina o le olioli silisili. Ua e latalata lava!

Ou te valaaulia outou, ma le malosi atoa o lou loto, ma mai i le taele o lou agaga, o atu ma ia papatisoina! O le mea silisili lava lea e te faia. E le gata e suaia ai lou olaga ae faapena foi olaga o lau fanau ma fanau a fanau.

Ua faamanuiaina a'u e le Alii i se aiga. Sa ou faaipoipo ia Renee, ma e toafa le ma fanau aulelei. Ma ona o lo'u papatisoga, ou te mafaia ai, e pei o le perofeta o Liae anamua, ona valaaulia i latou e aai i le fua o le laau o le ola, o le alofa lea o le Atua (tagai 1 Nifae 8:15; 11:25). E mafai ona ou fesoasoani ia i latou e o mai ia Keriso.

O lea, faamolemole ia mafaufau i o'u aafia, ma (1) gauai atoatoa i faifeautalai, (2) alu i le lotu ma manatua lagona faaleagaga, (3) faitau le Tusi a Mamona ma ole atu i le Alii pe moni, ma (4) faatinō le salamo ma ia papatiso.

Ou te molimau atu ia te outou afai e te totogia le tau o le faaaliga, lotomaualalo oe lava, faiatau, tatalo, ma salamo, o le a matale mai le lagi ma o le a e silafia, e pei ona ou iloa, o Iesu o le Keriso, o Ia o lo'u Faaola ma lou Faaola. I le suafa, o Iesu Keriso, amene. ■



Sauniga e Elder S. Mark Palmer
O Le Fitugafulu

Ua Silasila Atu lesu ia te la, ua Alofa Atu ia te la

O sooo se taimi lava e te lagona ai ua talosagaina oe e faia se mea faigata, mafaufau i le Alii o loo silasila mai ia te oe, alofa atu ia te oe, ma valaaulia oe e tuu ese [na mea] ma mulimuli atu ia te la.

Sa valaaufina au i nai tausaga ua mavae, faatasi ai ma lo'u toalua, o Jacqui, e pule faamalumalu i le Misiona a Uosigitone Spokane. Sa ma taunu i le misiona ma ni lagona fefe ma le fiafia i le tiutetauave o le galulue ma le toatele naua o faifeautalai talavou ofoofogia. Sa latou o mai mai ni talaaga eseese ma vave ona pei o ni a maua atalii ma afafine.

E ui sa sologa lelei le toatele, e toaititi sa tauivi ma faamoemoega maualuluga o o latou valaauga. Ou te

manatuaina le ta'u mai ia te a'u e se tasi o faifeautalai, "Peresitene, ou te lē fiafia i tagata." Na ta'u mai e nisi sa leai se naunau ia i latou e mulimuli ai i tulafono faamalosia a faifeautalai. Sa ou popole ma mafaufau i mea e mafai ona ma faia e suaia ai loto o na faifeautalai toalaiti o e na le'i aoaoina lava le olioli o le usiusitai.

I se tasi o aso a o aveina atu le taavale i fanua o saito matagofie i le tausiusuga o Idaho, Uosigitone, sa ou faalogologo i se lipine na pueina o le





Feagaiga Fou. A o ou faalogo i le tala masani o le alii talavou mauoa o sau i le Faaola e fesili i le mea e mafai ona ia faia e maua ai le ola e faavavau, sa ou maua se faaaliga patino ae loloto e le'i faamoemoeina ua avea nei o se manatuaga paia.

I le maea ai o le faalogo atu o toe ta'uua e Iesu poloaiga ma le tali a le alii talavou sa ia tausia mea uma nei talu mai lona laitiiti, sa ou faalogo mo le faasa'oga agamalu a le Faaola: "E tasi le mea e le o ia te oe: . . . faatau atu au mea uma, ma . . . sau, . . . mulimuli mai ia te a'u."¹ Ae i lo'u maofa, sa ou faalogoina ni upu se ono i luma o na fuaiupu e foliga mai ou te le'i faalogo lava i ai pe faitau i ai. Sa pei sa faaopoopoina na upu i tusitusiga paia. Sa ou manatunatu i le malamalamaga musuia lea na tatala mai.

O a nei upu e ono na i ai lea aafiaga loloto? Faalogo ina ia vaai pe mafai ona e iloa upu masani nei, e le o maua i isi

tala faaletalalelei ae ua na o le Talalelei o Mareko e maua ai:

"Ona momo'e mai ai lea o le tasi . . . ma fesili mai ia te ia, Le A'o'o Lelei e, se a se mea ou te faia ina ia ou maua ai le ola e faavavau?

"A ua fetalai atu Iesu ia te ia:

"Ua e iloa tulafono, Aua e te mulilua, Aua e te fasioti tagata, Aua e te gaoi, Aua e te molimau pepelo, Aua e te agaleaga, Ia e ava i lou tamā ma lou tina.

"Ona tali mai lea o ia . . . , Le a'oa'o e, ua ou tausia na mea uma talu ina ou ititi.

*"Ua silasila atu Iesu ia te ia, ua alofa atu ia te ia, ua fetalai atu foi ia te ia, E tasi le mea e le o ia te oe: Ina alu ia, faatau atu au mea uma, ma avatu i e ua matitiva, ona e maua lea o le oa i le lagi: i le ē sau ai, ma ave le satauro, a e mulimuli mai ia te au."*²

"Ua silasila atu Iesu ia te ia, ua alofa atu ia te ia."

A o ou faalogo i upu nei, sa faatu mulia lo'u mafaufau i se ata manino o le Alii o loo tu ma *silasila atu* i lenei alii talavou. *Silasila atu*—e pei o le vaai totoa ma le mamana i totonus o lona agaga, silafaina o lona agalelei ma lona gafatia foi, faapena foi le silafaina o lona manaoga silisili.

Sosoo ai ma upu faigofie—ua *alofa atu Iesu ia te ia*. Sa ia lagona le alofa faagaetia ma le agalelei mo lenei alii talavou lelei, ma *ona* o lenei alofa, ma *faatasai ai* ma lenei alofa, sa talosagaina e Iesu nisi mea mai ia te ia. Sa ou vaai faalemafaufau pe na faapei mo lenei alii talavou le lagonaina o lea ituaiga o alofa a o talosaga foi e faia se mea sa faigata tele e pei o le faatauina atu o mea uma na ia te ia ma tuuina atu i e matitiva.

I lena taimi, sa ou iloaina sa le na o loto o nisi o a matou faifeautalai sa manaomia le suiga. O lou loto fo'i. O le fesili sa le o le "E faapefea e se peresitene lē fiafia o le misiona ona faia ia lelei atu le amio o se faifeautalai o loo tauivi. I lo lena, o le fesili "E mafai faapefea ona faatumulia au i le alofa faaKeriso, ina ia mafai e se faifeautalai ona lagona le alofa o le Atua e ala ia te au ma manao ia sui?" E mafai faapefea ona ou *vaai atu* ia te ia i le ala e tasi na silasila atu ai le Alii i le alii talavou mauoa, vaai ia i latou i le tagata moni o i ai i latou ma le tagata e mafai ona avea ai, nai lo na o mea o loo latou faia pe le o faia? E mafai faapefea ona avea atili a'u e pei o le Faaola?

"Ua silasila atu Iesu ia te ia, ua alofa atu ia te ia."

Mai i lena taimi seja oo mai i le taimi nei, a ou saofai faafesagai ma se faifeautalai talavou o loo tauivi ma ni vaega o le usiusitai, i totonus o lou loto ua ou vaaia se alii talavou po o se tamaitai faamaoni sa galulue i le manao ia sau i se misiona. Ona mafai lea ona ou faapea atu ma lagona uma e pei o se matua alofa:³ "Elder po o le Sister, ana ou le alofa ia te oe, ou te le popole po o le a le mea e tupu i lau misiona. Ae ou te alofa ia te oe, ma ona ou te alofa ia te oe, ou te popole po o ai e te avea ai. O lea ou te valaaulia oe e suia na mea lea e faigata mo oe ma ia

avea ma se tagata e finagalo le Atua e te avea ai.”

O taimi taitasi ou te alu ai e faatalanoa faifeautalai, ou te tatalo muamua mo le meaalofa o le alofa mama ma ia mafai ona ou vaai i alii ma tamaitai taitoatasi e pei ona silasila mai ai le Alii ia te ia.

A o lei faia konafesi faalesone, a o ma faafeiloaia ma Sister Palmer faifeautalai taitasi taitoatasi, ou te tu ma tilotilo totoa i o latou mata, *tilotilo atu* ia i latou—o se faatalanoaga e aunoa ma ni upu—ma e aunoa ma le toilalo, sa faatumulia au i le *alofa* naua mo nei atalii ma afafine faapelepele o le Atua.

Sa ou aoaoina le tele o lesona e suaia ai le olaga mai lenei aafiaga patino ma le mataupu e 10 o Mareko. O lesona nei e fa ou te talitonu o le a fesoasoani ia i tatou taitoatasi:

1. A o tatou aoao e vaai atu i isi e pei ona silasila le Alii ia i latou



nai lo ō tatou lava mata, o le a tuputupu ae lo tatou alolofa mo i latou ma faapena lo tatou mananao e fesoasoani ia i latou. O le a tatou vaaia le gafatia i totonusi o isi masalo latou te le vaaia ia i latou lava. Faatasi ai ma le alofa FaaKeriso o le a tatou lē fefe e tautatala atu ma le totoa, mo le “alofa atoatoa e faateaeseina ai le fefe.”⁴ Ma o le a tatou le fiu lava, i le manatuaina o i latou e sili ona faigata le alolofa i ai e sili atu ona manaomiaina le alofa.

2. E leai se aoao atu po o se aoaoina mai moni o le a tupu pe a faia i le lē fiafia po o le ita, ma e le suaia loto pe a lē i ai le alofa. Pe o tatou galulue i o tatou matafaioi o ni matua, faiaoga, po o taitai, e na o le siosiomaga o le faatuatuaina nai lo le faasalaina e mafai ona tupu ai le aoao atu moni. E ao ona avea o tatou aiga ma malutaga saogalemu i taimi uma mo a tatou fanau—ae lē o ni siosiomaga matamataita.

3. E le tatau lava ona aveesea le alofa pe a toilalo se tamaitiiti, uo, po o se tagata o le aiga e ola i ou talitonuga. Tatou te le iloa le mea na tupu i le alii talavou mauoa i le mavae ai ona alu ese atu ma le faanoanoa, ae ou te talitonu sa atoatoa pea le alofa o Iesu ia te ia e tusa pe na ia filifilia le auala e sili ona faigofie. Atonu i le taimi mulimuli ane i le olaga, a o ia iloaina o ana meatotino maoae e lē aoga, na te manatua ai ma galue i aafiaga ofoofogia o le silasila mai o Lona Alii ia te ia, alofa ia te ia, ma valaaulia o ia e mulimuli atu ia te Ia.

4. Aua e alofa o Ia ia i tatou, e tele mea e faamoemoe mai ai le Alii ia i tatou. A tatou lotomaualalo, tatou te talia le valaaulia a le Alii ia salamo, ia ositaulaga, ma ia auauna atu o se faamaoniga o Lona alofa atoatoa mo i tatou. Aua, o se valaaulia e salamo o se valaaulia foi ia maua le meaalofa sili o le faamagaloga ma le filemu. O le mea lea, “aua le faatauvaa . . . le aoaiga a le Alii, aua foi le faavaivai pe a aoaiina oe e Ia: aua o le ua alofagia e le Alii, ua aoai atu o ia ia te ia.”⁵

Ou uso ma tuafafine, ia soo se taimi lava tou te lagona ai ua talosagaina outou e faia se mea faigata—tuu ese lena mausa po o se vaisu lē lelei, tuu ese fiafia faalelalolagi, ositaulaga se gaoioiga e sili ona fiafia i ai ona o le Sapati, faamagalo se tasi na leaga ia te oe—mafaufau i le Alii o loo *silasila atu* ia te outou, *alofa* ia te outou, ma valaaulia outou e tuu ese [na meal] ma *mulimuli atu ia te Ia*. Ma faafetai atu ia te Ia mo le lava o le alofa ia te outou e valaaulia ai outou e faia nisi mea.

Ou te molimau atu i lo tatou Faaola, o Iesu Keriso, ma taulai atu i le aso i le a Ia tuu mai ai Ona aao e opoina i tatou taitoatasi, *silasila* mai ia i tatou ma siomia i tatou i Lona alofa atoatoa. I le suafa, o Iesu Keriso, amene. ■

FAAMATALAGA

1. Mareko 10:21.
2. Mareko 10:17–21; faaopoopo le faamamafa.
3. Tagai 1 Nifae 8:37.
4. 1 Ioane 4:18.
5. Eperu 12:5–6.



Saunia e Elder Gary E. Stevenson

O Le Korama a Aposetolo e Toasefululua

E Faapefea ona Fesoasoani le Agaga Paia ia te Oe?

*E lapatai mai le Agaga Paia, e faamafanafana mai le Agaga Paia,
ma e molimau mai le Agaga Paia.*

se afiafi o se aso Gafua e lei mamao atu, sa ma asiasi ai ma lou toalua, o Lesa i le tale o se aiga talavou i la matou pitonuu. A o ma i ai iina, sa valaaulia i maua e le aiga e nonofo mo le afiafi faaleaiga, ma ta'u mai ia i maua sa saunia e le la atalii e iva tausaga le matua le lesona. Ioe, na ma nonofo!

I le mavae ai o le pese amata, tatalo, ma pisinisi faaleaiga, na amata e le iva tausaga i le faiatua o se fesili mai lana lesona na tusiaina: "E faapefea ona fesoasoani le Agaga Paia ia te oe?" O le tuuina atu o lenei fesili na amata ai se talanoaga anoa faaleaiga a o faasoaina e tagata uma ni manatu ma ni malamalamaga. Sa faagaeetia au i sauniuniga o le lesona a le matou faiaoga ma lana fesili lelei tele, lea na ou mafaufau ai peia ina ua maea lenei asiasiga.

Talu mai lena taimi, e faaauau pea ona ou fesili ifo ia te au lava, "E faapefea ona fesoasoani le Agaga Paia ia te oe?"—o se fesili e taua aemaise lava mo outou uma tamaiti o le Peraimeri o le a atoa le valu [tausaga] ma saunia mo le papatisoga ma mo outou fanau

na papatisoina lata mai nei ma maua le meaalofa o le Agaga Paia. E fitoitonu foi mo le faiatua afe o tagata fou liliu mai.

Ou te valaaulia i tatou taitoatasai, aemaise o tamaiti Peraimeri, ina ia mafaufau, "E faapefea ona fesoasoani le Agaga Paia ia te oe?" Pe a ou mafaufau i lenei fesili, na vave ona ou mafaufau i se aafiafa mai lou talavou.

O le tala lenei sa ou faamatalaina ia Elder Robert D. Hales ae lei leva ona valaaolina au i le Korama a Aposetolo e Toasefululua ma lea sa ia faaaofia i se tusiga o le mekasini a le Ekalesia sa ia tusia e uiga i lo'u olaga.¹ Atonu ua faafofoga i ai nisi o outou i lenei tala, ae e toatele e lei faalogo i ai.

Pe tusa o le 11 o ou tausaga, sa ma savali sopo ai ma lou tama i se aso vevela o le tau mafanafana i atu mauga e latalata i lo matou fale. A o savali sopo agai i luga Tama i se magaala e tu, sa ou puna mai i lea maa lapoa i le isi maa, i autafa o le ala. Ma le faamoemoe e pe'a i se tasi o maa tele lava, sa amata ona ou pe'a ai i luga. A o ou pe'a atu i luga o le maa tele, sa ou te'i ina ua mau lou tama ia te au i lou fusipau ma toso vave mai au i lalo, ma fai mai, "Aua e te pe'a i le maa lena. Ta tumau pea i le ala."

I minute mulimuli ane, sa ma tilotilo atu i lalo mai i luga a'e o le ala, ma sa faate'ia i maua a o ma vaaia se gata uogo o taatia i luga o le maa lava lea sa ou faamoemoe e pe'a ai.

I se taimi mulimuli ane, a o ma tietie atu agai i le fale, sa ou iloaina sa faatali Tama ia te au e fesili atu: "Na faapefea ona e iloa sa i ai le gata uogo iina?" O lea na ou fesili ai, ma o lau fesili sa tai-tai atu i se talanoaga e uiga i le Agaga Paia ma le ala e mafai ai e le Agaga Paia ona fesoasoani ia i tatou. E lei galolava ia te au le mea sa ou aoaoina i lena aso.



E mafai ona outou iloa le ala na fesoasoani ai le Agaga Paia ia te au? Ou te faafetai pea e faavavau i le faalogo o lou tama i le leo filemu ma le itiiti, o le Agaga Paia, aua sa mafai ona faasaoina ai lou ola.

O Mea Tatou te Iloa e uiga i le Agaga Paia

Ae tatou te lei mafaufau atili i le fesili "E faapefea ona fesoasoani le Agaga Paia ia te oe?" sei o tatou iloilo nisi o mea sa tatou aoaoina i le asō e uiga i le Agaga Paia. E tele upumoni e faavavau o loo i ai e mafai ona tatou vaai i ai, ae o le asō e na o le tolu [upumoni] o le a ou taulai i ai.

Muamua, o le Agaga Paia o le sui lona tolu o le Aiga Atua. Tatou te aoaoina lenei upumoni i le uluai mataupu faavae o le faatuatua: "Matou te talitonu i le Atua, le Tama Faavavau, ma Lona Alo o Iesu Keriso, ma le Agaga Paia."²

Lua, o le Agaga Paia o se peresona o agaga, e pei ona faamatalaina i tusutisiga paia o nei ona po: "Ua i le Tama se tino o aano ma ivi e mafai ona pa'i i ai e pei o le tagata; ua faapea foi le Alo, ae o le Agaga Paia e leai se tino o aano ma ivi, ae o se peresona o Agaga. A na le faapea, e le mafai e le Agaga Paia ona mau i totonusi o i tatou."³ O lona uiga o loo i ai i le Agaga Paia se tino agaga, e le pei o le Atua le Tama ma Iesu Keriso, e i aino faaletino. E faamanino e lenei upumoni isi suafa ua tuuina atu i le Agaga Paia ma e tatou te masani i ai, e aofia ai le Agaga Paia, Agaga o le Atua, Agaga o le Alii, Agaga Paia o le Folafolaga, ma Le Faamafanafana.⁴

Tolu, e oo mai le meaalofa o le Agaga Paia e ala i le faaee atu o lima. O lenei sauniga, lea e sosoo ma le papatisoga, e agavaa ai i tatou mo le mafutaga faifai pea a le Agaga Paia.⁵ Ina ia faatinu lenei sauniga, e tuu e ē umia le Perisitua Mekisateko o latou lima i luga o le ulu o le tagata,⁶ ta'u lona suafa, ta'u atu le pule o le perisitua o ia i latou, ma i le suafa o Iesu Keriso, e faamauina ai o ia o se tagata o Le Ekalesia a Iesu Keriso o le Au Paia o Aso e Gata Ai, ma faaleoina le fuaitau taua: "Talia le Agaga Paia."

E Faapefea ona Fesoasoani le Agaga Paia ia te Oe?

Faatasi ai ma lena iloiloga faigofie o upumoni taua e tolu e uiga i le Agaga Paia, tatou te toe foi i la tatou fesili muamua: "E faapefea ona fesoasoani le Agaga Paia ia te oe?"

E Lapatai Mai le Agaga Paia

E pei ona ou faamatalaina lou aafia i laitiiti, e mafai ona fesoasoani le Agaga Paia ia te oe e ala i le muai lapataiina o oe e uiga i tulaga lamatia faaletino ma faaleagaga. Sa ou toe aoaoina le matafaioi taua o le Agaga Paia e lapatai mai a o ou auauna atu i le Au Peresitene o le Eria i Iapani.

I lea taimi, sa ou galue vavalalata ai ma Peresitene Reid Tateoka, o le Misiona a Sendal Iapani. O se vaega o lana galuega masani o le misiona, e fuafuina e Peresitene Tateoka se fonotaga mo taitai faifeautalai i le vaega i saute o lana misiona. I nai aso a o lei faia le

fonotaga, sa maua e Peresitene Tateoka se uunaiga, o se lagona i lona loto, e valaaulia faifeautalai *uma* o lena sone i saute i le fonotaga faaleautaitai, i lo le numera atofaina laiti o taitai alii ma tamaitai faifeautalai.

Ina ua ia faalauiloa atu lona faamoemoega, sa faamanatu atu ia te ia o lenei fonotaga faapitoa sa le i fuafuina mo faifeautalai uma ae mo na o taitai i le misiona. E ui i lea, o le tuu ese o le fuafuaga masani ina ia mulimuli i le uunaiga sa ia maua, sa ia valaaulia ai faifeautalai uma o loo galulue i nai aai tu matafaga, e aofia ai le aai o Fukushima, i le fonotaga. I le aso na atofaina, 11 Mati, 2011, sa potopoto faatasi faifeautalai mo le fonotaga o le misiona ua faalauaitele i totonusi o le aai o Koriyama.

A o faia lea fonotaga, sa taia le itulagi o Iapani lea sa i ai le Misiona a Sendal Iapani i se mafuie e 9.0 le malosi ma le galulolo. O le mea e faanoanoa ai, o



le tele o aai tu matafaga—e aofia ai na [aa] na faapotopoto mai ai faifeautalai—sa faaleagaina ma pagatia i le tele o soifua na ma'umau. Ma sa mafatia le aai o Fukushima i se malosiaga faaauau pea faaniukilia.

E ui sa faaleagaina le falelotu sa feiloai ai faifeautalai i lena aso, ae e ala i le mulimuli i uunaiga a le Agaga Paia, sa potopoto saogalemu Peresitene ma Faletua Tateoka ma faifeautalai uma. Sa latou i ai i se nofoaga saogalemu mai le fia maila le mamao mai le faatamaiaga o le galulolo ma mea na faaleagaina e niukilia.

A o e faalogo i musumusuga mai le Agaga Paia—o lagona e tele ina filemu ma mālū—e ono aveesea mai oe, e aunoa ma le iloaina lava, mai i tulaga lamatia faaleagaga ma faaletino.

Uso e ma tuafafine, o le a fesoasoani le Agaga Paia ia te oe e ala i le lapataiina o oe, e pei ona ia faia i lo'u tama ma Peresitene Tateoka.

E Faamafanafana le Agaga Paia

Ina ia tali le fesili “E faapefea ona fesoasoani le Agaga Paia ia te oe?” sei o tatou suesue nei i Lana matafaioi o Le Faamafanafana. O mea e tutupu faafuasei i o tatou olaga atoa e mafua ai le faanoanoa, tiga, ma le le fiafia. Peitai, i le lotolotoi o nei faigata, e fesoasoani mai le Agaga Paia ia i tatou i se tasi o Ana matafaioi taua—e Faamafanafana, o se tasi lea o Ona suafa moni. O nei upu toafimalie, ma mautinoa mai ia Iesu Keriso e faamatala ai lenei matafaioi paia, “Ou te fai atu foi i le Tama, ona foai mai ai lea e ia ia te outou le tasi Fesoasoani, ina ia tumau pea o ia ia te outou e faavavau.”⁷

Ina ia faamalamalama atili lenei mataupu faavae, ou te faasoaina atu se tala moni o se aiga e toalima atalii o e na masii mai Los Angeles, Kaledonia, ISA, i se nuu laitiiti i ni nai tausaga ua mavae. Sa amata ona taaalo atalii matutua e toalua i taaloga o le aoga mauluga ma fegalegaleai ma uo, taitai, ma faiaoga—o le toatele o i latou o ni tagata faamaoni o le Eklesia. O nei fegalegaleiga na fesoasoani e taitai atu i le papatisoina o Fernando, le ulumata, ma lona uso laitiiti.



Na mulimuli ane siitia ese mai Fernando mai le aiga, lea na ia faaauau ai ana a'oa'oga ma taalo ai i le lakapi amerika i le kolisi. Sa ia faaipoipo atu i lana manamea mai le a'oga i le malumalu, o Bayley. A o faamaeaina e Fernando ma Bayley le la aoga, sa la faatali ma le naunautai i le fanau mai o le la tamaitiiti muamua—o se pepe teine. Ae i le taimi o le faagasologa o le fesoasoani a o la aiga i le toe foi atu o Fernando ma Bayley i le aiga, sa matautia le lavea ai o le taavale a Bayley ma lona uso i luga o le aualatanu ma sa tele ni taavale na lavevea ai. Sa maliliu uma ai Bayley ma lana tama teine e lei fanau mai.

Ae e pei o le matuitui o tiga o Fernando, e oo lava foi i matua o Bayley ma ona tei, e faapena foi le loloto o le filemu feteenai ma le mafanafana na latou lagonaina toetoe lava i le taimi lava lena. Na lagolagoina moni e le Agaga Paia Fernando i Lana matafaioi o Le Faamafanafana i lenei faigata lēmafaamatatalaina. Na auina mai e le Agaga se filemu tumau lea na taitai atu ai Fernando i se uiga o le faamagalatu ma le alofa i tagata uma na aafia i le faalavelave matautia.

Sa valaau atu matua o Bayley i le tuagane o Bayley sa auauna atu o se faifeautalai i le taimi o le faalavelave. Sa ia faamatalaina ona lagona mulimuli ane i se tusi i lona aiga i le faalogo ai i le tala

faigata e uiga i lona tuafafine pele: “Sa ofoo fogia le faalogo atu i ō outou leo sa matua'i toofilemu i le lotolotoi o se taimi faigata. Ou te lei iloa le tala e fai atu. . . . Na pau le mea na ou mafaufau i ai atonu o le a lē i ai iina lo'u tuafafine pe a ou alu atu i le fale. . . . Sa faamafanafanaina au e ā outou molimau mausali o le Faaola ma Lana fuafuaga. O lea agaga filemu e tasi na te aumaia au e latalata i le tagi masūsū a o faatumulia lou loto i le suesue ma le aoao atu. Sa faamafanafanaina au ma faamanatu mai mea ua ou iloaina.”⁸

O le a fesoasoani le Agaga Paia ia te outou e ala i le faamafanafanaina o outou, e pei ona ia faia mo le aiga o Fernando ma Bayley.

E Molimau Mai le Agaga Paia

E molimau mai foi le Agaga Paia ma tuuina atu le molimau e uiga i le Tama ma le Alo ma upumoni uma.⁹ Na fetalai atu le Alii i Ona soo, e faapea: “A maliu mai le Fesoasoani, o le ou te auina mai ia te outou mai le Tamā, . . . o ia lava e molimau ia te auu.”¹⁰

Ina ia faamatalaina le matafaioi taua o le Agaga Paia o se molimau ma Le e molimauina, o le a ou faaauau atu le tala ia Fernando ma Bayley. Afai tou te manatua, sa ou faasoia atu sa papatisoina Fernando ma lona uso, ae e le'i papatisoina ona matua ma ona uso laiti e toatolu. Ma, e ui i le mauaina o



valaaulia e anoanoai e feiloai ma faifeautalai i le tele o tausaga, sa teena e le aiga ia taimi taitasi.

I le tiga ai i le maliu o Bayley ma lana pepe teine, sa le mafamafanafanaina le aiga o Fernando. Sa lei pei [i latou] o Fernando ma sa lei pei o le aiga o Bayley, sa latou le'i mauaina le mafanafana ma le filemu. Sa lei malamalamala i laua pe na faapefesa e le la atalii, faatasi ai ma le aiga a Bayley, ona tauave o latou avega mamafa.

Mulimuli ane, na latou malamalamai ai o le mea sa mauaina e lo la atalii ma e le'i mauaina e i latou, o le talalelei toefuataiina a Iesu Keriso, ma masalo o lona puna lea o le filemu ma le mafanafana. Ina ua latou silafia lenei mea, sa latou valaaulia faifeautalai e aoao le talalelei i lo latou aiga. O se taunuuga, sa latou mauaina la latou lava faamautinoaga ma le molimau o le fuafuaga sili o le fiafia, lea na aumaia ia i latou le suamalie o le filemu ma le mafanafana toafimalie lea sa latou faananau e saili.

E lua masina talu ona maliu Bayley ma le tama teine a le la tama e lei fanau mai, sa papatisoina matua o Fernando faapena ma ona uso laiti e toalua ma faamauina ma maua le meaalofa o le Agaga Paia. Ua tulimatai atu nei le uso

laitiiti o Fernando i lona papatisoga pe a atoa lona valu tausaga. Ua latou taitasi ma molimau o le Agaga, le Agaga Paia lea, sa molimau mai i le moni a'ia'i o le talalelei, ma taitai i latou i se manao ina ia papatisoina ma maua le meaalofa o le Agaga Paia.

Uso e ma tuafafine, o le a fesoasoani le Agaga Paia ia te outou e ala i le molimau atu ia te outou e pei ona Ia faia i le aiga o Fernando.

Aotelega

Se'i ou otooto atu nei mea sa ou talanoa i ai. Ua ou faailoa atu ni upumoni faaalia se tolu lea e aumaia ia i tatou se malamalamala o le Agaga Paia. O upumoni nei, o le Agaga Paia o le sui lona tolu o le Aiga Atua, o le Agaga Paia o se peresona o agaga, ma o le meaalofa o le Agaga Paia e oo mai e ala i le faaee atu o lima. Sa ou faailoa atu foi ni tali se tolu i le fesili "E faapefesa ona fesoasoani le Agaga Paia ia te oe?" E lapatai mai le Agaga Paia, e faamafanafana mai le Agaga Paia, ma molimau mai le Agaga Paia.

Agavaa e Faatumauina ai le Meaalofa

Mo outou o loo sauni ina ia papatisoina ma faamauina, i latou e le'i leva, pe ua leva ona [papatisoina ma

faamauina] i se taimi ua leva atu, e taua i lo tatou saogalemu faaletino ma le faaleagaga le tatou faatumauina o le meaalofa o le Agaga Paia. Tatou te amata ona faia e ala i le taumafai e tausi ia poloaiga, faia o tatalo faaletagata lava ia ma faaleaiga, faitauina o tusitusiga paia, ma saili sootaga agaalofa ma faamagaloga ma aiga ma e pele. E tatau ona tatou tausia le mamā o õ tatou mafaufauga, amioga, ma le gagana. E tatau ona tatou tapuai i lo tatou Tama Faalelagi i o tatou aiga, i le lotu, ma pe a mafai ai, i le malumalu paia. Faalatalata i le Agaga, ma o le a latalata atu foi le Agaga ia te oe.

Molimau

Ou te faaiu atu nei i se valaaulia ma lau molimau mausali. Ou te valaaulia outou ia ola atoatoa i upu e masani ona lagiina e le fanau Peraimeri, o upu ou te mautinoa ua latou iloaina: "Faalogo, faalogo. Faalogo i le Agaga Paia. Faa-
logo, i Lona leo."¹¹

Ou uso e ma tuafafine pele, matutua ma talavou, ou te tuu atu lau molimau i le mamalu o le i ai o le tagata paia lea e aofia i le Aiga Atua—le Atua le Tama, o Iesu Keriso, ma le Agaga Paia. Ou te molimau atu o se tasi o faamanuiaga lea tatou te olioli ai o ni Au Paia o Aso e Gata Ai o loo ola i le atoatoaga o taimi o le meaalofa lea o le Agaga Paia. Ou te iloa e *mafai ma o le a fesoasoani* atu le Agaga Paia ia te oe. Ou te faaopoopo atu foi lau molimau faapitoo ia Iesu Keriso ma Lana matafaioi o lo tatou Faaola ma le Togiola ma i le Atua lo tatou Tama Faalelagi. I le suafa, o Iesu Keriso, amene. ■

FAAMATALAGA

1. Tagai Robert D. Hales, "Elder Gary E. Stevenson: O Se Loto Malamalamala," *Liahona*, Juni 2016, 26–31.
2. Mataupu Faavae o le Faatuatua 1:1.
3. Mataupu Faavae ma Feagaiga 130:22.
4. Tagai Mosaea 18:13; Alema 5:46; 9:21; Mataupu Faavae ma Feagaiga 88:3.
5. Tagai 1 Nifae 13:37; 2 Nifae 31:12; Mataupu Faavae ma Feagaiga 121:46.
6. Tagai Mataupu Faavae ma Feagaiga 138:33.
7. Ioane 14:16.
8. Tusi patino, 18 Tes, 2016.
9. Tagai Eperu 10:15; 2 Nifae 31:18; Iakopo 4:13.
10. Ioane 15:26.
11. "O Le Leo Ititi Filemu," *Children's Songbook*, 106.



Saunia e Elder C. Scott Grow
O Le Fitugafulu

O Le Ola e Faavavau Foi Lenei

E silafia outou e le Atua, ma valaaulia outou ia iloa o la.

O u te talanoa atu ia te outou, le tupulaga faia'e—le autalavou ma talavou matutua, nofofua pe faaipoipo—o outou o taitai o le lumanai o lenei Ekalesia. Faatasi ai ma amioleaga uma, vevesi, fefe, ma le fenumiai i le lalolagi i le asō, ou te talanoa atu ia te outou ma le manino e uiga i le mamalu ma le faamanuiaga o le iloaina o le Atua.

Sa aoao mai e Iesu Keriso le tele o upumoni na faamatala ai le fuafuaga o le fiafia a le Tama Faalelagi ma lou tulaga i totonu. Ou te taulai i upumoni e lua lea e fesoasoani ia e malamalamai ai i lou *faasinomaga* o se fanau a le Atua ma iloa lou *faamoemoega* i le olaga.

Muamua: "Aua ua faapea lava ona alofa mai o le Atua i le lalolagi, ua ia aumai mai ai lona Atalii e toatasī, ina ia le fano se tasi e faatuatua ia te ia, ae ia maua le ola e faavavau."¹

Lua: "O le ola e faavavau foi lenei, ia latou iloa oe le Atua moni e toatasī, atoa ma le ua e auina mai, o Iesu Keriso lea."²

Faamolemole ia manatua upumoni nei—la te aoao mai le *aisea*—a o ou saili e faamatala le *pe faapefea* ona iloa e outou ma tatou uma le Atua.

"Faauta, ua e iloa na e ole mai ia te a'u ma sa Ou faapupulaina lou mafafau. . . .

"Ioe, ua Ou tau atu ia te oe, ina ia mafai ona e iloa e leai lava se tasi ae ua nao le Atua ua ia silafia ou mafaufauga ma faamoemoega o lou loto. . . .

". . . Afai e te manao i se isi molimau, liliu ane lou mafaufau i le po na e tagi mai ai ia te a'u i lou loto. . . .

"Ou te lei tautala atu ea le filemu i lou mafaufau . . . ? O le a se molimau sili atu e mafai ona e maua mai lo lena mai le Atua?"³

A e tatalo ma le faatuatua, o le a e lagona le alofa o le Atua a o talanoa mai Lona Agaga i *lou agaga*. Po o le a lou tuuatoatasi pe le mautonu e te ono lagona i nisi o taimi, e le o tuuatoatasi oe i lenei lalolagi. E silafia patino *oe* e le Atua. A e tatalo, o le a oo ina e iloaina o *Ia*.

Iloa o la e ala i le Tatalo o Tusitusiga Paia

A o e suesue i tusitusiga paia, e le gata o le a e aoao ai e *uiga* i le Faaola, ae e mafai moni ona e *iloaina* le Faaola.

Ia Aperila 1985, sa saunoa ai Elder Bruce R. McConkie i le konafesi aoana o le 13 aso ao le'i maliu ai. Sa ia faaiuina i lana molimau:

"O a'u o se tasi o Ana molimau, ma i se aso a sau o le a ou pa'i atu ai i faailogia o fao i ona lima ma ona vae, ma o le a faasusūina ona vae i o'u loimata.



"E ui i lea, e leai la se isi malamalamama pito sili o le a ou *iloa* i lena taimi, nai lo o le malamalamama ua ou *iloa* nei o Ia o le Alo o le Atua Sili Sili Ese, o Ia o lo tatou Faaola ma Togiola, ma e oo mai ma ala mai i lona toto togiola le faaolataga, a e le o se isi lava auala."⁴

O i tatou sa faalogo o saunoa mai Elder McConkie i lena aso, e lei galo lava le auala na tatou lagonaina ai. A o ia amata lana lauga, sa ia faailoa mai le mafuaaga sa mamana tele ai lana molimau. Sa ia faapea mai:

"I lo'u ta'ua la o nei mea ofoofogia, o le a ou faaaogaina ai a'u lava upu, e ui atonu o le a outou faapea o ni afioga mai tusitusiga paia. . . ."

"E moni sa muai folafolaina mai e isi, ae ua avea *nei ma a'u upu*, auua ua molimau mai le Agaga Paia o le Atua ia te au e moni, ma e pei lava o lenei ua faailoa mai ia te au e le Alii i le taimi muamua. Sa ou *faalogo* i lona siufogaga ma *iloa* lana afioga."⁵

A o e suesue ma manatunatu i tusitusiga paia, o le a e faafogaga foi i le siufogaga o le Atua, silafia Ana afioga, ma silafia o Ia. O le a faaali atu patino e le Atua ia te oe Ana upumoni e faavavau. O nei aoaoga ma mataupu faavae o le a avea ma se vaega o lou tagata ma o le a oo mai mai i lou lava agaga.


E faaopoopo i suesuega faaletagata lava ia, o le suesueina faaleaiga o tusitusiga paia e taua.

I lo matou aiga, sa ma mananao i la ma fanau e aoao ia iloa le siufogaga o le Agaga. Sa ma talitonu sa tupu lena mea a o matou suesueina le Tusi a Mamona i aso taitasi o se aiga. Sa faamalolosia a matou molimau a o matou talanoa e uiga i upumoni paia.

E avea le suesueina o tusitusiga paia ma alaleo mo le Agaga e tuu mai ia i tatou taitoatasi se aoaoga faaopoopo e faaleleia. A o e suesueina tusitusiga paia i aso taitasi, na o oe ma faatasi ai ma lou aiga, o le a e aoao e iloa le siufogaga o le Agaga ma o le a silafia le Atua.

Iloa o la e ala i le Faia o Lona Finagalo

E faaopoopo i a tatou tatalo ma le suesueina o tusitusiga paia, tatou te manaomia le faia o le finagalo o le Atua.



O le Faaola o lo tatou faaa'oa'o sili lea. Sa Ia fetalai mai, "Ou te le'i alu ifo mai le lagi e fai lo'u lava loto, ao le finagalo o le ua auina mai a'u."⁶

Ina ua faaali atu le Faaola toetu i sa Nifae, sa Ia fetalai mai, "Ma faauta, o Au o le malamalamama ma le ola o le lalolagi; ma ua ou inu i lena ipu oona lea na tuuina mai e le Tamā ia te au, ma ua ou faamamaluina le Tamā i lou aveina i ou luga o agasala a le lalolagi, o se mea na ou tuu atu ai *le finagalo* o le Tama i mea uma mai le amataga."⁷

E faia e oe ma au le finagalo o le Tama e ala i le faamamaluina o a tatou

feagaiga, tausi poloaiga, ma auauna i le Atua ma o tatou uso a tagata.

E ia i maua, ma lou toalua, o Rhonda ni matua o ni tagata masani—masalo e tai pei o tou matua. Ae o le mea e tasi ou te alofa ai i o ma matua e latou te tuuto atu o latou olaga e auauna i le Atua, ma sa latou aoao i maua ia faia le mea e tasi.

Ina ua faatoa faaipoipo matua o Rhonda mo ni nai tausaga, sa valaauina lona tama e 23 tausaga e auauna atu i se misiona talai. Sa ia tuua lona toalua talavou ma le la tama teine e lua tausaga. Ona valaauina lea o

lona toalua e auauna faatasi ma ia i le taimi o le fitu masina mulimuli o lana misiona—ma tuua ai lo la tama teine i le tausiga a aiga.

I nai tausaga mulimuli ane, i le taimi nei ma le fanau e to'afa, sa latou masii atu i Missoula, Montana, ina ia mafai ona auai lona tama i le iunivesite. Ae peitai, sa na o ni nai masina sa latou i ai iina ae tuuina atu e Peresitene Spencer W. Kimball ma Elder Mark E. Petersen se valaauga i lo'u tama faaletulafono ina ia avea ma uluai pere sitene o le siteki fou faatoa faatuina o Missoula. Sa na o le 34 ona tausaga. O manatu e uiga i le iunivesite sa tuuese, a o ia saili e faia le finagalo o le Alii—e le o lona loto.

Sa auauna atu ou matua i le malumalu mo le silia ma le 30 tausaga—o Tama o se fai faamauga, ma Tina o se tagata faigaluega i sauniga. Sa la auauna foi i ni misiona talai se lima—i Riverside, Kaledonia; Ulaanbaatar, Monokolia; Nairobi, Kenya; le Malumalu o Navu Ilinoi; ma le Malumalu o Monterrey Mekisiko. I Mekisiko, sa la galulue malosi e aoao se gagana fou, lea sa le faigofie i le 80 tausaga o le matua. Ae sa la saili e faia le finagalo o le Alii i lo le mulimuli i o laua lava manaoga i le olaga.

I ia Au Paia uma tuuto o Aso e Gata Ai i le lalolagi atoa, ou te faaleo atu upu na fetalai ai le Alii i le perofeta o Nifae: “Amuia lava oe, . . . ona o ia mea na e faia . . . ma le le faavaivai . . . [ma sa e le] sailia lou lava ola, ae sa e saili lo'u loto, ma ia tausia au poloaga.”⁸

A o tatou saili e faia le finagalo o le Atua e ala i le auauna atu ma le faa tuatua ia te Ia ma o tatou uso a tagata, tatou te lagona Lona faamautinoaga ma oo moni ina iloa o Ia.

Iloa o la e ala i le Avea e Pei o la

Ua ta'u mai e le Faaola ia i tatou o le auala sili e iloa ai le Atua o le avea lea e pei o Ia. Sa ia aoao mai: “O lea, o a ituaiga o tagata e tatau ona outou i ai? E moni ou te fai atu ia te outou, e pei lava o au nei.”⁹

E taua le agavaa ina ia avea ai e pei o Ia. Sa Ia poloai mai, “Faapaia outou lava; ioe, ia faamamā o outou loto,

ma faamamā o outou lima . . . ina ia mafai ona Ou faamamāina outou.”¹⁰ O le amataga o le faagasologa e avea e pei o Ia, tatou te salamo, maua Lona faamagaloga, ma Na te faamamāina o tatou agaga.

Ina ia fesoasoani ia i tatou a o tatou alualu i luma i le Tama, na tuu mai ai e le Alii ia i tatou le folafolaga lenei: “O tagata taitoatas i lafoai ana agasala ma sau ia te a'u, ma valaau mai i lo'u igoa, ma usiusitai i lo'u leo, ma taus i a'u poloaiga, o le a vaai i o'u mata ma *iloa* o i ai a'u.”¹¹

E ala i lo tatou faatuatua i Lana taulaga togiola, e faamamāina i tatou e le Faaola, faamalolo i tatou, ma mafai ai e i tatou ona *iloa* o Ia ma avea e *pei* o Ia. Sa aoao mai Mamona, “Tatalo atu i le Tama ma le malosi atoa o le loto, . . . ina ia mafai ona avea o outou atalii [ma afafine] o le Atua; a oo ai ina afio mai o ia o le a tatou *faapei* o ia.”¹² A o tatou taumafai e avea e faapei o le Atua, e mafai ona Ia faia i tatou ia sili atu i lo mea tatou te mafai ona faia mo i tatou lava.

Iloa o la e ala i le Mulimuli i Faiaoga

Ina ia fesoasoani ia i tatou i la tatou taumafaiga, ua tuuina mai e le Atua ia i tatou ni faaa'oa'o lelei ma ni faiaoga. Ou te fia faasoatua ou lagona e uiga i se tasi o a'u [faaa'oa'o] o Elder Neal A. Maxwell. Na te saili pea e tuuina atu

lona loto i le finagalo o le Tama i lana taumafaiga e avea e faapei o le Atua.

I le silia ma le 20 tausaga talu ai, sa ia faasoatua mai ia te au ona lagona i le aafia ai i le kanesa. Sa ia ta'u mai ia te au, “Ou te fia i ai i le ‘au, i le itu lenei [o le veli] po o le itu le la. Ou te le fia nofo ma matamata. Ou te fia taalo i le taaloga.”¹³

I ni nai vaiaso na sosoo ai, sa musu e ole atu i le Atua e faamalolo o ia; sa tau lava o lona manao e fai le finagalo o le Atua. Sa ta'ua e lona faletua, o Colleen, o le uluai alaga a Iesu i le Faa toaga o Ketesemane o le, “Afae e mafai, ia ave ese lenei ipu ia te au.” O le taimi lena na fetalai atu ai le Faaola, “A e aua le faia lo'u loto, a o *lou finagalo*.”¹⁴ Sa ia uunaia Elder Maxwell e mulimuli i le faataitaiga a le Faaola, ia ole atu mo le toomaga, *ona* tuuina atu lea o lona loto i le finagalo o le Atua, lea sa ia faia.¹⁵

I le mavae ai o le mafatia i togaftiga tuga, faavaivai loto mo le toeitiiti atoa le tausaga, sa ia toe foi mai ma le atoatoa “i le manuia.” Sa ia auauna mo le isi fitu tausaga.

Sa ou maua ni tofiga faatasi ma ia i le taimi o na tausaga mulimuli. Sa ou lagonaina le agalelei, agaalofo, ma le alofa. Sa ou molimauina lona faateleina o le faaleleiga faaleagaga e ala i lona mafatiaga faifai pea ma lana auaunaga e le aunoa, a o ia taumafai e avea e faapei o le Faaola.



O le faaa'oa'o lelei ma le faiaoga *silisili* ua avanoa mo i tatou uma, o lo tatou Alii ma le Faaola, o Iesu Keriso, o Le na fetalai mai, "O a'u nei le ala, ma le upu moni, ma le ola; e le alu atu lava se tasi i le Tamā, pe a le ui mai ia te au."¹⁶ "Sau, mulimuli mai ia te au."¹⁷

O'u uso e ma tuafafine talavou, o le iloaina o le Atua o le sailiga o le olaga atoa. "O le ola e faavavau foi lenei, ia [*tatou*] iloa . . . le Atua moni e toatasí, atoa ma le ua e auina mai [e le Tamal], o Iesu Keriso lea."¹⁸

"Tatou te lē o atu ea i lenei savali sili? . . . Lototele, [a'u uo talavou]; o atu pea, o atu pea i le manumalo!"¹⁹

E silafia *outou* e le Atua, ma valaulia *outou* ia iloa o *Ia*. Tatalo i le Tama, suesue tusitusiga paia, saili e faia le finagalo o le Atua, taumafai e avea e faapei o le Faaola, ma mulimuli i faiaoga amiotonu. A o outou faia, o le a *outou iloa* le Atua ma Iesu Keriso, ma o le a outou maua le ola e faavavau. O la'u valaulia lea ia te outou, i le avea ai ma se molimau ua faauuina mo i Laua. O loo soifua i Laua. E alolofa i Laua ia te oe. Ou te molimau atu ai i le suafa o Iesu Keriso, amene. ■

FAAMATALAGA

1. Ioane 3:16.
2. Ioane 17:3.
3. Matapu Faavae ma Feagaiga 6:15–16, 22–23.
4. Bruce R. McConkie, "O Le Mana Faamāina o Ketesemanane," *Liahona*, Julai 1985; ua faaopoopo le faamamafa.
5. Bruce R. McConkie, "O Le Mana Faamāina o Ketesemanuea," 9; faaopoopo le faamamafa.
6. Ioane 6:38.
7. 3 Nifae 11:11; faaopoopo le faamamafa.
8. Helamana 10:4.
9. 3 Nifae 27:27.
10. Matapu Faavae ma Feagaiga 88:74.
11. Matapu Faavae ma Feagaiga 93:1; faaopoopo le faamamafa.
12. Moronae 7:48; ua faaopoopo le faamamafa.
13. Tagai i faamatalaga talitutusa i le Bruce C. Hafen, *A Disciple's Life: The Biography of Neal A. Maxwell* (2002), 16–19.
14. Mataio 26:39; ua faaopoopo le faamamafa.
15. Tagai i faamatalaga talitutusa i le Bruce C. Hafen, *A Disciple's Life*, 15.
16. Ioane 14:6.
17. Mataio 19:21.
18. Ioane 17:3; ua faaopoopo le faamamafa.
19. Matapu Faavae ma Feagaiga 128:22.



Sauniga e Elder Benjamín De Hoyos
O Le Fitugafulu

Ina ia Avea Lo Tatou Malamalama ma Tagavai mo Atunuu

E tuuina mai e le talalelei a le Faaola ma Lana Ekalesia ia i tatou le tele o avanoa mo lo tatou malamalama ina ia avea ai o se vaega o le tagavai silisili mo atunuu.

le tele o tausaga ua mavae, a o ou auauna atu o se faiaoga seminare, sa ou faalogo ai i se tasi o ou tagata faigaluega o fai atu i ana tamaiti aoga e mafaufau i le fesili lenei: A faapea sa e soifua i le vaitaimi o le Faaola, aisea e te manatu ai o le a e mulimuli ia te Ia o se tasi o Ona soo? Sa latou oo i le faaiuga e faapea o i latou o ē o loo mulimuli i le Faaola i le taimi nei ma taumafai ina ia avea ma Ona soo masalo latou te ono faia foi i na taimi ua mavae.

Talu mai lena taimi, sa ou mafaufau ai i lena fesili ma lo latou faaiuga. E masani ona ou mafaufau poo a ni ou lagona i le faalogo atu i le Faaola lava Ia a o Ia fetalai mai i vaega nei i le Lauga i le Mauga:

"O outou o le malamalama o le lalolagi outou. E le mafai ona lilo le aai ua tu i luga o le mauga.

"Latou te le tutuina foi le lamepa i le tuu ai i lalo o le mea e fua ai saito, a e tuu i luga lava o le tuugalamepa ia pupula atu ai i e o i le fale uma.





"Ia faapea ona pupula atu lo outou malamalama i luma o tagata, ina ia latou iloa la outou amio lelei, latou te vivii atu ai i lo outou Tama o i le lagi." (Mataio 5:14–16).

E mafai ona e vaai faalemafaufau po o a ni ou lagona i le faalogo atu i le siuofoga a le Faaola? O le mea moni, tatou te le tau vaai faalemafaufau i ai. Ua avea ma se aafiaga faifai pea mo i tatou le lagonaina o le siuofoga o le Alii aua a tatou faalogo i siuofoga o Ana auauna, e tusa lava ia.

I le 1838, i se savali e pei o le savali na tuuina mai i le Lauga i le Mauga, sa folafola mai e le Alii vaega nei e ala i le Perofeta o Iosefa Samita:

"Aua o le a faapea ona ta'ua o la'u ekalesia i aso e gata ai, O Le Ekalesia a Iesu Keriso o le Au Paia o Aso e Gata Ai.

"E moni Ou te fai atu ia te outou uma: Tutulai ia ma susulu atu, ina ia avea lo outou malamalama ma tagavai mo atunu" (MF&F 115:4–5).

E tulaga ese o tatou aso lea sa faaalia foi i se faaaliga i le perofeta o Isaia; sa ia vaaia ma valoia foi nei aso o le

Toefuataiga o le Ekalesia a Iesu Keriso ma ona faamoemoega, e faapea, "E faatuina foi e ia le tagavai mo nuu ese, ma faapotopotoina e ua tulia i Israuelu, ma aofai e ua faataapeapeinea o Iuta i itu e fa o le lalolagi" (Isaia 11:12).

I se anotusi faaletusitusiga paia, o se tagavai, po o se sulu, o se fu'a lea e potopoto ai tagata i le lotogatasi o le faamoemoe. I taimi anamua, sa avea le tagavai o se tulaga e potopoto ai mo fitafita i le taua. E ta'ua faafaatusa, o le Tusi a Mamona ma le Ekalesia toefuataiina a Iesu Keriso o tagavai ia i atunuuma. (Tagai Taiala i Tusitusiga Paia, "Ensign," scriptures_lds.org.)

E aunoa ma le masalosalo, o se tasi o tagavai silisili o aso nei e gata ai o lenei konafesi aoao, lea e faaauau ai pea ona folafola atu le galuega sili ma le fuafuaga a lo tatou Tama Faalelagi "ia aumaia le tino ola pea ma le ola faava-vau o le tagata" (Mose 1:39).

O le faaauau pea o le faia o konafesi aoao o se tasi lea o molimau silisili i le mea moni o i tatou o Au Paia o Aso e Gata Ai e "talitonu i mea uma na faaali

mai e le Atua, mea uma ua ia faaali mai nei ma matou te talitonu foi o le a ia faaali mai le tele o mea silisili ma le taua i le Malo o le Atua i le lumanai" (Mataupu Faavae o le Faatuatua 1:9).

O a la mea na faaalia mai e le Alii ia Peresitene Monson e tatau ona tatou faia pea ia mafai ai ona avea lo tatou malamalama o se tagavai mo atunu? O a nisi o mea taua e faia i lenei taimi matagofie o le attiina ae o Siona ma le faapotopotoina o Israuelu?

Ua faaali mai pea e le Alii Lona finagalo ia i tatou i "lea fuaitau i luga o lea fuaitau, ma lea mataupu i luga o lea mataupu, o sina mea itiiti i ma sina mea itiiti i o" (2 Nifae 28:30). O lea, e le tatau ai ona tatou maofa i mea e foliga mai o mea itiiti ona o lo latou natura faigofie ma fai faafia, aua ua uma ona apoapoi mai le Alii ia i tatou e faapea "e manuia lava i latou o e e faalogologo i a'u mataupu, ma ua'i mai o latou taliga i la'u fautuaga, ona o le a latou aoaoina le poto; ona o ia o lē na te taliaina o le a Ou tuu atili i ai" (2 Nifae 28:30).



Ou te molimau atu e ala i "lea fuaitau i luga o lea fuaitau, ma lea mataupu i luga o lea mataupu, o sina mea itiiti i ma sina mea itiiti i o" ma i le faalogo i fautuaga a o tatou taitai, o le a tatou maua suau'u i o tatou lamepa e mafai ai ona tatou tuuina atu i isi le malamalama e pei ona poloaiina ai i tatou e le Alii.

A o i ai le tele o mea e mafai ona tatou faia ina ia avea ai o se malamalama ma se tagavai mo isi, e tolu ni mea ou te manao e taulai i ai; tausiaina o le aso Sapati; faanatinatiina o le galuega o le faaolataga i itu uma o le veli; ma le aoao atu i le ala a le Faaola.

O le malamalama o loo tatou talanoa i ai e sau mai le tuuto tatou te tuuina atu i le tausiga o le aso Sapati, i le Lotu e faapena foi i le aiga; o le malamalama e tuputupu ae a o tatou tausia i tatou lava ia lē pisia mai le lalolagi; o le malamalama e sau mai le osi a'e o ō tatou faamanatuga i Lona aso paia ma mai le avatu o lo tatou tautinoga i le Silisili Ese, o mea uma ia e mafai ai ona tatou maua pea Lona Agaga e faatasi ma i tatou. O lena malamalama lea e tuputupu ae ma mafai ona vaaia pe a tatou toe foi i le aiga ma le lagona o le faamagaloga lea na saunoa i ai Peresitene Henry B. Eyring i le konafesi aoao ua tuanai ia

Oketopa na ia faapea mai: "I faamanu-iaga uma e mafai ona tatou faiatua, o le faamanu-iaga aupito silisili, o le lagonaina o le faamagaloga lea e oo mai pe a tatou aai i le faamanatuga. O le a tatou lagonaina le alofa sili atu ma le talisapaiaina o le Faaola, o le ana le taulaga le mafuatia ua mafai ai ona faamamaina i tatou mai le agasala" ("Lotofafetai i le Aso Sapati," *Liahona*, Nov. 2016, 100).

A o tatou tausia le paia o le aso Sapati ma aai ma feinu i le faamanatuga, e le gata ina faamamaina i tatou, ae e tupu susulu foi lo tatou malamalama.

E tupu foi lo tatou malamalama a o tatou tuuto atu ma faapaiaina le taimi e saili ai suafa o o tatou tuaa, ave o latou suafa i le malumalu, ma aoao o tatou aiga ma isi ia faia lea mea e tasi.

O lenei galuega faalemalumalu ma talafaasolopito o aiga lea tatou te tau-soaina faatasi ma Au Paia i itu uma o le veli ua tele ina agai i luma i lo se isi lava taimi a o fausiaina malumalu o le Alii. I le maua ai e malumalu i le taimi nei o taimi faatulagaina faapitoa mo vaega faaleaiga o e o mai ma o latou lava kata o igoa faaleaiga, sa ma maua ai ma lou toalua ni aafiaga matagofie a o matou auauna atu faatasi i le malumalu ma le ma fanau ma fanau a fanau.

Pe a tatou maua ma ave ni igoa i le malumalu ma aoao foi isi i le auala e faia ai, o loo tatou susulu atu o ni tagavai po o le sulu.

O le aoaoina ina ia aoao atu e pei ona aoao le Faaola o se isi auala lea e mafai ai ona tatou tutulai ma susulu atu. Ou te olioli faatasi ma tagata uma o e o aoao pe faapefea ona aoao atu i le ala a le Faaola. Faataga au e faitau atu mai le faava'a o le tusi lesona fou o le aoao atu: "O le faamoemoega o faiaoga uma o le talalelei—matua uma, o faiaoga uma ua valauina, o faiaoga o aiga ma paga asiiasi uma, ma i latou uma e mulimuli ia Keriso—o le aoao o aoaoga faavae manino o le talalelei, e ala i le Agaga, . . . ia mafai ai ona fesoasoani i fanau a le Atua e fausia lo latou faatua-tua i le Faaola ma avea atili e pei o Ia" (*Aoao Atu i le Ala a le Faaola* [2016]).

I le taimi nei, e uuina i luga e le faitau afe o o tatou faiaoga faatua se malamalama a o latou aoao le auala e aoao atu ai i le ala a le Faaola. I lenei tulaga, o le fonotaga faaleufono fou a faiaoga o se auala e tutulai ai ma susulu atu a o feiloai tamaiti aoga i le tagavai o le aoaoga faavae a Keriso, aua "o le ki e aoao atu ai e pei ona aoao atu le Faaola o le ola ai i le ala na soifua ai le Faaola" (*Aoao Atu i le Ala a le Faaola*, 4).

A o tatou aoao atu ma aoaoina mai uma i Lona ala ma avea atili e pei o Ia, e tupu susulu lo tatou malamalama ma e le mafai ona natia ma e avea ma se tagavai ia i latou o e o loo saili mo le malamalama a le Faaola.

Ou uso e ma tuafafine pele, e le tatau lava ona tatou natiaina lo tatou malamalama. Sa poloaiina i tatou e lo tatou Faaola ina ia faasusulu atu lo tatou malamalama e pei o se aai i luga o se mauga po o le ia pei o se malamalama mai se tuugalamepa. A tatou faia lea mea, o le a tatou faamamaluina lo tatou Tama oi le Lagi. E tuuina mai e le talalelei a le Faaola ma Lana Ekalesia ia i tatou le tele o avanoa mo lo tatou malamalama ina ia avea ai o se vaega o le tagavai silisili mo atunu.

Ou te molimau o Iesu Keriso o le malamalama lea e tatau ona tatou faataitai i ai, i le suafa o Iesu Keriso, amene. ■



Saunia e Elder Quentin L. Cook

O Le Korama a Aposetolo e Toasefululua

○ Faavae o le Faatuatua

O la'u augani ia tatou faia ni taulaga ma maua le lotomaualalo talafeagai e faamalosia ai faavae o lo tatou faatuatua i le Alii o Iesu Keriso.

O se konafesi aoao ofoofogia lenei. Ua faagaeitia moni lava i tatou. Afai e i ai se faamoe-moega silisili o le konafesi aoao, o le fausiaina lea o le faatuatua i le Atua le Tama ma lo tatou Faaola, le Alii o Iesu Keriso.

O la'u tautalaga o le a talanoaina ai faavae o lena faatuatua.

O faavae faaletagata lava ia, e pei o le tele o sailiga taua, e masani lava ona atiae malie—tasi le fola, tasi le aafiaga, tasi le luitau, tasi le faafitaui, ma tasi le faamanuaina i le taimi e tasi. O se aafiaga faaletino aupito sili ona faamemelo i ai, o uluai laa a se pepe. E ofoofogia le vaai atu i ai. O se vaaiga faapelepele i ona foliga—o se tuufatasiga o le naunautaiga, olioli, faateia, ma le ausiaga—o se mea taua moni ua tupu.

I lo matou aiga, e i ai se mea e talitutusa faapena lona natura e tumatalitala lava. Ina ua fa tausaga le matua o le ma atalii uii, sa ia sau ai i totonus o le fale ma faasilasila fiafia mai ma le mitamita tele i le aiga: “Ua mafai nei ona ou faia mea uma. Ua ou mafai ona nonoa, ua ou mafai ona tietie, ma ua ou mafai ona sipi.” Na matou malamalamo o loo ia tau mai ia i matou ua mafai ona ia nonoaina ona seevae, ua mafai ona ia tietie i lana Uila Lapoa

pa'utolu, ma ua mafai ona ia sipiina lona ofu. Sa matou toē uma ae na iloa o ni ausiaga sili ia mo ia. Sa ia manatu ua matua moni lava o ia.

O le atinaega faaletino, faalemafaufau, ma faaleagaga e tele lava mea e tutusa ai. O le atinaega faaletino e faigofie lava ona vaaia. Tatou te amata

i laa a se pepe ma agai i luma i lea aso ma lea aso, lea tausaga ma lea tausaga, tuputupu ae ma atiae ia maua lo tatou fuaitino sili faaletino. O le atiaeina e ese mo tagata taitoatasi.

A tatou matamata i se faatinoga sili o afeleti po o musika, e tele ina tatou faapea e talenia tele le tagata, lea e moni lava. Ae o faatinoga e fua i tausaga o tapenaga ma faataitaiga. O se tasi o tusitala lauiloa, o Malcolm Gladwell, na ia ta'ua lenei mea o le tulafono 10,000 itula. Sa tonu i tagata sailili o lenei aofaiga o faatinoga e talafeagai i afeleti, faatinoga faamusika, atamai faaleaoaoga, tomai faapitoa faa-legaluega, tomai faafomai pe faaloia, ma isi. Sa taua e se tasi o nei tagata atamamai mo saililiga “o na itula e sefulu afe o faataitaiga e manaomiaina e ausia ai le tulaga silisili lea e maua e tagata sili ona atamamai i le lalolagi—i soo se mea.”¹

E toatele tagata e iloaina ina ia maua le tulaga silisili o se faatinoga faaletino ma faalemafaufau, o tapenaga ma faataitaiga faapena e taua tele.

O le mea e leaga ai, i se lalolagi ua faateteleina le faalelalolagi, ua faaitiitia ai le faamamafa e tuu i le tele o le





aofaiga o le tuputupu ae faaleagaga e manaomia ina ia avea atili ai e faapei o Keriso, ma faamautu ai faavae ia e taitai atu i le faatuatua tumau. Ua tele ina tatou faamamafa ia taimi o malamalamaaga faaleagaga musuia. O taimi ttau ia pe a tatou iloaina ua molimau mai e le Agaga Paia ni malamalamaaga faapitoa faaleagaga i o tatou loto ma mafaufau. Tatou te olioli i nei mea pe a tutupu; e le tatau ona faaitiitia i soo se auala. Ae mo le faatuatua tumau ma le mauaina o le mafutaga faifai pea a le Agaga, e leai se mea e suitulaga i le

matauga faalelotu a le tagata lava ia e faatusata i le atinaega faaletino ma faalemafaufau. E tatau ona tatou atiae i luga o nei aafiaga, lea i nisi taimi e tai foliga mai o uluai laa a se pepe. Tatou te faia lenei mea e ala i le tuuto atu ma le faapaiaina i sauniga faamanatuga paia, suesuega o tusitusiga paia, tatalo, ma le auauna atu e pei ona valaauiina ai. I se faamamaluga talu ai nei o le maliu o se tama e toa 13 le fanau, sa ta'ua ai o lona "tuuto atu i tatalo i aso uma ma le suesueina o tusitusiga paia na matua uunaia loloto ai lana fanau,

ma latou maua ai se faavae lemafaagaeetia o le faatuatua i le Alii o Iesu Keriso.”²

I se aafiaga na ou maua ina ua 15 ou tausaga, sa matua ttau mo au. Sa taumafai ma le lototoa si ou tina faamoni e fesoasoani ia te au ia faamautu ia faavae o le faatuatua i lo'u olaga. Sa ou auai i sauniga faamanatuga, Peraimeri, ona sosoo lea ma Alii Talavou ma le seminare. Sa ou faitauina le Tusi a Mamona ma sa tatalo a'u lava ia e le aunoa. I lena taimi sa tupu ai se mea ttau i lo matou aiga ina ua mafaufau lo'u uso pele e matua atu i se valaauga faaolioli o se misiona. Sa manao si o'u tama lelei sa le toaga i le Lotu, ia faauau lana a'oga ae aua nei auauna atu i se misiona. Sa oo ina avea lenei mea ma se mataupu o finauga.

I se talanoaga matagofie ma lo'u uso, lea sa lima tausaga e matua ai ia te au na taitaia le talanoaga, na matou faaiuina ai e faapea, o lana faaiuga pe alu i se misiona sa faalagolago lea i ni mataupu se tolu: (1) E paia ea Iesu Keriso? (2) E moni ea le Tusi a Mamona? (3) O Iosefa Samita ea o le perofeta o le Toefuataiga?

A o ou tatalo faamaoni i lena po, sa faamautu mai e le Agaga ia te au le moni o fesili uma e tolu. Sa oo foi ina ou malamalama e toetoe lava o faaiuga uma o le a ou faia mo lo'u olaga atoa o le a fua lea i tali i na fesili e tolu. Sa ou iloaina patino lava o le faatuatua i le Alii o Iesu Keriso sa ttau tele. I le tepa ai i tua, ua ou iloaina ai, o le autu lava ona o lo'u tina, sa taatitia lelei ai faavae mo au e maua ai faamautinoaga faaleagaga i lena afiafi. Sa faia e lo'u uso, lea ua leva ona i ai sana molimau, le faaiuga e auauna atu i se misiona ma mulimuli ane ai lagolagoina e lo matou tama.

E mauaina le taitaiga faaleagaga pe a manaomia, i le taimi a le Alii ma e tusa ma Lona finagalo.³ O Le Tusi a Mamona: O Se Tasi Molimau ia Iesu Keriso o se faataitaiga lelei tele lea. Talu ai sa ou iloiloina ai se uluai lomiga muamua o le Tusi a Mamona. Sa faamaeaina e Iosefa Samita le faaliiliuga ina ua 23 ona tausaga. Ua tatou iloa se mea e uiga i le faagasologa ma

meafaigaluega na ia faaaogaina i lena faaliliuga. I lena uluai lomiga i le 1830, sa faaaofia ai e Iosefa se faatomuaga puupuu ma tautino mai ai ma le faigofie ma le manino sa faaliliuina “e ala i le meaalofa ma le mana o le Atua.”⁴ Ae a fesoasoaniga i le faaliliuga—le Urima ma le Tumema, o maa a tagata vaai? Pe na taua ea, pe na pei i latou o ni uili faaopoopo o se uila vilivae seja oo ina mafai e Iosefa ona faaaoga le faatuatua talafeagai e maua ai nisi faaaliga tuusao?⁵

E pei lava o taumafaiga faifai soo ma le tumau e manaomia ina ia maua ai le malosi faaletino pe faalemafaufau, e faapena foi lona moni i mataupu faaleagaga. Manatua le Perofeta o Iosefa na faafa ona asiasi i ai le tagata lava e tasi, o Moronae, faatasi ma le savali lava e tasi i tapenaga mo le mauaina o papatusi. Ou te talitonu o le auai i vaiaso taitasi i sauniga faamanatuga paia o loo i ai ni aafiaga faaleagaga tatou te le malamalamala atoatoa i ai. O le mafaufau loloto i tusitusiga paia e le aunoa—nai lo le fatauina i nisi taimi—e mafai ai e se faaleleiga musuia o lo tatou faatuatua e suia ai le olaga ona aveesea se malamalamala papa'u.

O le faatuatua o se mataupu faavae o le mana. Sei ou faamanino atua: A o avea ma se faifeatalai talavou, sa faailoa mai ai e se peresitene maoae o le misiona⁶ ia te au i se auala loloto le tala faatusi paia o loo maua i le Luka 8 e uiga i le fafine na maua i le puna toto mo le 12 tausaga ma sa faaaluina mea uma na ia te ia i fomai sa ono mafai ona faamalolo ia te ia. Ua tumau pea e oo mai i lenei aso o se tasi o mau ou te fiafia lava i ai.

E te manatuaina na ia te ia le faatuatua afai e mafai ona ia pa'i atu tau lava o le tuupao o le ofu o le Faaola, o le a faamaloloia o ia. Ina ua ia faia lea mea, sa faamaloloia o ia i le taimi lava lea. Na fetalai atu le Faaola sa savavali faatasi ma Ona sooo, “O ai ea na pa'i mai ia te a'u?”

O le tali a Peteru o i latou uma, sa savavali faatasi, na fetaomi atu ia te Ia.

“Ona fetalai ane lea o Iesu, Na pa'i mai lava se tasi ia te a'u: aua ua ou iloa ua alu atu le mana nai ia te a'u.”



O le upu autu mo le *virtue* e mafai ona faauigaina faigofie o le “mana.” I le Faa-Sipaniolo ma le Faa-Potukale, ua faaliliuina o le “mana.” Ae e ui i lea, sa lei silafia e le Faaola o ia; ae sa lei tau-lai atu o Ia i lona manaoga. Ae o lona faatuatua sa mauaa lea na o le pa'i atu i le tuupao o le ofu na maua mai ai le mana faamalolo o le Alo o le Atua.

E pei ona fetalai atu le Faaola ia te ia, “Afafine, ina faalototeleina ia oe: ua e ola i lou faatuatua; ina alu ia oe ma le manuia.”⁷

Ua ou mafaufau i lenei tala i lo'u olaga matua atoa. Ua ou iloa o a tatou tatalo faaletagata lava ia ma aioiga i se Tama o i le Lagi alofa i le suafa o Iesu Keriso e mafai ona aumaia faamanu-iaga i o tatou olaga e sili atu ma lo tatou tomai e malamalamala ai. O faavae o le faatuatua, le ituaiga o faatuatua lea na faaalia e lenei fafine, e tatau ona avea ma manaoga sili o o tatou loto.

Peitai, o uluai faavae o le faatuatua, e oo lava i faamautinoaga faaleagaga, e le faapea ai o le a tatou le fetaiai ma luitau. O le liuaina i le talalelei e le faapea o le a foia uma ai o tatou faafitauli.

O le talafaasolopito i le popofou o le Ekalesia ma faaaliga o loo faa-maumauina i le Mataupu Faavae ma Feagaiga o loo i ai ni faataitaiga sili o le faamautuina o faavae o le faatuatua ma le taulimaina o suiga ma luitai e lei mafaufauina o loo feagai ma tagata uma.

O le faamaeaina o le Malumalu o Katelani sa matua taua mo le Ekalesia atoa. Sa o mai faatasi ma anoano o mea faaleagaga, faaaliga o aoaoga faavae, ma le toefuataiga o ki taua mo le faamautuina faifai pea o le Ekalesia. E pei o Apostolo anamua i le aso o le Penetikoso, sa toatele tagata o le ekalesia na oo i aafiaga ofoofogia faaleagaga e fesootai ma le faapaiaga o le Malumalu

o Katedani.⁸ Ae, e pei ona i ai i o tatou lava olaga, sa lei faapea ai la o le a latou le toe fetaiai ma ni luitau po o faigata i le agai i luma. Sa lilo i manatu o nei uluai tagata o le Ekalesia o le a latou fetaiai ma se mala tautupe i le Iunaite Setete—le popolevale o le 1837—lea na tofotofoina ai o latou agaga.⁹

O se tasi o luitau e fesootai ma lenei faaletonu tautupe sa oo i ai Elder Parley P. Pratt, o se tasi o taitai maoae o le Toefuataiga. O ia o se tasi o uluai sui o le Korama a Apostetolo e Toasefululu. I le amataga o le 1837, sa malu ai lona faletua pele, o Thankful i le maea ai ona fanauina o le la pepe muamua. Sa faaipoipo Parley ma Thankful mo le toetoe 10 tausaga, ma sa matua lofituina o ia i le malu [o lona faletua].

I ni nai masina mulimuli ane, sa oo ai Elder Pratt i se tasi o taimi sili ona faigata na oo i ai le Ekalesia. I le lotolotoi o lea faaletonu faalemalu, o faafituali tau tamaoaiga i le lotoifale—e aofia ai fefaatauaiga o fanua mo se faasiliaga atoa ma tauiviga ma se faalapotopotoga tautupe sa faavaeina e Iosefa Samita ma isi tagata o le Ekalesia—na mafua ai ni

feeseeseariga ma ni finauga i Katedani. Sa lei faia pea e taitai o le Ekalesia i taimi uma ni faaiuga atamai faaletino i o latou lava olaga. Sa mafatia Parley i ni tupe gau iloga ma mo se taimi na oo ai ina le fiafia i le Perofeta o Iosefa.¹⁰ Sa ia tusia se faitioga ogaoga ia Iosefa ma saunoa ai e tetee ia te ia mai le pulelau. Ae i le taimi lava e tasi, sa fai mai ai Parley sa faaaauau pea ona talitonu i le Tusi a Mamona ma le Mataupu Faavae ma Feagaiga.¹¹

Ua leai se faletua o Elder Pratt, leai sona fanua, leai ma sona fale. Sa malaga ese atu Parley i Misuri e aunua ma le tauina atu ia Iosefa. A o agai atu i le auala iina, sa faafuasei ona fetau ai ma ona uso a Apostetolo o Thomas B. Marsh ma David Pattern ua toefoi atu i Katedani. Sa la lagonaina se manaoga tele ia toefuatai le lotogatasi i le Korama ma tauanau Parley latou te toe foi atu ma i lau. Sa ia iloaina ai e leai ma se tasi ua sili atu ni mea ua ma'umauina nai lo Iosefa Samita ma lona aiga.

Sa saili e Parley le Perofeta, tagi, ma tautino atu ua ia faia se mea sese. I ni masina talu ona malu

lona faletua, o Thankful, sa “ufitia ai [Parley] i se ao pogisa” ma sa faatoilaloina e le fefe ma le le fiafia.¹² I le iloaina ai o lagona o le tauivi ma le fili ma faaosoosoga, sa “faamagalo fua” ai e Iosefa ia Parley, ma tatalo mo ia ma faamanuia o ia.¹³ O Parley faatasi ma isi na tumau ma le faamaoni sa faamanuiaina mai luitau o Katedani. Sa faateleina lo latou atamai ma avea ma ni tagata sili ona mamalu ma mama. O le aafiaga sa oo ina avea ma vaega o o latou faavae o le faatuatua.

E le tatau ona tatou vaa i faigata o se le fiafia o le Alii po o se aveesega o Ana faamanuiaaga. O le faafeagai o mea uma o se vaega o le afi faamama e sauniaina i tatou mo se taunuuga e faavavau i selesitila.¹⁴ A o i ai le Perofeta o Iosefa i le Falepuipui i Liperate, o le fetalaiga a le Alii ia te ia na faamatala uma ai uiga o luitau—e aofia ai faafituali, tuuiga sese—ma faaiu ai e faapea:

“Afaie tatala faamaga lautele mai e auvae lava o seoli le gutu ia te oe, ia e iloa, lo'u atalii e, o nei mea uma e te maua ai le poto masani, ma o le a avea mo ou lelei.

“Na afio ifo le Atalii o le Tagata i lalo o na mea uma. Pe sili ea oe i lo ia?”¹⁵

I lenei lava faatonuga ia Iosefa Samita, sa faamanino atu ai e le Alii e faapea ua iloa ona aso ma e le faiatina itiiti. Sa faaiu atu le Alii e faapea, “Aua le mata'u i mea e mafai ona fai e tagata, aua o le a faatasi le Atua ma oe e faavavau ma faavavau lava.”¹⁶

O a la ia faamanuiaaga o le faatuatua? O le a le mea e ausia e le faatuatua? E toetoe lava a le muta le lisi:

E mafai ona faamagaloina a tatou agasala ona o lo tatou faatuatua ia Keriso.¹⁷

Po o ai lava e faatuatua o le a maua le mafutaga ma le Agaga Paia.¹⁸

O le faaolataga e oo mai e ala i le faatuatua i le suafa o Keriso.¹⁹

Tatou te mauaina le malosi e tusa ma lo tatou faatuatua ia Keriso.²⁰

E leai ma se tasi e ulu atu i le malologa o le Alii vagana ua faamamaina o latou ofu i le toto o Keriso ona o lo latou faatuatua.²¹

E taliina tatalo e tusa ma le faatuatua.²²

A leai se faatuatua i tagata, e le mafai e le Atua ona faia se vavega ia i latou.²³





I le faiuga, o lo tatou faatuatua ia Iesu Keriso o le faavae taua lea mo lo tatou faaolataga e faavavau ma le faaeaga. E pei ona aoaoina e Helamana ona atalii, "Ia manatua, ia manatua o luga lava o le papa o lo tatou Togiola, o Keriso lea, le Alo o le Atua, e ao ina oulua atinae ai lo oulua faavae . . . , o se faavae lea afai e atiae ai tagata e le mafai lava ona pauu i latou."²⁴

Ou te faafetai mo le faamalosiga o faavae o le faatuatua ua maua mai i lenei konafesi. O la'u augani ia tatou faia ni taulaga ma maua le lotomaualalo talafeagai e faamalosia ai faavae o lo tatou faatuatua i le Alii o Iesu Keriso. Ona o Ia ou te tuu atu ai se molimau mautinoa, i le suafa o Iesu Keriso, amene. ■

FAAMATALAGA

1. Tagai Malcolm Gladwell, *Outliers: The Story of Success* (2008), 40. O loo ia sii maia le faamatalaga a le fomai o Daniel Levitin.
2. Obituary of Bryant Hinckley Wadsworth, *Deseret News*, Jan. 15, 2017, legacy.com/obituaries/deseretnews.
3. Tagai 2 Nifae 28:30. Tatou te le mauaina se tino atoatoa o le malamalamama e uiga i le mataupu po o mataupu faavae e faatatau i ai. Latou te oo mai pe a manaomia i latou:
4. I le uluai lomiga o le Tusi a Mamona, na lolomiina i le 1830, sa tusia ai e le Perofeta o Iosefa Samita, "Ou te faailoa atu ia te outou sa ou faaliliuina, e ala i le meaalofa ma le mana o le Atua" (tagai i le faatomuaga o le Tusi a Mamona [1830]). O lomiga na sosoo ai o le Tusi a Mamona na aofia ai se faamatalaga talitutusa: "Na tuuina mai ai papatusi ia Iosefa Samita, o lē na faaliliuina i le meaalofa ma le mana o le Atua" (tagai i le faatomuaga i le Tusi a Mamona [2013]).
5. Sa toe manatua e Orson Pratt sa ia i ai i le tele o taimi a o faaliliuina e Iosefa Samita le Feagaiga Fou ma sa iloa ai na te lei faaaogaina se meafaigaluega i lena faagasologa. "O Iosefa, e pei o loo ia faiatua ona manatu, na tilotilo i luga ma faamalamalama mai na tuuina mai ia te ia e le Alii le Urima ma le Tumema ao leai sona poto masani i le Agaga o musumusuga. Ae o lenei sa ia agai luma i le mamao lea ua ia malamalamama ai i le faatautaiga o lena Agaga, ma le manaomia ai le fesoasoani o lena meafaigaluega" ("Two Days' Meeting at Brigham City, June 27 and 28, 1874," *Millennial Star*, Aug. 11, 1874, 499; tagai foi Richard E. Turley Jr., Robin S. Jensen, ma Mark Ashurst-McGee, "O Iosefa le Tagata Vaai," *Liahona*, Oke. 2015, 10–17).
6. O le peresitene o le misiona o Elder Marion D. Hanks, sa avea foi ma Pulega Aoao.
7. Tagai Luka 8:43–48.
8. Tagai Galuega 2.
9. Tagai Mosaea 2:36–37; tagai foi Henry B. Eyring, "Sauniuniga Faaleagaga: Ia Vave

Amata ma Ia Tumau Ai," *Liahona*, Nov. 2005, 38: "O le tofotofoga sili o le olaga, o le vaai lea po o tatou faalogo ma usitai i poloaiga a le Atua, i le lotolotoi o afa o le olaga. E le o le onosaia o afa, ae o le filifilia o le mea tonu pe a pesi mai. Ma o le tulaga faigata o le olaga, o le toilalo lea i lena suega ma lē agavaa ai e toe foi atu ma le mamalu i lo tatou aiga faalelagi."

10. Tagai Terry L. Givens ma Matthew J. Grow, *Parley P. Pratt: The Apostle Paul of Mormonism* (2011), 91–98; faatomuaga o le lomiga ma faatomuaga i le vaega 5, *The Joseph Smith Papers, Documents, Volume 5: October 1835–January 1838* ed. Brent M. Rogers ma isi (2017), xxviii–xxx, 285–93.
11. Tagai "Letter from Parley P. Pratt, 23 May 1837," i le *The Joseph Smith Papers, Documents, Volume 5: October 1835–January 1838*, 386–91.
12. Tagai "History of John Taylor by Himself," 15, in *Histories of the Twelve, 1856–1858, 1861*, Church History Library; Givens and Grow, *Parley P. Pratt*, 101–2.
13. Tagai *The Autobiography of Parley P. Pratt*, ed. Parley P. Pratt Jr. (1874), 183–84.
14. Tagai 2 Nifae 2:11.
15. Mataupu Faavae ma Feagaiga 122:7–8.
16. Mataupu Faavae ma Feagaiga 122:9.
17. Tagai Enosa 1:5–8.
18. Tagai Iaroma 1:4.
19. Tagai Moronae 7:26, 38.
20. Tagai Alema 14:26.
21. Tagai 3 Nifae 27:19.
22. Tagai Moronae 7:26.
23. Tagai Eteru 12:12.
24. Helamana 5:12.



O Le Avea o le Konafesi ma Vaega o o Tatou Olaga

Mafaufau e faaaoga nisi o gaoioiga nei ma fesili e fai ma vaega amata mo suesuega faaletagata lava ia pe faaleaiga.

Mo Tamaiti

- Itulau 86: Na valaaulia i tatou e Peresitene Thomas S. Monson ina ia fai-tau le Tusi a Mamona i aso uma, ma folafola mai, "O le a faaali atu e le Agaga Paia ia te outou lona moni."

E faaopoopo atu i au lava suesuega, e mafai ona e faia se mausa o le suesueina o le Tusi a Mamona i aso taitasi faatasi ma lou aiga. E mafai ona foi faatino ni vaaiga po o le taalo i taaloga e fesoasoani e manatuaina ai fuaiupu taua ma tala. Alu i le friend.lds.org ma vaavaai i le 2016

Liahona mekasini mo tala o le Tusi a Mamona, siata faitau, ma isi mea.

- Itulau 117: Sa faamatalaina e Elder Gary E. Stevenson le auala na faa-logo ai lona tama i le Agaga Paia ma faasaoina ai o ia mai se gata uogo. Fesili i ou matua pe mafai ona faia se tou talanoaga faaleaiga i le fesili,

E faapefea ona fesoasoani le Agaga Paia ia te oe? Faasoa atu ni taimi sa lapataia ai, faamafanafanaina ai, pe molimau mai ai le Agaga Paia ia te oe. E mafai ona e tuisaina i lalo ma faia se tusi.

- Itulau 87: Sa aoao mai Sister Joy D. Jones, e mafai ona e saunia e osia feagaiga paia mulimuli ane e ala i le aoaoina e tausia folafolaga i le taimi nei. Seti se sini ma folafola e mulimuli i ai. Fai atu i se paga e siaki mai oe ma ia mautinoa o loo e tausia lau folafolaga.

- Itulau 90: Na faasoa mai e Elder Yoon Hwan Choi ni fautuaga mai lona tama: "Aua e te vaavaai solo, vaai i luga!" O nisi taimi tatou te tosina ai ma gallo le taulai atu i le Tama Faalelagi ma Iesu Keriso. O lea ia faamanatu ia te oe lava ina ia vaai i luga! E mafai ona e tautaua se ata

o Iesu i totonu o lou potu. Alu i fafo ma vaai i luga i le lagi. Faaalu sina taimi filemu i aso taitasi e mafaufau ai e uiga i le Tama Faalelagi ma Iesu Keriso ma lagonaina le Agaga.

Mo Le Autalavou

- Itulau 93 ma le 117: Ua e fesili ia te oe lava: E mafai faapefea ona ou maua pea le Agaga? E mafai faapefea ona ou iloa le siufofoga o le Agaga Paia? E faapefea ona fesoasoani mai le Agaga Paia ia te au? Sa taliina e Elders Ronald A. Rasband ma Gary E. Stevenson fesili nei ma le tele o isi fesili. "Ua ia i tatou le tiutetauave e aoao ina ina iloa Lana uunaiga i o tatou olaga ma tali atu," o le tala lea a Elder Rasband. E mafai faapefea ona e faia lena tiutetauave?
- Itulau 33: Na sii mai ai e Elder Ulisses Soares se vaega o le mau autu o le Mutuale: "Ole atu ma le faatuatua, aua lava nei masalosalo. Aua o lē masalosalo e tusa ia ma le peau o le sami ua sousou i le matagi ma felafoaiina ai" (Iakopo 1:5–6). E faapefea ona e le masalosalo? Amata e ala i le faamalosia o lou faatuatua ia Iesu Keriso. Suesue atili e uiga ia te Ia. Manatua le taimi na e lagonaina ai Lona alofa ma le filemu.
- Itulau 86 ma le 9: Na valaaulia i tatou e Peresitene Thomas S. Monson, "Afai e te le o faitauina le Tusi a Mamona i aso taitasi, faamolemole ia fai loa." Ma sa fesili Sister Carol F.



McConkie: "O tatou tuueseina le telefoni, lisi e le muta o mea e fai, ma popolega faalelalolagi? O le tatalo, suesue, ma le usiusitai i le afioga a le Atua e valaaulia ai Lona alofa faamamaina ma faamalolo e oo mai i totonu o o tatou agaga." Fuafua se taimi i aso uma e faitau ai le Tusi a Mamona ma tuu se faamanatu i lau api o fuafuaga, po o i lau telefoni.

Mo Talavou Matutua

- Itulau 62: O a ni sini o loo ia te oe mo lou olaga? O sini mo lau galuega, aiga, ma e oo lava i taalogia ma mea e fiafia ai e lelei, ae "o tatou sili aupito sili ona faamuamua e tatau ona ogatusa ma le fuafuaga e faavavau a le Tama Faalelagi," na aoao mai ai Elder M. Russell Ballard. E faapefea ona ogatusa au fuafuaga ma le fuafuaga a le Tama Faalelagi mo oe? E mafai faapefea ona sili atu ona e taulai i le sini o le ola ai e faavavau ma le Tama Faalelagi ma Iesu Keriso?
- Itulau 39: I le amataga o lenei tausaga, sa valaaulia ai e Peresitene Russell M. Nelson talavou matutua e "faapaiaina se vaega o [latou] taimi i vaiaso taitasi i le suesueina o *mea uma* sa fetalai mai ai ma faia e Iesu e pei ona tusia i [tusitusiga paia]" ("Perofeta, Taitaiga, ma le Tulafono Faalelagi" [faigalotu i le lalolagi atoa mo talavou matutua, 8 Ian., 2017], broadcasts_lds.org). Sa ia toe taua lenei valaaulia i le konafesi aoao o se tasi o ana vaega autu e fa i le mauaina o le mana o le Faaola i o tatou olaga. Suesue le lauga a Peresitene Nelson ina ia aoao ai pe mafai faapefea ona e mauaina le "mana ua lava e taulimaina ai avega, faafitauli, ma faaosoosoga o o tatou aso."
- Itulau e 100 ma le 26: Pe e te manao ea i se faafanua o le ala mo lou olaga? Sa aoao mai Elder Dallin H. Oaks, "Ona ua i ai ia i tatou le upumoni e uiga i le Aiga Atua ma lo tatou sootaga ia i Latou, o le faamoemoega o le olaga, ma le natura o lo tatou taunuuga e faavavau, ua tatou maua ai le faafanua sili ma le faamautinoaga mo la tatou malaga i



- le olaga faaletino." Sa aoaoina uma e i laua ma Elder Weatherford T. Clayton lena malamalamana o le fuafuaga o le faaolataga e mafai ona fesoasoani i o tatou luitau o aso nei. Suesue i a laua savali ma ole atu i le Tama Faalelagi pe mafai faapefea ona tuuina mai e upumoni e faavavau se faafanua o le ala i lou olaga.
- Itulau 104: E mafai ona faaosofia le fefe, ae na aoao mai Peresitene Dieter F. Uchtdorf "ma o le a le suaia i lava i tatou i tagata e fiafia i le mea sao ma le e manao ia usiusitai i le Tama Faalelagi." E mafai faapefea e le alofa mama o Keriso ona avea "o le vaifofo tofia mai le lagi" i lou fefe?

Mo Tagata Matutua

- Itulau 86: A o tatou suesue ma le agaga tatalo ma mafaufau loloto i le Tusi a Mamona i aso taitasi, sa saunoa mai Peresitene Thomas S. Monson, "o le a tatou i ai i se tulaga e lagona ai le siufogaga o le Agaga, e tetee atu ai i faaosoosoga, e faatoilalo ai le masalosalo ma le fefe, ma maua ai le fesoasoaniga a le lagi i o tatou olaga." Faaletagata lava ia ma faaleaiga, ia faatu se sini e faitau le Tusi a Mamona i aso uma.
- Itulau 39: Ia auai i le lui na tuuina atu e Peresitene Russell M. Nelson i autalavou matutua (tagai i luga "Mo Talavou Matutua"). E mafai faapefea ona e fetuunaia lenei lui ia te oe lava ma i lou aiga? Talanoaina faamanuiaga e oo mai mai le aoao atili e uiga i le Faaola.
- Itulau 93 ma le 117: A o e faitauina saunoaga a Elder Ronald A. Rasband ma Elder Gary E. Stevenson, vaavaai mo ni auala ia maua ai pea le Agaga ma le auala e fesoasoani mai ai le Agaga ia te oe. Faailoa mai ni auala e faateleina ai Lana uunaiga i lou olaga.
- Itulau 39 ma le 62: Sa uunaia e Peresitene Russell M. Nelson ma Elder M. Russell Ballard tagata o le Ekalesia e suesue i le "O Le Keriso Soifua: O Le Molimau a le Au Apostolo" (tagai i totonu o le faavava pito i luma). Na saunoa mai Elder Ballard, "Tuu se kopi i se mea e mafai ona e iloa atu ai, ma faaalu se taimi e iloilo ai faamatalaga taitasi o loo maua i lenei molimau musuia e uiga ia Keriso." I le avea ai ma se aiga, faitau le "O Le Keriso Soifua" ma talanoa i mea ua outou aoaoina.
- Itulau 127 ma 97: Sa aoao mai Elder Quentin L. Cook, o lo tatou faavae o le faatuatua ua fausia "ona atiae malie—tasi le fola, tasi le aafiaga, tasi le luitau, tasi le faafitauli, ma tasi le faamanuiaina i le taimi e tasi." Sa saunoa mai Elder L. Clayton, "O le faasa'oina o mausa laiti o le faatuatua i aso taitasi, o se auala lea e tasi e silia ona lelei e faamalosia ai i tatou e faasaga atu i faafitauli o le olaga, po o a lava." O le a se mea e mafai ona e faia i aso taitasi e faamalosia ai lou faavae o le faatuatua? ■

O nei aaficaga na filifilia sa fofogaina i le taimi o le konafesi aoao e mafai ona faaaogaina i suesuega faaletagata lava ia, aafiafi faaleaiga, ma isi aoaoga. O le numera o loo faasino i le itulau muamua o le lauga.

Failauga	Tala
Neil L. Andersen	(58) I le faaalia na vaia ai e Peresitene President David O. McKay le Faaola ma i latou "o e ua manumalo i le lalolagi." Ua mafatia Elder Bruce D. Porter i le faafitauli o le fatugao ae e faatoilalo le lalolagi e ala i lona alofa mo le Faaola.
David A. Bednar	(67) Ua fesoasoani David A. Bednar i se faifeatalai le fiafia ua maea le misiona.
Mark A. Bragg	(36) Ua faasaoina e le au tineiafi ata o lesu Keriso mai se nofoaga autu na mu.
M. Joseph Brough	(23) Ua faafogoga le tama o M. Joseph Brough i taitaiga atamai mai i lona tina. I le avea ai ma se alii talavou, sa saili e M. Joseph Brough le finagalo a le Tama Faalelagi a o sauni o ia e foai atu lana taifau. I le malumalu, sa aoaoina e M. Joseph Brough e alofa le Tama Faalelagi ia te ia.
Linda K. Burton	(12) Ina ua uma mavae le pipili ai o lona tane, sa tausia e Drusilla Hendricks lona aiga. Ua auauna atu se Peresitene o le Aualofa i isi a o tauivi ma le kanesa.
Gérald Caussé	(75) Ona o le seminare, ua siitia ai Gérald Caussé e 30 tausaga le matua. Na saili e tagata o le uarota ni auala e auauna atu ai i se alii talavou.
Yoon Hwan Choi	(90) Ua aoao e le tama o Yoon Hwan Choi o ia, "Aua le vaavaai solo, vaa i luga." Sa faamanuiaina Sunbeam Choi a o auaua atu ona matua i se misiona. O le valauina o Yoon Hwan Choi i le Fitugafulu o lona ulga e ititi le taimi mo lona aiga, ae e fiafia lava lona atalii aua o i latou "o se aiga e faavavau."
L. Whitney Clayton	(97) Ua fautuina e se epikopo talavou tagata atuatuvalo e le uarota e gauai atu i faiga faavae o le faatuatua.
Weatherford T. Clayton	(26) Ua vaia e Weatherford T. Clayton le olioli e aumaia e se pepe fou i le tina. Ina ua maliu lo latou tina, sa maua e fanau teine e toalua le mafanafana e ala i lo la faatuatua i le Faaola.
Quentin L. Cook	(127) O le atalii e fa tausaga le matua a Quentin L. Cook ua "mafai ona faia mea uma i le taimi nei." I le avea ai o se alii talavou, na maua ai e Quentin L. Cook se faamaoniga faaleagaga e uiga i le talalelei toefuataiina. E ala i le tumau i le faamaoni e ui lava i faigata, sa faateleina Parley P. Pratt i le atamai ma le mama.
Bonnie H. Cordon	(6) Ua talosagaina Bonnie H. Cordon e le atalii a lana tama tama ina ia faitau nisi tusitisiga paia. O le filemu sa ia lagonaina mai le tatalo a lona tina na tuuina atu ai ia Bonnie H. Cordon le lototele e faalagolago ai i le Alii. E ala i le auauna atu i isi, na maua ai e se tasi na maua i le kanesa le malosi ma le lototele e tetee atu ai i lona mai.
Valeri V. Cordon	(55) I le avea ai ma se alii talavou, sa vaia ai e Valeri V. Cordon le faamanuiaina o lona aiga ona o le totogiina o le sefulua.
Joaquin E. Costa	(112) Ao faia lesona a faifeatalai, sa faamaulaloina e Joaquin E. Costa o ia lava ma vaa i le salamo o le ala i le tuputupu ae ma le fiafia.
Henry B. Eyring	(15) Ua faatagaina e tagata lotomualalo o le Ekalesia i Austria le Agaga Paia e faasusuul le tamai fale sa latou faia ai le sauniga faamanatuga. Ua faataga e le Agaga Paia Henry B. Eyring e vaa i lona atalii laititi vaovaogata e pei ona silasila mai le Atua ia te ia. (19) E oo lava i le tekinolesi sili ona lelei e le mafai ona suitulaga mo faaaliga faaletagata lava ia. (82) E faalagolago Henry B. Eyring i le folafolaga o le a i ai le Agaga i lona loto ma o le a tauave e agelu o ia a o ia tuu atu le auaunaga faaleperisitu.
C. Scott Grow	(121) Sa auauna atu matua o C. Scott Grow ma [lona] aiga faaletulafono i ni misiona. Ua molimauna e C. Scott Grow le faamamaina faaleagaga o Elder Neal A. Maxwell.
Joy D. Jones	(87) Ua tausia e se tuagane matua lana folafolaga i ona matua e aua nei taufaalili i lona tuafafine e lima tausaga le matua.
Carol F. McConkie	(9) Ua fesoasoani se peresitene o le vasega o le Ofagapi e 13 tausaga le matua i Ghana i ana uo ina ia faia a latou feau i le fale ina ia mafai ona latou auai atu i le lotu.
Russell M. Nelson	(39) Ua tausia e se Lora lana tautinoga e auai i se fonotaga a le Aualofa e ui lava sa faaleogaina mai se tauvaga faavaomalo.
S. Mark Palmer	(114) O se peresitene o le misiona, ua aoao ai S. Mark Palmer e "vaa'i" i faifeatalai ma alofa ia i latou e pei ona alofa le Tama ma le Alo ia i latou.
Ronald A. Rasband	(93) I le avea ai ma se faifeatalai faamisiona, na faaaoga ai e Ronald A. Rasband lona vae e taofi ai se faitotoa mai le tapunia. Sa lagona e Elder Ronald A. Rasband le uunaia e asiasi ma faamanuia tagata o le Ekalesia i Ekuatoa i le maea ai o se mafuie iina. I le avea ai ma se peresitene o le misiona, sa uunaia ai e Ronald A. Rasband faifeatalai e faatino ia uunaiga muamua.
Dale G. Renlund	(29) I le <i>Les Misérables</i> , sa faaosofia e le agaalofa o se epikopo Jean Valjean e sui lona olaga. I le avea ai ma se alii talavou i Europa, sa sauaina ma faapologaina Dale G. Renlund.
Gary B. Sabin	(52) Sa faaaluina e se Tama Sikauti se po i le malulu. Sa toe foi mai i tua le polo tui feula aua "o loo ia tu i luga i totonu." Sa aoao e le tama o Gary B. Sabin ni au vaa se toalua o e na fiafia i lana faataitaiga amiontonu.
Joseph W. Sitati	(33) Sa toe faafouina e se faifeatalai faamisiona lana tautinoga e auauna atu ma le filiga i le Atua i le mavae ai o lona aoaoina ua maliu lona tuafafine.
Gary E. Stevenson	(117) Ua faafiafiaina Gary E. Stevenson i le lesona o le afiafi faaleaiga a se tamaititi e iva tausaga le matua. O se uunaiga na tausia le saogalemu o Gary E. Stevenson talavou mai se gata uogo. O se uunaiga a se peresitene o le misiona sa tausia ai le saogalemu o faifeatalai i le taimi o le mafuie i lapani. Sa maua e tagata o le aiga le mafanafana mai le Agaga Paia i le mavae ai o se faalavelave matautia tau taavale.
Dieter F. Uchtdorf	(104) Ua olioli Dieter F. Uchtdorf i le faamaeaina o le malumalu o Madrid Sepania e ui lava i le valaauliai ai i le faapaiaga. Sa tau atu e Peresitene James E. Faust ia Dieter F. Uchtdorf ia aua nei "manavaina i totonu" viiviiga o tagata o le Ekalesia. Ua fautuina e Peresitene J. Reuben Clark Jr. se taitai fou e mulimuli i le tulafono numera ono. O le peresitene muamua o se siteki sa ofofua atu e faamama solofanua i le maea ai o le solo i le aai.



Elder Taylor G. Godoy

Fitugafulu o le Pulega Aoao



Elder Joni L. Koch

Fitugafulu o le Pulega Aoao

O ni nai tausaga i le faagasologa o lana matata faalegaluega, na maua ai e Elder Taylor G. Godoy o ia i se fetaulaiga ala.

Sa faigaluega o ia o se fomai nifo, faavaeina se pisinisi [e vaaia oloa po o nifo], ma tulimatai atu i se lumanai i aoaoga faaakatemia o le taotoga o oloa po o nifo. Peitai sa valaauina o ia e se taitai perisitua alofa ma faatuatuaina e galue mo le Seminare ma Inisitituti.

O le aluese mai i se matata tauolaola sa avea ma se filifiliga malie mo le fomai nifo talavou, o le sa lagolagoina i le aso 1 Aperila, 2017, o se Fitugafulu o le Pulega Aoao. Sa manatu le toatele o ana uo pe faapefea ona ia tuua lana matata [o se fomai nifo].

“Ae peitai sa ou iloaina o se filifiliga sao,” o lana tala lea. O lea ituaiga o faamaoni ua matuai faamatalaina ai tagata liliu mai o le Ekalesia. O le fesoasoani i isi ia iloa ma fiafia i le talalelei ua faamaonia le avea ai ma se avanoa ma faamanuiaga o le ttau a o le olaga.

I le taimi o lana galuega mo aoaoga a le Ekalesia, sa galue Elder Godoy o se faiaoga inisitituti, taitai faamaopoopo, faatonu, ma le faatonusili i le atunu. Talu ai nei lava, sa avea o ia ma faatonu o le eria o Amerika i Sante Matusisifo mo Seminare ma Inisitituti.

Sa soifua mai Taylor Guillermo Godoy Atanacio i Lima, Peru, i le 1968, ia Taylor Godoy ma Adalzahinda Atanacio. Na maliu lona tama a o avea o ia ma se tama talavou, ma sa tausia o ia e le toalua pele o lona tina, o Elias Rebaza. Na auai Elder Godoy i le Ekalesia ina ua 17 ona tausaga.

Ina ua uma ona auauna atu i le Misiona a Peru Lima i Matu, sa ia toe foi atu i lona nuu moni o Arequipa. O iina na ia atiae ai se faauoga ma se tamaitai talavou e igoa ia Carol Pacheco. Sa faaipoipo le alii ma le tamaitai na liliu mai i le aso 31 o Me, 1994, i le malumalu o Lima Peru. O i la'ua o ni matua o se fanau e toalua.

Sa maua e Elder Godoy se faailoga o le tagata malaga i mea tau oloa po o nifo mai le Iunivesite Katoliko a Sagata Maria i le 1993 ma se faailoga o le matuaofaiva i le pulega mai le Iunivesite o Tekinolosi i Madrid i le 2006.

Sa ia auauna atu o se epikopo, fautua maualuga, peresitene o le siteki, faatonu o le va i fafo o le eria, ma Fitugafulu Eria. ■

O Elder Joni Luiz Koch o se tagata o le augatupulaga lona luga o le Ekalesia mai Pasila. Na asiasi atu ona matua, o Luiz and Etelca Gascho Koch, i ni ekalesia eseese i le lotofale i le popofou o le la faaipoipoga ina ia maua le upumoni faaleagaga.

O ni itula talu ona mavae le ofoina atu e lona tina o se tatalo mai le loto ma folafola atu e mulimuli i le Atua, na tauuu atu ai faifeautalai i le faitotoa a ona matua. I le itiiti ifo ma le ono masina, sa papatisoina i lau.

Sa soifua mai i le 1962, na ola ae Elder Koch i Joinville, Santa Catarina, Pasila. O le uunaiga a taitai o le Ekalesia, e pei o se faiaoga tuuto o le Peraimeri, se epikopo faaletama, ma se peresitene o le siteki lototoa, na fesoasoani ia te ia e tautino atu ia ola i le talalelei.

Ina ua maea se misiona talai i le Misiona a Pasila Sao Paulo i Matu, na aoga Elder Koch i mataupu tau fuainumera i le Iunivesite o Polika Iaga i Provo, Iuta, ISA. “I se malaga e toe foi atu i Pasila, sa ou asiasi atu ai i le uarota a se uo, lea sa ou feiloai ai i lou toalua o le lumanai,” o le tala lea a Elder Koch. “Sa ia savali mai ia te au ma fesili mai pe ua ou faaipoipo.” Ina ua mavae se faamasaniga valu masina le mamao—ma na o le 15 moni lava aso sa faatasi ai—na ia faaipoipo atu ai ia Liliane Michele Ludwig i le aso 26 o Aperila, 1988, i le Malumalu o Sao Paulo Pasila. E toalua le la fanau.

Ina ua uma ona faauu mai le BYU ma mauaina se faailoga faapitoa o le matuaofaiva o le pulega faapisinisi, sa faigaluega Elder Koch i mea tau fuainumera faavaomalo. I le periota o le 25 tausaga, sa ia faigaluega ai mo ni kamupani eseese seia oo ina valaauina e auauna atu tumau mo le Ekalesia.

Sa auauna atu Elder Koch o se epikopo, peresitene o le siteki, ma Fitugafulu Eria. Sa ia auauna atu o se peresitene o le Misiona a Mozambique Maputo i le taimi o lona valaauga o se Fitugafulu o le Pulega Aoao.

“Na fausia malie lava lau molimau i le aluga o taimi e ala i aafiaga faaleagaga na mauaina i le ola ai i le talalelei,” o le tala lea a Elder Koch. “O le Tusi a Mamona o se tasi o elemene autu i le malosi o la'u molimau i le Alii o Iesu Keriso, Lana Ekalesia, ma le Perofeta o Iosefa Samita.” ■



Elder Adilson de Paula Parrella

Fitugafulu o le Pulega Aoao

na ua valu tausaga o Elder Adilson de Paula Parrella, sa amata ona aoao atu e faifeautalai lona aiga e uiga i le Perofeta o Iosefa Samita ma le Toefuataiga o le talalelei.

“E oo lava ao tamaitiiti, ou te lei fesiligia lava le moni o le vaaítino o Iosefa Samita i le Atua ma Iesu Keriso,” o le tala lea a Elder Parrella, o le na lagolagoina i le aso 1 o Aperila, 2017, o se Fitugafulu o le Pulega Aoao. “Ou te lei masalomia lava lena mea talu mai lena taimi.”

Sa soifua mai Elder Parrella i le 1962 i Guarujá, Pasila, i le talafatai o Atelenitika e latalata i São Paulo, ia Fioravante ma Vany de Paula Parrella.

Na faamisiona uma ona uso matutua e toalua. O a laua faataitaiga faapea ma se epikopo alofa, o Angelino Borges de Freitas, o le na aoaoina o ia i le ala e avea ai ma se tasi e umia le Perisitua Arona, na faamumuina i totonu ia te ia se manao e auauna atu i se misiona talai. O le auaunaga faafaifeautalai na toe faamalosia atu ia te ia “le moni o le Atua ma Lona Alo ma o i tatou uma o fanau a le Atua.”

Ina ua uma ona auauna atu i le Misiona a Pasila Porto Alegre, sa auai atu Elder Parrella i le Iunivesite o Polika Iaga i Provo, Iuta, ISA, lea sa ia maua ai se faailoga o le tagata malaga i fesootaiga ma se faailoga o le matuaofaiva o pulega faapisinisi. Sa ia galue o se pule faatonusili i le Polychrome Kodak Graphics ma o se faipaaga i le Korn Ferry Faavaomalo. Talu ai nei sa avea o ia o se paaga i le Caldwell Partners.

Sa ia faaipoipo atu ia Elaine Finholdt ia Tesema 1988 i le Malumalu o São Paulo Pasila. O i la’ua o ni matua o se fanau tama e toalima.

Sa auauna atu Elder Parrella o se peresitene o se paranesi, epikopo, fautua maualuga, fesoasoani i se au peresitene o le siteki, Fitugafulu Eria, ma peresitene o le Misiona a Pasila Belo Horizonte mai le 2009 i le 2012.

Talu mai le taimi sa ia feiloai ai i faifeautalai, sa avea lona olaga o se malaga ina ia malamalama i lagona sa ia oo i ai o se tagata e valu tausaga le matua. O le auai atu i le lotu, faaaauau pe a ona aoao mai i le afioga a le Atua, ma taumafai ia ola i poloaiga na fesoasoani ia faalauteina lana vaaiga mai sina tepa i le upumoni lea na tuuina atu ia te ia o se tamaitiiti. “O le malo moni lava lenei a le Atua i luga o le fogaelele,” na ia saunoa ai. ■



Elder John C. Pingree Jr.

Fitugafulu o le Pulega Aoao

“O la’u molimau na fausia i le faagasologa o taimi, i lea taimi ma lea taimi, e ala i le mauaina o tali i tatalo, o le lagonaina o le Agaga ao faiatua tusitusiga paia, salamo, ma le auauna atu i le Alii,” o le tala lea a Elder John C. Pingree Jr., o le na lagolagoina i le aso 1 o Aperila, 2017, o se Fitugafulu o le Pulega Aoao.

Sa soifua mai i le 1966, i le Aai o Sate Leki Iuta, ISA, ia Carmen ma John C. Pingree Sr., na te faafetaia le tuuto o ona matua i le fesoasoani e mamanuina lona olaga.

“O le aso na sosoo ai ina ua ou fanau mai, sa tusi ai e lo’u tamā se tusi ia te a’u,” o le tala lea a Elder Pingree. “Sa ia teuina lena tusi, ma mulimuli ane, ina ua ou aluese e auauna atu i se misiona talai, sa ia lafoina mai ia te a’u. Sa i ai i le tusi le tele o itulau o lana molimau ma lesona sa ia manao ia ou aoaoina i le faagasologa o lo’u olaga. A o o’u faiatui ai, sa molimau mai le Agaga ia te au o mea sa ou aoaoina e uiga i le talalelei toefuataiina a Iesu Keriso e ala mai i o’u matua o ni upu moni.”

Sa auauna atu Elder Pingree i le Misiona a Massachusetts Boston, i le gagana Sipaniolo.

Sa ia maua ni tikeri i le gagana Peretania ma le Saienisi Faaupufai mai le Iunivesite o Iuta ma le faailoga o le matuaofaiva o le pulega faapisinisi mai le Aoga Faapisinisi a Harvard. Sa ia faaipoipo atu ia Anne Pugsley ia Mati 1990, ma o i laua o ni matua o se fanau e toalima.

O le tele o lana matata faalegaluega na taulai atu i le fesoasoani atu i isi. Sa avea o ia ma peresitene o se faalapotopotoga o fesoasoaniga faafomai ma se sui peresitene o ni kamupani se lula o le tausiga o le soifua maloloina.

Sa avea o ia ma peresitene o le Misiona a Texas Houston mai le 2011 i le 2014 ma sa ia auauna atu o se Fitugafulu Eria, peresitene o le siteki, epikopo, peresitene o le korama a toeaina, ma se faiaoga o le inisitituti ma le seminar.

“Na fetalai mai le Alii, ‘Afai e te manao i ai, o le a avea oe ma ala o le faia o mea lelei e tele i lenei tupulaga’ (MF&F 11:8),” na saunoa ai Elder Pingree. “Ia te a’u, o loo fetalai mai le Alii, ‘E mafai ona ou faaaogaina oe ia faia se lelei i olaga o isi tagata, pe a e faataga mai a’u.’ Afai tatou te vaavaai atu mo ni avanoa, o le a faaaoga i tatou e le Tama Faalelagi e faamanuia ai se isi tagata.” ■



Elder Brian K. Taylor

Fitugafulu o le Pulega Aoao

Sa lagolagoina Elder Brian King Taylor o se Fitugafulu o le Pulega Aoao i le aso 1 o Aperila, 2017.

Sa soifua mai Elder Taylor i le 1964 i Ogden, Iuta, ISA, ia Lowell Moon ma Marie King Taylor. Sa ia tuputupu ae i Kaysville lata ane, o le lona fa i se aiga e toalima le fanau ma e fiafia e fagota ma taaloga.

O lona uso matua o Craig sa i ai se sikolasipi i le pasiketipolo i le Iunivesite o le Setete o Iuta i Logan, Iuta, ma sa taumafai e filifili pe auauna atu i se misiona pe faaaauau pea lana matata i le kolisi.

“I se tasi po i le taumafataga o le afiafi sa ou fai atu [ia te ia], ‘Ei, afai e te alu i se misiona, o le a ou alu i se misiona,’” na tote’ua e Elder Taylor. Sa iu ina auauna atu uma le au uso e toa-lua, ma o Elder Taylor na alu i le Misiona a Sepania Seville.

A o le’i alu lana misiona, sa taalo Elder Taylor i le ‘au pasiketipolo a le Iunivesite a Polika Iaga mai le 1982 i le 1984 faatasi ai ma Devin G. Durrant, lea o loo auauna atu i le taimi nei o se tasi o le Au Peresitene Aoao o le Aoga Sa.

Sa ia feiloai foi i lona toalua o le a i ai, o Jill Featherston, i BYU. Sa faiaoga [Jill] i le vasega o Mataupu Faavae o le Ekalesia i lana uarota o tagata aoga. O le valaaulaina e lona uso, na asiiasi atu ai Elder Taylor ma feiloai ai ia te ia. Sa tuputupu ae se faigauo, ma sa la faaipoipo i le aso 30 Aperila, 1987, i le Malumalu o Sate Leki. O i laua o ni matua o se fanau e toafitu.

O Sister Taylor ua na o le pau lea o le teine o le fanau e toafitu a Elder Vaughn J. Featherstone, o se Pulega Aoao ua faamalolo faamamaluina, ma Sister Merlene Featherstone. “Sa latou matuai taliaina ma agalelei,” na fai mai ai Elder Taylor e uiga i lona aiga faaletulafono. “Sa ou lagonaina le alofagia i le taimi lava lena.”

Faatasi ai ma se faailoga o le tagata malaga mai BYU, na fausia e Elder Taylor le tele o pisinisi, e aofia ai se kamupani e mamanuina le polokalama faamaopoopo o valaauga mo faala-velave faafusei i le va o faalapotopotoga mo tagata lautele o le saogalemu.

Sa ia auauna atu o se faiaoga inisitituti, fautua maualuga, peresitene o Alii Talavou o le uarota, peresitene o le siteki, ma, i le taimi o lona valaauga o se Fitugafulu, peresitene o le Misiona a Texas Dallas. ■



Elder Taniela B. Wakolo

Fitugafulu o le Pulega Aoao

O Elder Taniela Biu Wakolo sa tuuto atu uma aso o lona soifuaga talu mai lona papatisoga ia Mati 1994 e auauna atu ai i le Alii.

Na soifua mai i le 1967 i se tamai motu o Lomaloma, Lau, Fiti, ia Taniela Vosa ma Temalesi Buadromo Wakolo, o Elder Wakolo o le uii o le fanau e toaono. “Sa ou ola ae i se aiga e ese le faatauvaa, ae sa matou mauoa i le tulaga o le alofa sa matou mauaina mo le tasi ma le isi,” sa ia fai mai ai.

I le 12 o ona tausaga, na tuua ai e Elder Wakolo le fale a ona matua e auai i le aoga nofotumau e silia ma le 500 alii talavou, e i le vaitausaga o le 12 i le 19. “Sa avea lena ma se nofoaga lelei mo le aoaoga mo a’u,” o lana tala lea. “O iina sa ou aoaoina ai le amio-pulea.”

Sa ia tafao faamasani ma Anita Herberta Moimoi, o se tagata faatoa liliu mai, mo le silia ma se tausaga. Sa la faaipoipo i le aso 22 o Aokuso, 1987, i Suva, Fiti.

E lei vave ona liliu mai Elder Wakolo, ma i le aluga o uluai tausaga e valu o le faaipoipoga a le ulugalii, sa ia feiloai ai i le tele o faifeatalalai. “E faafaa ona ou faamaeaina lesona a [faifeatalai] i tausaga e valu,” o lana tala lea. “E toa 24 a’u faifeatalalai.”

O se fesili faigofie mai se tasi o na faifeatalai e uiga i le igoa o le Ekalesia na suia ai lona mafaufau e uiga i le papatisoga. “E tatau ona faaigoaina le Ekalesia i lē e anaina,” o lana tala lea. “Na lava lea mo a’u.”

Sa faamauina Elder Wakolo ma lona faletua i le Malumalu o Nukualofa Toga i le 1995. O i la’ua o ni matua o se fanau e toalua.

Mai lona papatisoga sa vave ona sosoo ai ma avanoa e auauna atu. E lua vaiaso talu ona uma lona papatisoga, ae valaaulina o ia i le au peresitene o Alii Talavou a le uarota ma faiaoga faatasi ma lona faletua i le seminare. Ina ua maea le itiiti ifo ma se tausaga, sa ia taliaina le valaauga e auauna atu o se peresitene o le paranesi. Na auauna atu mulimuli ane o se fesoasoani i se au peresitene o le siteki, peresitene o le siteki, ma Fitugafulu Eria. I le taimi o lona valaauga o se Fitugafulu a le Pulega Aoao, sa ia pulefaamalumalu i le Misiona a Arkansas Little Rock.

Sa a’otauina Elder Wakolo i mataupu faalepulega mo taitai ma tagata lautele ma mauaina se faailoga o le matuaofaiva i le pulega. Talu ai nei lava, sa avea o ia ma se pule i le Ofisa Autu o Auaunaga a le Ekalesia i Fiti. ■



Jean B. Bingham

Peresitene Aoao o le Aualofa

Ole nofo ai i ni nofoaga eseese i le Iunaite Setete, ua talisapaia ai e Sister Jean B. Bingham le ala o aumaia ai e le talalelei se uunaiga malosi i taimi o suiga i le siosiomaga.

Sa soifua mai i le 1952 i Provo, Iuta, ISA, ia Robert ma Edith Joy Barrus, sa ia tuputupu ae ma ni uso e toaono ma tuagane e toalua. Sa ia auai i le aoga tulagalua i Texas ma Minesota, ISA, ma faamaea le aoga maualuga i New Jersey. Sa na o ia ma nai ona tei ni tamaiti aoga a le AAG i a latou aoga seia oo ina latou siitia atu i New Jersey, lea sa ia fiafia ai i le iloaina o loo i ai se teine mai lana uarota fou i lana vasega.

Ina ua uma ona la faaipoipo ma Bruce Bingham i le Malumalu o Provo Iuta i le aso 22 o Tesema, 1972, sa la siitia atu i Ilinoi e faaauau le aoga a [Bruce].

E toalua ni fanau sa fananau mai ia Brother ma Sister Bingham, ma sa la ta'ua o ni a lau lava fanau nisi sa la tausia. Sa ia mauaina se tikeri i le olaga faaleaiga, ma a o i ai le la uii i le aoga maualuga, sa ia toe foi i le aoga ma sa maua se faailoga o le matuaofaiva i le aoao atu.

O le uluai valaauga o Sister Bingham i le Aualofa na oo mai ina ua faatoa mavae le fanauina o lana tamaitiiti muamua. "Na valaauna a'u e aoao atu ia lesona o aoaoga faatina. Sa avea ma se avanoa sili e aoao ai mai faataitaiga a isi uso faapea foi ma le tusi lesona."

Sa malaga soo Sister Bingham i le taimi o lana auaunaga o se sui o le au faatonu aoao o le Peraimeri ma i le avea ai ma se fesoasoani i le Au Peresitene Aoao o le Peraimeri. Na ia vaaia ni luitau ma faamanuiga o le avea ai ma se tagata o le Ekalesia i eria i le salafa o le lalolagi.

Ua faamoemoe o ia o le a iloaina e uso o le Aualofa le lelei i le tasi ma le isi. "O se faaososoga le faatusatusa o i tatou lava i isi, o ni faafitauli ma e faafeagai ma le finagalo o le Tama Faalelagi mo i tatou." Sa ia fai mai o le Aualofa e fesoasoani i uso taitasi ia atiae se malamalama o le tagata o i ai o ia i le malo e faavavau. "A tatou faatotonugalemuina o tatou olaga ia Iesu Keriso, ua tatou iloa moni lava le tagata tatou te i ai," o lana tala lea. ■



Sharon Eubank

Fesoasoani Muamua, i le Au Peresitene Aoao o le Aualofa

I le avea ai ma se tagata faigaluega fou i le Auaunaga o Fesoasoani Alofa a le AAG, sa molimauina ai e Sharon Eubank le pagatia, faanoanoa, ma le faavauvau lea na faigata ai ia te ia ona galue. E ala i le tatalo, sa oo ai ina ia malamalama e ui e mafai ona ia fesoasoani i le Alii e tausia Lana fanau, na te le pule i lena faanoanoaga. "O Iesu Keriso o loo pule. O le a Ia tauaveina lena avega. O i latou o Lona nuu, ma e Na te faafogaga ma taliina a latou tatalo." O lena tali na suia ai lona gafatia e aapa atu ma auauna atu.

O tausaga mulimuli ane, i le avea ai o, Sister Eubank, ma faatonu o Auaunaga Limafoai a le AAG—o le faalapotopotoga limafoai a le Ekalesia—na auina atu ni fesoasoani ma faalauihoa atu le ola tutoatasai ia i latou o e le tagolima i le salafa o le lalolagi.

Na lagolagoina i le aso 1 o Aperila, 2017, i le Au Peresitene Aoao o le Aualofa, o le a ia faaauau ai pea i lana matafaioi i le avea ai ma faatonu o le Auaunaga Limafoai a le AAG. O loo i ai se "sootaga maoae" i le va o Auaunaga Limafoai a le AAG ma le Aualofa, lea e saofafai ai sui o le Au Peresitene Aoao o le Aualofa i le au faatonu aoao mo le Auaunaga Limafoai a le AAG, sa ia faamalamalama mai. O ona tiutetauave mo faalapotopotoga uma e lua o le a faamalosia ai lena sootaga.

Na soifua mai i le 1963 i Redding, Kaledonia, ISA, o Sharon o le ulumatua o le fanau e toafitu a Mark ma Jean Eubank. Na ola ae Sister Eubank i Bountiful, Iuta, ISA, i se fasi laueelele e 10 eka (4 ha) lea na pikiina ai e le fanau a Eubank ia apricots, lipea ia paipa faapasi, ma nonofo latalata i atumauga o Iuta.

Sa maua e Sister Eubank lona faailoga o le tagata malaga i le Igilisi ma talafaasolopito mai le Iunivesite o Polika Iaga, i Iuta, ma sa auauna atu i le Misiona a Finelani Helsinki.

E le gata i lana galuega i le Matagaluega o le Uelefea a le Ekalesia, sa galue Sister Eubank i Capitol Hill i Uosigitone, D.C., ISA, sa pulea faatasi ma se isi tagata se pisinisi laitiiti, ma sa alala i fafo i Japoni ma Farani.

O avanoa taitasi o se "puna oso o le faatuatua" lea na fesoasoani ia te ia e aoao ai tomai o loo ia faaaogaina i lenei vaitaimi, ua faatagaina ai o ia e feiloai ma ni tagata lelei i totonu ma fafo atu o le Ekalesia, ma ua avatua ia te ia se fiafaga ma se agaga talisapaia mo le tele o aganuu, gagana, ma meataumafa o le lalolagi. ■



Reyna I. Aburto

Fesoasoani Lua, Au Peresitene
Aoao o le Aualofa

Sa soifua mai Sister Reyna I. Aburto i Managua, Nicaragua, ia Noel Blanco ma Delbi Cardoza i le 1963. "O o'u matua sa galulue malolosi e le aunoa ina ia la saunia mea manaomia mo i matou," o le tala lea a Sister Aburto. "Sa ou mauaina se taimi sili ona fiafia i lou laitiiti."

I le faatoa tea o le vaeluapo i le aso 23 Tesema, 1972, ao iva ona tausaga, sa taia ai Managua i se mafuie. "Sa faasaoina a'u ona sa i ai se fasi meafale i tua atu o a'u, peitai sa utia o'u vae." O le faalogoina o le la fe'eei ma lona tina, na o mai ai tuaoi ma toso mai i laua i fafo mai le fale ua faaleagaina. I mea ua faaleagaina, na latou maua ai le tino o lona tuagane matua i le moega i tafatata o lona moega. "O meatotino faalelalolagi sa nao ni mea e le tumau, ae o le mea taua o lo matou aiga," o lana tala lea.

Ina ua 21 ona tausaga, sa malaga mai Sister Aburto ma lona aiga i le Iunaite Setete. A o nofo ai i San Francisco, Kafeonia, sa faafeiloai atu o ia i faifeautalai ma filifili ai e sau i le lotu. "O le taimi lava na ou laa ai i totonusi o lena fale, sa ou lagonaina le Agaga. O le konafesi lea a le siteki, ma sa ou lagonaina faapea o savali taitasi uma sa mo a'u," o lana tala lea. Sa papatisina o ia i le 1989.

I le taimi lea, sa ia feiloai ai ia Carlos Aburto, ma avea i laua ma ni uo. Sa faaaauau pea ona la fetusiai, e oo lava i le taimi ina ua siitia atu Sister Aburto i Orem, Iuta. Sa la faaipoipo i le aso 8 Me, 1993, i le Malumalu o Jordan River Iuta. O i la'ua o ni matua o se fanau e toatolu.

Sa lagolagoina Sister Aburto, i le aso 1 o Aperila, 2017, i le Au Peresitene Aoao o le Aualofa, na galue i le matagaluga o faaliliuga mo le silia ma le 25 tausaga, e aofia ai ma le Novell Inc. ma Lemoine International. Ua la anaina nei ma lona toalua se tamai pisinisi faaliliu. Sa ia aoga i le faaenisia i le Iunivesite a Amerika Tutotonu i Managua, Nicaragua, mo tausaga e fa ma sa maua se tikeri lagolago i le saienisi faakomepiuta mai le Kolisi o le Setete o le Vanu o Iuta i le 1997.

Sa auauna atu Sister Aburto i ni valaauga eseese o le Ekalesia, e aofia ai le avea ma sui o le au faatonu aoao o le Peraimeri mai le 2012 i le 2016. ■



Cristina B. Franco

Fesoasoani Lua, Au Peresitene
Aoao o le Peraimeri

I lona laitiiti, na aoaoina ai e Sister Cristina B. Franco faapea afai e i ai sana fesili, e mafai ona ia liliu atu i le Tama Faalelagi i le tatalo mo se tali.

"Ou te manatua le alu atu i lo'u tina ina ua 11 ou tausaga pe a ma fesili atu ia te ia se fesili faaleaoaoga faavae," o lana tala lea. "Sa ia taliina lau fesili ae na fai mai ia te a'u, 'E te le tau faaaogaina la'u tali e uiga i ai.' O lea sa ou tatalo ai ma ole atu i lo'u Tama Faalelagi pe moni lea mea."

Sa tali mai lana tatalo, ma mai i lena taimi sa ia iloa ai sa i ai se Tama Faalelagi e alofa ia te ia ma o le a tali mai i ana tatalo.

Lagolagoina i le aso 1 o Aperila, 2017, i le Au Peresitene Aoao o le Peraimeri, sa soifua mai Cristina Beatriz Fraga i le 1958 ia Hugo R. ma Maria A. Godoy Fraga i Buenos Aires, Atenitina.

Ina ua tolu tausaga lona matua, na tuitui atu ni faifeatalai i le faitotoa a ona matua. Ina ua mavae le suesueina ma le auai i le lotu mo le tusa ma le valu masina, na auai le ulugalii i le Ekalesia ma amata ona faafaleleina lo latou aiga i le talalelei. I le Peraimeri, sa ia feiloai ai ia Rodolfo C. Franco, o se tamaitiiti o le na avea mulimuli ane ma ana ua sili ona lelei.

Ina ua 18 ona tausaga, sa siitia atu le aiga o Sister Franco i Iuta, ISA. I lena taimi, ua la iloa ma Rodolfo la te fia faaipoipo, peitai sa manaomia Rudolfo e auaua atu i le militeli a Atenitina mo se taimi. Sa fetusiai le toalua lea, ma ina ua maea lana tautua faamiliteli, sa la faaipoipo i le aso 15 o Tesema, 1978, i le Malumalu o Sate Leki. O i la'ua o ni matua o se fanau tama e toatolu.

O le mulimuli ai i tulagavae o le tama o Sister Franco, o se fai uati, sa galulue ai le ulugalii i se faleoloa fai uati i le Aai o Sate Leki mo le toeitiiti atoa le tolu sefulu tausaga.

Sa auauna atu Sister Franco i le tele o valaauga i le Ekalesia. Sa auauna atu o ia i le au faatonu aoao o le Peraimeri mai le 2005 i le 2010 ma, i le taimi o lona valaauga i le Au Peresitene Aoao o le Peraimeri, o loo la auauna atu faatasi ma lana tane, lea o loo pulefaamalumalu i le Misiona a Atenitina Resistencia. ■



Faamoemoega o le Aualofa

Ua toe faafou e le Aualofa le faaupuga i lana faamatalaga o le faamoemoega. Ua faitauina nei faapea: "O le Aualofa e fesoasoani e sauniaina tamaitai mo faamanuiaga o le ola e faavavau a o latou faateleina le faatuatua i le Tama Faalelagi ma lesu Keriso ma Lana Togiola; faamalolosia o tagata taitoatasi, aiga, ma auaiga e ala i sauniga ma feagaiga; ma galulue i le lotogatasi e fesoasoani ia i latou e manaomia le fesoasoani."

O lenei faamatalaga e atagia ai le malamalamaga faaopoopo o le a fesoasoani i tamaitai o le Au Paia o Aso e Gata Ai ia malamalamaga i le faasinomaga paia, galuega e faavavau, ma faamoemoega o uso taitoatasi i le Aualofa. ■

Fofogaina Atu ni Valaauga Fou

S a fofogaina atu i le taimi o le konafesi aoao, le valaauna o ni Fitugafulu fou e toaono o le Pulega Aoao, o se Au Peresitene Aoao fou o le Aualofa, ma le toe faatulagaga o le Au Peresitene Aoao o le Peraimeri.

Na valaauna e avea ma Fitugafulu o le Pulega Aoao ia Elder Taylor G. Godoy, Elder Joni L. Koch, Elder Adilson de Paula Parrella, Elder John C. Pingree Jr., Elder Brian K. Taylor, ma Elder Taniela B. Wakolo.

O Jean B. Bingham o le a auauna atu o se Peresitene Aoao o le Aualofa,

ma Sharon Eubank o le Fesoasoani Muamua ma Reyna I. Aburto o le Fesoasoani Lua. Ao lei maua lana valaauga, sa auauna atu Sister Bingham o se Fesoasoani Muamua i le Au Peresitene Aoao o le Peraimeri. O Bonnie H. Cordon, o le sa avea ma Fesoasoani Lua i le Au Peresitene Aoao o le Peraimeri, sa fofogaina atu o le a avea ma Fesoasoani Muamua fou, ma Cristina B. Franco o le Fesoasoani Lua.

O loo maua ia tala o soifuaga e amata i le itulau e 135. Na fofogaina atu foi ia valaauga o Fitugafulu Eria e toa 36 (tagai i le itulau e 44). ■

Malumalu Fou e Lima

Na fofogaina mai e Peresitene Thomas S. Monson fuafuaga mo le fausiaina o ni malumalu faaopoopo e lima, i aai nei:

Brasília, Pasila. O le Malumalu o Brasilia Pasila o le a avea ma malumalu lona 10 i Pasila, e aofia ai malumalu e ono o loo faaaogaina ma le isi tolu ua fofogaina atu po o o loo fausiaina. E ese ai mai le Iunaite Setete ma Mekisiko, ua toatele atu le Au Paia o Aso e Gata Ai (silia ma le 1.3 miliona) o loo nonofo i Pasila nai lo sooo se isi atunu. O Pasila e i ai se faitau aofai e tusa ma le 211 miliona.

Manila Lautele, Filipaina. O lenei malumalu o le a avea ma [malumalu] lona lua i Manila ma le lona fa i le Atu Filipaina. Ua toeitiiti atoa le 750,000 o le Au Paia o Aso e Gata Ai i Filipaina, lea e i ai se faitau aofai e 104 miliona.

Nairobi, Kenya. O le a auauna atu le malumalu i le silia ma le 30,000 tagata o le Ekalesia i Aferika i sasae, e aofia ai le au paia e 13,000 i Kenya, lea e i ai se faitau aofai e 48 miliona. O le a avatua le fuainumera i le valu o malumalu o loo faaaogaina, o loo fausiaina, po o ua faasilasila atu i Aferika.

Pocatello, Idaho, ISA. O le Malumalu o Pocatello Idaho Temple o le a avea ma malumalu lona ono i Idaho, o se setete e i ai le tusa ma le 450,000 o le Au Paia o Aso e Gata Ai ma se faitau aofai e 1.7 miliona.

Saratoga Springs, Iuta, ISA. O lenei malumalu o le a i ai i se tasi o eria aupito televave le faatupulaia i Iuta ma o le a avea ma malumalu lona 18 i le setete. O Iuta, lea e i ai le laumua o le Ekalesia, e 2.1 miliona tagata o le Ekalesia, faatasi ai ma se faitau aofai o tagata o le setete pe tusa ma le 3.1 miliona.

O malumalu e lima na fofogaina atu ua aumaia ai le faitau aofai o malumalu o loo faaaogaina (155) ma malumalu ua fofogaina atu po o o loo fausiaina/ faafouina (27) i le 182 malumalu i le lalolagi atoa.

Talu mai le konafesi aoao ia Oketopa 2016, ua uma ona faapaiaina le Malumalu o Fort Collins Colorado, le Malumalu o Star Valley Wyoming, ma le Malumalu o Hartford Connecticut i le ISA, ma ua toe faapaiaina le Malumalu o Suva Fitit.

Ua fuafuaina faapaiaga o i le lumanaui e pei ona taua i lalo:

MALUMALU	ASO O LE FAAPAIAGA
Pale Farani	21 Me, 2017
Idaho Falls	4 luni, 2017
Idaho (ISA)	(toe faapaiaina)
Tucson Arisona (ISA)	13 Aokuso, 2017
Meridian Idaho (ISA)	19 Novema, 2017
Cedar City Iuta (ISA)	10 Tesema, 2017

Ua uma ona suatiaina le laueleele mo le Malumalu o Winnipeg Manitoba (Kanata), le Malumalu o Kinshasa Ripapelika Temokarasi o le Congo, le Malumalu o Barranquilla Kolomupia, le Malumalu o Arequipa Peru, ma le Malumalu o Rio de Janeiro Pasila.

Ia matauina foi, ao faaaauau pea le fausiaina o le Malumalu o Roma Italia, ua uma ona tuuina i totonu o le nofoga autu mo tagata asiasi mai ia faatagata o Iesu Keriso ma uluai Apostolo e Toasefululua, ma ua tuuina foi i luga o le tumutumu le faatagata o le agelu o Moronae. ■

Sue ni faamatalaga fou ma faamatalaga i le temples.lds.org.

Pathway mo le A'otauina

Ua fofogaina atu e le Au Pere-sitene Sili le faatuina o se faalapotopotoga fou i le lalolagi mo aoaoga maualuluga i le Ekalesia, ua ta'u a o le BYU-Pathway Worldwide. O le a amata ona faagaoioia le faalapotopotoga fou i le aso 1 Me, 2017. O le a saunia e le faalapotopotoga ia avanoa mo le a'otauina mo i latou o e semanu e le mauaina.

"O le Pathway o se alalaupapa i le lalolagi o aoaoga faalekolisi i luga o le initoneti ma o se auala i avanoa mo se galuega faamanuia-in," na saunoa ai Peresitene Dieter F. Uchtdorf, Fesoasoani Lua i le Au Peresitene Sili. ■

E maua nisi faamatalaga atili i le pathway.lds.org.



Faaauau Pea le Auaunaga a Aposetolo i le Lalolagi Atoa

Oloo faaauau pea ona auauna atu perofeta ma aposetolo i le lalolagi atoa (tagai i le MF&F 107:23). I le ono masina mulimuli:

I se faasalalauga o le Faafesagai o loo tuusao atu i **Palamaira, Niu Ioka, ISA**, na uunaia ai e Peresitene Henry B. Eyring ma Elder Jeffrey R. Holland le autalavou o le Ekalesia ina ia maua se molimau faaletagata lava ia. “Ia iloa mo oe lava ia ua moni nei mea,” na saunoa mai ai Peresitene Eyring.

I **Mekisiko**, na faalauiloa atu ai Peresitene Russell M. Nelson i le Chamber of Deputies a le atunu (o le vaega pito i lalo o le Konekaresi), ma sa viia le Ekalesia mo le lelei o le puipuiga o le saolotoga o tapuaiga ma i le faamalosia o aiga. Na feiloai atu foi Peresitene Nelson i faifeautalai ma saunoa atu faapea o tagata o le Ekalesia “o se uunaiga malosi mo le lelei o o latou nuu ma atanuu.”

I **Arisona, ISA**, na uunaia ai e Elder Dallin H. Oaks tagata uma o le Ekalesia ia puipuia le saolotoga o tapuaiga. (E maua nisi faamatalaga i le religiousfreedom.lds.org.)

Saunoa atu Peresitene Dieter F. Uchtdorf i tagata o le Paranesi o Parleys Creek (Suaili) i le **Aai o Sate Leki, Iuta, ISA**. O le toatele o tagata o le paranesi o ni tagata sulufai mai i itumalo o Aferika, ma o Peresitene Uchtdorf e faalua ona avea foi o ia ma se tagata sulufai. “Ia manatua i taimi uma po o fea lava o tatou i ai, o le talalelei o le aiga lea,” na ia saunoa ai.



Faasolo agai i luma, mai le agavale pito i luga: Asiasi atu Elder Bednar i tagata o le Ekalesia i le Atu Filipaina; Sa feilocai atu Peresitene Russell M. Nelson ma le Chamber of Deputies (o le vaega maualalo o le Konekaresi a Mekisiko) e talanoaina le saolotoga o tapuaiga faalelotu; asiasi atu se faatasiga iloga o Mamona ma taitai o Tagata lutaia mai le ISA i le palemia o Israelu o Benjamin Netanyahu; sa faafeiloi e Elder Stevenson se talavou matua o loo auauna atu o se faufautua i se konafesi o le Mo le Malosi o le Autalavou i lurukuei; auai atu ni talavou i se faasalalauga tuusao ma Elder Holland ma Peresitene Eyring i Palamaira, Niu Ioka, ISA; o Elder ma Sister Renlund o loo faafeiloi ia tuafafine i se fonotaga i Toga; ma o loo asiasi atu Elder Rasband i se falemai o le kanesa a tamaiti i le Aai o Kuatemala, Kuatemala.

Na auai atu Elder M. Russell Ballard ma Elder D. Todd Christofferson i le sauniga o le faatulaia o le epikōpō fou o le Matagaluega a le Katoliko Roma o le Aai o Sate Leki ma faafeiloi o ia i totonu o le nuu.

I le **Aai Paia**, sa auai atu faatasi Elder Holland ma Elder Quentin L. Cook ma se vaega o taitai o le Au

Paia o Aso e Gata Ai ma malo faaalogia o Tagata Iutaia mai le ISA o e sa faapotopoto i se nofoaga lauiloa i **Ierusalem** e failogia le 175 tausaga o Elder Orson Hyde (1805–78) o le Korama a Aposetolo e Toasefululua o loo faapaiaina le laueelele o se nofoaga o le faapotopotoga mo tagata Iutaia.

Sa asia foi e Elder Holland tagata o le ekalesia ma faifeautalai i **Iapani, Korea, ma Guam**, lea “sa mafai ona matou faamautinoa atu ia i latou se lumanai [manuia],” na ia saunoa ai. Sa ia ta’ua o faasalalauga tuusao o faigalotu i le lalolagi atoa e “ofoina mai ia i tatou le tele o le mafai ona oo atu o a tatou savali,” e fesootai ai ma le fia sefulu afe o tagata o le Ekalesia.

I **Niu Ioka, ISA**, sa auai Elder David A. Bednar i se felafolafoaiga e uiga i le faaipoipoga, ua fai mai o se tasi o galuega sili o o tatou taimi—o se tasi lea e tatau ai ona tuufaatasia nuu e eseese faatuatuaga—ina ia fesoasoani i tagata ia malamalamā i le uiga moni ma faamoemoega o le faaipoipoga.

A o asiasi atu i le Au Paia o Aso e Gata Ai i **Iapani** ma **Korea**, na saunoa atu Elder Bednar o loo aafia le Ekalesia i le tuai o le tuputupu ae e mautinoa o Asia. “E leai sau mea e te mafai aae ia faagaeetia i le filiga, agaalofa, ma le faamaoni o nei Au Paia o Aso e Gata Ai,” sa ia saunoa mai ai. Sa saunoa atu foi Elder Bednar i le faiatua afe o tagata o le Ekalesia ma aoao atu ni faifeautalai i ni misiona se 7 mai misiona e 21 a le Ekalesia i **Filipaina**.

I **Mekisiko**, na fiautuina e Elder Neil L. Andersen tagata o le Ekalesia e faatoilalo ni faafitaulo o loo taofia i latou mai le auai atu i le malumalu, tausia o le Sapati, ma ia faamalosia sootaga faaleaiga. Sa ia valaaulia i latou ina ia tuuina atu atoa le Faaola i o latou olaga.

Na asiasi atu Elder Quentin L. Cook i le **Atu Filipaina**, i le 20 tausaga ina ua uma ona ia auauna atu i ai iina o se Pulega Aoao. Sa ia saunoa mai ua faaluaina le toatele o le Ekalesia i le Atu Filipaina talu mai lena taimi. “I le mea sa i ai paranesi,” sa ia saunoa mai ai, “ua i ai nei ni siteki. O tamaiti sa tatou iloa i na taimi ua avea nei ma faifeautalai ua maea misiona. O faifeautalai ua

maea misiona ua avea nei ma peresitene o siteki. E ese le maoae o le vaai atu i le tuputupu ae o le Ekalesia.”

I **Polivia** ma **Peru**, ua fiautuina e Elder Cook ia tagata o le Ekalesia ia taulai atu i le faatuatua i le Alii o Iesu Keriso. Sa ia saunoa mai o le autalavou ma talavou matutua nofofua o i ai iina e tulaga ese lava ma e faaalia le alofa mo le Faaola ma Lana Togiola ma le Toetu.

I le **Eria o Aferika i Sisifo**, na saunoa mai Elder Gary E. Stevenson o lana asiasiga na saunia ai se avanoa e mafaufau ai i le alofa ma le olioli o loo maua e le Au Paia o Aso e Gata Ai i le talalelei, e ui i “luitau ma mafatiaga” o feagai ma i latou.

Mulimuli ane, i **Iurukuei, Chile**, ma **Atenitina**, na saunoa ai Elder Stevenson i se konafesi Mo le Malosi o le Autalavou. Sa ia tau mai, o le toatele o le autalavou “ua faia ni faaiuga e o i ni misiona ma ia tumau mausali i a latou sini ina ia faaipoipo i le malumalu, ma . . . [maua] ni aoaoga maualulu atu.”

Na fiautuina e Elder Ronald A. Rasband tagata o le Ekalesia ma faifeautalai i le **Eria o Amerika Tutotonu** ia tumau faamaoni i a latou feagaiga ma vaavaai atu i le Alii i taimi faigata. Sa ia asiasi atu i le falemai o le kanesa a tamaiti i **Kuatemala**, tuuina atu se saunoaga autu i se semina o le saolotoga o tapuaiga e lagolagoina e le Ekalesia i **El Salvador**, ma feiloai ma le peresitene o **Nicaragua**.

I **Toga**, sa feiloai Elder Dale G. Renlund ma le tupu tamaitai ma isi tagata o le aiga tautupu. Sa ia asia foi **Ausetalia** ma **Niu Sila**, lea na talosagaina ai o ia e tagata ina ia faailoa atu lo latou alolofa ia Peresitene Thomas S. Monson. ■


E mafai ona maua faamatalaga fou i auaunaga a nei taitai o le Ekalesia i o latou lava itulau o le Facebook ma le [prophets.lds.org](https://www.prophets.lds.org).

Faifeautali Sili ona Lelei, Faiaoga Sili ona Lelei

se faasalalauga i le lalolagi atoa, e toeitiiti lava o alii ma tamaitai faifeautalai e toa 71,000 i misiona e 422 na maua ni aoaoga faamasani i le auala e avea ai ma faifeautalai ma faiaoga sili atu ona lelei. Sa fofogaina atu ni suiga sa faamaonia e le Au Peresitene Sili ma le Korama a Aposetolo e Toasefululua o se vaega o le aoaoga. O se fuafuaga fou o le aso o le a mafai atili ai ona fetuunaia le auala o loo faaaoga ai e faifeautalai lo latou taimi ma faamasani atili ai e tusa ma le eria o loo latou tautua atu ai.

O le faamoemoega o le fetuunaia atili o le faatulagaga ina ia fesoasoani i faifeautalai ia faateleina le lelei o le galuega i aso taitasi, seti ni sini musuia, fuafua lelei atili, ia ola maloloina, ma faaaoga lo latou fitalia e faia ai ni faaiuga amiotonu e uiga i le auala sili ona lelei e faaalu ai lo latou taimi. O le a faatagaina foi i latou ina ia galulue mo se taimi umi.

O le isi suiga na fofogaina atu o le faaitiitia lea o le aofai o “faailo autu” e faaaoga e faifeautalai e lipotia ai le alualu i luma i la latou galuega. Sa faamanatu atu i faifeautalai o matapu faavae uma i le **Talai Lau Talalelei** e taua ma e tatau ona faaaogaina. ■



Oloa ma Punaoa Fou

O se aotelega lenei o oloa ma punaoa fou na faavanoaina atu talu ai nei e le Ekalesia. *Tala o tusitusiga paia ma tusi valivali.* Ina ia uunaia le suesueina o tusitusiga paia faaletagata lava ia ma faaleiga, ua faamatuuina atu nei e le Ekalesia ni punaoa fou o tala o tusitusiga paia, e amata atu i se faasologa o tusi e valivali ua mamanuina mo tamaiti i le vaitausaga 2–8. O loo maua lomiga PDF mauafua i le scripturestories.lds.org, ma e mafai ona oka ni lomiga ua uma ona lolomiina i le store.lds.org ma Faletusi tutotonu.

O tusi valivali o le a faaliliuina i ni gagana lea e maua ai lomiga a le AAG o tusitusiga paia. O le a maua lomiga ua faaliliuina i le faagasologa o le 2017, e amata i gagana Sipaniolo, Potukale, Farani, Iapani, Korea, Saina (masani), Siamani, Rusia, ma Italia.

Tusitusiga Paia. Ua fogaina atu e le Au Peresitene Sili se faaliliuga fou o le fusitolu o tusitusiga paia i le gagana Farani, o loo maua i le [écrivains.lds.org](https://scriptures.lds.org) ma i le polokalama feaveai o le Potutusi o le Talalelei. E aofia i le faaliliuga se suiga laitiiti o faaupuga i se tasi o tatalo o le faamanatuga. Sa latou fogaina atu foi o loo maua le fusitolu ua faaliliuina i le gagana Kalaotia i luga o le initoneti. O lomiga ua lolomiina o le fusitolu i le gagana Kalaotia, Rusia, ma Iselani sa faavanoaina atu foi lata mai nei.

Fesoasoaniga mo aiga o loo fetaiai ma le tosina atu i le itupa e tasi. Ina ia fesoasoani i tagata e tali atu ma le faautauta ma le totoa pe a latou fetaiai ma le tosina atu i le itupa e tasi i o latou

lava aiga, ma isi tagata o le Ekalesia, po o isi nofoaga, o punaoa e aofia ai le saite fou mormonandgay.lds.org ma le Autu o le Talalelei ua faafouina i le tosina atu i le itupa e tasi (i le faaPertenania), e aofia ai ma fesili e fesiligia soo ma aoaoga a le Ekalesia.

Ua Faafouina Polokalama o le Potutusi o le Talalelei (Gospel Library App) O le polokalama o loo faaaogaina e tagata i le lalolagi atoa e suesue ai i tusitusiga paia, saunoaga o konafesi, ma isi anomea, na i ai se faafouga tele talu ai nei mo le iOS ma le Android. I le lomiga e 4, o meafaigaluega mo le suesueina ua sili atu ona manino, ua sili atu ona ogatusa ia vaega ma faatinoga, ma ua maua ia vitio fou o aoaoga. Talu ai ua mafai nei ona tusi faamatalaga o anotusi uma, ua mafai ona e faamamafa atu, faaopoopo ni manatu faaalia, fesootai, faailoga, ma faatulaga ia anotusi uma i ni api. Ua mafai ona e tusia faamatalaga o vitio, ulutala o mataupu o le mau ma fesoasoani i suesuega, lisi i tusi lesona eseese, viiga ma pese o le Peraimeri, ma le tele o isi mea.

Ua Faafouina le Polokalama o Meafaigaluega a le AAG O le lomiga 3.2.0 o le polokalama feaveai o Meafaigaluega a le AAG ua faigofie ai ona auai atu i le malumalu. O vaega faaopoopo ua faatagaina ai tagata ina ia vaai i lo latou malumalu ua atofaina, sue le malumalu aupito lata ane e lima, faafesootai se malumalu po o le iloa po o le a le taimi ua fuafuaina e tapuni ai, ma ia faamnatu mai ao lei faamutaina le aoga o a latou pepa faataga. ■

Aoao Atu i le Ala a le Faaola

Tatou te mananao uma e aoao atu e pei ona aoao mai lesu,” na saunoa ai Elder Jeffrey R. Holland o le Korama a Aposetolo e Toasefululu i se faasalalauga i le lalolagi atoa mo faiaoga i le aso 5 o Novema, 2016. “O ana faatonuga sa faigofie ma tuusao ma mamaana.”

Na saunoa mai Elder Holland o le punaoa o le, Aoao Atu i le Ala a le Faaola e fesoasoani e faaleleia ai aoaoga i totolu o le Ekalesia. E faapena foi fonotaga a aufono a faiaoga ma aoaoga faamasani mo faiaoga fou, lea na talanoaina i le taimi o le faasalalauga. O loo maua le faasalalauga i gagana e 10 i le teach.lds.org, faatasi ai ma ni vitio eseese ma isi anomea e faaoga e faamalolosia ai aoaoga. ■



OLE AIGA

O SE FOLAFOLAGA I LE LALOLAGI

O LE AU PERESITENE SILI MA LE AUFONO A APOSETOLO E TOASEFULULUA
O LE EKALESIA A IESU KERISO O LE AU PAIA O ASO E GATA AI

OI MATOU, O LE AU PERESITENE SILI ma le Aufono a Aposetolo e Toasefululua O Le Eklesia a Iesu Keriso o le Au Paia o Aso e Gata Ai, matou te ta'utino atu ma le faamaoni, o le faaipoipoga i le va o se alii ma se tamaitai, ua faauuina e le Atua, ma o le aiga o le totongalemu lea o le fuafuaga a Lē Fofoa, mo le taunuuga e faavavau o Lana fanau.

OTAGATA UMA—tane ma le fafine—ua foaoaina i le faatusa o le Atua. O i latou taitoatasi o se atalii po o se afafine agaga faapelepele a ni matua faalelagi, ma, o lea ua tofu ai ma se natura paia ma se taunuuga. O le tulaga tane po o le fafine [o le tagata] o se vaega taua lea o le mua'i olaga, olaga faitino, ma le faasinomaga e faavavau ma le faamoemoega.

ILE MUAI OLAGA, sa iloa ma tapua'i atalii ma afafine agaga i le Atua o lo latou Tama e Faavavau ma sa [latou] talia Lana fuafuaga e mafai ai e Lana fanau ona maua se tino faaletino ma maua le tomai faalelalagi latou te maua ai le atoatoaga ma iloa tino ai lo latou taunuuga paia o ni suli o le ola e faavavau. O le fuafuaga paia o le fafia, ua mafai ai ona faaaaua fegalegaleaiga faaleaiga i tala atu o le tuugamau. Ua mafai i sauniga paia ma feagaiga ua maua i malumalu paia ona toe foi atu ai tagata taitoatasi i le afioaga o le Atua ma toe faatasia ai aiga e faavavau.

OLE ULUAI POLOAIGA na tuuina e le Atua ia Atamu ma Eva, e faatatau i lo la agavaa mo le tulaga faamātua, o se tane ma se ava. Matou te ta'utino atu o le poloaga a le Atua i Lana fanau ia fanafanau ma ululuola ai le lalolagi, ua faamalosia ma faatumauina. Matou te toe ta'utino atu foi ua poloi mai le Atua, o mana paia o le foaoaina o fanau, ua na o le va lava o le alii ma le tamaitai ua faaipoipoina faaletulafono, o se tane ma le ava, e tatau ona faaaogaina ai.

MATOU TE TA'UTINO ATU o le ala ua foaoaina ai le ola faitino, ua faatuina i le finagalo paia. Matou te faamaonia le paia o le ola ma lona taua i le fuafuaga e faavavau a le Atua.

OLE TANE MA LE AVA ua i ai se tiutetauave paia e alofa ma tausi e le tasi le isi ma a la fanau. "O fanau o le tofi lea mai

le Alii" (Salamo 127:3). Ua i ai i matua se tiute paia e tausia a latou fanau i le alofa ma le amiontu, ia tuuina atu i ai mea e manaomia faaletino ma le faaleagaga, ma ia aoao i latou e alolofa ma feauaunaa'i, ia tausia poloaiga a le Atua ma avea ma tagatanuu usiusitai i tulafono i soo se mea latou te nonofo ai. O tane ma ava—tina ma tamā—o le a latou tali atu i le Atua mo le faataunuina o nei mea e ao ona faia.

OLE AIGA ua faauuina e le Atua. O le faaipoipoga i le va o le alii ma le tamaitai e taua i Lana fuafuaga e faavavau. E tatau ona fanauina fanau i totolu o feagaiga o le faaipoipoga, ma ia tausia e se tamā ma se tina o ē ua faamamaluina ma le faamaoni atoatoa feagaiga faaleulugalii. E maua le fiafia i le olaga faaleaiga pe a faavae i aoaoga a le Alii o Iesu Keriso. O faaipoipoga ma aiga manuia, e faavae ma tumau i mataupu faavae o le faatuatua, tatalo, salamo, faamagaloga, faaaloalo, alofa, agalelei, galuega, ma gaoioiga faafafia tuufaatasi. I le fuafuaga paia, e tatau ona pulefaamalumalu tamā i o latou aiga i le alofa ma le amiontu ma o i latou e tuuina atu mea e manaomia o le olaga ma le puipuiga mo o latou aiga. O le uluai matafaioi a tina o le faafaleleina lea o a latou fanau. O nei matafaioi paia, e ao i tamā ma tina ona fesoasoani le tasi i le isi o se paaga tutusa. O mea e faletonu, oti, po o nisi mea e tula'i mai, e alagatatau ai ona fetuutuunai tagata taitoatasi. E tatau i aiga lautele ona tuuina atu le lagolago pe a manaomia.

MATOU TE LAPATA'I ATU o tagata taitoatasi o ē ua solia feagai-ga o le ola mama, o ē faasaunoa i taitoalua po o fanau, o ē ua faatalalē i le faataunuina o tiutetauave faaleaiga, o le a i ai se aso tou te tutū atu ai e tali atu i luma o le Atua. E le gata i lea, matou te lapata'i atu foi, o le faamalepeina o le aiga o le a aumai ai i tagata taitoatasi, alaalafaga, ma malo, faafanoga ia na ulua'i ta'u mai e perofeta anamua ma aso nei.

MATOU TE VALAAU ATU i tamalii ma failauga ma taitai o malo i soo se mea ina ia faalauiloa atu na fua faatatau ua fuafuaina ina ia faatumauina ma faamalosia le aiga o se iunite faavae o malo.

*Sa fofogaina lenei folafolaga e le Susuga a Peresitene Gordon B. Hinckley,
o se vaega o lana savali i le Sauniga Aoao a le Aualofa sa faia i le aso 23 o Setema, 1995 i le Aai o Sate Leki, Iuta.*



"O loo tatou ola i se taimi o faafitauli ma le amioleaga tele. O le a le mea o le a puipuia i tatou mai le agasala ma le leaga ua matua salalau solo i le lalolagi i nei aso?" sa fesili ai Peresitene Thomas S. Monson i le taimi o le konafesi aoao faaletausaga lona 187 a le Eklesia. "Ou te faamausali atu o se molimau malosi e uiga i lo tatou Faaola, o Iesu Keriso, ma Lana talalelei o le a fesoasoani e taitai i tatou i le saogalemu. . . . Ou te augani atu ia i tatou uma ia suesue ma le agaga tatalo ma mafaufau loloto i le Tusi a Mamona i aso taitasi. A tatou faia lea mea, o le a tatou i ai i se tulaga e lagona ai le siufogofa o le Agaga, e tetee atu ai i faaosoosoga, e faatoilalo ai le masalosalo ma le fefe, ma maua ai le fesoasoaniga a le lagi i o tatou olaga."